

三叉 卷二 至卷三〇(魏書三)

宋 晉 裴松之 壽 注 撰

華 書 局

中

王衞二劉傅傳第二十一

長史。進以謙名公之胄,欲與爲婚,見其二子,使擇焉。謙弗許。以疾免,卒于家。 王粲字仲宣,山陽高平人也。曾祖父壟,祖父暢,皆爲漢三公。〔〕父謙,爲大將軍何進

[1] 張璠漢紀曰: [龔字伯宗,有高名於天下。順帝時為太尉。初,山陽太守薛勤喪妻不哭,將殯,臨之曰:「幸不為夭, 及。會連有災異,而言事者皆言三公非其人,宜因其變,以暢、膺代之,則禎祥必至。由是宦豎深怨之,及膺誅死 復何恨哉?」及選妻卒,龔與諸子並杖行服,時人或兩譏焉。暢字叔茂,名在八俊。靈帝時爲司空,以水災免, 而字鷹亦兔歸故郡,二人以直道不容當時。天下以暢、膺爲高士,諸危言危行之徒皆推宗之,願涉其流,惟恐不 而暢遂廢,終于家。

巷,賓客盈坐。 聞髮在門,倒屣迎之。 燦至,年旣幼弱,容狀短小,一坐盡驚。 邕曰:「此王 |公孫也,有異才,吾不如也。 吾家書籍文章,盡當與之。」 年十七, 司徒辟, 詔除黃門侍郎, 獻帝西遷,粲徙長安,左中郎將蔡邕見而奇之。時邕才學顯著,貴重朝廷,常車騎塡

魏 書 王衞二劉傑傳第二十一

變, 勸表子踪,令歸太祖。〔三〕太祖辟爲丞相掾, 明公定冀州之日,下車卽繕其甲卒,收其豪傑而用之,以橫行天下;及平江、漢,引其賢儁 以西京擾亂 今袁紹起河北,仗大衆,志兼天下,然好賢而不能用,故奇士去之。 而置之列位,使海內回心,望風而願治,文武並用,英雄畢力,此三王之舉也。」後遷軍謀祭 自以爲西伯可規。 魏國旣建,拜侍中。 ,皆不就。 乃之荆州依劉表。 士之避亂荆州者,皆海內之儁傑也; 表不知所任,故國危而無輔。 博物多識,問無不對。 表以粲貌寢而體弱通悅,不甚重也。〔〕表卒。 賜爵關內侯。 時舊儀廢弛,興造制度,粲恆典之。〔三〕 太祖置酒漢濱,粲奉觴賀曰:「方 劉表雍容荆楚,坐觀時

- (一) 臣松之曰:貌寢,謂貌負其實也。通俛者,簡易也。
- (三)文土傳載解說除曰:「僕有愚計、願進之於將軍,可乎?」除曰:「吾所願聞也。」解曰:「天下大亂、豪傑並 垂之後嗣,此萬全之策也。 日之事,去就可知也。 出世,推袁氏於官渡,驅孫權於江外,逐劉備於隴右,破烏丸於白登,其餘梟夷蕩定者,往往如神, 者,則恆受其福。今將軍自度,何如曹公邪?」踪不能對。疑復曰:「如髮所聞,曹公故人傑也。雄略冠時,智謀 倉卒之際, 疆弱未分, 故人各各有心耳。 將軍能聽發計,卷甲倒戈,應天順命,以歸曹公,曹公必重德將軍。 當此之時,家家欲爲帝王,人人欲爲公侯。觀古今之成敗, **|** 琮納其言。 保己全宗, 不可勝計。 能先見事 長享福祚, 起, 今 在

年方入蜀,備身未嘗涉於關、隴。

臣松之案:孫權自此以前,倘與中國和同,未嘗交兵,何云「驅權於江外」乎。魏武以十三年征荆州,

而於征荆州之年,便云逐備於隴右,既已乖錯;又白登在平城,亦魏武所不經,

劉備卻後數

北征烏丸,與白登永不相豫。 以此知張騭假僞之辭,而不覺其虛之自露也。凡隱虛僞妄作,不可覆疏, 如此類

者,不可勝紀。

(三)摯處決疑要注曰:漢末喪亂,絕無玉珮。魏侍中王疑識舊珮,始復作之。今之玉珮,受法於疑也。

年,從征吳。二十二年春,道病卒,時年四十一。 燦二子,爲魏諷所引,誅。後絕。 (三) 誤一道。其彊記默識如此。性善算,作算術,略盡其理。善屬文,舉筆便成,無所改定,時 人常以爲宿構;然正復精意覃思,亦不能加也。〔〕著詩、賦、論、議垂六十篇。 建安二十一 一字。觀人圍棊,局壤,粲爲覆之。棊者不信,以帊蓋局,使更以他局爲之。 初,粲與人共行,讀道邊碑,人問曰:「卿能闇誦乎?」 曰:「能。」 因使背而誦之,不失 用相比校,不

(三)文章志曰:太祖時征漢中,聞粲子死,歎曰:「孤若在,不使仲宣無後。」

留阮瑀字元瑜、汝南應瑒字德璉、瑒,音徒哽反,一音暢。東平劉楨字公幹並見友善。 始文帝爲五官將,及平原侯植皆好文學。 粲與北海徐幹字偉長、廣陵陳琳字孔璋、陳

幹爲司空軍謀祭酒掾屬,五官將文學。〔〕〕

(一) 先賢行狀曰:幹淸玄體道,六行脩備,聰識洽聞,操翰成章,輕官忽祿,不耽世榮。 建安中、太祖特加旌命、以疾休

息。後除上艾長,又以疾不行。

魏書 王衞二劉傅傳第二十一

於他。大兵合聚,强者爲雄,所謂倒持干戈,授人以柄;功必不成,祇爲亂階。」進不納其 於鼓洪爐以燎毛髮。但當速發雷霆,行權立斷,違經合道,天人順之;而反釋其利器,更徵 國之大事,其可以詐立乎?今將軍總皇威,握兵要,龍驤虎步,高下在心;以此行事,無異 移書,但可罪狀孤而已,惡惡止其身,何乃上及父祖邪?」琳謝罪,太祖愛其才而不咎。 劫恐太后。 言,竟以取禍。琳避難冀州,袁紹使典文章。袁氏敗,琳歸太祖。 琳 前爲何進主簿。 琳諫進曰:「易稱『卽鹿無虞』。, 諺有『掩目捕雀』。 進欲誅諸宦官,太后不聽,進乃召四方猛將,並使引兵向京城,欲以 夫微物尚不可欺以得志,況 太祖謂曰:「卿昔爲本初

軍謀祭酒,管記室,〔〕軍國書檄,多琳、瑪所作也。〔三〕琳徙門下督,瑪爲倉曹掾屬。 瑪少受學於蔡邕。 建安中都護曹洪欲使掌書記,瑪終不爲屈。 太祖使人焚山,得瑀,送至,召入。 太祖並以琳、瑀爲 太祖 時征長

運。靑蓋巡九州,在東西人怨。 安,大延賓客,怒瑀不與語,使就技人列。 士爲知己死,女爲悅者玩。 **踽善解音,能鼓琴,遂撫弦而歌,因造歌曲曰:「奕奕天門開,** 恩義肯與暢,他人焉能亂?」爲曲旣捷, 音聲殊妙, 大魏 應期

臣松之案魚氏典略、摯虞文章志並云琦建安初辭疾避役,不爲曹洪屈。 當時冠坐,太祖大悅 得太祖召, 即投杖而起。 不得有逃入山

中,焚之乃出之事也。

叉典略載太祖初征荆州,使瑀作書與劉備,及征馬超,又使瑀作書與韓遂,此二書今具存。至長安之前,遂等破

|公,而云||瑪默舞辭稱「|大魏應期運」,愈知其妄。又其辭云「他人焉能亂」,了不成語。||瑪之吐屬,必不如 走,太祖始以十六年得入關耳。而張騰云初得萬時太祖在長安,此又乖戾。瑀以十七年卒,太祖十八年策爲魏

(三) 典略曰:琳作諸書及檄,草成呈太祖。太祖先苦頭風,是日疾發,臥讀琳所作,翕然而起曰:「出愈我病。」數加厚 賜。太祖嘗使瑀作書與韓遂,時太祖適近出,瑀隨從,因於馬上具草,書成呈之。太祖學筆欲有所定,而竟不能

瑒、槙各被太祖辟,爲丞相掾屬。 場轉爲平原侯庶子,後爲五官將文學。(1) 慎以不敬

被刑,刑竟署吏。〔三〕咸著文賦數十篇。

增損

(一) 華嶠漢書曰:豫祖奉,字世叔。才敏善諷誦,故世稱「應世叔讀書,五行俱下」。 著後序十餘篇, | 励記之。 續漢書曰:劭又著中漢輯敍、漢官儀及禮儀故事,凡十一種,百三十六卷。朝廷制度,百官儀式,所以不亡者, 中,至司隸校尉。子劭字仲遠,亦博學多識,尤好事。諸所撰述風俗通等,凡百餘篇,辭雖不典,世服其博聞。 官至泰山太守。劭弟珣,字季瑜,司空掾,即赐之父。 爲世儒者。 延熹 由

(三)文士傳曰:賴父名梁,字曼山,一名恭。少有清才,以文學見貴,終於野王令。

登窈窕之首;雕貂之尾,綴侍臣之幘:此四寶者,伏朽石之下,潛汙泥之中,而揚光千載之上,發彩疇昔之外,亦 禾始熟而農夫先嘗其粒。 皆未能初自接於至尊也。 典略曰:文帝嘗賜楨廓落帶,其後師死,欲借取以爲像,因書嗍楨云:「夫物因人爲貴。故在賤者之手,不御至尊 今雖取之,勿嫌其不反也。」慎答曰:「慎聞荆山之璞,曜元后之寶;隨侯之珠,燭衆士之好;南垠之金, 夫尊者所服,卑者所脩也;貴者所御,賤者所先也。故夏屋初成而大匠先立其下,嘉 恨楨所帶,無他妙飾,若實殊異,倘可納也。」 槙辭旨巧妙皆如是, 由是特爲諸公子所

親愛。其後太子嘗請諸文學,酒酣坐歡,命夫人甄氏出拜。坐中衆人咸伏,而慎獨平視。太旭聞之,乃收慎,減

死翰作

難遇,傷門人之莫逮也。 諸子但爲未及古人,自一時之儁也。」〔1〕 不起其文;至於所善,古人無以遠過也。昔伯牙絕絃於鍾期,仲尼覆醢于子路,痛知音之 獨懷文抱質,恬淡寡欲,有箕山之志,可謂彬彬君子矣。 著中論二十餘篇,辭義典雅,足傳 多離其災,徐、陳、應、劉,一時俱逝。觀古今文人,類不護細行,鮮能以名節自立。而偉長 瑀以十七年卒。 幹、琳、瑒、楨二十二年卒。 文帝書與元城令吳質曰:「昔年疾疫,親故 公幹有逸氣,但未資耳。元瑜書記翩翩,致足樂也。仲宣獨自善於辭賦,惜其體弱 德璉常斐然有述作意,其才學足以著書,美志不遂,良可痛惜!孔璋章表殊健,微爲

(二)典論曰:今之文人,魯國孔融、廣陵陳琳、山陽王粲、北海徐幹、陳留阮瑀、汝南應瑒、東平劉楨,斯七子者,於學無 傷也。應瑒和而不壯;劉楨壯而不密。孔融體氣高妙,有過人者,然不能持論,理不勝辭,至于雜以嘲戲;及其 征、登樓、槐賦、征思,幹之玄猨、漏巵、圓扇、橘賦,雖脹、歑不過也,然於他文未能稱是。琳、瑀之章表書記,今之 所遺,於辭無所假,咸自以騁騏驥於千里,仰齊足而並馳。一粲長於辭賦。一幹時有逸氣,然非一疑匹也。 如粲之初

荀緯等,亦有文采,而不在此七人之例。(2) 自潁川邯鄲淳、〔〕繁欽、繁,晉婆。〔三〕陳留路粹、〔三〕沛國丁儀、丁廙、弘農楊脩、河內

所善,揚、班之儔也

|魏略曰:淳一名竺,字子叔。博學有才章,又善蒼、雅、蟲、篆、許氏字指。 之「天人」。而于時世子未立。太祖俄有意於植,而淳屢稱植材。 說混元造化之端,品物區別之意,然後論義皇以來賢聖名臣烈士優劣之差, 袒,胡舞五椎鍛,跳丸擊劍,誦俳優小說數千言訖,謂淳曰:「邯鄲生何如邪?」 求淳,太祖遣淳詣植。 先後,又論用武行兵倚伏之勢。乃命廚宰,酒炙交至,坐席默然,無與伉者。 旭 素聞其名,召與相見,甚敬異之。時五官將博延英儒,亦宿聞淳名,因啓淳欲使在文學官屬中。 淳作投壺賦千餘言奏之,文帝以爲工,賜帛千匹。 植初得淳甚喜,延入坐,不先與談。 時天暑熱,植因呼常從取水自澡訖, 由是五官將頗不悅。及黃初初,以淳爲博士給 初平時,從三輔客荆州。 及暮,淳歸,對其所知歎植之材, 次頭古今文章賦誄及當官政事宜所 於是乃更著衣幘,整儀容,與淳評 傅粉。 會臨菑侯植亦 荆州內附,太 遂科頭拍

- (三)典略曰 巧麗。 :一欽字休伯,以文才機辯,少得名於汝、潁。 爲丞相主簿。 建安二十三年卒。 欽既長於書記,又善爲詩賦。 其所與太子書,記喉轉意, 率皆
- (三)典略曰: 也。 位,特用其子爲長史。 不死也。」 叉云:「融爲九列,不遵朝儀,秃巾微行,唐突宮掖。 略言:「融昔在北海,見王室不寧,招合徒衆,欲圖不軌,言『我大聖之後也,而滅於宋。 武,出爲揚州刺史。粹後爲軍謀祭酒,與陳琳、阮瑀等典記室。及孔融有過,太祖使粹爲奏,承指數致融罪,其大 至十九年,粹轉爲祕書令,從大軍至漢中,坐違禁賤請驢伏法。太子素與粹善,聞其死,爲之歎惜。 融答曰 『顔淵復 生。」 凡說顧諸如此輩,辭語甚多。 又與白衣禰衡言論放蕩,衡與融更相贊揚。 建安初,以高才與京兆嚴像擢拜尚書郎。 融誅之後, 人觀粹所作, 有天下者何必卯金刀』?」 無不嘉其才 衡謂融曰:『仲尼 像以兼有文 而畏其筆

魏

王衞二劉傅傳第二十一

於肥蠶,休伯都無格檢,冗瑜病於體弱,孔璋實自麤疏,文蔚性頗忿鷙,如是彼爲,非徒以脂燭自煎糜也, 旨,亦何昔不若哉?其所以不論者,時世異耳。余又竊怪其不甚見用,以問大鴻臚卿韋仲將。 魚豢曰·專省往者,魯連、鄒陽之徒,援譬引類,以解締結,誠彼時文辯之儁也。 今覽三、繁、阮、陳、路諸人前後文 仲將云:「仲宣傷 其不高

|儀、奧、脩事,並在陳思王傳。 荷勖文章敍錄曰:緯字公高。 至散騎常侍、越騎校尉。年四十二,黃初四年卒。 少喜文學。建安中,召署軍謀掾、魏太子庶子,稍遷

然君子不賣備于一人,譬之朱漆,雖無楨幹,其爲光澤亦壯觀也。」

蹈,蓋有由矣。

場弟璩,璩子貞,咸以文章顯。璩官至侍中。貞咸熙中參相國軍事。[1]

[一] 文章敍錄曰:據字休璉,博學好屬文,善爲書記。文、明帝世,歷官散騎常侍。 顯位。 軍、江州刺史。 禮,事未施行。 贈衞尉。 曹爽秉政,多違法度,跋爲詩以諷焉。其言雖頗諧合,多切時要,世共傳之。 晉武帝爲撫軍大將軍,以貞參軍事。晉室踐阼,遷太子中庶子、散騎常侍。又以儒學與太尉荀顗撰定新 貞字吉甫,少以才聞,能談論。正始中,夏侯玄盛有名勢,貞嘗在玄坐作五言詩,玄嘉玩之。 泰始五年卒。貞弟純。純子紹,永嘉中爲黃門侍郎,爲司馬越所殺。純弟秀。秀子詹,鎭南大將 復爲侍中,典著作。 齊王即位,稍遷侍中、大將軍長史。 嘉平四年卒,追 舉高第,歷

瑪子籍,才藻豔逸,而倜儻放蕩,行己寡欲,以莊周爲模則。 官至步兵校尉。 [1]

(二)籍字嗣宗。 相見,終日不得與言,昶歎賞之,自以不能測也。太尉蔣濟聞而辟之,後爲尚書郎、曹爽參軍,以疾歸田里。 魏氏春秋曰:贈曠達不羈,不拘禮俗。性至孝,居喪雖不率常檢,而毀幾至滅性。兗州刺史王昶請與 巌

終。」又歎曰:「天地解兮六合開,星辰隕兮日月頹,我騰而上將何懷?」觸口不論人過,而自然高邁, 韻響亮,蘇門生逌爾而笑。 籍既降,蘇門生亦嘯,若鸞鳳之音焉。 至是,籍乃假蘇門先生之論以寄所懷。 實數斛、臼杵而已。籍從之,與談太古無爲之道,及論五帝三王之義,蘇門生蕭然曾不經聽。籍乃對之長嘯,清 成名乎!」時經意獨駕,不由徑路,車迹所窮,輒慟哭而反。籍少時嘗遊蘇門山,蘇門山有隱者,莫知名姓,有竹 廚多美酒,營人善釀酒,求爲校尉,遂縱酒昏酣,遺落世事。 嘗登廣武,觀楚、漢戰處,乃歎曰:「時無英才,使豎子 餘,爽誅,太傅及大將軍乃以爲從事中郎。後朝論以其名高,欲顯崇之,籍以世多故,祿仕而已,聞步兵校尉缺. 曰:「日沒不周西,月出丹淵中,陽精蔽不見,陰光代爲雄。亭亭在須臾,厭厭將復隆。 之士何曾等深所讎疾。 大將軍司馬文王常保持之,卒以壽終。子輝字長成。世語曰:渾以閒澹寡欲,知名京邑。 富貴俯仰問, 故爲禮法 貧賤 何必

時又有譙郡嵇康,文辭壯麗,好言老、莊,而尚奇任俠。至景元中,坐事誅。〔1〕

爲太子庶子。早卒。

[1] 康字叔夜。案然氏譜:康父昭,字子遠,督軍糧治書侍御史。兄喜,字公穆,晉揚州刺史、宗正。喜爲康傳曰:「家 於導養得理,以盡性命,若安期、彭祖之倫,可以善求而得也;著養生篇。 管寧,凡百一十有九人,蓋求之於宇宙之內,而發之乎千載之外者矣。故世人莫得而名焉。」 失其性,超然獨達,遂放世事,縱意於塵埃之表。撰錄上古以來聖賢、隱逸、遁心、遺名者,集爲傳贊,自混沌至于 世儒學,少有儁才,曠邁不羣,高亮任性,不脩名譽,寬簡有大量。學不師授,博洽多聞,長而好浅、莊之業,恬靜無 性好服食,嘗採御上藥。善屬文論,彈琴詠詩,自足于懷抱之中。以爲神仙者,稟之自然, 知自厚者所以喪其所生, 其求益者必 非積學所致。至

|處預晉書曰:|康家本姓|奚,會稽人。先自會稽遷于||譙之蛭縣,改爲嵇氏,取「稽」字之上,〔加〕「山」以爲姓,蓋以志

共本也。一曰庭有嵇山,家于其側,遂氏焉。

魏氏春秋曰:康寓居河內之山陽縣,與之游者,未嘗見其喜慍之色。 烈,有濟世志力。 平呂昭子巽及巽弟安親善。 時人莫不哀之。初,康採藥於汲郡共北山中,見隱者孫登。康欲與之言,登默然不對。踰時將去,康曰:「先生竟 避世。及山濤爲選曹郎,舉康自代,康答書拒絕,因自說不堪流俗,而非薄陽、武。大將軍聞而怒焉。 曰:「有所聞而來,有所見而去。」會深銜之。大將軍嘗欲辟康。康旣有絕世之言,又從子不善,避之河東,或云 能貴幸,乘肥衣輕,賓從如雲。 康方箕踞而鍛, 會至,不爲之禮。 康問 會曰:「何所聞而來?何所見而去?」 會 咸、琅邪王戎、沛人劉伶相與友善,遊於竹林,號爲七賢。鍾會爲大將軍所昵,聞康名而造之。 物,頻致怨憎。昔慚柳下,今愧孫登。 無言乎?」登乃曰:「子才多識寡,難乎免於今之世。」及遭呂安事,為詩自責曰:「欲寡其過,謗議沸騰。 鍾會勸大將軍因此除之,遂殺安及康。康臨刑自若,援琴而鼓,既而數曰:「雅脅於是絕矣! 會異経安妻徐氏,而誣安不孝,囚之。安引康爲證,康義不負心,保明其事, 內負宿心,外赮良朋。」康所著諸文論六七萬言,皆爲世所玩詠 與陳留阮籍、河內山濤、河南向秀、籍兄子 會,名公子, 初,康與東 安亦至 性不傷 以才

康別傳云:孫登謂康曰:「君性烈而才儁,其能免乎?」稱康臨終之言曰:「袁孝尼嘗從吾學廣陵散, 廣陵散於今絕矣!」 與盛所記不同 吾每固之不

叉晉陽秋云:康見孫登,登對之長嘯,踰時不言。 康辭還,曰:「先生竟無言乎?」 登曰:「惜哉!」 此二書皆孫盛

所述,而自爲殊異如此。

康集目錄曰:登字公和,不知何許人,無家屬,於汲縣北山土窟中得之。 夏則編草爲裳,冬則被髮自覆。 鼓琴,見者皆親樂之。 每所止家,輒給其衣服食飲,得無辭讓 好讀場

世語曰:田丘儉反,康有力,且欲起兵應之,以問山濤,濤曰:「不可。」 儉亦已敗。

之明審者也。案濤行狀,濤始以景元二年除吏部郎耳。景元與正元相較七八年,以濤行狀檢之, 安。蓋緣世語云康欲舉兵應田丘儉,故謂破儉便應殺康也。其實不然。山濤爲選官,欲舉康自代,康書告絕,事 司馬文王,故遂抵安罪。尋文王以景元四年鐘、鄧平蜀後,始授相國位;若巽爲相國掾時陷安,焉得以破田丘儉 又鍾會傳亦云會作司隸校尉時誅康;會作司隸,景元中也。 臣 松之案本傳云康以景元中坐事誅,而干寶、孫盛、習鑿齒諸書,皆云正元二年,司馬文王反自樂嘉,殺嵇康、呂 干寶云呂安兄巽善於鍾會,異爲相國掾, 如本傳爲審。 俱有寵於

年殺ि然、呂?此又干寶之疏謬,自相違伐也。

康子紹,字延祖,少知名。 山濤啓以爲祕書郎,稱紹平簡溫敏,有文思,又曉音,當成濟者。帝曰:「紹如此,

以爲丞,不足復爲郎也。」遂歷顯位。

官皆走,惟紹獨以身扞衞,遂死於帝側。 晉諸公贊曰:紹與山濤子簡、弘農楊準同好友善,而紹最有忠正之情。 故累見褒崇,追贈太尉,諡曰忠穆公。 以侍中從惠帝北伐成都王,王師敗績, 百

景初中,下邳桓威出自孤微,年十八而著渾輿經,依道以見意。從齊國門下書佐、司徒

署吏,後爲安成令。

吳質,濟陰人,以文才爲文帝所善,官至振威將軍,假節都督河北諸軍事,封列侯。〔1〕

·魏略曰:質字季重,以才學通博,爲五官將及諸侯所禮愛;質亦善處其兄弟之間,若前世樓君卿之游五侯矣。及 河北平定,(大將軍) [五官將]為世子,質與劉楨等並在坐席。 慎坐譴之際,質出爲朝歌長,後遷元城令。 其後大

魏書 王衞二劉傅傳第二十一

坑。 |仲尼覆臨於子路,愍知音之難遇,傷門人之莫逮也。諸子但爲未及古人,自一時之儁也,今之存者已不逮矣。後 翩翩,致足樂也。 邪!昔日游處,行則同興,止則接席,何嘗須臾相失!每至觴酌流行,絲竹並奏,酒酣耳熱,仰而賦詩。當此之時, 道相過。行矣,自愛!」二十三年,太子又與質書曰:「歲月易得,別來行復四年。 三年不見,東山猶歎其遠,況乃 書問致簡,益用增勞。 軍西征,太子南在孟津小城,與質書曰:「季重無恙!途路雖局,官守有限,願言之懷,良不可任。足下所治僻左, 淚,旣痛逝者,行自念也。 傳于後,此子爲不朽矣。 姓名,已爲鬼錄,追思昔游,猶在心目,而此諸子化爲糞壤,可復道哉!觀古今文人,類不護細行,鮮能以名節自 忽然不自知樂也。 過之,思何可支?雖書疏往反,未足解其勞結。昔年疾疫,親故多離其災,徐、陳、應、劉, 時駕而游,北遵河曲,從者鳴笳以啓路,文學託乘於後車,節同時異,物是人非,我勞如何!今遣騎到鄴,故使枉 分別,各在一方。 哀筝順耳。 生可畏,來者難誣,然吾與足下不及見也。行年已長大,所懷萬端,時有所慮,至乃通夕不瞑。何時復類昔日 輪徐動,賓從無聲,淸風夜起,悲笳微吟,樂往哀來,凄然傷懷。 而偉長獨懷文抱質,恬淡寡欲,有箕山之志,可謂彬彬君子矣。著中論二十餘篇,成一家之業,辭義典雅,足 馳騖北場,旅食南館,浮甘瓜於淸泉,沈朱李於寒水。皦日旣沒,繼以朗月,同乘並載,以游後園, 仲宣獨自善於辭賦,惜其體弱,不足起其文,至於所善,古人無以遠過也。 元瑜長逝,化爲異物,每一念至,何時可言?方今葢賓紀辰,景風扇物,天氣和暖, 衆果具繁。 謂百年己分,長共相保,何圖數年之間,零落略盡,言之傷心。 每念昔日南皮之游,誠不可忘。旣妙思六經,逍遙百氏,彈棊閒設,終以博弈, 德璉常斐然有述作意,才學足以著書,美志不遂,良可痛惜。 孔璋章表殊健,微爲繁富。 公幹有逸氣,但未適耳,至其五言詩,妙絕當時。 余顧而言,茲樂難常,足下之徒,咸以爲然。 頃撰其遺文,都爲一 閒 歷觀諸子之文, 一時俱逝, 昔伯牙絕絃於鍾期, 高談娛心, 元瑜書記 痛何可言 對之校 今果 觀其 輿

已成老翁,但未白頭耳。光武言『年已三十,在軍十年,所更非一』,吾德雖不及,年與之齊。 之文,無衆星之明,假日月之光,動見觀膽,何時易邪?恐永不復得爲昔日游也。 少壯眞當努力,年一過往,何可 以犬羊之質,服虎豹

攀接?古人思秉燭夜游,良有以也。頃何以自娛?頗復有所造述不?東望於邑,裁書敍心。」

攢也。 」 和中,入朝。 史。王顧質有望,故稱二人以慰之。始質爲單家,少游邀貴·戚間,蓋不與鄉里相沈浮。 臣松之以本傳雖略載太子此書,美辭多被删落,今故悉取魏略所述以備其文。太子卽王佐,又與質書曰:「南皮 云遠,今復相聞。」初,曹眞、曹休亦與質等俱在渤海游處,時休、眞亦以宗親並受爵封, 之游,存者三人,烈祖龍飛,或將或侯。 及魏有天下,文帝徵質,與車駕會洛陽。 質自以不爲本郡所饒,謂司徒董昭曰:「我欲溺鄉里耳。」昭曰:「君且止,我年八十,不能老爲君溺 今惟吾子,棲遲下仕,從我游處,獨不及門。 到,拜北中郎將,封列侯,使持節督幽、抖諸軍事, 瓶罄罍恥, 故雖已出官,本國猶不與 出爲列將, 能無懷愧。 治信都。 而質故為長 路不 太

吳質耳曰:「王當行,流涕可也。」及辭,世子泣而拜,王及左右咸歔欷,於是皆以檀辭多華,而誠心不及也。 世語曰:魏王嘗出征,世子及臨菑侯植並送路側。 植稱述功德,發言有章,左右屬目,王亦悅焉。 世子悵然自失。

几上肉,吳質吞爾不搖喉,咀爾不搖牙,何敢恃勢驕邪?」 鱳因起曰:「陛下使吾等來樂卿耳,乃至此邪! 上將軍服肥,卽自宜爲瘦。」 說肥瘦。 上將軍及特進以下皆會質所,大官給供具。 質別傳曰:帝嘗召質及曹休歡會,命郭后出見質等。 真負貴, 恥見戲, 怒謂質曰:「卿欲以部曲將遇我邪?」 眞愈憲,拔刀瞋目,言:「俳敢輕脫,吾斬爾。」 酒酣,質欲盡歡。 帝曰:「卿仰諦視之。」其至親如此。質黃初五年朝京師,詔 時上將軍曹眞性肥,中領軍朱蘇性瘦,質召優, 驃騎將軍曹洪、 遂駡坐。 輕車將軍王忠言:「將軍 質案劍曰:「曹子丹, 汝非屠 小必欲使 質顧 使

叱之曰:「朱鑠,敢壞坐!」 正元中乃改諡威侯。應字溫舒,晉尚書。應子康,字子仲,知名於時,亦至大位 之。而天下以司空不如長文,即學,言無實也。質其年夏卒。 質先以怙威肆行,諡曰醜侯。 質子應仍上書論枉,至 |懿,忠智至公,社稷之臣也。 太和四年,入爲侍中。時司空陳羣錄尙書事,帝初親萬機,質以輔弼大臣,安危之本,對帝盛稱「驃騎將軍司馬 何意中見棄,棄我歸黃壚。 熒熒廳所恃,淚下如連珠。 隨沒無所益,身死名不書。 「愴愴懷殷憂,殷憂不可居。徙倚不能坐,出入步踟蹰。念蒙聖主恩,榮爵與衆殊。 諸將軍皆還坐。鱳性急,愈恚,還拔劍斬地。遂便罷也。及文帝崩,質思慕作詩曰: 陳羣從容之士,非國相之才, 處重任而不親事。」帝甚納之。明日,有切詔以督責 慷慨自僶俛, 自謂永終身,志氣甫當舒。 庶幾烈丈夫。」

還民,關中諸將多引爲部曲,覬書與荀彧曰:「關中膏腴之地,頃遭荒亂,人民流入荆州者十 御史使益州,令璋下兵以綴表軍。至長安,道路不通,覬不得進,遂留鎭關中。 萬餘家,聞本土安寧,皆企望思歸。而歸者無以自業,諸將各競招懷,以爲部曲。 弱,不能與爭,兵家遂彊。一旦變動,必有後憂。夫鹽,國之大寶也,自亂來散放,宜如舊置 日夜競還。 使者監賣,以其直益市犂牛。若有歸民,以供給之。勤耕積粟,以豐殖關中。遠民聞之,必 太祖征袁紹,而劉表爲紹援,關中諸將又中立。益州牧劉璋與表有隙, **衞覬字伯儒,河東安邑人也。少夙成,以才學稱。** 叉使司隸校尉留治關中以爲之主,則諸將日削,官民日盛,此彊本弱敵之利 太祖辟爲司空掾屬,除茂陵令、尚書 時四方大有 郡縣貧

魏 書 王衞二劉傅傳第二十一

覬還,稍遷尙書。〔〕魏國旣建,拜侍中,與王粲並典制度。文帝卽王位,徙爲尙書。頃之, 也。」彧以白太祖。太祖從之,始遣謁者僕射監鹽官,司隸校尉治弘農。關中服從,乃白召

還漢朝爲侍郎,勸贊禪代之義,爲文誥之詔。文帝踐阼,復爲尙書,封陽吉亭侯。

魏書曰:初,漢朝遷移,臺閣舊事散亂。 不從覬議,由是益重覬。 祖。太祖初善之,而以繇自典其任,遂從繇議。 兵始進而關右大叛,太祖自親征,僅乃平之, 死者萬計。 若以兵入關中,當討張魯,魯在深山,道徑不通,彼必疑之;一相驚動,地險衆疆,殆難爲慮!」感以閱議呈太 皆豎夫屈起,無雄天下意,苟安樂目前而已。今國家厚加爵號,得其所志,非有大故,不憂爲變也。宜爲後圖 內未可信。司隸校尉鍾繇求以三千兵入關,外託討張魯,內以脅取質任。 太祖使荷彧問覬,覬以爲「西方諸將, 自都許之後,漸有綱紀,戰以古義多所正定。是時關西諸將,外雖懷附, 太祖悔

行。時百姓凋匱而役務方殷,覬上疏曰:「夫變情厲性,彊所不能,人臣言之旣不易,人主受 之則富貴顯榮,君惡之則貧賤死亡;順指者愛所由來,逆意者惡所從至也。故人臣皆爭順 之叉艱難。且人之所樂者富貴顯榮也,所惡者貧賤死亡也,然此四者,君上之所制也,君愛 所縣命,而選用者之所卑下。 王政之弊,未必不由此也。 請置律博士,轉相教授。」 事遂施 意微妙。百里長吏,皆宜知律。刑法者,國家之所貴重,而私議之所輕賤;獄吏者,百姓之 明帝即位,進封閺鄕侯,三百戶。團晉聞。閱奏曰:「九章之律,自古所傳,斷定刑罪,其

尙書右丞河南潘勖,○□黄初時,散騎常侍河內王象,亦與覬並以文章顯。○□ 覬薨,諡曰敬 子瓘嗣。 受詔典著作,又爲魏官儀,凡所撰述數十篇。好古文、鳥篆、隸草,無所不善。建安末, 瓘咸熙中爲鎭西將軍。[三]

下通明,每所非笑。漢武有求於露,而由尙見非,陛下無求於露而空設之;不益於好而糜

[一] 文章志曰: 勖字元茂, 初名芝, 改名勖, 後避諱。 或曰勖獻帝時爲尚書郎,遷右丞。 **兼通,明習舊事,敕并領本職,數加特賜。 二十年,遷東海相。** 未發,留拜尚書左丞。其年病卒,時年五十餘。人 韶以勖前在二千石曹, 才敏

公九錫策命,勖所作也。勖子滿,平原太守,亦以學行稱。

仕。尼嘗贈陸機詩,機答之,其四句曰:「猗歟潘生,世篤其藻,仰儀前文,丕隆祖考。」 位終太常。 滿子尼,字正叔。 尼別傳曰: 尼少有清才,文辭溫雅。 初應州辟,後以父老歸供養。居家十餘年, 晚乃出

尼從父岳,字安仁。岳別傳曰:岳美麥容,夙以才穎發名。其所著述,淸綺絕倫。 爲黃門侍郎,爲孫秀所殺。 尼

岳文翰,並見重於世。

尼從子滔,字湯仲。晉諸公贊"滔以博學才量爲名。 永嘉末,爲河南尹,遇害。

(三)王象事別見楊俊傳。

(三) 晉陽秋曰:[瓘字伯玉。 淸貞有名理,少爲傳嘏所知。 弱冠爲尚書郎,遂歷位內外,爲晉尚書令、司空、太保。

初輔政,為楚王瑋所害。

世語曰: 瓘與扶風內史燉煌索端,並善草書。 瓘子恆,字巨山,黃門侍郎。 恆子玠,字叔寶,有盛名,爲太子洗馬,

早卒。

皆以讒毀,爲表所誅。望之又以正諫不合,投傳告歸。虞謂望之曰:「趙殺鳴、犢,仲尼回 子,『黃中通理』,寧自知不?」廙兄望之,有名於世,荆州牧劉表辟爲從事。而其友二人, 劉廙字恭嗣,南陽安衆人也。年十歲,戲於講堂上,潁川司馬德操拊其頭曰:「孺子,孺

節,不敢脩草。必如嚴命,誠知勞謙之素,不貴殊異若彼之高,而惇白屋如斯之好,苟使郭 也!」望之不從,尋復見害。 廙懼,奔揚州,行之遂歸太祖。太祖辟爲丞相掾屬,轉五官將 隗不輕於燕,九九不忽於齊,樂毅自至,霸業以隆。〔三」虧匹夫之節,成巍巍之美,雖愚不敏, 文學。文帝器之,命廙通草書。廙答書曰:「初以尊卑有踰,禮之常分也。是以貪守區區之 輪。〔〕今兄旣不能法柳下惠和光同塵於內,則宜模范蠡遷化於外。坐而自絕於時,殆不可 何敢以辭?」魏國初建,爲黃門侍郎。

劉向新序曰:趙簡子欲專天下,謂其相曰:「趙有懷孽,晉有鐸鳴,魯有孔丘,吾殺三人者,天下可王也。」於是乃 爲之此乎?」於是遂回車不渡而還。 翔; 竭澤而漁,則龜龍不見。 政,及其得意也,殺之。黃龍不反于涸澤,鳳皇不離其罻羅。故刳胎焚林,則麒麟不臻;覆巢破卵, 夫!」子路趨而進曰:「敢問何謂也?」孔子曰:「夫懷摩、鐸鳴,晉國之賢大夫也,趙簡子未得意之時,須而後從 必流而殺之。」孔子至,使者致命,進胖牛之肉。孔子仰天而歎曰:「美哉水乎,洋洋乎,使丘不濟此水者,命也 而黃鐘應於內。夫物類之相感,精神之相應,若響之應聲,影之象形,故君子違傷其類者。今彼已殺吾類矣,何 召懷犨、鐸鳴而問政焉,已卽殺之。使使者聘孔子於魯,以胖牛肉迎於河上。使者謂船人曰:「孔子卽上船,中河 鳥獸之於不仁,猶知避之,況丘乎?故虎嘯而谷風起,龍興而景雲見,擊庭鐘於外, 則鳳皇不

(三) 奧別傳載奧道路爲牋謝劉表曰:「考知過蒙分遇榮授之顯,未有管、狐、桓、文之烈,孤德隕命,精誠不遂。 見禮在昔,旣無堂構昭前之績,中規不密,用墜禍辟。 斯乃明神弗祐,天降之災。 悔吝之負, 哀號靡及。 | 廙之愚 兄望之

淺,言行多違,懼有浸潤三至之閒。考別之愛已衰,望之之責猶存,必傷天慈旣往之分 門戶殪滅,取笑明哲。

也。據全楚之地,不能以成功者,未必不由此也。庚、叔迕武王以成名,丁公順高祖以受戮,二主之度遠也。若 是用迸竄,永涉川路,即日到廬江潯陽。 昔鍾儀有南音之操,椒學有班荆之思,雖遠猶邇,敢忘前施?」

不遠其度,惟褊心是從,難乎以容民畜衆矣。

戰國策曰:有以九九求見齊桓公,桓公不納。其人曰:「九九小術,而君納之,況大於九九者乎?」於是桓公設庭

之。 物,而聖賢引以自匡。臣才智閤淺,願自比於韋茲。昔樂毅能以弱燕破大齊,而不能以輕 臣,不當冀州之卒,權、備之籍,不比袁紹之業,然本初以亡,而二寇未捷,非闇弱於今而智 千載者,必以近察遠,智周於獨斷者,不恥於下問,亦欲博采必盡於衆也。且韋弦非能言之 無不破,彊無不服。今以海內之兵,百勝之威,而孫權負險於吳,劉備不賓於蜀。夫夷狄之 兵定卽墨者,夫自爲計者雖弱必固,欲自潰者雖彊必敗也。自殿下起軍以來,三十餘年,敵 卹民於內也。 武於昔也。 秦爲諸侯,所征必服,及棄天下,東向稱帝,匹夫大呼而社稷用隳。是力斃於外,而不 |太祖在長安,欲親征蜀, 廙上疏曰:「聖人不以智輕俗, 王者不以人廢言。 燎之禮而見之。 斯自爲計者,與欲自潰者異勢耳。故文王伐崇,三駕不下,歸而脩德,然後服 臣恐邊寇非六國之敵,而世不乏才,土崩之勢,此不可不察也。天下有重得, 居無幾,隰朋自遠而至,齊遂以霸。 。故能成功於

於父母,可以死效,難用筆陳。」曰奧著書數十篇,及與丁儀共論刑禮,皆傳於世。文帝即 問,(二) 徙署丞相倉曹屬。 運,揚湯止沸,使不燋爛;起烟於寒灰之上,生華於已枯之木。物不答施於天地,子不謝生 王位,爲侍中,賜爵關內侯。 魏諷反,庭弟偉爲諷所引,當相坐誅。太祖令曰:「叔向不坐弟虎,古之制也。」特原不 **廙上疏謝曰:「臣罪應傾宗,禍應覆族。遭乾坤之靈,値時來之** 黃初二年卒。〔三無子。帝以弟子阜嗣。〔四〕

- (1) 奧別傳曰:初, 奧弟偉與諷善, 奧戒之曰: 「夫交友之美, 在於得賢, 不可不詳。而世之交者, 不審擇人, 務合黨衆, 也。 違先聖人交友之義,此非厚已輔仁之謂也。吾觀|魏||諷,不脩德行,而專以鳩合爲務,華而不實, 此直攪世沽名者 卿其愼之,勿復與通。」偉不從,故及於難。
- 轉易,往來不已,送迎之煩,不可勝計。轉易之閒,輒有姦巧,旣於其事不省,而爲政者亦以其不得久安之故,知 者之不用意,蓋才匱使之然耳。況於長吏以下,羣職小任,能皆簡練備得其人也,其計莫如督之以法。不爾而數 況亂弊之後,百姓凋盡,士之存者蓋亦無幾。 股肱大職,及州郡督司,邊方重任,雖備其官,亦未得人也。 此非選 明賢者難得也。

無部司之監,姦譽妄毀,可得而盡。」事上,太祖甚善之。 及盜賊發興,民之亡叛者,爲得負之計。如此行之,則無能之吏,脩名無益;有能之人,無名無損。法之一行,雖 小久,足使自展。歲課之能,三年總計,乃加黜陟。課之皆當以事,不得依名。事者,皆以戶口率其墾田之多少, 屈而從人,於治雖失計,其聲譽必集也。長吏皆知黜陟之在於此也,亦何能不去本而就末哉?以爲長吏皆宜使 公也, 卹民也。 此三事者, 或州郡有所不便, 往來者有所不安。 而長吏執之不已, 於治雖得計, 其聲譽未爲美; 爲黜陟者,近頗以州郡之毀譽,聽往來之浮言耳。亦皆得其事實而課其能否也?長吏之所以爲佳者,奉法也,憂 惠益不得成於己,而苟且之可冤於患,皆將不念盡心於卹民,而夢想於聲譽,此非所以爲政之本意也。今之所以

(三) 虞別傳云"時年四十二。

(四) 案劉氏譜:"厚字伯陵,陳留太守。 厚子僑,字仲彥。

晉陽秋曰:喬有贊世志力。 惠帝末,爲豫州刺史。曆胃胤丕顯,貴盛至今。

不爲變〔異〕豫廢朝禮者,或災消異伏,或推術謬誤也。」或善其言。敕朝會如舊,日亦不 占水火,錯失天時。禮記日諸侯旅見天子,及門不得終禮者四,日蝕在一。然則聖人垂制, 在尙書令荀彧所,坐者數十人,或云當廢朝,或云宜卻會。 劭曰:「梓愼、裨竈,古之良史,猶 劉劭字孔才,廣平邯鄲人也。建安中,爲計吏,詣許。太史上言:「正旦當日蝕。」劭時

蝕 二

魏 書 王衞二劉傅傳第二十一

者?禮 晉永和 瘎 大日蝕,史官告譴,而無懼容,不脩豫防之禮,而廢消救之術,方大饗華夷,君臣相慶,豈是將處天災罪已之謂? 侯雖已入門而卒暴有之,則不得終禮。非爲先存其事,而徼倖史官推術錯謬,故不豫廢朝禮也。夫三辰有災,莫 且檢之事實,合朔之儀,至尊靜躬殿堂,不聽政事,冕服御坐門闥之制,與元會禮異。 合朔之禮,不輕於元會。元會有可卻之準,合朔無可廢之義。謂應依建元故事,卻元會。」浩從之,竟卻 <u> 庾車騎寫劉孔才所論以示八座。于時朝議有謂孔才所論爲不得禮議,荀令從之,是勝人之一失也。何</u> 云,諸侯族見天子,入門不得終禮而廢者四:太廟火,日蝕,后之喪,雨霑服失容。尋此四事之指,自謂諸 中,廷尉王彪之與揚州刺史殷浩書曰:「太史上元日合朔,談者或有疑,應卻會與不?昔建元元年,亦元 自不得兼行, 則當權其事 日

首,是淵先世之效忠也。又所聞虛實,未可審知。古者要荒未服,脩德而不征,重勞民也。 淵受孫權燕王之號,議者欲留淵計吏,遣兵討之。劭以爲「昔袁尙兄弟歸淵父康,康斬送其 都、浴都賦。時外興軍旅,內營宮室,劭作二賦,皆諷諫焉。 宜加寬貸,使有以自新。」後淵果斬送權使張彌等首。 励嘗作趙都賦,明帝美之,詔劭作許 拜騎都尉,與議郎庾嶷、荀詵等定科令,作新律十八篇,著律略論。 受詔集五經羣書,以類相從,作皇覽。明帝卽位,出爲陳留太守,敦崇敎化,百姓稱之。徵 御史大夫郗慮辟劭,會慮免,拜太子舍人,遷祕書郎。黃初中,爲尚書郎、散騎侍郎。 遷散騎常侍。時聞公孫

青龍中,吳圍合肥,時東方吏士皆分休,征東將軍滿龍表請中軍兵,并召休將士,須集

後,必震怖遁走,不戰自破賊矣。」帝從之。 兵比至合肥,賊果退還。 肥,疏其行隊,多其旌鼓,曜兵城下,引出賊後,擬其歸路,要其糧道。 兵,未有所失也。 擊之。問議以爲「賊衆新至,心專氣銳。」寵以少人自戰其地,若便進擊,不必能制。 以爲可先遣步兵五千,精騎三千,軍前發,揚聲進道,震曜形勢。 賊聞大軍來,騎斷其 騎到合 龍水待

奇其器量。以爲若此人者,宜輔翼機事,納謀幃幄,當與國道俱隆,非世俗所常有也。 固,文章之士愛其著論屬辭,制度之士貴其化略較要,策謀之士贊其明思通微,凡此諸論 下垂優游之聽,使劭承清閒之歡,得自盡於前,則德音上通,煇燿日新矣。」〔〕〕 皆取適己所長而舉其支流者也。臣數聽其淸談,覽其篤論,漸漬歷年,服膺彌久,實爲朝廷 所錯綜,源流弘遠,是以羣才大小,咸取所同而斟酌焉。 故性實之士服其平和良正,清靜之 人慕其玄虛退讓,文學之士嘉其推步詳密,法理之士明其分數精比,意思之士知其沈深篤 時詔書博求衆賢。散騎侍郎夏侯惠薦劭曰:「伏見常侍劉劭,深忠篤思,體周於數,凡

〔一〕臣松之以爲凡相稱薦,率多溢美之辭,能不違中者或寡矣。惠之稱劭云「玄虛退讓」及「明思通微」,近於過也。

典闕而未補,能否混而相蒙。陛下以上聖之宏略,愍王綱之弛頹,神慮內鑒,明詔外發。臣 奉恩曠然,得以啓矇,輒作都官考課七十二條,叉作說略一篇。臣學寡識淺,誠不足以宣暢 景初中,受詔作都官考課。勖上疏曰:「百官考課,王政之大較,然而歷代弗務,是以治

施行。 聖旨,著定典制。」又以爲宜制禮作樂,以移風俗,著樂論十四篇,事成未上。會明帝崩,不 正始中。 執經講學,賜爵關內侯。凡所撰述,法論、人物志之類百餘篇。 。卒,追贈光

祿勳。子琳嗣。

劭同時東海繆襲亦有才學,多所述敍,官至尙書、光祿勳。 [1]

[1] 先賢行狀曰: 繆斐字文雅。該覽經傳,事親色養。徵博士,六辟公府。 漢帝在長安,公卿博舉名儒, 時舉斐任侍

中,並無所就。即關父也。

文章志曰:襲字熙伯。辟御史大夫府,歷事魏四世。正始六年,年六十卒。子悅字孔懌,晉光祿大夫。襲孫紹

播、徵、胤等,並皆顯達。

襲友人山陽仲長統,漢末爲尚書郎,早卒。著昌言,詞佳可觀省。〔1〕

(一)襲撰統昌言表,稱統字公理,少好學,博涉書記,贍於文辭。年二十餘,游學青、徐、丼、冀之間,與交者多異之。 丼 州刺史高幹素貴有名,招致四方游士,多歸焉。統過幹,幹善待遇之,訪以世事。統謂幹曰:「君有雄志而無雄 才,好士而不能擇人,所以爲君深戒也。」一幹雅自多,不納統言。一統去之,無幾而斡敗。一片、真之士,以是識統。

大司農常林與統共在上黨,為臣道統性倜儻,敢直言,不矜小節,每列郡命召,輒稱疾不說。 元年卒,時年四十餘。

統每論說古今世俗行事,發憤歎息,

賴以爲論,名曰昌言,凡二十四篇 之狂。漢帝在許,尙書令荀彧領典樞機,好士愛奇,聞統名,啓召以爲尙書郎。後參太祖軍事, 默語無常,時人或謂 復還爲郞 延康

散騎常侍陳留蘇林、八八光祿大夫京兆韋誕、八八樂安太守譙國夏侯惠、八八陳郡太守任

- [一]魏略曰:林字孝友,博學,多通古今字指,凡諸書傳文閒危疑,林皆釋之。 中,為博士給事中。 文帝作典論所稱蘇林者是也。 以老歸第,國家每遣人就問之,數加賜遺。 建安中,爲五官將文學,甚見禮待。 年八十餘卒。 遺
- (三)文章敍錄曰:一誕字仲將,太僕端之子。有文才,善屬辭章。建安中,爲郡上計吏,特拜郎中,稍遷侍中中書監, |英。 盡黑。 體微瘦,崔氏甚得筆勢而結字小疏。 候所書,猶有髣髴。」 敬侯謂覬也。 其序篆書曰:「秦時李斯號爲工篆,諸山及銅人銘皆斯書也。 中,立三字石經,轉失淳法。因科斗之名,遂效其法。太康元年,汲縣民盜發魏襄王家,得策書十餘萬言。 謂之科斗書,漢世祕藏,希得見之。魏初傳古文者,出於邯鄲淳。敬侯寫淳尚書,後以示淳, 光祿大夫遜位,年七十五卒於家。 「漢興而有革書,不知作者姓名。至章帝時,齊相杜度號善作篇,後有崔瑗、崔寔亦皆稱工。杜氏結字甚安而書 中,魏氏實器銘題皆誕書云。 曹喜少異於斯而亦稱善。 用篆書,焚燒先典,而古文絕矣。 又有姜孟頌、梁孔達、田彦和及草仲將之徒,皆伯英弟子,有名於世,然殊不及文舒也。」 下筆必爲楷則,號『忽忽不暇草』,寸紙不見遺,至今世人尤寶之,草仲將謂之草聖。 叉曰:「師宜官爲大字,邯鄲淳爲小字。梁鵠謂淳得次仲法,然鵠之用筆盡其勢矣。」 其序草書曰 邯鄲淳師焉,略究其妙。 漢末又有蔡邕宋斯、喜之法,爲古今雜形,然精密簡理不如淳也。」 漢武帝時,魯恭王壞孔子宅,得尚書、春秋、論語、孝經, 初,邯鄲淳、衞覢及誕並善書,有名。 弘農張伯英者因而轉精其巧。凡家之衣帛,必書而後練之,臨池學書,池水 章誕師淳而不及也。 **凱孫恆撰四體書勢,** 太和中,誕爲武都太守, 時人已不復知有古文, 伯英弟文舒者, 而淳不別。 其序古文曰:「自秦 其序錄隸書,已 漢建初中,扶風 以能書留補侍 至正始 次|伯 以

(三)惠,淵子。事在淵傳。

魏 書 王衞二劉傅傳第二十一

元二年卒官。

(四)文章敍錄曰:該字公達。 疆志好學。年二十,上計掾,召爲郎中。著魏書。遷博士司徒右長史,復還入著作。 景

(至)文章敍錄曰:擊字德魯。初上笳賦,署司徒軍謀吏。 |衆藥,信來給一丸。」|檢答曰:「鳳鳥翔京邑,哀鳴有所思。才爲聖世出,德音何不怡!八子未遭遇,今者遭明時。 擊爲勝臣,呂望身操竿;夷吾困商販,甯戚對牛歎;食其處監門,淮陰飢不餐;買臣老負薪,妻畔呼不還, 胡康出壟畝,楊偉無根基,飛騰沖雲天,奮迅協光熙。 宦十年,位不增故官。才非八子倫,而與齊其患。 詩與儉,求仙人藥一丸,欲以感切儉求助也。 纖微疾,安用問良醫?聯翩輕栖集,還為燕雀嗤。 其詩曰:「騏驥馬不試,婆娑槽櫪間。 無知不在此,袁盎未有言。被此篤病久,榮衞動不安,聞有韓 韓衆藥雖良,或更不能治。 後舉孝廉、除郎中、轉補校書。擊與田丘儉鄉里相親, 駿驥骨法異,伯樂觀知之,但當養羽翮,鴻舉必有期。 悠悠千里情,薄言答嘉詩。 壯士志未伸,坎軻多辛酸。伊 信心感 體無 故爲

諸中,中質不在辭。」擊竟不得遷,卒於祕書。

<u>孋江何氏家傳曰:明帝時,有</u>譙人胡康,年十五,以異才見送,又陳損益,求試劇縣。 詔特引見。衆論翕然,號爲 神童。詔付祕書,使博覽典籍。帝以問祕書丞何禎:「康才何如?」,禛答曰:「康雖有才,性質不端,必有負敗。」

臣 松之案:魏朝自微而顯者,不聞胡康;疑是孟康。 康事見杜恕傳。 楊偉見曹爽傳。 後果以過見譴

名,(三)司空陳羣辟爲掾。時散騎常侍劉劭作考課法,事下三府。|嘏難劭論曰:「蓋聞帝制 傅嘏字蘭石,北地泥陽人,傅介子之後也。伯父巽,黃初中爲侍中尚書。〔〕 嘏弱冠知 爲敍,如此則殿最之課,未盡人才。述綜王度,敷贊國式,體深義廣,難得而詳也。」 本綱末舉而造制未呈,國略不崇而考課是先,懼不足以料賢愚之分,精幽明之理也。 務,不足垂後。夫建官均職,清理民物,所以立本也;循名考實,糾勵成規,所以治末也。 宜,以應政機。 逆,芟夷遺寇,旌旗卷舒,日不暇給。及經邦治戎,權法並用,百官羣司,軍國通任,隨時之 承秦、漢之烈,制度之流,靡所脩乐。自建安以來,至于青龍,神武撥亂,肇基皇祚,掃除凶 文,然其制度略以闕亡。禮之存者,惟有周典,外建侯伯,藩屛九服,內立列司,筦齊六職, 宏深,聖道奧遠,苟非其才,則道不虛行,神而明之,存乎其人。暨乎王略虧頹而曠載罔綴, **爱及京城,未有六鄕之舉,其選才之職,專任吏部。 案品狀則實才未必當,任薄伐則德行未** 王之擇才,必本行於州閭,講道於庠序,行具而謂之賢,道脩則謂之能。 土有恆貢,官有定則,百揆均任,四民殊業,故考績可理而黜陟易通也。 王拜受之,舉其賢者,出使長之,科其能者,入使治之,此先王收才之義也。方今九州之民, 六籍泯玷。 以古施今,事雜義殊,難得而通也。所以然者,制宜經遠,或不切近,法應時 何則?道弘致遠而衆才莫晞也。案問考課論,雖欲尋前代黜陟之 大魏繼百王之末, 鄉老獻賢能于王, 昔先

二次一次

傳子曰:是時何晏以材辯顯於貴戚之間,鄧颺好變通,合徒黨,醫聲名於閭閻,而夏侯玄以貴臣子少有重名,爲之

宗主,求交於假而不納也。假友人荀粲,有淸識遠心,然猶怪之。謂假曰:「夏侯泰初一時之傑,虛心交子,合則 好成,不合則怨至。二賢不睦,非國之利,此藺相如所以下遼頗也。」一概答之曰:「泰初志大其量,能合虛聲而無 同惡異,多言而妒前;多言多釁,妒前無親。以吾觀此三人者,皆敗德也。遠之猶恐禍及,況昵之乎?」 何平叔言遠而情近,好辯而無誠,所謂利立覆邦國之人也。鄧玄茂有爲而無終,外要名利,內無關鑰,貴

誅,爲河南尹,(1)遷尙書。 殿常以爲「秦始罷侯置守,設官分職,不與古同。 漢、魏因循,以 與嘏不平,因微事以免嘏官。起家拜滎陽太守,不行。太傅司馬宣王請爲從事中郎。 叔外靜而內銛巧,好利,不念務本。吾恐必先惑子兄弟,仁人將遠,而朝政廢矣。」晏等遂 歷代而不至於治者,蓋由是也。欲大改定官制,依古正本,今遇帝室多難,未能革易」。 至于今。然儒生學士,咸欲錯綜以三代之禮,禮弘致遠,不應時務,事與制違,名實未附,故 正始初,除尚書郎,遷黃門侍郎。時曹爽秉政,何晏爲吏部尚書,嘏謂爽弟巖曰:「何平 曹爽

[一] 姨子曰:河南尹內掌帝都,外統京畿,兼古六鄉六遂之士。其民異方雜居,多豪門大族,商賈胡貊,天下四(方) 隱其端迹,若不由己出。故當時無赫赫之名,吏民久而後安之。 教爲本,然持法有恆,簡而不可犯,見理識情,獄訟不加價楚而得其實。 不爲小惠,有所薦達及大有益於民事,皆 官掾功曹典選職,皆段其本國人,無用異邦人者,嘏各舉其良而對用之,官曹分職,而後以次考核之。 其治以德 會,利之所聚,而姦之所生。前尹司馬芝,舉其綱而太簡,次尹劉靜,綜其目而太密,後尹李勝,毀常法以收一時 脚立司馬氏之綱統,裁劉氏之網目以經緯之,李氏所毁以漸補之。 郡有七百吏, 半非舊也。 河南俗黨五

破

國,終禍

時論者議欲自伐吳、三征獻策各不同。

|姑蘇;齊閔兼土拓境,闢地千里,身蹈顚覆。 有始不必善終,古之明效也。

韶以訪問, 假對日:「昔大差陵齊勝晉,威行中

孫權

自

征南大將軍王昶、征東將

沉溺,略無

向

盛衆厲兵以震之,參惠倍賞以招之,多方廣似以疑之。由不虞之道,以閒其不戒;比及三年,左提右挈, 散瓦解,安受其弊,可坐算而得也。 僞,將焉所逃?夫以小敵大,則役煩力竭,以貧敵富,則斂重財匱。故『敵逸能勞之,飽能飢之』,此之謂也。然後 國,不可不察也。 積穀,土不運輸,六也;釁隙時聞,討襲速決,七也: 凡此七者,軍事之急務也。 犯,二也;招懷近路,降附日至,三也;羅落遠設,閒構不來,四也;賊退其守,羅落必淺,佃作易之,五也;坐食 完牢。可詔昶、遵等擇地居險,審所錯置,及令三方一時前守。奪其肥壤,使還耕堾土,一也;兵出民表,寇鈔不 軍無耳目,校察未詳,而舉大衆以臨巨險,此爲希幸徼功,先戰而後求勝,非全軍之長策也。唯有進軍大佃,最 鐲其弊,天去其疾,崩潰之應,不可卒待。 飾舟楫,羅船津要,堅城淸野,以防卒攻,横行之計,殆難必施。 之當機,則功成名立,苟不應節,必貽後患。 以武,誘間攜貳,待其崩壞;或欲進軍大佃,偪其項領,積穀觀覺,相時而動:凡此三者, 今權已死,託孤於諸葛恪。 不能以冤姑蘇之禍;齊閔辟土兼國,開地千里,不足以救顯覆之敗:有始不必善終,古事之明效也。 軍胡遵、鎭南將軍毌丘儉等表請征吳。 兼平荆州之後,志盈欲滿,罪戮忠良,誅及胤嗣,元凶已極。 夫屯壘相偪,形勢已交,智勇得陳,巧拙得用,策之而知得失之計,角之而知有餘不足, 若矯權苛暴,蠲其虐政,民免酷烈,偷安新惠,外內齊慮,有同舟之懼,雖不能終自保 昔漢氏歷世常惠匈奴,朝臣謀士早朝晏罷,介胄之將則陳征伐, 朝廷以三征計異,詔訪尚書傅嘏,嘏對曰:「昔夫差勝齊陵晉, 今邊壤之守,與賊相遠,賊設羅落,叉持重密,間諜不行,耳目無聞。夫 自治兵已來,出入三載,非掩襲之軍也。 相國宣文侯先識取亂侮亡之義,深建宏圖大舉之策。 賊之爲寇,幾六十年,君臣僞立,吉凶同患, 不據則賊擅便資,據之則利歸於 賊喪元帥,利存退守, 皆取賊之常計 **搢**納之徒咸 孫權自破蜀 威行中國, 也。 **虜之情** 若恪 若撰 然施 臨之

地,振 辱秦軍。 然之理,而行萬一不必全之路,誠愚臣之所慮也。 言和親,勇奮之士思展搏噬。 長策以禦之,虜之崩潰,必然之數。 今諸將有陳越江陵險,獨步虜庭,即亦向 故樊噲願以十萬之衆橫行匈奴,季布 故兵法曰:『屈人之兵,而非戰也;拔人之城,而非攻也。』 故謂大佃而偪之計最長。」 時之類也。 以陛下 面折其短。 聖德,輔相忠賢,法明士練, 時不從嘏言。其年十一月,詔昶 李信求以二十萬獨舉楚人, 錯計於全 若釋廟: 一勝之 而果 勝 必

漢書張湯傳 曰:湯始爲小更,乾沒,與長安富賈田甲、魚翁叔之屬交私。 服虔說曰:「乾沒, 射成敗也。」 如淳曰

征吳。

五年正月,諸葛恪拒戰,大破衆軍於東關

得利爲乾,失利爲沒。」

燥之乾。 臣松之以虔 蓋謂有所徼射,不計乾燥之與沈沒而爲之。 直以乾沒爲射成敗,而不說乾沒之義,於理猶爲未暢。 淳以得利爲乾,又不可了。 愚謂乾讀宜爲乾

鄉亭侯。 薨,時 其量,而勳業難爲也,可不愼哉!」 司馬文王徑還洛陽,文王遂以輔政。 王肅勸之。 嘏常論才性同異,鍾會集而論之。[二嘉平末,賜爵關內侯。 年四 正元二年春,毌丘儉、文欽作亂。 十七,追 景王遂行。〔三以嘏守尚書僕射,俱東。 贈太常,諡曰元侯。 嘏以 語在鍾會傳。至會由是有自矜 (3)子祗嗣。 功進封陽鄉侯,增邑六百戶,幷前千二百戶。 或以司 馬景王不宜自行,可遣太尉学往,惟 儉、欽破敗, 嘏有謀焉。 咸熙中開建五等, 高貴鄉公即尊位,進封武 色,嘏戒之曰:「子志大 以嘏著勳前朝,改封 及景王薨,嘏 뺂及 是歲 典

祗涇原子

£

- (一),鎮子曰: 嚴旣達治好正,而有清理識要,好論才性,原本精微,尠能及之。 虧 則爲識有所藏,難以言通;若皆知其不終,而情有彼此,是爲厚薄由于愛憎,奚豫於成敗哉?以愛憎爲厚薄,又 以利動取敗,禍自己出。 臣松之案:傅子前云嘏了夏侯之必敗,不與之交,而此云與鍾會善。愚以爲夏侯玄以名重致患,費由外至;鍾會 於雅體矣。 傳子此論,非所以益嘏也。 然則夏侯之危兆難覩,而鍾氏之敗形易照也。嘏若了夏侯之必危,而不見鍾會之將敗, 司隸校尉鍾會年甚少,嘏以明智交會。
- (三)漢晉春秋日 利鈍,大勢一失,則公事敗矣。」是時景王新割目瘤,創甚,聞嘏言,蹶然而起曰:「我請輿疾而東。」 ··· 嘏固勸景王行,景王未從。 嘏重言曰:「淮、楚兵勁,而儉等負力遠鬬, 其鋒未易當也。 若諸將戰有
- (三)世語曰:景王疾甚,以朝政授傅嘏,嘏不敢受。及薨,嘏祕不發喪,以景王命召文王於許昌,領公軍焉。 孫盛評曰:晉宣、景、文王之相魏也,權重相承,王業基矣。 豈蕞爾傅嘏所宜閒廁?世語所云·斯不然矣。
- 傅子曰:初,李豐與嘏同州,少有顯名,早歷大官,內外稱之,嘏又不善也。 綜朝事,俱爲名臣 刺史裴徽、散騎常侍荷甝善,徽、魁早亡。又與鎭北將軍何曾、司空陳泰、尚書僕射荷顗、後將軍鍾毓並善, 昧於權利,若處庸庸者可也,自任機事,遭明者必死。」

 豐後爲中書令,與夏侯玄俱禍,卒如嘏 謂同志曰:「豐飾僞而多疑,矜小失而 言。 脚自少與冀州 相與
- 晉謝公贊曰:脈字子莊,嘏少子也。晉永嘉中至司空。 祗子宣,字世弘。 世語稱宣以公正知名,位至御史中丞。 宣弟暢,字世道,祕書丞,沒在胡中。 著晉諸公贊及晉公卿禮 秋 故事

故,相時王之式。劉劭該覽學籍,文質周洽。劉廙以淸鑒著,傅嘏用才達顯云。〔〕 評曰: 昔文帝、陳王以公子之尊,博好文采,同聲相應,才士並出,惟聚等六人最見名

(一)臣松之以爲傅嘏識量名輩,寔當時高流。而此評但云「用才達顯」,既於題目爲拙,又不足以見嘏之美也。

桓二陳徐衞盧傳第二十二

周,晉文逐叔帶以納王。今袁氏反此,而劉牧應之,取禍之道也。明府必欲立功明義,全福 州以應紹。 |羨日:「善。」 乃舉長沙及旁三郡以拒表,遣使詣太祖。|太祖大悅。 會紹與|太祖連戰,軍未 危,奉王命而討有罪,孰敢不服。今若舉四郡保三江以待其來,而爲之內應,不亦可乎!」 遠禍,不宜與之同也。」羨曰:「然則何向而可?」階曰:「曹公雖弱,仗義而起,救朝廷之 會堅擊劉表戰死,階冒難詣表乞堅喪,表義而與之。後太祖與袁紹相拒於官渡,表舉 階自陳已結婚,拒而不受,因辭疾告退。 桓階字伯緒,長沙臨湘人也。〔〕仕郡功曹。太守孫堅舉階孝廉,除尙書郎。 而表急攻羨,羨病死。城陷,階遂自匿。久之,劉表辟爲從事祭酒,欲妻以妻妹蔡 階說其太守張羨曰:「夫舉事而不本於義,未有不敗者也。 故齊桓率諸侯以尊 父喪還鄉

(一)魏書曰:階祖父超,父勝,皆歷典州郡。 勝爲尚書,著名南方。

桓二陳徐衞盧傳第二十二

前後懇至。「こ又毛玠、徐奕以剛蹇少黨,而爲西曹掾丁儀所不善,儀屬言其短,賴階左右以 之勢也。 中郎將侍中。 於敗而欲自往?」太祖善其言,駐軍於摩陂。 足以料事勢不也?」 自全保。 「吾恐虜衆多,而晃等勢不便耳。」階曰:「今仁等處重圍之中而守死無貳者,誠以大王遠爲 太祖欲自 太祖定荆州,聞其爲張羨謀也,異之,辟爲丞相掾主簿,遷趙郡太守魏國初建,爲虎賁 其將順匡救,多此類也。 夫居萬死之地,必有死爭之心;內懷死爭,外有彊救,大王案六軍以示餘力,何憂 時太子未定,而臨菑侯植有籠。階數陳文帝德優齒長,宜爲儲副,公規密諫 一南征,以問羣下。 曰:「能。」「大王恐二人遺力邪?」曰:「不。」「然則何爲自往?」曰: 霯下皆謂: 「王不亟行,今敗矣。」

階獨曰: 「大王以仁等爲 遷尙書,典選舉。曹仁爲關羽所圍,太祖遣徐晃救之,不 賊遂退。

一稱階諫曰:「今太子仁冠墓子,名昭海內,仁 聖達節,天下莫不聞;而大王甫以植而問臣,臣誠惑之。」於是

太祖

知階篤於守正

,深盆重焉。

嘉嗣。 孤,寄天下之命於卿。 子不封,病卒,又追贈關內侯。 文帝踐阼,遷尙書令,封高鄉亭侯,加侍中。 以階弟纂爲散騎侍郎,賜爵關內侯。 勉之!」徙封安樂鄉侯,邑六百戶,又賜階三子爵關內侯。 後階疾篤,遣使者卽拜太常,薨,帝爲之流涕,諡曰貞侯。 嘉尚升遷亭公主,會嘉平中,以樂安太守與吳 階疾病,帝自臨省,謂曰:「吾方託六尺之 施 以 嗣

戰於東關,軍敗,沒,諡曰壯侯。 子翊嗣。〔一〕

〔一〕世語曰:階孫陵,字元徽,有名於晉武帝世,至滎陽太守,卒。

備遂東,與袁術戰。 |羣說備日:「袁術尙彊,今東,必與之爭。||呂布若襲將軍之後,將軍雖得徐州,事必無成。| 與羣交,更爲紀拜,由是顯名。 異之,謂宗人父老曰:「此兒必興吾宗。」魯國孔融高才倨傲,年在紀、羣之間,先與紀友,後 魏國旣建,遷爲御史中丞。 爲知人。 太祖辟之。 行,隨紀避難徐州。 <u>零薦廣陵陳燆、丹陽戴乾,太祖皆用之。後吳人叛,乾忠義死難,矯遂爲名臣,世以羣</u> 陳羣字長文,潁川許昌人也。祖父寔,父紀,叔父諶,皆有盛名。〔〕羣爲兒時,寔常奇 除蕭、贊、長平令,父卒去官。後以司徒掾舉高第,爲治書侍御史,轉參丞相軍事。 羣封還教,以爲模、達穢德,終必敗,太祖不聽。 屬呂布破,太祖辟羣爲司空西曹掾屬。 布果襲下邳,遣兵助術,大破備軍,備恨不用羣言。 劉備臨豫州,辟羣爲別駕。時陶謙病死,徐州迎備,備欲往 時有薦樂安王模、下邳周達者 後模、達皆坐姦宄誅,太祖以謝 舉茂才,除柘令,不

(二) 寔字仲弓, 紀字元方, 諶字季方。魏書曰: 寔德冠當時, 紀、諶並名重於世。 宗師之。 靈帝崩,何進輔政,引用天下名士,徵寔,欲以爲參軍,以老病,遂不屈節。 **寔爲太丘長,遭黨錮,隱居荆山,遠近** 勘為司 早卒。 紀歴位

平原 相、侍中、大鴻臚,著書數十篇,世謂之陳子。 **定之亡也,司空宿爽、太僕令韓融並制緦麻,** 執子孫禮。 四方

至者車數千乘,自太原郭泰等無不造門。

(漢) 日: 度亡,天下致弔,會其葬者三萬人,制線麻者以百數

命,率皆同時,羔鴈成羣,丞掾交至。 先賢行狀曰:大將軍何進遣屬弔祠,諡曰文範先生。 豫州百姓皆圖畫寔、紀、諶之形象。 于時,寔、紀高名並 著,而諶又配之,世號曰三君。 每宰府辟

足以相質矣。 刑 先施用。 **盜者則其足,則永無淫放穿窬之姦矣。夫三千之屬,雖未可悉復,若斯數者,時之所患,宜** 死,合於古制;至於傷人,或殘毀其體而裁翦毛髮,非其理也。 日:『惟敬五刑,以成三德。』易蓍劓、刖、滅趾之法,所以輔政助教,懲惡息殺也。 一朗及議者多以爲未可行。 而 可加於仁恩者,正謂此也。御史中丞能申其父之論乎?」 增加笞,本興仁惻而死者更衆,所謂名輕而實重者也。 時太祖議復肉刑,令曰:「安得通理君子達於古今者,使平斯事乎!昔陳鴻臚以爲死刑 漢律所殺殊死之罪,仁所不及也,其餘逮死者,可以刑殺。 今以笞死之法易不殺之刑, 太祖深善繇、羣言,以軍 是重人支體 事未罷,顧衆議,故且寢。 而輕人軀命也。」 名輕則易犯,實重則傷民。 **羣對日:「臣父紀以爲漢除肉** 若用古刑, 使淫者下蠶室, 如此,則所刑之與所生 時鍾繇與羣議同 且殺人償

在朝無適無莫,雅杖名義,不以非道假人。 文帝在東

進封潁陰侯,增邑五百,幷前千三百戶,與征東大將軍曹休、中軍大將軍曹眞、撫軍大將軍 潁鄉侯。 侯,徙爲尚書。 宮,深敬器焉,待以交友之禮,常歎曰:「自吾有回,門人日以親。」及卽王位,封羣昌武亭 司馬宣王並開府。頃之,爲司空,故錄尙書事。 大將軍,領中護軍,錄尙書事。帝寢疾,羣與曹眞、司馬宣王等並受遺詔輔政。 帝征孫權,至廣陵,使羣領中領軍。帝還,假節,都督水軍。 制儿品官人之法,羣所建也。及踐阼,遷尙書僕射,加侍中,徙尙書令,進爵 還許昌,以羣爲鎭軍 明帝卽位,

因,且斜谷阻險,難以進退,轉運必見鈔截,多留兵守要,則損戰士,不可不熟慮也」。帝從 斜谷入。羣以爲「太祖昔到陽平攻張魯,多收豆麥以益軍糧,魯未下而食猶乏。今旣無所 端,毀譽無端則眞僞失實,不可不深防備,有以絕其源流。」太和中,曹眞表欲數道伐蜀,從 則兆民幸甚。夫臣下雷同,是非相蔽,國之大患也。若不和睦則有讎黨,有讎黨則毀譽無 其陵遲已甚。陛下當盛魏之隆,荷二祖之業,天下想望至治,唯有以崇德布化,惠恤黎庶, 以御于家邦』。道自近始,而化洽於天下。自喪亂已來,干戈未戢,百姓不識王敎之本,懼 行。會霖雨積日,羣又以爲宜詔眞還,帝從之。 **羣議。眞復表從子午道。羣叉陳其不便,幷言軍事用度之計。詔以羣議下眞,眞據之遂** 是時,帝初蒞政,羣上疏曰:「詩稱『儀刑文王,萬邦作学』;又曰『刑于寡妻,至于兄弟,

抑或致,以求厥中。防墓有不脩之儉,嬴、博有不歸之魂。夫大人動合天地,垂之無窮,又 鄕邑從其風化,無恐懼之心。 況乃帝王萬國之主,靜則天下安,動則天下擾; 行止動靜,豈 大衰。加所煩費,不可計量。且(由)吉士賢人,當盛衰,處安危,秉道信命,非徙其家以寧, 及孟津別宮,皆可權時分止。可無舉宮暴露野次,廢損盛節蠶農之要。又賊地聞之,以爲 舉朝素衣,朝夕哭臨,自古已來,未有此比。 而乃復自往視陵,親臨祖載。 願陛下抑割無益 大德不踰閑,動爲師表故也。八歲下殤,禮所不備,況未期月,而以成人禮送之,加爲制服 何故。臣以爲吉凶有命,禍福由人,移徙求安,則亦無益。若必當移避,繕治金墉城西宮, 二宮上下,皆悉俱東,舉朝大小,莫不驚怪。或言欲以避衰,或言欲於便處移殿舍,或不知 有損之事,但悉聽羣臣送葬,乞車駕不行,此萬國之至望也。聞車駕欲幸摩陂,實到許昌, 後皇女淑薨,追封諡平原懿公主。臺上疏曰:「長短有命,存亡有分。故聖人制禮,或

此急而先宮室,臣懼百姓遂困,將何以應敵?昔劉備自成都至白水,多作傳舍,興費人役, 之患,國家之深憂也。且吳、蜀未滅,社稷不安。宜及其未動,講武勸農,有以待之。今舍 今喪亂之後,人民至少,比漢文、景之時,不過一大郡。〔〕加邊境有事,將士勞苦,若有水旱 青龍中,營治宮室,百姓失農時。羣上疏曰:「禹承唐、虞之盛,猶卑宮室而惡衣服,況

可輕脫哉? 」帝不聽

爲百姓也。今臣曾不能少凝聖聽,不及意遠矣。」帝於是有所減省。 其言,後乃復作之;殿成,謂羣臣曰:『鍾離尙書在,不得成此殿也。』 夫王者豈憚一臣,蓋 辭言所屈;若少留神,卓然回意,亦非臣下之所及也。漢明帝欲起德陽殿,鍾離意諫,卽用 莫之敢違。前欲壞武庫,謂不可不壞也;後欲置之,謂不可不置也。若必作之,固非臣下 急,然猶非其壯麗。 今二虜未平,誠不宜與古同也。〔三〕夫人之所欲,莫不有辭,況乃天王, 也。」羣叉曰:「昔漢祖唯與項羽爭天下,羽已滅,宮室燒焚,是以蕭何建武庫、太倉,皆是要 太祖知其疲民也。今中國勞力,亦吳、蜀之所願。此安危之機也,惟陛下慮之。」帝答曰: 「王者宮室,亦宜並立。滅賊之後,但當罷守耳,豈可復興役邪?是故君之職,蕭何之大略

- (1)臣|松之案:漢書地理志云:元始二年,天下戶口最盛,汝南郡爲大郡,有三十餘萬戶。則文、景之時不能如是多 殊。長文之言,於是爲過 也。案晉太康三年地記,晉戶有三百七十七萬,吳、蜀戶不能居半。以此言之,魏雖始承喪亂,方晉亦當無乃大也。案晉太康三年地記,晉戶有三百七十七萬,吳、蜀戶不能居半。以此言之,魏雖始承喪亂,方晉亦當無乃大
- (三)孫盛曰:周禮,天子之宮,有斲礲之制。然質文之飾,與時推移。漢承周、秦之弊,宜敦簡約之化,而何崇飾宮室, 玷,不可爲也。」 其斯之謂乎! 蕭何之過議,以爲令軌,豈不惑於大道而昧得失之辨哉?使百代之君,眩於奢儉之中,何之由矣。詩云:「斯言之 示侈後嗣。此乃武帝千門萬戶所以大興,豈無所復增之謂邪?況乃魏氏方有吳、蜀之難,四海罹塗炭之艱,而述

初,太祖時,劉廙坐弟與魏諷謀反,當誅。臺言之太祖,太祖曰:「廙,名臣也,吾亦欲赦

列侯。[]

弘博不伐,皆此類也。一青龍四年薨,諡曰靖侯。子|秦嗣。帝追思|羣功德,分|羣戶邑,封一子 之。」乃復位。 廙深德羣,羣曰:「夫議刑爲國,非爲私也;且自明主之意,吾何知焉?」 其

|魏書曰:臺前後數密陳得失,每上封事,輒削其草,時人及其子弟莫能知也。論者或畿羣居位拱默,正始中詔撰

羣臣上書,以爲名臣奏議,朝士乃見羣諫事,皆歎息焉。

直詆其非而播揚其惡,可謂直士,未爲忠臣也。故司空陳靈則不然,其談論終日,未嘗言人主之非;書數十上而 者,其本一也。故仁愛之至者,君親有過,諫而不入,求之反覆,不得已而言,不忍宣也。今爲人臣,見人主失道, 謇,匪躬之故』者歟」!答曰:「然可謂直士,忠則吾不知也。夫仁者愛人,施於君謂之忠,施於親謂之孝。 <u>遠子曰:或云「故少府楊阜豈非忠臣哉?見人主之非,則勃然怒而觸之,與人言未嘗不道也,豈非所謂『王臣謇</u> 外人不知。君子謂羣於是乎長者矣。」 忠孝

軍郭淮與泰謀所以禦之,泰曰:「麴城雖固,去蜀險遠,當須運糧。」羌夷患維勞役,必未肯 軍姜維率衆依麴山築二城,使牙門將句安、李歆等守之,聚羌胡質任等寇偪諸郡。 壁,不發其封,及徵爲尙書,悉以還之。嘉平初,代郭淮爲雍州刺史,加奮威將軍。 持節,護匈奴中郎將,懷柔夷民,甚有威惠。京邑貴人多寄寶貨,因泰市奴婢,泰皆挂之於 泰字玄伯。 青龍中,除散騎侍郎。 正始中,徙游擊將軍,爲幷州刺史,加振威將軍,使 征西將 蜀大將

白水 使泰率 將士困窘,分糧聚雪以稽日月。鮮果來救,出自牛頭山,與秦相對。 附。 而 屈 今圍而取之,可不血刃而拔其城;雖其有救,山道阻險,非行兵之地也。」 淮從泰計, ,循水而東,使淮趣牛頭,截其還路,可幷取維,不惟安等而已。淮善其策,進率諸軍軍 人。今絕牛頭,維無反道,則我之禽也。」敕諸軍各堅壘勿與戰,遣使白淮,欲自南渡 討蜀護軍徐質、南安太守鄧艾等進兵圍之,斷其運道及城外流水。 泰曰:「兵法貴在不戰 安等挑戰,不許,

洮

維懼,遁走,安等孤縣,遂皆降。

道。 營在前 進 雕 倉。 繼敗軍之後,將士失氣,隴右傾蕩。 賊勢終不能三道,且兵勢惡分,凉州未宜越境,報經:「審其定問,知所趣向 夏侯霸欲三道向祁山、石營、金城,求進兵爲翅,使凉州軍至枹罕, 西。 淮薨 泰軍上邽,分兵守要,晨夜進前。 會經所統諸軍於故關與賊戰不利,經輒渡洮。 時維等將數萬人至枹罕, ,泰率諸軍繼之。 艾等以爲「王經精卒破衂於西, 泰代爲征西將軍,假節都督雍、凉諸軍事。後年,雍州刺史王經白泰,云姜維 經已與維戰,大敗,以萬餘人還保狄道城,餘皆奔散。 趣狄道。 古人有言:『蝮蛇螫手,壯士解其腕。』孫子曰:『兵有所 鄧艾、胡奮、王祕亦到, 賊衆犬盛, 秦敕經進屯狄道,須軍到,乃規取之。 乘勝之兵旣不可當,而將軍以烏合之卒, 泰以經不堅據一然道,必有他變, 即與艾、祕等分爲三軍 討蜀護軍向祁山 須東西勢合乃 維 泰進軍陳 乘勝圍狄 並遣 進到 五

魏

得出。 差軍守,並治城壘,還屯上邽。 衆集乃發,而卒聞已至,謂有奇變宿謀,上下震懼。 還。凉州軍從金城南至沃干阪。 道東南高山上,多舉烽火,鳴鼓角。||狄道城中將士見救者至,皆憤踊。||維始謂官救兵當須 賊之時也,所謂疾雷不及掩耳,自然之勢也。||洮水帶其表,維等在其內,今乘高據勢,臨其 拒堙三月而後已』。誠非輕軍遠入,維之詭謀倉卒所辨。縣軍遠僑,糧穀不繼,是我速進破 城之下,銳氣之卒,屈力致命,攻守勢殊,客主不同。兵書云『脩櫓(積榲)〔轒輼〕,三月乃成, 之實,放兵收降,招納羌、胡,東爭關、隴,傳檄四郡,此我之所惡也。 而維以乘勝之兵,挫峻 也。」秦曰:「姜維提輕兵深入,正欲與我爭鋒原野,求一戰之利。 王經當高壁深壘,挫其稅 徒不守之謂。姜維之兵,是所辟之鋒。不如割險自保,觀釁待弊,然後進救,此計之得者 不擊,地有所不守。』蓋小有所失而大有所全故也。今隴右之害,過於蝮蛇,狄道之地,非 項領,不戰必走。 氣。今乃與戰,使賊得計,走破王經,封之狄道。若維以戰克之威,進兵東向,據機陽積穀 |泰詭從南道,維果三日施伏。〔〕定軍潛行,卒出其南。|維乃緣山突至,泰與交戰,維退 經歎曰:「糧不至旬,向不應機,舉城屠裂,覆喪一州矣。」、康慰勞將士,前後遣還,更 **寇不可縱,圍不可久,君等何言如此。」遂進軍度高城嶺,潛行,夜至**狄 泰與經共密期,當共向其還路,維等聞之,遂遁,城中將十 自軍之發隴西也,以山道深險,賊必設

魏 書 桓二陳徐衞盧傳第二十二

(一)臣松之案:此傳云「謂救兵當須衆集,而卒聞已至,謂有奇變,上下震懼」,此則救至出於不意。若不知救至,何故 伏兵深險乃經三日乎?殼伏相伺,非不知之謂。此皆語之不通也。

大將,不當爾邪!」 以一方有事,輒以虚聲擾動天下,故希簡白上事,驛書不過六百里。司馬文王語荀顗曰: 「玄伯沈勇能斷,荷方伯之重,救將陷之城,而不求益兵,叉希簡上事,必能辨賊故也。 事大謀遠,非維所任也。且城非倉卒所拔,而糧少爲急,征西速救,得上策矣。」秦每 衆議以經奔北,城不足自固,維若斷凉州之道,兼四郡民夷,據關、隴之險,敢能沒經軍 初,泰聞經見圍,以州軍將士素皆一心,加得保城,非維所能卒傾。 表上進軍晨夜速到 宜須大兵四集,乃致攻討。大將軍司馬文王曰:「昔諸葛亮常有此志,卒亦不

陔亦與泰善。文王問陔曰:「玄伯何如其父司空也?」 陔曰:「通雅博暢,能以天下聲教爲 亭侯,二人關內侯。 景元元年薨,追贈司空,諡曰穆侯。〔〕子恂嗣。 恂薨,無嗣。 弟溫紹 己任者,不如也;明統簡至,立功立事,過之。」秦前後以功增邑二千六百戶,賜子弟一人 誕作亂壽春,司馬文王率六軍軍丘頭,泰總署行臺。司馬景王、文王皆與泰親友,及沛國武 將軍,假節都督准北諸軍事,詔徐州監軍已下受泰節度。峻退,軍還,轉爲左僕射。 後徵泰爲尙書右僕射,典選舉,加侍中光祿大夫。吳大將孫峻出淮、泗。以泰爲鎭軍

咸熙中開建五等,以泰蓍勳前朝,改封溫爲愼子。〔三〕

[1]干寶晉紀曰:高貴鄉公之殺,司馬文王會朝臣謀其故。太常陳泰不至,使其舅荀顗召之。顗至, 處我?」 曰:「世之論者,以泰方於舅,今舅不如麽也。」子弟內外咸共逼之,垂涕而入。王待之曲室,謂曰:「玄伯,卿何以 對曰:「誅賈充以謝天下。」 文王曰:「爲我更思其次。」 泰曰:「泰言惟有進於此,不知其次。」 文王乃不 告以可否。泰

他。」泰曰:「豈可使泰復發後言。」遂嘔血薨。 大將軍亦對之泣、謂曰:「玄伯、其如我何?」 泰曰:「獨有斬賈充,少可以謝天下耳。」 大將軍久之曰:「卿更思其 魏氏春秋曰:帝之崩也,太傅司馬孚、尚書右僕射陳泰枕帝尸於股,號哭盡哀。 時大將軍入于禁中,泰見之悲慟,

更言。

聞 時人爲其語曰:「公慚卿,卿慚長。」 哉?案博物記曰:太丘長陳寔、寔子鴻臚紀、紀子司空墨、馨子泰四世、於漢、魏二朝並有重名,而其德漸漸小減。 臣松之案本傳、泰不爲太常、未詳干寶所由知之。 ,率更自以意制,多不如舊。 凡記言之體,當使若出其口。 孫盛改易泰言,雖爲小勝。 辭勝而違實,固君子所不取,沉復不勝而徒長虛妄 然檢盛言諸所改易,皆非別有異

(三)案陳氏譜:靈之後,名位逐微。 諶孫佐,官至靑州刺史。 佐弟坦,廷尉。 佐子達,太尉,封廣陵郡公。 及從弟堪,並至大位。準孫達,字林道,有譽江左,爲西中郎將,追贈衞將軍 準弟戴、 懰

陳矯字季弼,廣陵東陽人也。 避亂江東及東城,辭孫策、袁術之命,還本郡。 太守陳登 魏 書 桓二陳徐衞盧傳第二十二

吾敬孔文舉;雄姿傑出,有王霸之略,吾敬劉玄德:所敬如此,何驕之有!餘子瑣瑣,亦焉 清玉絜,有禮有法,吾敬華子魚;清脩疾惡,有識有義,吾敬趙元達;博聞彊記,奇逸卓榮, 請爲功曹,使屬詣許,謂曰:「許下論議,待吾不足;足下相爲觀察,還以見誨。」 屬還曰: 足錄哉?」登雅意如此,而深敬友燆。 「聞遠近之論,頗謂明府驕而自矜。」登曰:「夫閨門雍穆,有德有行,吾敬陳元方兄弟;淵

忘弘演之義乎?」「一太祖乃遣赴救。吳軍旣退,登多設閒伏,勒兵追奔,大破之。 蒙救援,使爲外藩,則吳人剉謀,徐方永安,武聲遠震,仁愛滂流,未從之國,望風景附,崇德 養威,此王業也。」太祖奇燆,欲留之。燆辭曰:「本國倒縣,本奔走告急,縱無申胥之效,敢 郡爲孫權所圍於匡奇,登令矯求救於太祖。 矯說太祖曰:「鄙郡雖小,形便之國也,若

一〕劉向新序曰:齊桓公求婚於儒,衞不與,而嫁於許。 衞爲狄所伐,桓公不救,至於國滅君死。 懿公屍爲狄人所食, 臣若此而尙滅,寡人無有,亡無日矣!」乃救衞,定其君 惟有肝在。懿公有臣曰弘演,適使反,致命於肝曰:「君爲其內,臣爲其外。」乃刳腹內肝而死。齊桓公曰:「衞有

病,以牛薦,縣結正棄市。 燆曰:「此孝子也。」 表赦之。 遷魏郡太守。 時繫囚千數,至有歷 矯以爲周有三典之制,漢約三章之法,今惜輕重之理,而忽久繫之患,可謂謬矣。 悉自 太祖辟矯爲司空掾屬,除相令,征南長史,彭城、樂陵太守,魏郡西部都尉。 曲周民父

案行文書耳。」矯曰:「此自臣職分,非陛下所宜臨也。若臣不稱其職,則請就黜退。陛下 位,進爵東鄕侯,邑六百戶。車駕嘗卒至尙書門,矯跪問帝曰:「陛下欲何之?」帝曰:「欲 節,明略過人,信一時之俊傑也。」帝旣踐阼,轉署吏部,封高陵亭侯,遷尙書令。明帝即 外,天下惶懼。太子宜割哀卽位,以繫遠近之望。且又愛子在側,彼此生變,則社稷危矣。」 宜還。」帝慚,回車而反。其亮直如此,自加侍中光祿大夫,遷司徒。景初元年薨,諡曰貞 即具官備禮, 爲尙書。行前未到鄴,太祖崩洛陽,羣臣拘常,以爲太子卽位,當須詔命。燆曰:「王薨于 覽罪狀,一時論決。 大軍東征,入爲丞相長史。 軍還,復爲魏郡,轉西曹屬。 從征漢中,還 一日皆辦。明旦,以王后令,策太子卽位,大赦蕩然。文帝曰:「陳季弼臨大

- [一] 世語曰:劉曄以先進見幸,因譖矯專權。矯懼,以問長子本,本不知所出。次子騫曰:「主上明聖,大人大臣,今若 也。 **構君,殷有以迹君;殷心故已了。」以金五鉼授之,矯辭。帝曰:「豈以爲小惠?君已知殷心,顧君妻子未知故** 不合,不過不作公耳。」後數日,帝見燆,燆又問二子,騫曰:「陛下意解,故見大人也。」旣入,盡日,帝曰:「劉曄 帝憂社稷,問矯:「司馬公忠正,可謂社稷之臣乎?」矯曰:「朝廷之望;社稷,未知也。」
- (二)魏氏春秋曰:屬本劉氏子,出嗣舅氏而婚于本族。 ·喪亂已來,風敎彫薄,謗議之言,難用褒貶。 自建安五年已前,一切勿論。 徐宣每非之,庭議其闕。 其以斷前誹議者,以其罪罪之。」 太祖惜矯才量,欲擁全之,乃下令曰:

事,不讀法律而得廷尉之稱,優於司馬岐等,精練文理。遷鎭北將軍,假節都督河北諸軍 子本嗣,歷位郡守、九卿。 所在操綱領,舉大體,能使羣下自盡。 有統御之才,不親小

¥。薨,子粲嗣。本弟騫,咸熙中爲車騎將軍。〔1〕

(二)案晉書曰:騰字休淵,爲晉佐命功臣,至太傅,封高平郡公。

而交二千石,鄰國君屈從陪臣游,不亦可乎!」 初 ,矯爲郡功曹,使過泰山。 泰山太守東郡薛悌異之,結爲親友。戲謂燆曰:「以郡吏 悌後爲魏郡及尚書令,皆承代矯云。[1]

[1]世語曰:悌字孝威。年二十二,以兗州從事爲泰山太守。初,太祖定冀州,以悌及東平王國爲左右長史,後至中 領軍,並悉忠貞練事,爲世吏表。

大德以鎭統之。」 形勢,質乃進破賊。 爾、令梁習夜奔宣家,密送免之。太祖遣督軍扈質來討賊,以兵少不進。 齊名而私好不協,然俱見器於太守陳登,與登並心於太祖。 會馬超作亂,大軍西征,太祖見官屬曰:「今當遠征,而此方未定,以爲後憂,宜得淸公 徐宣字寶堅,廣陵海西人也。避亂江東,叉辭孫策之命,還本郡。與陳矯並爲綱紀,二人 乃以宣爲左護軍, 太祖辟爲司空掾屬,除東緡、發干令,遷齊郡太守,入爲門下督,從到壽 留統諸軍。還,爲丞相東曹掾,出爲魏郡太守。 海西、淮浦二縣民作亂,都尉衞 宣潛見責之,示以

魏

書

崩洛陽,羣臣入殿中發哀。或言可易諸城守,用譙、沛人。宣厲聲曰:「今者遠近一統,人懷 起,帝船回倒,宣病在後,陵波而前,羣寮莫先至者。帝壯之,遷尙書。 丞,賜爵關內侯,徙城門校尉,旬月遷司隸校尉,轉散騎常侍。 從至廣陵,六軍乘舟,風浪暴 效節,何必譙、沛,而沮宿衞者心。」文帝聞曰:「所謂社稷之臣也。」帝旣踐阼,爲御史中

惜乎大命不永!其追贈車騎將軍,葬如公禮。」諡曰貞侯。子欽嗣 莫宜宣者。」帝遂以宣爲左僕射,後加侍中光祿大夫。 車駕幸計昌,總統留事。 帝還,主者 世俗;確然難動,有社稷之節;歷位州郡,所在稱職。今僕射缺,宣行掌後事;腹心任重, 用陳平之智而託後於周勃也。竊見尚書徐宣,體忠厚之行,秉直亮之性;清雅特立,不拘 奪之時,以策略爲先,分定之後,以忠義爲首。故晉文行舅犯之計而賞雍季之言,行高祖 內方外,歷在三朝,公亮正色,有託孤寄命之節,可謂柱石臣也。常欲倚以台輔,未及登之, 奏呈文書。詔曰:「吾省與僕射何異?」竟不視。尙方令坐猥見考竟,宣上疏陳威刑大過, 乃固辭疾遜位,帝終不許。一靑龍四年薨,遺令布衣疏巾,斂以時服。詔曰:「宣體履至實,直 叉諫作宮殿窮盡民力,帝皆手詔嘉納。 宣曰:「七十有縣車之禮,今已六十八,可以去矣。」 明帝卽位,封津陽亭侯,邑二百戶。中領軍桓範薦宣曰:「臣聞帝王用人,度世授才,爭

[一] 呂氏春秋曰:昔晉文公將與楚人戰於城濮,召咎犯而問曰:「楚衆我寡,奈何而可?」 咎犯對曰:「臣聞繁禮之君,

楚人於城濮。 不足於文,繁戰之君,不足於詐,君亦詐之而已。」文公以咎犯言告雅季,雅季曰:「竭澤而漁,豈不得魚,而 文公曰:「雍季之言,百代之利也;咎犯之言,一時之務也。焉有以一時之務,先百代之利乎? 焚藪而田,豈不得獸,而明年無獸。 詐偽之道,雖今偷可,後將無復,非長術也。」 文公用咎犯之言,而敗 反而爲賞,雍季在上。左右諫曰:「城濮之功,咎犯之謀也。君用其言而後其身,或者不可乎!」 明 年

陵,行中領軍,從。 征東大將軍曹休表得降賊辭,「孫權已在濡須口」。 臻曰:「權恃長江,未 敢抗衡,此必畏怖僞辭耳。」考核降者,果守將詐所作也。 稱揚漢美。帝數日臻曰:「天下之珍,當與山陽共之。」遷尙書,轉侍中吏部尙書。帝幸廣 位,爲散騎常侍。及踐阼,封安國亭侯。時羣臣並頌魏德,多抑損前朝。臻獨明禪授之義, 聘貴人于魏,因表留臻參丞相軍事。追錄臻父舊勳,賜爵關內侯,轉爲戶曹掾。文帝卽王 卿君同共舉事,加欽令問。始聞越言,固自不信。及得荀令君書,具亮忠誠。」會奉詔命, 之正」。 惇怒,執臻,旣而赦之。 後爲漢黃門侍郎。 東郡朱越謀反,引臻。 太祖令曰:「孤與 涉郡境,輒遣使祠焉。〔1〕夏侯惇爲陳留太守,舉臻計吏,命婦出宴,臻以爲「末世之俗,非禮 「平天下者,必此人也。」太祖亦異之,數詣茲議大事。從討董卓,戰于滎陽而卒。太祖每 **衞臻字公振,陳留襄邑人也。父茲,有大節,不應三公之辟。太祖之初至陳留,茲曰:**

〔一〕 先賢行狀曰:茲字子許。 不爲激詭之行,不徇流俗之名;明慮淵深,規略宏遠。爲車騎將軍何苗所辟,司徒楊彪 之。」且言「兵之興者,自今始矣」。深見廢興,首讚弘謀。合兵三千人,從太祖入際陽,力戰終日,失利,身歿。 林宗曰:「子許少欲,文生多情,此二人非徒兄弟,乃父子也。」後文生以穢貨見損,茲以烈節垂名。 ·郭林宗傳曰:茲弱冠與同郡圈文生俱稱盛德。 林宗與二人共至市,子許買物,隨價讎直,文生訾呵,減價乃取。 再加旌命。董卓作亂,漢室傾蕩,太祖到陳留,始與茲相見,遂同盟,計與武事。茲答曰:「亂生久矣,非兵無以整

然入居巢,進攻合肥。帝欲自東征,臻曰「權外示應亮,內實觀望。且合肥城固,不足爲 上:「朱然等軍已過荆城。」臻曰:「然,吳之驍將,必下從權,且爲勢以緩征南耳。」權果召 所墮者大也。臣每察校事,類皆如此,懼羣司將遂越職,以至陵遲矣。」亮叉出斜谷;征南 夫。是時,帝方隆意於殿舍,臻數切諫。及殿中監擅收蘭臺令史,臻奏案之。詔曰:「殿舍 關,絕其糧道。」乃以臻爲征蜀將軍,假節督諸軍事,到長安,亮退。還,復職,加光祿大 好不經之舉,開拔奇之津,將使天下馳騁而起矣。」諸葛亮寇天水,臻奏:「宜遣奇兵入散 不成,吾所留心,卿推之何。」臻上疏曰:「古制侵官之法,非惡其勤事也,誠以所益者小, 臻答曰:「古人遺智慧而任度量,須考績而加黜陟;今子同牧野於成、康,喻斷**虵於文、景**, 「漢祖遇亡虜爲上將,周武拔漁父爲太師;布衣廝養,可登王公,何必守文,試而後用?」 明帝卽位,進封康鄕侯,後轉爲右僕射,典選舉,如前加侍中。 中護軍蔣濟遺臻書曰:

慮。 車駕可無親征,以省六軍之費。」帝到尋陽而權竟退。

夷,內脩戰射,而儉欲以偏軍長驅,朝至夕卷,知其妄矣。」儉行軍遂不利 境,而猶案甲養士,未果尋致討者,誠以百姓疲勞故也。 方無用之士克定遼東。」臻曰:「儉所陳皆戰國細術,非王者之事也。 図 [州刺史毌丘儉上疏曰:「陛下卽位已來,未有可書。 且淵生長海表, 吳、蜀恃險,未可卒平,聊可以此 吳頻歲稱兵, 寇亂邊 相承三世,外撫戎

侯。 入守尚書令,及爲弟求婚,皆不許。 子,而方奇貴臨菑侯。 不忘楚事。 有寵,帝問臻一平原侯何如?」 子烈嗣,咸熙中爲光祿勳。[1] 臻遷爲司空,徙司徒。正始中,進虧長垣侯,邑千戶,封一子列侯。 讜言嘉謀,望不吝焉。」 丁儀等爲之羽翼,勸臻自結,臻以大義拒之。 臻稱明德美而終不言。 固乞遜位。 賜宅一區, 位特進,秩如三司。 詔曰:「昔干木偃息,義壓彊秦; 曹爽輔政,使夏侯玄宣指, 及文帝卽位,東海王霖 薨,追贈太尉,諡曰敬 初,太祖久不立太 留侯頤 欲引臻

臣松之案舊事及傅咸集,烈終於光祿勳。 一下,我理塞路,今有伯輿,復越某作郎。 一犬吠形,羣犬吠聲,懼於羣吠,遂至回聽。」 權作左思吳都賦敍及注,敍 粗有文辭,至於爲注,了無所發明,直爲塵穢紙墨,不合傳寫也。 以 權爲尚書郎。傅咸與亮牋曰:「衞伯與貴妃兄子,誠有才章,應作臺郎,然未得東宮官屬。 烈二弟京、楷、皆二千石。 楷子權,字伯輿。 晉大司馬汝南王 東宮官屬, 亮輔政, 前患楊

魏

曰:「毓執之是也。又引經典有意,使孤歎息。」由是爲丞相法曹議令史,轉西曹議令史。 **夫家數日,未與夫相見,大理奏棄市。** 袁紹、公孫瓚交兵,幽冀饑荒,養寡嫂孤兄子,以學行見稱。文帝爲五官將,召毓署門下賊 不辜,寧失不經』,恐過重也。 同牢合卺之後,罪何所加?且記曰『附從輕』,言附人之罪,以輕者爲比也。又書云『與其殺 女氏之黨,以未成婦也」。今白等生有未見之悲,死有非婦之痛,而吏議欲肆之大辟, 故詩云『未見君子,我心傷悲;亦旣見止,我心則夷』。又禮『未廟見之婦而死, 崔琰舉爲冀州主簿。 盧毓字子家,涿郡涿人也。 父植,有名於世。 (三 毓十歲而孤,遇本州亂,二兄死難。 時天下草創,多逋逃,故重士亡法,罪及妻子。亡士妻白等,始適 苟以白等皆受禮聘,已入門庭,刑之爲可,殺之爲重。」太祖 毓駁之曰:「夫女子之情,以接見而恩生,成婦而義 則若

(二)續漢書曰:植字子幹。 中郎將征角,失利抵罪。 征柳城,過涿郡,令告太守曰:「故北中郎將盧植,名著海內,學爲儒宗,士之楷模,乃國之楨幹也。昔武王入殷, 董卓議欲廢帝,衆莫敢對,植獨正言,語在卓傳。 建寧中,徵博士,出補九江太守,以病去官。 少事馬融,與鄭玄同門相友。 頃之,復以爲尙書。 張讓劫少帝奔小平津,植手劍責數讓等,讓等皆放兵,垂泣 作尚書章句、禮記解詁。 |植剛毅有大節,常喟然有濟世之志,不苟合取容,不應州郡 植以老病去位,隱居上谷軍都山, 稍遷侍中、尙書。 初平三年卒。 張角起,以植爲北 謝罪,遂 太祖北

封 · 商容之間,鄭喪子產而仲尼隕涕。孤到此州,嘉其餘風。春秋之義,賢者之後,有異於人。 敬遣丞掾脩墳墓,

抖致薄霰,以彰厥德。」 植有四子,毓最小。

舊鄕,故大徙民充之,以爲屯田。 躬自臨視,擇居美田,百姓賴之。 衍,失帝意。 魏國旣建,爲吏部郎。 雖聽賦所表,心猶恨之,遂左遷毓,使將徙民爲睢陽典農校尉。 文帝踐阼, 遷安平、廣平太守,所在有惠化。 而譙土地墝瘠,百姓窮困,毓愍之,上表徙民於梁國就沃 徙黃門侍郎,出爲濟陰相,梁、譙二郡太守。 毓心在利民, 帝以譙

難,必須良佐,進可替否。 及隆。 知之,更舉吾所未聞者。」 以毓爲吏部尚書。」 爲法宜一正,不宜有兩端,使姦吏得容情。 曰:「臣聞君明則臣直,古之聖王恐不聞其過,故有敢諫之鼓。 青龍二年,入爲侍中。 隆諸生,名爲狂直,陛下宜容之。」在職三年,多所駁爭。 使毓自選代,曰:「得如卿者乃可。」 乃舉阮武、孫邕,帝於是用邕 侍中毓稟性貞固, 先是,散騎常侍劉劭受詔定律,未就。 及侍中高堂隆數以宮室事切諫, 心平體正,可謂明試 毓舉常侍鄭沖, 近臣盡規,此乃臣等所以不 韶曰:「官人秩才,聖帝所 有功,不懈于位者也。 毓上論古今科律之意,以 帝曰:「文和, 帝不悅, 毓

人與否, 前 此 在盧生耳。 諸葛 誕 、鄧颺等馳名譽,有四(窗)〔聰〕八達之誚,帝疾之。時舉中書郎,詔曰:「 選舉莫取有名, 名如畫地作餅,不可啖也。」 毓對曰:「名不足以致異

魏

書

露二年薨,諡曰成侯。孫藩嗣。 一般、光祿大夫王觀、司隸校尉王祥。 詔使使者卽授印綬,進爵封容城侯,邑二千三百戶。 選舉,加光祿大夫。高貴鄉公卽位,進封大梁鄕侯。封一子(高)亭侯。田丘儉作亂,大將軍 出航爲廷尉,司隸舉軌叉枉奏発官。衆論多訟之,乃以毓爲光祿勳。爽等見收,太傅司馬 司馬景王出征,毓綱紀後事,加侍中。 正元三年,疾病,遜位。 遷爲司空,固推驃騎將軍王 |使毓行司隸校尉,治其獄。 復爲吏部尚書,加奉車都尉,封高樂亭侯,轉爲僕射,故典 齊王卽位,賜爵關內侯。 時曹爽秉權,將樹其黨,徙毓僕射,以侍中何晏代毓。頃之, 毓子欽、遜,咸熙中欽爲尚書,遜泰山太守。 [1]

飲子浮,字子雲。

晉諸公贊曰:張華博識多聞,無物不知。 浮高朗經博,有美於華,起家太子舍人,病疽,截手,遂廢。 就家以爲國子博士,遷祭酒。 永平中爲祕書監。 溫嶠表稱諶清出有 朝廷器重之,

文思。

騎中書侍郎,不得南赴。 永和六年,卒於胡(胡)中,子孫過江。妖賊帥盧循,諶之曾孫。 洛陽傾覆,北投劉琨,琨以爲司空從事中郎。 琨敗,諶歸段末波。

元帝之初,累召爲散

爝、宣剛斷骨鯁,臻、毓規鑒清理,咸不忝厥職云。 魏世事統臺閣,重內輕外,故八座尚書,卽古六卿之任也。陳、徐、衞、盧,久居斯位, 評曰:桓階識覩成敗,才周當世。 陳羣動仗名義,有清流雅望;秦弘濟簡至,允克堂構

和常楊杜趙裴傳第二十三

危,(己必有讒慝閒其中者。」遂南度武陵。 南從表,表以上客待之。給曰:「所以不從本初,辟爭地也。 昏世之主,不可黷近,久而阽 未可必也。荆州劉表無他遠志,愛人樂士,土地險阻,山夷民弱,易依倚也」。遂與親舊俱 大夫。治獨以「冀州土平民彊,英桀所利,四戰之地。」本初乘資,雖能彊大,然雄豪方起,全 和洽字陽士,汝南西平人也。舉孝廉,大將軍辟,皆不就。袁紹在冀州,遣使迎汝南士

(一)臣松之案漢書文紀曰「阽於死亡」,食貨志曰「阽危若是」,注曰:「阽音鹽,如屋簷,近邊欲墮之意也。」 一曰「臨危

失或多。今朝廷之議,吏有著新衣、乘好車者,謂之不清;長吏過營,形容不飾,衣裘敵壞 「天下大器,在位與人,不可以一節(儉)[檢]也。 儉素過中,自以處身則可,以此節格物,所 太祖定荆州,辟爲丞相掾屬。時毛玠、崔琰並以忠清幹事,其選用先尚儉節。洽言曰:

和常楊杜趙裴傳第二十三

立教觀俗,貴處中庸,爲可繼也。 大教,務在通人情而已。凡激詭之行,則容隱僞矣。」〔1〕 至令士大夫故汙辱其衣,藏其輿服;朝府大吏,或自挈壺餐以入官寺。 。今崇一概難堪之行以檢殊塗,勉而爲之,必有疲瘁。古之

孫盛曰: 昔先王 矣。 夫矯枉過正則巧僞滋生,以克訓下則民志險隘,非聖王所以陶化民物, 閑邪存誠之道。 宜仰思古制 |御世,觀民設敎,雖質文因時,損益代用,至於車服禮秩,貴賤等差,其歸一 ,訓以約簡,便奢不陵肆,儉足中禮,進無蜉蝣之刺,退**免採**莫之畿;如此則治道隆 揆。魏承漢亂,風俗侈 和洽之言,於是允 m 頭聲作

實其事。 不考,欲兩全所及言事者耳。」恰對日三所信有謗上之言,當肆之市朝;若所無此,言事者 拔擢,顯在首職,歷年荷寵,剛直忠公,爲衆所憚,不宜有此。 妄爲死友怨歎,殆不可忍也。昔蕭、曹與高祖並起微賤,致功立勳。 順,臣道益彰,所以祚及後世也。 言事者言,所罪過深重,非天地所覆載。臣非敢曲理所以枉大倫也, 魏國旣建,爲侍中。後有白毛玠謗毀太祖,太祖見近臣,怒甚。冷陳玠素行有本,求案 今聖恩垂含垢之仁,不忍致之于理,更使曲直之分不明,疑自近始。」 太祖曰:「所以 罷朝,太祖令曰:「今言事者白)所不但謗吾也,乃復爲崔琰觖望。 和侍中比求實之,所以不聽,欲重參之耳。」洽對曰:「如 然人情難保,要宜考覈, 以玠出羣吏之中,特見 高祖每在屈斧,二相恭 此損君臣恩義 兩驗

加誣大臣以誤主聽;二者不加檢覈,臣竊不安。」太祖曰:「方有軍事,安可受人言便考之

邪?狐射姑刺陽處父於朝,此爲君之誠也。」

出爲郎中令。文帝踐阼,爲光祿勳,封安城亭侯。明帝卽位,進封西陵鄕侯,邑二百戶。 太祖克張魯,治陳便宜以時拔軍徙民,可省置守之費。太祖未納,其後竟徙民棄漢中。

業有廢,百姓囂然,時風不至,未必不由此也。消復之術,莫大於節儉。太祖建立洪業,奉 故費一時之農,則失育命之本。是以先王務蠲煩費,以專耕農。自春夏以來,民窮於役,農 也。」詔書謙虛引咎,博諮異同。治以爲「民稀耕少,浮食者多。國以民爲本,民以穀爲命。 數舉,舉而無庸,所謂『悅武無震』,古人之誠也。」 實,蓄士養衆,算廟勝之策,明攻取之謀,詳詢衆庶以求厥中。 若謀不素定,輕弱小敵,軍人 今之要,固在息省勞煩之役,損除他餘之務,以爲軍戎之儲。 三邊守禦,宜在備豫。 料賊虛 師徒之費,供軍賞之用,吏士豐於資食,倉府衍於穀帛,由不飾無用之宮,絕浮華之費。 方 太和中,散騎常侍高堂隆奏:「時風不至,而有休廢之氣,必有司不勤職事以失天常

【离】嗣。 (禽) [离]音離。 (禽) [离]弟(適) [逌],才爽開濟,官至廷尉、吏部尙書。 [1] 轉爲太常,清貧守約,至賣田宅以自給。明帝聞之,加賜穀帛。薨,諡曰簡侯。子〈禽〉

晉諸公贊曰:和嶠字長輿,(適)(道)之子也。少知名,以雅重稱。常慕其舅夏侯玄之爲人,厚自封植,嶷然不羣。

嶠

同母弟御,素無名,嶠輕侮之,以此爲損。卒於官,贈光祿大夫。郁以公彊當世,致位尚書令。 於黃門郎遷中書令,轉尙書。慇懷太子初立,以嶠爲少保,加散騎常侍。家產豐富,擬於王公,而性至儉吝。

洽同郡許混者,許劭子也。 清醇有鑒識,明帝時爲尙書。(Ti

(二) 砌字子將。 將見之乎?」 流,絜士盈朝。 匐椒門,承風而驅,官以賄成,惟砌不過其門。 廣陵(徐孟本) [徐孟玉]來臨汝南,聞劭高名,請爲功曹。 饕餮放 者,不可殫記。 章,時年四十六。 發明樊子昭於醫幘之肆,出虞永賢於牧豎,召李淑才鄉閭之閒,擢郭子瑜鞍馬之吏,援楊孝祖,舉和陽士,茲六賢 一、皆當世之令懿也。其餘中流之士,或舉之於淹滯,或顯之乎重齒,莫不賴劭顧歎之榮。 汝南先賢傳曰:'召陵謝子微,高才遠識,見劭年十八時,乃歎息曰:「此則希世出衆之偉人也。」 劭始 **遂單車而歸。** 袁紹公族好名,爲濮陽長,棄官來還,有副車從騎,將入郡界,紹乃歎曰:「吾之輿服, 其探擿僞行,抑損虛名,則周之單襄,無以尚也。劭宗人許栩,沉沒榮利,致位司徒。 有子曰混,顯名魏世 辟公府掾,拜鄢陵令,方正徵,皆不就。避亂江南,所歷之國,必翔而後集。 凡所拔育, 舉宗莫不匍 豈可使許子 顯成令德

爲諸生所白,匡怒收治。舉宗惶怖,不知所責多少,懼繫者不救。林往見匡同縣胡母彪曰: 於屬縣微伺吏民罪負,便收之,考責錢穀贖罪,稽遲則夷滅宗族,以崇威嚴。|林叔父撾客, 日:「雖當下客,臨子字父,何拜之有?」於是咸共嘉之。〔1〕太守王匡起兵討董卓,遣諸生 常林宇伯槐,河內溫人也。年七歲,有父黨造門,問林:「伯先在否?汝何不拜!」林

當時旱蝗,林獨豐收,盡呼比鄰,升斗分之。依故河間太守陳延壁。陳、馮二姓,舊族冠冕。 若響,克亂在和,何征不捷。 苟無恩德,任失其人,覆亡將至,何暇匡翼朝廷,崇立功名乎? 沖,賊臣虎據,華夏震慄,雄才奮用之秋也。 若欲誅天下之賊,扶王室之微,智者望風,應之 張楊利其婦女,貪其資貨。林率其宗族,爲之策謀。見圍六十餘日,卒全堡壁。 君其藏之!」因說叔父見拘之意。|彪卽書責|匡,|匡原|林叔父。|林乃避地|上黨, 「王府君以文武高才,臨吾鄙郡。 鄙郡表裏山河,土廣民殷,又多賢能,惟所擇用。今主上幼 耕種山阿。

魏略曰:林少單貧。 野,其相敬如賓 雖貧,自非手力,不取之於人。性好學,漢末爲諸生,帶經耕組。其妻常自餽餉之,林雖在田

雖克不武。」文帝從之,遣將往伐,應時克滅。 犬羊相聚,智小謀大,不能爲害。方今大軍在遠,外有彊敵,將軍爲天下之鎭也,輕動遠舉, 博陵,又在幽州,賊之形勢,可料度也。北方吏民,樂安厭亂,服化已久,守善者多。」銀、伯 荀緯,太祖皆以爲縣長。 爲五官將,林爲功曹。太祖西征,田銀、蘇伯反,幽、冀扇動。文帝欲親自討之,林曰:「昔忝 并州刺史高幹表爲騎都尉,林辭不受。後刺史梁習薦州界名士林及楊俊、王凌、王象、 林宰南和,治化有成,超遷博陵太守、幽州刺史,所在有績。文帝

出爲平原太守、魏郡東部都尉,入爲丞相東曹屬。 魏國旣建,拜尙書。文帝踐阼,遷少

貞侯。子旹嗣,爲泰山太守,坐法誅。 欲致之公輔,而林遂稱疾篤。 爲後生之法。 邑耆德,每爲之拜。 或謂林曰:「司馬公貴重,君宜止之。」 府,封樂陽亭侯,日華大司農。 貴非吾之所畏,拜非吾之所制也。」言者踧踖而退。〔1〕時論以林節操淸峻, 拜光祿大夫。 年八十三,薨,追贈驃騎將軍,葬如公禮,諡曰 明帝即位,進封高陽鄉侯,徙光祿勳太常。 **曽弟靜紹封。〔三〕** 林日:「司馬公自欲敦長幼之敍, 晉宣王以林鄉

- [1]魏略曰:林性旣清白,當官又嚴。少府寺與鴻臚對門,時崔林爲鴻臚。崔性闊達,不與林同,數數聞林撾吏聲,不 覺答曰:「不也。」 |崔曰:「卿不爲廷尉,昨夜何故考囚乎?」 |林大慚,然不能自止。 以爲可。|林夜撾吏,不勝痛,叫呼敖敖徹曙。明日,崔出門,與|林車相遇,乃啁|林曰:「聞卿爲廷尉,爾邪?」|林不
- Ξ 魏略曰:初,林少與司馬京兆善。 以林補之。 案魏略此語,與本傳反。 太傅每見林,輒欲跪。林止之曰:「公尊貴矣,止也!」 臣松之以爲林之爲人,不畏權貴者也。 論其然否,謂本傳爲是。 及司徒缺, 太傅有意欲
- 魏略以林及吉茂、沐並、時苗四人爲淸介傳。

案晉書,諸葛誕反,大將軍東征,皆坐稱疾,爲司馬文王所法。

則共入武功南山 坐其宗人吉本等起事被收。 曰:「我坐書也。」會鍾相國證茂、本服第已絕,故得不坐。後以茂爲武陵太守,不之官。轉聞相,以國省,拜議 吉茂字叔暢,馮翊池陽 ,隱處精思數歲。 人也,世爲著姓。好書,不恥惡衣惡食,而恥一物之不知。 先是科禁內學及兵書,而茂皆有,匿不送官。 州舉茂才,除臨汾令,居官清靜, 吏民不忍欺。 及其被收,不知當坐本等,顧謂其左右 建安初,關中始平,茂與扶風蘇 轉為武德侯 庶子。 二十二年,

鄎。 通人。 怨怒不肯哭。至歲終,蘇舉茂。議者以爲茂必不就,及舉旣到而茂就之,故時人或以茂爲畏鯀,或以茂爲髦士 趙溫薨,自以爲故吏,違科奔喪,爲司隸鍾繇所收,遂伏法。茂時爲白衣,始有淸名於三輔,以爲兄坐追義而 效汝父子冠幘劫 以下,至于郎吏,功德材行所任。茂同郡護羌校尉王琰,前數爲郡守,不名爲淸白。 饋遺,一不肯受。 景初中病亡。 嘉時還爲散騎郎,馮翊郡移嘉爲中正。 人邪!! 雖不以此高人,亦心疾不義而貴且富者。 自茂修行,從少至長,多則被裘,夏則裋褐,行則步涉,食則茨藿,臣役妻子,室如懸磬。 初,茂同產兄黃,以十二年中從公府掾爲長陵令。是時科禁長吏擅去官, 嘉敍茂雖在上第,而狀甚下,云:「德優能少。」茂慍曰:「痛乎, 先時國家始制九品,各使諸郡選置中正,差敍自公卿 而琰子嘉仕歷諸縣, 而黃聞司徒 亦復 我 為

也。

有見。 狀聞。 異域如此。 作食,有先熟者呼後熟者,言:「共食來。」後熟者答言:「不也。」 吏,由是放散十餘年。 務者終爲小人,然非聖人莫能履其從容也。是以富貴者有驕奢之過,而貧賤者譏於固陋,於是養生送死,苟竊非 無常,豫作終制 果,不畏彊禦,丞相召署軍謀掾。 沐並字德信,河閒人也。 未辦之間,肇人從入並之閣下,呴呼罵吏。一並怒,因躡履提刀而出,多從吏卒,欲收肇。 有詔:「肇爲牧司爪牙吏,而並欲收縛,無所忌憚,自恃淸名邪?」 雖自華夏,不知者以爲前世人也。 ,戒其子以儉葬,曰:「告雲、儀等:夫禮者,生民之始敎,而百世之中庸也。故力行者則爲君子,不 至正始中,爲三府長史。 少孤苦,袁紹父子時,始爲名吏。 黄初中,爲成皋令。 爲長史八年,晚出爲濟陰太守,召還,拜議郎。 時吳使朱然、諸葛瑾攻圍樊城,遣船兵於峴山 校事劉肇出過縣,遣人呼縣吏,求索稾穀。 有志介, 嘗過姊, 姊爲殺雞炊黍而不留也。 呼者曰:「汝欲作沐德信邪?」 遂收欲殺之。(\) 髠決減死,刑竟復 年六十餘, 東斫材, 肇覺知驅走,具以 其名流 是時蝗旱,官無 牂牁人兵 然為人公 播於

魏

和常楊杜趙裴傳第二十三

靈祖。 禮。 極。 **胔乎哉?吾以材質滓濁,汙於淸流。** 死生之命,吾有慕於道矣。 聲,止婦女之送,禁弔祭之賓,無設摶治粟米之奠。又戒後亡者不得入藏,不得封樹。 或矜之!使死而有知,吾將屍視。」至嘉平中,病甚。臨困,又敕豫掘埳。 求,從吾所好。 僵燥, 託類神仙。 久容耳。至夫末世,緣生怨死之徒,乃有含珠鱗柙,玉牀象衽,殺人以狗;壙穴之內,錮以紵絮,藉以蜃炭,千載 盡性、陶冶變化之實論也。 由斯觀之,陽虎璵璠,甚於暴骨,桓魋石椁,不如速朽。此言儒學撥亂反正、鳴鼓矯俗之大義也,未是夫窮理 奚以棺椁爲牢,衣裳爲纏?屍繁地下,長幽桎梏,豈不哀哉!昔莊周闊達,無所適莫;又楊王孫裸體, 顧 源幼昏,未知臧否,若將逐俗,抑廢吾志,私稱從令,未必爲孝;而犯魏顯聽治之賢,爾爲棄父之命, 今年過耳順,奄忽無常,苟得獲沒,即以吾身襲於王孫矣。 於是大教陵遲,競於厚葬,謂莊子爲放蕩,以王孫爲戮屍,豈復識古有衣薪之鬼,而野有狐狸之 夫道之爲物,惟恍惟忽,壽爲欺魄,天爲鳧沒,身綸有無,與神消息,含悅陰陽,甘夢太 若能原始要終,以天地爲一區,萬物爲獨狗,該覽玄通,求形景之宗, 昔忝國恩,歷試宰守,所在無效,代匠傷指,狼跋首尾, 戒氣絕,令二人舉屍卽埳,絕哭泣之 上冀以贖市朝之逋罪, 妻子皆遵之。 無以雪恥。 同禍福之素,一 下 以親道化之 如 貴不 不 可

下,旦夕射之。 能寬,然紀人之短,雖在久遠,銜之不置。 不識父,自當隨母。」苗不聽,時人皆以爲激,然由此名聞天下。 濟爲治中。 時苗字德胄,鉅鹿人也。少清白,爲人疾惡。 居官歲餘,牛生一犢。 苗以初至往謁濟,濟素嗜酒,適會其醉,不能見苗。 州郡雖知其所爲不恪,然以其履行過人,無若之何。又其始之官,乘藏奪 及其去,留其懷,謂主錄曰:「令來時本無此懷, 犢是淮南所生有也。」羣吏曰:「六畜 如所急蔣濟者,仕進至太尉,濟不以苗前毀己為嫌,苗亦不以濟貴更 建安中,入丞相府。出爲壽春令,令行風靡。 苗恚恨還,刻木爲人,署曰「酒徒蔣濟」, 還爲太官令,領其郡中正,定九品,於敍人才不 音飯。 揚州治在其縣 車,黃牸牛,布被 置之牆 時蔣

達之衢,必爲戰場,乃扶持老弱詣京、密山間,同行者百餘家。|俊振濟貧乏,通共有無。 族知故爲人所略作奴僕者凡六家,俊皆傾財贖之。司馬宣王年十六七,與俊相遇,俊曰: 讀書,因被箠楚。一俊嘉其才質,即贖象著家,聘娶立屋,然後與別。 實理但有優耳。」優轉避地幷州。本郡王象,少孤特,爲人僕隸,年十七八,見使牧羊而私 「此非常之人也。」又司馬朗早有聲名,其族兄芝,衆未之知,惟俊言曰:「芝雖夙望不及朗, 楊俊字季才,河內獲嘉人也。受學陳留邊讓,讓器異之。俊以兵亂方起,而河內處四

守。文帝踐阼,復在南陽。時王象爲散騎常侍,薦俊曰:「伏見南陽太守楊俊,秉純粹之茂 其智能,宜還本朝,宣力輂轂,熙帝之載。」 質,履忠肅之弘量,體仁足以育物,篤實足以動衆,克長後進,惠訓不倦,外寬內直,仁而有 俊以身方罪免,牋辭太子。太子不悅,曰:「楊中尉便去,何太高遠邪!」遂被書左遷平原太 稱之。徙爲征南軍師。魏國旣建,遷中尉。太祖征漢中,魏諷反於鄴,悛自劾詣行在所。 自初彈冠,所歷垂化,再守南陽,恩德流著,殊鄰異黨,襁負而至。今境守清靜,無所展 太祖除俊曲梁長,入爲丞相掾屬,舉茂才,安陵令,遷南陽太守。宣德教,立學校,吏民

俊,叩頭流血,帶不許。|俊日:「吾知罪矣。」 遂自殺。 衆寃痛之。 (1) 之。黃初三年,車駕至宛,以市不豐樂,發怒收俊。尚書僕射司馬宣王、常侍王象、荀緯請 定,密訪羣司。俊雖並論文帝、臨菑才分所長,不適有所據當,然稱臨菑猶美,文帝常以恨 士;後固歷位郡守,恂御史、縣令,其明鑒行義多此類也。 俊自少及長,以人倫自任。 同郡審固、陳留衞恂本皆出自兵伍,俊資拔獎致,咸作佳 初,臨菑侯與俊善,太祖適嗣未

(1)世語曰:俊二孫:覽字公質,汝陰太守;猗字公彥,尚書:晉東海王越舅也。 覽子沈,字宣弘,散騎常侍。 乃出。象自恨不能濟俊,遂發病死。 知楊俊與卿本末耳。 文,知俊必不冤。 閉市門。 文采溫雅,用是京師歸美,稱爲儒宗。 車駕南巡,未到宛,有詔百官不得干豫郡縣。 及車駕到,而宛令不解詔旨: **瑀、路粹等亡後,新出之中,惟象才最高。魏有天下,拜象散騎侍郎,遷爲常侍,封列侯。** 魏略曰:王象字義伯。 像從延康元年始撰集,數歲成,藏於祕府,合四十餘部,部有數十篇,通合八百餘萬字。 像旣性器和厚,又 帝聞之, 乃當帝前叩頭,流血竟面,請傻減死一等。 忿然曰:"「吾是寇邪?」乃收宛令及太守楊俊。 今聽卿,是無我也。 既爲俊所知拔,果有才志。建安中,與同郡南緯等俱爲魏太子所禮待。及王粲、陳琳、阮 卿寧無俊邪?無我邪?」像以帝言切,乃縮手。帝遂入,決俊法,然後 帝不答,欲釋入禁中。象引帝衣,帝顧謂象曰:「我 韶問尚書:「漢明帝殺幾二千石?」 時象見詔 受詔撰皇覽, 使象領秘

杜襲字子緒,潁川定陵人也。曾祖父安,祖父根,著名前世。三襲避亂荆州,劉表待以

豈謂劉牧當爲撥亂之主,而規長者委身哉?子若見能不已,非吾徒也。 同郡繁欽數見奇於表,襲喩之曰:「吾所以與子俱來者,徒欲龍蟠幽藪,待時鳳翔。 吾其與子絕矣!」

欽慨然曰:「請敬受命。」襲遂南適長沙。

先賢行狀曰:安年十歲,名稱鄕黨。 伏誅。 趸。 安帝謂根久死。 得蘇息,遂閉目不動搖。經三日,乃密起逃竄,爲宜城山中酒家客,積十五年,酒家知其賢,常厚敬待。鄧后崩, 令不忍致理,將與俱亡。縣中豪彊有告其處者,致捕得。安深疾惡之,到官治戮, 遷濟陰太守,以德讓爲政,風移俗改。 天下同類知故不少,何至自苦歷年如此?」 根舉孝廉,除郎中。 通者,東至門,安乃發壁出書,印封如故,當時皆嘉其慮遠。三府並辟,公車特徵,拜宛令。先是宛有報讎者,其 逃避不見。時貴戚慕安高行,多有與書者,輒不發,以慮後患,常鑿壁藏書。後諸與書者果有大罪, 後徵拜巴郡太守,率身正下,以禮化俗。 誅者皆絹囊盛,於殿上撲地。執法者以根德重事公,默語行事人,使不加力。 以根等忠直,普下天下,錄見誅者子孫。 時和熹鄧后臨朝,外戚橫恣,安帝長大,猶未歸政。 至十三,入太學,號曰神童。 年七十八以壽終,棺不加漆,斂以時服。 根答曰:「周旋人間,非絕迹之處。 以病卒官,時服薄斂,素器不漆,子自將車。 根乃自出,徵詣公車,拜符節令。 旣名知人,清高絕俗。 根乃與同時郎上書直諫,鄧后怒,收根等 長吏下車 邂逅發露, 禍及親 肆之於市。 誅訖,車載城外, 洛陽令周行數候安,安常 ,常先詣安、根墓 州郡賢之,表章墳墓。 或問根:「往日遭難 懼有司繩彈, 知,故不爲也。」 推捕所與交 根以撲輕 致祠。 逐自

長吏皆斂民保城郭,不得農業。 建安初,太祖迎天子都許。 襲逃還鄕里,太祖以爲西鄂長。 野荒民困,倉庾空虚。 襲自知恩結於民,乃遣老弱各分散 縣濱南境,寇賊縱橫。

魏

率與戮力。吏民感恩,咸爲用命。 就田業, 創,賊得入城。 十餘人,與之要誓。其親戚在外欲自營護者,恣聽遣出;皆叩頭願致死。於是身執矢石, 更民慕而從之如歸。[]] 留丁彊備守,吏民歡悅。 襲帥傷痍吏民決圍得出,死喪略盡,而無反背者。遂收散民,徙至摩陂營, 會荆州出步騎萬人來攻城,襲乃悉召縣吏民任拒守者五 臨陳斬數百級,而襲衆死者三十餘人,其餘十八人盡被

 \subseteq 九州春秋日: 聲,恐懼,入室閉戶,牽被覆頭。相攻半日,稍敢出面。其明,側立而聽。二日,往出戶問消息。至四五日,乃更 負楯親鬭,語子緒曰:「勇可習也。」 建安六年,劉表攻西鄂, 西鄂長杜子緒帥縣男女嬰城而守。 時南陽功曹柏孝長亦在城中, 聞兵攻

淵爲 心,三軍途定。 祖還,拜襲駙馬都尉,留督漢中軍事。 盡邪?卿晝侍可矣,悒悒於此,欲兼之乎!」後襲領丞相長史,隨太祖到漢中討張魯。 獨見,至于夜半。 與王粲、和洽並用。 . 劉備所沒,軍喪元帥,將士失色。 司 記 隸 鍾 繇 表拜議郎參軍事。 太祖東還,當選留府長史,鎭守長安,主者所選多不當,太祖令曰:「釋騏驥 **繁性躁競,起坐日:「不知公對杜襲道何等也?」洽笑答日:「天下事豈有** 粲彊識博聞,故太祖游觀出入,多得驂乘,至其見敬不及洽、襲。 荀彧又薦襲, 太祖以爲丞相軍祭酒。 襲與張郃、郭淮糾攝諸軍事, 綏懷開導,百姓自樂出徙洛、鄴者,八萬餘口。 權宜以郃爲督,以一衆 魏國旣建,爲侍中, 夏侯 襲嘗

而 不乘,焉皇皇而更索?」遂以襲爲留府長史,駐關中。

撫攸,攸卽歸服。 攸,共討彊敵。」太祖橫刀於膝,作色不聽。 帝初甚不悅,後乃追思。 **鼠發機,萬石之鍾不以莛撞起音,今區區之許攸,何足以勞神武哉?」太祖曰: 豺狼當路而狐狸是先,人將謂殿下避彊攻弱,進不爲勇,退不爲仁。** 人邪?」|太祖曰:「凡人也。」|襲曰:「夫惟賢知賢,惟聖知聖,凡人安能知非凡 勿言之,何待下之不闡乎?」太祖曰:「許攸慢吾,如何可置乎?」襲曰:「殿下謂許攸何 時將軍許攸擁部曲,不附太祖而有慢言。太祖大怒,先欲伐之。 襲曰:「若殿下計是邪,臣方助殿下成之;若殿下計非邪,雖成宜改之。殿下逆臣, 時夏侯尙暱於太子,情好至密。 語在倘傳。 其柔而不犯,皆此類也。 襲入欲諫,太祖逆謂之曰:「吾計以定,卿勿復 襲謂尚非益友,不足殊待,以聞太祖。 臣聞千鈞之弩不爲鼷 羣臣多諫:「可招懷 「善。」 | | | | | | | | | **人邪?方今** 如

爲尙書。 軍 百五十戶。 軍 ·師,分邑百戶賜兄<u>基</u>爵關 文帝即王位,賜爵關內侯。 明帝 以疾徵還,拜太中大夫。薨,追贈少府,諡曰定侯。子會嗣 即位,進封平陽鄉侯。 內侯。 及踐作,爲督軍糧御史,封武平亭侯,更爲督軍糧執法,入 諸葛亮出秦川 眞薨,司馬宣王代之,襲復爲軍師, 大將軍曹眞督諸軍拒亮, 增邑三百,弁前五 徙襲爲大將

送綿絹 獻 叛, 慰撫,所斂綿絹,皆俾還之。」「彧報曰:「輒白曹公,公文下郡,綿絹悉以還民。」上下歡喜, 郡人執守忠節,在險不貳。 將軍相持甚急,左右郡縣背叛乃爾。 皆得死罪。 **遂扶持老弱詣太祖,太祖以儼爲朗陵長。縣多豪猾,無所畏忌。儼取其尤甚者,收縛案驗,** 郡內遂安。 曰:「誠亦如君慮;然當權其輕重,小緩調,當爲君釋此患。」乃書與荀彧曰:「今陽安郡當 諸郡多受其命。 帝都許 懷附者復收其綿絹,小人樂亂,能無遺恨!且遠近多虞,不可不詳也。」 趙儼字伯然,潁川陽翟人也。 ,道路艱阻,必致寇害。 ,儼謂欽曰:「曹鎭東應期命世,必能匡濟華夏,吾知歸矣。」建安二年,年二十七, **儼旣囚之,乃表府解放,自是威恩並著。時袁紹舉兵南侵,遣使招誘豫州諸郡,** 惟陽安郡不動,而都尉李通急錄戶調。 微善必賞,則爲義者勸。 百姓困窮,鄰城並叛,易用傾蕩,乃一方安危之機也。 避亂荆州,與社襲、繁欽通財同計,合爲一家。太祖始迎 若綿絹不調送,觀聽者必謂我顧望,有所須待也。」嚴 善爲國者,藏之於民。以爲國家宜垂 儼見通曰:「方今天下未集,諸郡並 通日:「紹與大 且此

協; 于禁、張遼、張郃、朱靈、李典、路招、馮楷七軍。 復爲丞相主簿,遷扶風太守。 使儼并參三軍,每事訓喩,遂相親睦。 入爲司空掾屬主簿。〔1〕時于禁屯潁陰,樂進屯陽翟,張遼屯長祉,諸將任氣,多共不 太祖征荆州,以嚴領章陵太守,徙都督護軍,護 太祖徙出故

寇害,儼率署等追到新平,大破之。 屯田客呂並自稱將軍,聚黨據陳倉,嚴復率署等攻之, 韓遂、馬超等兵五千餘人,使平難將軍殷署等督領,以儼爲關中護軍,盡統諸軍。 羌虜數來

賊卽破滅

魏略曰:太祖北拒袁紹,時遠近無不私遺牋記,通意於紹者。 不 臣松之案魏武紀"破紹後,得許下軍中人書,皆焚之。若故使人搜閱,知其有無,則非所以安人情也。 必敗意,通乃止。 及紹破走,太祖 **使人搜閱紹記室,惟不見通書疏 懺與領陽安太守李通同治** ,陰知儼必爲之計,乃曰:「此必 ,通亦欲遣使。 趙伯 然 疑此 |儼爲 也。 陳紹

定問」。 杰 豫,促撫寧之。且爲之元帥,旣不能安輯, 問,各驚,被甲持兵,不復自安。 四十里,兵果叛亂,未知署吉凶。 B 一呼所從人,喻以成敗,慰勵懇切。 ,儼慮其有變,乃自追至斜谷口,人人慰勞,又深戒署。 簡諸姦結叛者八百餘人,散在原野,惟取其造謀魁率治之,餘一不問。 時被書差千二百兵往助漢中守,署督送之。行者卒與室家別, 儼曰:「雖疑本營與叛者同謀,要當聞行者變,乃發之。 儼欲還,既等以爲「今本營黨已擾亂,一身赴之無益, 而儼自隨步騎百五十人,皆與叛者同部曲, 皆慷慨曰:「死生當隨護軍 身受禍難,命也。」遂去。行三十里止,放馬息, 還宿雍州刺 , 叉有欲善不能自定,宜及猶 不敢有二。」前到諸營,各 皆有 史張旣舍。 漫色。 那縣所收送,皆 或 婚姻 署發後 署 軍 得得 叫

定,與儼同心。其當去者亦不敢動,儼一日盡遣上道,因使所留千人,分布羅落之。 以諸營圖爲邪謀。若或成變,爲難不測。 至,乃復脅喩,幷徙千人,令相及共東,凡所全致二萬餘口。〔〕〕 千人,當須到乃發遣,而事露,諸營大駭,不可安喻。 | 儼謂諸將曰:「舊兵旣少,東兵未到,是 厚者千人鎭守闘中,其餘悉遣東。便見主者,內諸營兵名籍,案累重,立差別之。 乃卽相率還降。儼密白:「宜遣將詣大營,請舊兵鎭守關中。」太祖遣將軍劉柱將二 因其狐疑,當令早決。」遂宣言當差留新兵之溫 東兵尋 留者意

[1] 孫盛曰:盛聞爲國以禮,民非信不立。 周成不棄桐葉之言,晉文不違伐原之誓,故能隆刑措之道, |儼旣詐留千人,使效心力,始雖權也,宜以信終。 兵威旣集,而又逼徙。 信義喪矣,何以臨民? 建一匡之功。

到,羽圍仁遂堅,餘救兵未到。見所督不足解圍,而諸將呵責見促救。儼謂諸將曰:「今賊 即走南還。仁會諸將議,咸曰:「今因羽危懼,必可追禽也。」 儼曰:「權邀羽連兵之難,欲掩 賊必矣。 軍偪圍,遣諜通仁,使知外救,以勵將士。計北軍不過十日,尙足堅守。然後表裏俱發,破 圍素固,水潦猶盛。我徒卒單少,而仁隔絕不得同力,此舉適所以弊內外耳。當今不若前 軍亦至,幷勢大戰。羽軍旣退,舟船猶據沔水,襄陽隔絕不通,而孫權襲取羽輜重,羽聞之, 關羽圍征南將軍曹仁於樊。儼以議郎參仁軍事南行、(遷)〔與〕平寇將軍徐晃俱前。旣 如有緩救之戮,余爲諸軍當之。」諸將皆喜,便作地道,箭飛書與仁,消息數通,北

存之以爲權害。 制其後,顧栩還救,恐我承其兩疲,故順辭求效,乘釁因變,以觀利鈍耳。 太祖聞羽走,恐諸將追之,果疾敕仁,如儼所策 若深入追北,權則改虞於彼,將生患於我矣。 王必以此爲深慮。」仁 今羽已孤迸,更宜 乃解

凉。 郡辛毗、陳羣、杜襲並知名,號曰辛、陳、杜、趙云。 邑六百戶,監劑州諸軍事,假節。 **|侯,轉爲度支中郞將,遷尙書。** 入爲大司農。 關內侯。 正始四年,老疾求還,徵爲驃騎將軍,自己遷司空。 文帝卽王位,爲侍中。頃之,拜駙馬都尉,領河東太守,典農中郞將。 孫權寇邊,征東大將軍曹休統五州軍禦之,徵儼爲 齊王卽位,以儼監雍、涼諸軍事,假節, 從征吳,到廣陵,復留爲征東軍師。 會疾,不行,復爲尙書,出監豫州 轉征蜀將軍,又遷征西將軍,都督雍 薨,諡日穆侯。子亭嗣。 軍師。 諸軍事,轉大司馬軍 明帝即位,進封都鄉 權衆退,軍還,封宜土亭 黃初三年,賜爵 初,嚴與同 酮

魏略曰:舊故四征有官廚財籍,遷轉之際,無不因緣。 雜藥材數箱,懺笑曰:「人言語殊不易,我偶問所服藥耳,何用是爲邪?」 而儼义手上車,發到霸上,忘持其常所服藥。 遂不取 。 雍州聞之,乃

劉牧非霸王之才,乃欲西伯自處,其敗無日矣。」遂南適長沙。 裴潛字文行,河東聞喜人也。(二) 避亂荆州, 劉表待以賓禮。 潛私謂所親王粲、司馬芝 太祖定荆州,以潛參丞

六七一

相軍事 如 ? _ 潛曰:「使居中國,能亂人而不能爲治也。若乘閒守險,足以爲一方主。」 出歷三縣令,入爲倉曹屬。 太祖問潛曰:「卿前與劉備俱在荆州, 卿以備才略何

(一)魏略曰:潛世爲著姓。父茂,仕靈帝時,歷縣令、郡守、尚書。建安初,以奉使率導關中諸將討李傕有功, 潛少不脩細行,由此爲父所不禮。 封列

爲峻。 百姓歸 單于自知放橫日久,內不自安。 至,乃遣鄢陵侯彰爲驍騎將軍征之。 訟 所掠婦女、器械、財物。 太守莫能治正,太祖欲授潛精兵以鎭討之。 不可以兵威迫也。」 爭所由生也。 時代郡大亂,以潛爲代郡太守。 ر الرا الرا 今計者必以潛爲理過嚴,而事加寬惠;彼素驕恣,過寬必弛,旣弛又將攝之以法,此 在代三年,還爲丞相理曹掾,太祖褒稱治代之功,潛曰:「潛於百姓雖寬,於諸胡 以勢料之,代必復叛。」 **遂**單車之郡。 潛案誅郡中大吏與單于爲表裏者郝溫、郭端等十餘人,北邊大震, 今多將兵往,必懼而拒境,少將則不見憚。 單于驚喜。 烏丸王及其大人,凡三人,各自稱單于,專制郡事。 於是太祖深悔還潛之速。 潛辭曰:「代郡戶口殷衆,士馬控弦,動有萬數。 潛撫之以靜。 單于以下脫帽稽顙,悉還前後 後數十日, 宜以計謀圖之, 三單于反問 前

散騎常侍。 潛出為 流國相,遷兗州刺史。 出爲魏郡、潁川典農中郎將,奏通貢舉,比之郡國,由是農官進仕路泰。 太祖次摩陂,歎其軍陳齊整,特加賞賜。 文帝踐阼,

官,拜光祿大夫。正始五年薨,追贈太常,諡曰貞侯。〔〕子秀嗣。 州刺史,賜爵關內侯。 坐,瓦器數枚,其餘一無所設。 候,邑二百戶。入爲尙書令,奏正分職,料簡名實,出事使斷官府者百五十餘條 明帝卽位,入爲尙書。 秀,咸熙中爲尙書僕射。曰 出爲河南尹,轉太尉軍師、大司農,封清陽亭 遺令儉葬, 墓中惟置 喪父去

- 魏略曰:時遠近皆云當爲公,會病亡。 履檢校度,自魏興少能及者。 以父在京師,出入薄軬車;羣弟之田廬,常步行;家人小大或丼日而食;其家教上下相奉,事有似於石奮。 省恪然。每之官,不將妻子。妻子貧乏,織藜芘以自供。 潛爲人材博,有雅(要)容,然但如此而已,終無所推進,故世歸其絜而不宗其餘。 始潛自感所生微賤,無舅氏,又爲父所不禮,即折節仕進,雖多所更歷, 又潛爲兗州時,嘗作一胡牀,及其去也, 留以掛柱。 其 凊 叉
- (三)文章敍錄曰:秀字季彥。 於世。 秀典爲制度,封廣川侯。 遷黃門侍郎。 盟會圖及典治官制皆未成。 爽誅,以故吏免。 遷衞國相,累遷散騎常侍、尚書僕射令、光祿大夫。 咸熙中,晉文王始建五等,命 弘通博齊,八歲能屬文,遂知名。 晉室受禪,進左光祿大夫,改封與鹿公,遷司空。著易及樂論,又畫地域圖十八篇,傳行 年四十八,泰始七年薨,諡元公,配食宗廟。 大將軍曹爽辟。 喪父服終, 少子頗,字逸民,襲封 推財與兄弟。 年二十五,

尙書左僕射。 荷綽冀州記曰 "頗爲人弘雅有遠識,博學稽古, 趙王倫以其望重,畏而惡之,知其不與賈氏同心,猶被枉害。 履行高整, 自少知名。 歷位太子中庶子、侍中尚書。 元康末, 爲

無二論,以矯虛誕之弊,文辭精富,爲世名論。子嵩,字道文。「荀綽稱嵩有父祖風。爲中書郎,早卒。 臣松之案陸機惠帝起居注稱「頠雅有遠量,當朝名士也」,又曰「民之望也」。 **随理具淵博,贍於論難,著崇有、貴**

邈,字景聲,有雋才,爲太傅司馬越從事中郎,假節監中外營諸軍事。

潛 少弟徽,字文季 ,遊擊將軍。 次康,字仲豫,太子左衞率。 次楷,字叔則,侍中中書令、光祿大夫、開府。 ,冀州刺史。 有高才遠度,善言玄妙。事見荷粲、傅嘏、王弼、管輅諸傅。 徽長子黎, 次綽,字季舒,黃門 字伯宗,

侍郎,

早卒,追贈長水校尉。康、楷、綽皆爲名士,而楷才望最重。

在 純,黄門侍郎。 遐,太傅主簿。瓚、遐並有盛名,早卒。 王戎簡要。」 晉諸公贊曰:康有弘量,綽以明達爲稱,楷少與琅邪王戎俱爲掾發名, 此,雖不治事,然識量弘淹,此下人士大敬附之。」次廊,中壘將軍。 文王卽辟爲掾,進歷顯位。 次盾,徐州刺史。 次郃,有器望。 謝鯤爲樂廣傳,稱楷雋朗有識具,當時獨步。 晉元帝爲安東將軍,郃爲長史,侍中王曠與司馬越書曰:「裴郃 楷子瓚,中書郎。 鍾會致之大將軍司馬文王曰:「裴楷清通 黎子苞, 次憲, 豫州刺史。 秦州刺史。

晉諸公贊稱憲有淸識。

魏略列傳以徐福 福事在諸葛亮傳,游楚事在張旣傳。 、嚴幹、李義、張旣、游楚、梁習、趙儼、裴潛、韓宣、黃朗十人共卷,其旣、習、儼、潛四人自有傳,徐 餘韓等四人載之於後。

牀耳。」 史郡,治高陵;以東數縣爲本郡,治臨晉。 會三輔亂,人多流宕,而幹、義不去,與諸知故相浮沈,採樵自活。 年二十餘,幹好擊劍,義好辦護喪事。馮翊甲族桓、田、吉、郭及故侍中鄭文信等,頗以其各有器實,共紀識之。 嚴幹字公仲,李義字孝懿,皆馮翊東縣人也。 逐相附結,皆仕東郡爲右職。 司隸辟幹,不至。 義於縣分當西屬,義謂幹曰:「西縣兒曹,不可與爭坐席, 馮翊東縣舊無冠族,故二人並單家,其器性皆重厚。當中平末, 歲終,郡舉幹孝廉,義上計掾。 逮建安初,關中始開。 養留京師, 韶分馮翊西數縣為左內 爲平陵令,遷 今當共作方 同

耳,公羊未肯也。」 為人機捷,善持論,而幹訥口,臨時屈無以應。 一條謂幹曰:「公羊高竟為左丘明服矣。」 幹曰:「直故吏爲明使君服 問 分散。 始李義以 韶拜議郎,還參州事。 **冗從僕射,遂歷顯職。** ,特善春秋公羊。 |超 直道推誠於人, 破,爲漢陽太守。 義子豐,字宜國,見夏侯玄傳。 司隸鍾繇不好公美而好左氏,謂左氏爲太官,而謂公美爲賣餅家,故數與聲共辯析長短。 會以建策捕高幹,又追錄前討郭援功,封武鄉侯,遷弘農太守。 逮魏封十郡、請義以爲軍祭酒,又爲魏尚書左僕射。及文帝卽位,拜諫議大夫、執金吾衞 故于時陳羣等與之齊好。 遷盆州刺史,以道不通, |幹以孝廉拜||補阪令,病,去官。 雖無他: 黄初中, 材力, 轉爲五官中郎將。 而終仕進不頓躓。 復舉至孝, 明帝時,遷永安太僕, 爲公車司馬令。 及馬超反,幹郡近超,民人 幹從破亂之後, 爲州所請, 更折節 數歲卒。 Ѭ 壆

鴻臚 事當受罰於殿前,已縛,東杖未行。 微,列于諸侯之上,未聞宰士而爲下士諸侯禮也。」 植又曰:「卽如所言,爲人父吏,見其子應有禮否?」 宣又曰: 駐車,使其常從問宣何官?宣云:「丞相軍謀掾也。」 韓宣字景然,勃海人也。 其原,揮腰不下,乃趨而去。 候所說,乃寤曰:「是子建所道韓宣邪!」 植 於禮,臣、子一例也,而宣年又長。」 相遇。 ,數歲卒。 時天新雨 宣前後當官,在能否之間,然善以已恕人。始南陽韓暨以宿德在宣前爲大鴻臚,暨爲人賢,及宣 ,地有泥潦。 爲人短 帝自而送之,笑曰:「此家有瞻諦之士也。」後出爲淸河、東郡太守。明帝時,爲尚書大 小。 宣欲避之,関滾不得去。 文帝輦過,問:「此爲誰?」 植知其枝柱難窮,乃釋去,具爲太子言,以爲辯。 建安中,丞相召署軍謀掾,冗散在鄴。 特原之,遂解其縛。 植叉問曰:「應得唐突列侯否?」宣曰:「春秋之義,王人雖 乃以扇自障,住於道邊。 時天大寒,宣前以當受杖,豫脫袴, 左右對曰:「尚書郎勃海韓宣也。」 嘗於鄴出入宮,於東掖門內與臨菑侯 植嫌宣旣不去,又不爲禮 黄初中,爲尙書郎,嘗以職 纏褌 帝追念前 面 縛; 臨盛 *7*5 及

魏

書

和常楊杜趙裴傳第二十三

在後 亦稱職,故鴻臚中爲之語曰:「大鴻臚,小鴻臚,前後治行曷相如。」 案本志,宣名都不見,惟魏略有此傳, 而

世語列於名臣之流。

異。 至於忿怒,亦終不言。 令,遷襄城典農中郞將、涿郡太守。 |黄朗字文達,沛郡人也。爲人弘通有性實。父爲本縣卒,則感其如此,抗志游學,由是爲方國及其郡士大夫所禮 特與東平右姓王惠陽爲碩交,惠陽親拜朗母於牀下。朗始什黃初中,爲長吏,遷長安令,會喪母不赴,復爲魏 朗既仕至二千石,而惠陽亦歷長安令、酒泉太守。故時人謂惠陽外似麤疏而內堅密,能不 以明帝時疾病卒。 始朗爲君長,自以父故,常忌不呼鈴下伍伯,而呼其姓字,

顧朗之本末,事朗母如己母,爲通度也。

楊不足,至於檢己,老而益明,亦難能也。 若皆非似龍之志也,其何能至於此哉?李推至道,張工度主,韓見識異,黃能拔萃, 魚緣曰:世稱君子之德其猶龍乎,蓋以其善變也。 昔長安市儈有劉仲始者,一爲市吏所辱,乃感激,蹋其尺折之, 里,亦未爲易也。 **遂行學問,經明行脩,流名海內。** 游翁慷慨,展布腹心,全軀保郡,見延帝王,又放陸生,優游宴戲,亦一實也。梁、趙及裴,雖張 後以有道徵,不肯就,衆人歸其高。 余以爲前世偶有此耳,而今徐、 各著根於石上, 而垂陰乎千 嚴復參之,

潛平恆貞幹,皆一世之美士也。 評曰:和洽清和幹理,常林素業純固,楊俊人倫行義,杜襲溫粹識統,趙儼剛毅有度,裴 至林能不繫心於三司,以大夫告老,美矣哉!

韓崔高孫王傳第二十四

庸賃積資,陰結死士,遂追呼尋禽茂,以首祭父墓,由是顯名。舉孝廉,司空辟,皆不就。 陵界,所在見敬愛,而表深恨之。暨懼,應命,除宜城長。 危。山民化之,終不爲害。避袁術命召,徙居山都之山。 變名姓,隱居避亂魯陽山中。山民合黨,欲行寇掠。暨散家財以供牛酒,請其渠帥,爲陳安 韓暨字公至,南陽堵陽人也。〔〕同縣豪右陳茂,譖暨父兄,幾至大辟。暨陽不以爲言: 荆州牧劉表禮辟,遂遁逃,南居属 ፓታ

〔1〕楚國先賢傳曰:暨,韓王信之後。祖術,河東太守。父純,南郡太守。

爲排以吹炭。每一熟石用馬百匹,更作人排,又費功力;暨乃因長流爲水排,計其利益,三倍 黃初七年,遷太常,進封南鄕亭侯,邑二百戶。 太祖平荆州,辟爲丞相士曹屬。後選樂陵太守,徙監治謁者。舊時治,作馬排,蕭拜反。 在職七年,器用充實。制書褒歎,就加司金都尉,班亞九卿。 文帝踐阼, 封宜城亭

魏書

洛陽廟,四時蒸嘗,親奉粢盛。崇明正禮,廢去淫祀,多所匡正。 初二年春,詔曰:「太中大夫韓暨,澡身浴德,志節高絜,年踰八十,守道彌固,可謂純篤,老 而益劭者也。其以暨爲司徒。」夏四月薨,遺令斂以時服,葬爲土藏。 時新都洛陽,制度未備,而宗廟主而音石。〔〕皆在鄴都。 暨奏請迎鄴四廟 在官八年,以疾遜位。 諡曰恭侯。(三子肇 神主,建立

〔一〕春秋傳曰:命我先人典司宗祏。注曰:「宗廟所以藏主石室者。」

嗣。

肇薨,子邦嗣。[三]

- 〔三〕楚國先賢傳曰:暨臨終遺言曰:「夫俗奢者,示之以儉,儉則節之以禮。歷見前代送終過制,失之甚矣。若爾曹敬 所闕。 陽吏民供設喪具。 醴 積德履行,忠以立朝,至於黃髮,直亮不虧。 臣備位台司,在職日淺,未能宣揚聖德以廣益黎庶。 聽吾言,斂以時服,葬以土藏,穿畢便葬,爰以瓦器,愼勿有增益。」又上疏曰:「生有益於民,死猶不害於民。況 ;

 晏嬰尙儉,

 遣車降制。

 今司徒知命,

 遺言卿民,必欲崇約,可謂善始令終者也。

 其喪禮所設,皆如故事,勿有 特賜溫明祕器,衣一稱,五時朝服,玉具劍佩。」 懼國典有常,使臣私願不得展從,謹冒以聞,惟蒙哀許。」帝得表嗟歎,乃詔曰:「故司徒韓暨 既登三事,望獲毗輔之助,如何奄忽,天命不永!曾參臨沒,易贊以 寝疾彌留,奄即幽冥。方今百姓農務,不宜勞役,乞不令洛
- (三)楚國先賢傳曰:邦字長林。 帝大怒,遂殺邦。 暨次子縣,高陽太守。 少有才學。 晉武帝時爲野王令,有稱績。爲新城太守,坐舉野王故吏爲新城計吏,武 縣子洪,侍御史。 洪子壽,字德貞

赞諸公贊曰:自贊已下,世治素業,壽能敦尙家風,性尤忠厚。早歷淸職,惠帝踐阼,爲散騎常侍,遷守河南尹。

病卒,贈驃騎將軍。壽妻賈充女。充無後,以壽子謐爲嗣,弱冠爲祕書監侍中,性驕佚而才出衆。

器望,並爲趙王倫所誅。韓氏遂滅。

除鄔長,貧無車馬,單步之官。太祖征壺關,問長吏德政最者,幷州刺史張陟以林對,於是 崔林字德儒,清河東武城人也。少時晚成,宗族莫知,惟從兄蹊異之。太祖定冀州,召

擢爲冀州主簿,徙署別駕、丞相掾屬。

魏國旣建,稍遷御史中丞。

爲寄。」在官一期,寇竊寢息;〔〕猶以不事上司,左遷河閒太守,淸論多爲林怨也。〔三〕 駕曰:「吳中郞將,上所親重,國之貴臣也。 仗節統事,州郡莫不奉牋致敬,而崔使君 展,寧當相累邪?此州與胡虜接,宜鎭之以靜,擾之則動其逆心,特爲國家生北顧憂,以此 相聞。若以邊塞不脩斬卿,使君寧能護卿邪?」別駕具以白林,林曰:「刺史視去此州如脫 文帝踐阼,拜尙書,出爲幽州刺史。 北中郞將吳質統河北軍事,涿郡太守王雄謂林別 初 **不與**

(二)案正氏譜:雄字元伯,太保祥之宗也。

受陛下拔擢之恩,常勵節精心,思投命爲效。言辭激揚,情趣款惻。臣雖愚闇,不識眞僞,以謂雌才兼資文武,忠 果而有謀。歷試三縣,政成人和。及在近職,奉宣威恩,懷柔有術,淸愼持法。臣往年出使,經過雌郡。 知』。臣不自量,竊慕其義。臣昔以人乏,謬充備部職。時涿郡太守王雄爲西部從事,與臣同僚。 魏名臣奏載安定太守孟達薦雄曰:「臣聞明君以求賢爲業,忠臣以進善爲效,故易稱『拔茅連茹』, 雄天性良固 傳曰『舉爾所 自說特

膽智技能文武之姿,吾宿知之。今便以參散騎之選,方使少在吾門下知指歸,便大用之矣。天下之士,欲使皆先 臣受恩深厚,無以報國,不勝悽悽淺見之情,謹冒陳聞。」詔曰:「昔蕭何薦韓信,鄧禹進吳漢,惟賢知賢也。 雄有 烈之性,踰越倫輩。今涿郡領戶三千,孤寡之家,參居其半,北有守兵藩衞之固,誠不足舒雌智力,展其勤幹也。 歷散騎,然後出據州郡,是吾本意也。」 雄後爲幽州刺史。子渾,凉州刺史。次义,平北將軍。司徒安豐侯戎,渾

之子。 太尉武陵侯衍、荆州刺史澄,皆义之子。

[三]魏名臣奏載侍中辛毗奏曰:「昔桓階爲尚書令,以崔林非尚書才,遷以爲河閒太守。」與此傳不同。

諸國豐約故事,使有恆常。 明帝即位,賜爵關內侯,轉光祿勳、司隸校尉。 屬郡皆 罷 非 法 勞所養之民,資無益之事,爲夷狄所笑,此曩時之所患也。乃移書燉煌喩指,并錄前世待遇 使連屬,林恐所遣或非眞的,權取疏屬賈胡,因通使命,利得印綬,而道路護送,所損滋多。 遷大鴻臚。 龜茲王遣侍子來朝,朝廷嘉其遠至,褒賞其王甚厚。 餘國各遣子來朝,閒

除過員吏。 林爲政推誠,簡存大體,是以去後每輒見思。

振其領。 或猥或卒,備之以科條,申之以內外,增減無常,固難一矣。且萬目不張舉其綱,衆毛不整 以陵遲,此卽考課之法存乎其人也。及漢之季,其失豈在乎佐吏之職不密哉?方今軍旅, 散騎常侍劉劭作考課論,制下百僚。林議曰:「案周官考課,其文備矣,自康王以下,遂 皋陶仕虞,伊尹臣殷,不仁者遠。五帝三王未必如一,而各以治亂。易曰:『易簡

惟在守一勿失而已。若朝臣能任仲山甫之重,式是百辟,則孰敢不肅。」 而天下之理得矣。』太祖隨宜設辟,以遺來今,不患不法古也。以爲今之制度,不爲疏闊,

侯,邑六百戶。三公封列侯,自林始也。(三頃之,又進封安陽鄉侯。 所在而治,及爲外司,萬里肅齊,誠台輔之妙器,袞職之良才也。」後年遂爲司空,封安陽亭 之弘量。論其所長以比古人,忠直不回則史魚之儔,清儉守約則季文之匹也。牧守州郡 **秉忠履正本德仗義之士,足爲海內所師表者。竊見司隸校尉崔林,稟自然之正性,體高雅** 景初元年,司徒、司空並缺,散騎侍郎孟康薦林曰:「夫宰相者,天下之所瞻效,誠宜得

(一) 臣松之以爲漢封丞相邑,爲荀悅所畿。魏封三公,其失同也。

義踰湯、武,可謂崇明報德矣,無復重祀於非族也。」(1) 後,及立三恪,禹、湯之世,不列于時,復特命他官祭也。今周公已上,達於三皇,忽焉不祀, 祀。今宗聖侯奉嗣,未有命祭之禮,宜給牲牢,長吏奉祀,尊爲貴神。」 制三府議,博士傳祗 而其禮經亦存其言。今獨祀孔子者,以世近故也。以大夫之後,特受無疆之祀,禮過古帝, 宜如魯相所上。林議以爲「宗聖侯亦以王命祀,不爲未有命也。周武王封黃帝、堯、舜之 以春秋傳言立在祀典,則孔子是也。宗聖適足繼絕世,章盛德耳。至於顯立言,崇明德,則 魯相上言:「漢舊立孔子廟,褒成侯歲時奉祠,辟雍行禮,必祭先師,王家出穀,春秋祭

臣 賢之格言,商較之定準乎!雖妙極則同,萬聖猶一,然淳薄異時,質文殊用,或當時則榮,沒則已焉,是以遺風所 被,冤有深淺。若乃經緯天人,立言垂制,百玉莫之能違,彝倫資之以立,誠一人而已耳。周監二代,斯文爲盛。 然於六經之道,未能及其精致。加以聖賢不興,曠年五百,道化陵夷,憲章殆滅, L松之以爲孟軻稱字我之辭曰:「以予觀夫子,賢於堯舜遠矣。」 又曰:「生民以來,未有盛於孔子者也。」 夫能光明先王之道,以成萬世之功,齊天地之無窮,等日月之久照,豈不有踰於羣聖哉?林曾無史遷洞想之 若使時無孔門,則周典幾乎息 斯非通

明帝又分林邑,封一子列侯。 正始五年薨,諡日孝侯。 子述嗣。〔〕

誠,梅眞慷慨之志,而守其蓬心以塞明義,可謂多見其不知量也。

口]晉諸公贊曰:述弟隨,晉尙書僕射。 疎,至太子右衞率也。初,林識拔同郡王經於民伍之中,卒爲名士,世以此稱之。 爲人亮濟。 趙王倫篡位,隨與其事。 倫敗、隨 亦廢錮 而卒。 |林孫瑋, 性率而

横,而||柔冒艱險詣||蜀迎喪,辛苦荼毒,無所不嘗,三年乃還。 柔從兄幹,袁紹甥也,自己在河北呼柔,柔舉宗從之。 於陳留,吾恐變乘閒作也,欲與諸君避之。」衆人皆以張邈與太祖善,柔又年少,不然其言。 起,陳留四戰之地也。 高柔字文惠,陳留圉人也。 父靖,爲蜀郡都尉。〔〕柔留鄕里,謂邑中曰:「今者英雄並 曹將軍雖據兗州,本有四方之圖,未得安坐守也。 會靖卒於西州,時道路艱澁,兵寇縱 而張府君先得志

(二)陳留耆舊傳曰:靖高祖父固,不仕王莽世,爲淮陽太守所害,以烈節垂名。 固子愼,字孝甫。敦厚少華,有沈深之

|萊太守。 乎?」順曰:「我以勤身凊名爲之基,以二千石遺之,不亦可乎!」子式,至孝,常盡力供養。永初中,螟蝗爲害, 量。 獨不食式麥,圍令周殭以表州郡。太守楊舜舉式孝子,讓不行。後以孝廉爲郎。夾子昌,昌弟賜,並爲刺史、郡 撫育孤兄子五人,恩義甚篤。 老病歸家,草屋蓬戶,甕缶無儲。其妻謂之曰:「君累經宰守,積有年歲,何能不少爲儲畜以遺子孫 琅邪相何英嘉其行履,以女妻焉。英卽車騎將軍熙之父也。愼歷二縣令、東

謝承後漢書曰:幹字元才。才志弘邈,文武秀出。父躬,蜀郡太守。祖賜,司隸校尉。

守。试子弘,孝廉。弘生靖。

案陳留耆舊傳及謝承書,幹應爲柔從父,非從兄也。 未知何者爲誤。

佳吏。 當,獄無留滯,辟爲丞相倉曹屬。〔〕太祖欲遣鍾繇等討張魯,柔諫,以爲今猥遣大兵,西有 韓遂、馬超,謂爲己舉,將相扇動作逆,宜先招集三輔,三輔茍平,漢中可傳檄而定也。 吉臨政,吏嘗有非,猶尙容之。況此諸吏,於吾未有失乎!其召復之。」咸還,皆自勵,咸爲 太祖平袁氏,以柔爲(管)〔菅〕長。縣中素聞其名,奸吏數人,皆自引去。柔敎曰:「昔邴 高幹旣降,頃之以幷州叛。柔自歸太祖,太祖欲因事誅之,以爲刺奸令史;處法允

關,遂、超等果反。

魏氏春秋曰:柔旣處法平允,又夙夜匪懈,至擁膝抱文書而寢。 太祖嘗夜微出,觀察諸吏,見柔,哀之,徐解裘覆

|柔而去。自是辟焉。

魏國初建,爲尚書郎。 轉拜丞相理曹掾,令曰:「夫治定之化,以禮爲首。撥亂之政,以

得殺也。此重刑非所以止亡,乃所以益走耳。」|太祖曰:「善。」即止不殺|金母、弟,蒙活者 絕其意望,而猥復重之,柔恐自今在軍之士,見一人亡逃,誅將及己,亦且相隨而走,不可復 其中時有悔者。愚謂乃宜貸其妻子,一可使賊中不信,二可使誘其還心。正如前科,固已 重其刑。|金有母妻及二弟皆給官,主者奏盡殺之。|柔啓曰:「士卒亡軍,誠在可疾,然竊聞 勉恤之哉!」鼓吹宋金等在合肥亡逃。舊法,軍征士亡,考竟其妻子。太祖患猶不息,更 刑爲先。是以舜流四凶族,皋陶作士。漢祖除秦苛法,蕭何定律。掾清識平當,明于憲典,

通用羣盜,良有以也。」達等後奸利發,太祖殺之以謝於柔。 |祖曰:「卿知達等,恐不如吾也。要能刺舉而辨衆事,使賢人君子爲之,則不能也。 昔叔孫 職,各有所司。今置校事,旣非居上信下之旨。又達等數以憎愛擅作威福,宜檢治之。」太 遷爲潁川太守,復還爲法曹掾。時置校事盧洪、趙達等,使察羣下,柔諫曰:「設官分

宗,咸不顧小人之怨。在漢太宗,亦除妖言誹謗之令。臣愚以爲宜除妖謗賞告之法,以隆 路,又將開凶狡之羣相誣罔之漸,誠非所以息奸省訟,緝熙治道也。 昔周公作誥,稱殷之祖 之,有妖言輒殺,而賞告者。 柔上疏曰:「今妖言者必戮,告之者輒賞。 旣使過誤無反善之 文帝踐阼,以柔爲治書侍御史,賜爵關內侯,轉加治書執法。民閒數有誹謗妖言,帝疾

罪之。」於是遂絕。校事劉慈等,自黃初初數年之閒,舉吏民姦罪以萬數,柔皆請懲虚實; 天父養物之仁。」帝不卽從,而相誣告者滋甚。帝乃下詔:「敢以誹謗相告者,以所告者罪

其餘小小挂法者,不過罰金。四年,遷爲廷尉。

之日,又可特延入,講論得失,博盡事情,庶有裨起天聽,弘益大化。」帝嘉納焉。 任臣於上,賢相良輔股肱於下也。今公輔之臣,皆國之棟梁,民所具瞻,而置之三事,不使 仗阿衡之佐,文、武憑旦、望之力,逮至漢初,蕭、曹之儔並以元勳代作心膂,此皆明王聖主 知政,遂各偃息養高,鮮有進納,誠非朝廷崇用大臣之義,大臣獻可替否之謂也。 古者刑政 有疑,輒議於槐棘之下。自今之後,朝有疑議及刑獄大事,宜數以咨訪三公。三公朝朔望 |魏初,三公無事,又希與朝政。|柔上疏曰:「天地以四時成功,元首以輔弼興治;成湯 帝以宿嫌,欲枉法誅治書執法鮑勛,而柔固執不從詔命。帝怒甚,遂召柔詣臺;遣使

者承指至廷尉考竟勛,勛死乃遣柔還寺。

復辟雍,州立課試,於是天下之士,復聞庠序之敎,親俎豆之禮焉。 陛下臨政,尤迪叡哲,敷 顯。太祖初興,愍其如此,在於撥亂之際,並使郡縣立教學之官。高祖卽位,遂闡其業,興 崇儒,帝者明義。 昔漢末陵遲,禮樂崩壞,雄戰虎爭,以戰陳爲務,遂使儒林之羣,幽隱而不 明帝卽位,封柔延壽亭侯。時博士執經,柔上疏曰:「臣聞瓊道重學,聖人洪訓;褒文

故楚禮申公,學士銳精,漢隆卓茂,搢紳競慕。臣以爲博士者,道之淵藪,六藝所宗,宜隨學 弘大猷,光濟先軌,雖夏啓之承基,周成之繼業,誠無以加也。然今博士皆經明行脩,一國 清選,而使遷除限不過長,懼非所以崇顯儒術,帥勵怠惰也。 孔子稱『舉善而敎不能則勸』,

行優劣,待以不次之位。敦崇道教,以勸學者,於化爲弘。」帝納之。

徵,可庶而致矣。」 資,不營小臺之娛; 去病慮匈奴之害,不遑治第之事。況今所損者非惟百金之費,所憂者 殿舍,上下勞擾;若使吳、蜀知人虛實,通謀幷勢,復俱送死,甚不易也。 昔漢文惜十家之 性,而頃皇子連多夭逝,熊羆之祥叉未感應。羣下之心,莫不悒戚。周禮,天子后妃以下百 非徒北狄之患乎?可粗成見所營立,以充朝宴之儀。乞罷作者,使得就農。二方平定,復 可妙簡淑媛,以備內官之數,其餘盡遣還家。且以育精養神,專靜爲寶。 二十人,嬪嬙之儀,旣以盛矣。竊聞後庭之數,或復過之,聖嗣不昌,殆能由此。臣愚以爲 可徐興。 一虜狡猾,潛自講肄,謀動干戈,未圖束手;宜畜養將士,繕治甲兵,以逸待之。而頃興造 後大興殿舍,百姓勞役;廣采衆女,充盈後宮;後宮皇子連夭,繼嗣未育。|柔上疏日: 昔軒轅以二十五子,傳祚彌遠; 周室以姬國四十, 歷年滋多。 陛下聰達, 窮理盡 帝報曰:「知卿忠允,乃心王室,輒克昌言;他復以聞。」 宜陽典農劉龜竊於禁內射冤,其功曹張京詣校事言之。帝匿京名,收龜 如此,則螽斯之

時獵法甚峻。

復請告者主名,吾豈妄收龜邪?」柔曰:「廷尉,天下之平也,安得以至尊喜怒而毀法乎?」 重復爲奏,辭指深切。 帝意寤,乃下京名。 卽還訊,各當其罪。 付獄。柔表請告者名,帝大怒曰:「劉龜當死,乃敢獵吾禁地。 送龜廷尉,廷尉便當考掠,何

寬貸。帝乃詔曰:「孝哉弘也!其原之。」 病爲辭。詔怒曰:「汝非曾、閔,何言毀邪?」促收考竟。」柔見弘信甚羸劣,奏陳其事,宜加 時制,更遭大喪者,百日後皆給役。有司徒吏解弘遭父喪,後有軍事,受敕當行,以疾

亮司馬牛之憂,祁奚明叔向之過,在昔之美義也。臣以爲晃信有言,宜貸其死;苟自無言, 類,誠應梟縣,勿使遺育。而臣竊聞晃先數自歸,陳淵禍萌,雖爲凶族,原心可恕。夫仲尼 獄殺之。、柔上疏曰:「書稱『用罪伐厥死,用德彰厥善』,此王制之明典也。 晃及妻子叛逆之 不聽,竟遣使齎金屑飲晃及其妻子,賜以棺、衣,殯斂於宅。〔1〕 便當市斬。今進不赦其命,退不彰其罪,閉著囹圄,使自引分,四方觀國,或疑此舉也。」帝 初,公孫淵兄晃,爲叔父恭任內侍,先淵未反,數陳其變。及淵謀逆,帝不忍市斬,欲就

孫盛曰:聞五帝無誥誓之文,三王無盟祝之事,然則盟誓之文,始自三季,質任之作,起於周微。夫貞夫之一,則 凉者哉?且夫要功之倫,陵肆之類,莫不背情任計,昧利忘親,縱懷慈孝之愛, 或慮傾身之禍。 是以周、鄭交惡: 天地可動,機心內萌,則鷗鳥不下。 沉信不足焉而祈物之必附,猜生於我而望彼之必懷,何異挾冰求溫,

善,非王者之體。古者殺人之中,又有仁焉。刑之於獄,未爲失也。 權數,檢之以一切,雖覽一室而庶徵於四海,法生鄙局,冀或半之暫益。自不得不有不忍之刑,以遂孥戮之罰,亦 終無勦絕之慮。柔不究明此術非盛王之道,宜開張遠義,蠲此近制,而陳法內之刑以申一人之命,可謂心存小 不保其父兄,輒有二三之言,曲哀其意而悉活之,則長人子危親自存之悖。子弟雖質,必無刑戮之憂,父兄雖逆, **猶灠盟由乎一人,而云俾墜其師,無克遺育之言耳。豈得復引四罪不及之典,司馬牛獲宥之義乎?假令任者皆** 斂衽於一朝,炰哮可屈膝於象魏矣。 何必拘厥親以來其情,逼所愛以制其命乎?苟不能然,而仗夫計術,籠之以 之至道,近鏖狡肆徇利之凶心,勝之以解網之仁,致之以來蘇之惠,燿之以雷霆之威,潤之以時雨之施,則不恭可 漢高請虀,隗囂捐子,馬超背父,其爲酷忍如此之極也,安在其因質委誠,取任永固哉?世主若能遠覽先王閑邪

繁,事須判決,空論刑措之美,無聞當不之實哉?其爲迂闊,亦已甚矣。」漢高事窮理迫,權以濟親,而總之酷忍之 鍾會之兄,以密言全子,古今此比,蓋爲不少。晃之前言,事同斯例,而獨遇否閉,良可哀哉 科,既已大有所誣。且自古以來,未有子弟妄告父兄以圖全身者,自存之悖,未之或聞。 晃以兄告弟,而其事果 是謂應大明先王之道,不預任者生死也。見之爲任,歷年已久,豈得於殺活之際,方論至理之本。 先言之善,宜蒙原心之宥。 於犬馬之形也。質任之興,非(防)〔仿〕近世,況三方鼎峙,遼東偏遠,羈其親屬以防未然,不爲非矣。 臣松之以爲辨章事理,貴得當時之宜,無爲虛唱大言而終歸無用。浮誕之論,不切於實,猶若畫魑魅之象,而躓 謂晃應殺,將以遏防。 若言之亦死,不言亦死,豈不杜歸善之心,失正刑之中哉?若趙括之母,以先請獲免 而盛責柔不能開張遠理,鐲此近制。 不達此言竟爲何謂?若云猜防爲非,質任宜廢 是何異叢棘旣 柔謂晃有

是時,殺禁地鹿者身死,財產沒官,有能覺告者厚加賞賜。。柔上疏曰:「聖王之御世,莫

也。 寬放民閒,使得捕鹿,遂除其禁,則衆庶久濟,莫不悅豫矣。」〔1〕 旣減,加頃復有獵禁,羣鹿犯暴,殘食生苗,處處爲害,所傷不貲。 民雖障防,力不能禦。 至 不以廣農爲務,儉用爲資。夫農廣則穀積,用儉則財畜,畜財積穀而有憂患之虞者,未之有 損者甚多。卒有兵戎之役,凶年之災,將無以待之。惟陛下覽先聖之所念,愍稼穡之艱難, 如滎陽左右,周數百里,歲略不收,元元之命,實可矜傷。方今天下生財者甚少,而麋鹿之 古者,一夫不耕,或爲之饑;一婦不織,或爲之寒。中閒已來,百姓供給衆役,親田者

魏名臣奏載柔上疏曰:「臣深思陛下所以不早取此鹿者,誠欲使極蕃息,然後大取以爲軍國之用。 早取之爲便也。」 萬狐一月共食鹿子三萬頭也。大凡一歲所食十二萬頭。其鷦鶚所害,臣置不計。 鹿,是爲五百頭狼一歲共食萬八千頭鹿。鹿子始生,未能善走,使十狐一日共食一子,比至健走一月之間,是爲 狐萬頭。使大虎一頭三日食一鹿,一虎一歲百二十鹿,是爲六百頭虎一歲食七萬二千頭鹿也。使十狼日共食一 鹿但有日耗,終無從得多也。 何以知之?今禁地廣輪且千餘里,臣下計無慮其中有虎大小六百頭,狼有五百頭 以此推之,終無從得多, 然臣竊以爲今 不如

曰:「夫少單特,養一老嫗爲母,事甚恭謹,又哀兒女,撫視不離,非是輕狡不顧室家者也。」 連至州府, 頃之,護軍營士竇禮近出不還。 稱寃自訟,莫有省者。 乃辭詣廷尉。柔問曰:「汝何以知夫不亡?」 營以爲亡,表言逐捕,沒其妻盈及男女爲官奴婢。 盈垂泣對

文色動,遂曰:「汝昔舉竇禮錢,何言不邪?」子文怪知事露,應對不次。柔曰:「汝已殺禮, 所坐。言次,曰:「汝頗曾舉人錢不?」子文曰:「自以單貧,初不敢舉人錢物也。」 柔察子 財乎?」對曰:「嘗出錢與同營士焦子文,求不得。」時子文適坐小事繫獄,柔乃見子文,問 |柔重問日:「汝夫不與人有怨讎乎?」對曰:「夫良善,與人無讎。」又曰:「汝夫不與人交錢 便宜早服。」子文於是叩頭,具首殺禮本末,埋藏處所。 柔便遣吏卒,承子文辭往掘禮,即

鄉公卽位,進封安國侯,轉爲太尉。常道鄉公卽位,增邑幷前四千,前後封二子亭侯。 召柔假節行大將軍事,據爽營。太傅謂柔曰:「君爲周勃矣。」爽誅,進封萬歲鄉侯。 四年,年九十薨,諡曰元侯。孫渾嗣。咸熙中,開建五等,以柔等蓍勳前朝,改封渾昌陸 在官二十三年,轉爲太常,旬日遷司空,後徙司徒。太傅司馬宣王奏免曹爽,皇太后詔 詔書復盈母子爲平民。班下天下,以禮爲戒。

晉諸公贊曰:承長子儁,大將軍掾,次誕,歷三州刺史、太僕。 事誕愈謹。終於尙書令。追贈司空。 業,明練法理。晉武帝世,爲黃沙御史,與中丞同,遷守廷尉,後卽眞。兄誕與光異操,謂光小節,常輕侮之,而光 誕放率不倫,而決烈過人。 次光,字宣茂,

同郡馬台求得禮母,禮推家財盡以與台。 孫禮字德達,涿郡容城人也。太祖平幽州,召爲司空軍謀掾。初喪亂時,禮與母相失, 台後坐法當死,禮私導令踰獄自首,旣而曰:「臣

恢嘉之,具白太祖,各減死一

等。

無逃亡之義。」徑詣刺奸主簿溫恢。

相。 爲尙書。 昌、琅邪太守。 禮至官,出俸穀,發吏民,募首級,招納降附,使還爲閒,應時平泰。 後除河間郡丞,稍遷榮陽都尉。 從大司馬曹休征吳於夾石,禮諫以爲不可深入,不從而敗。 魯山中賊數百人,保固險阻,爲民作害;乃徙禮爲魯 歷山陽、平原、平 遷陽平太守,入

也。 時李惠監作,復奏留一月,有所成訖。 明帝方修宮室,而節氣不和,天下少穀。 禮徑至作所,不復重奏,稱詔罷民,帝奇其意而不責 禮固爭,罷役,詔曰:「敬納讜言,促遣民作。」

爽弗便也,以爲揚州刺史,加伏波將軍,賜爵關內侯。吳大將全踪帥數萬衆來侵寇,時州兵 被數創,手秉枹鼓,奮不顧身,賊衆乃退。詔書慰勞,賜絹七百匹。禮爲死事者設祀哭臨, 休使,在者無幾。 以 曹爽爲大將軍,宜得良佐,於牀下受遺詔,拜禮大將軍長史,加散騎常侍。 帝獵於大石山,虎趨乘輿,禮便投鞭下馬,欲奮劍斫虎,詔令禮上馬。 禮躬勒衞兵禦之,戰於芍陂,自旦及暮,將士死傷過半。禮犯蹈白刃,馬 明帝臨崩之時, 禮亮直不撓

六

《號發心,皆以絹付亡者家,無以入身。

爲難。 年,一朝決之者,緣有解書圖畫,可得尋案擿校也。平原在兩河,向東上,其間有虧隄,虧隄 假虛訟訴,疑誤臺閣。竊聞衆口鑠金,浮石沈木,三人成市虎,慈母投其杼。今二郡爭界八 以桐葉戲叔虞,周公便以封之。今圖藏在天府,便可於坐上斷也,豈待到州乎?」宣王曰: 任,奉聖朝明圖,驗地著之界,界實以王翁河爲限;而鄙以馬丹候爲驗,詐以鳴犢河爲界。 同。」禮上疏曰:「管仲霸者之佐,其器叉小,猶能奪伯氏騏邑,使沒齒無怨言。 臣受牧伯之 先老爲正,而老者不可加以榎楚,又墟墓或遷就高敞,或徙避仇讐。如今所聞,雖皋陶猶將 在高唐西南,所爭地在高唐西北,相去二十餘里,可謂長歎息流涕者也。 更二刺史,靡能決之;虞、芮待文王而了,宜善令分明。」禮曰:「訟者據墟墓爲驗,聽者以 不受詔,此臣軟弱不勝其任,臣亦何顏尸祿素餐。」 「是也。 劾禮怨望,結刑五歲。 徵拜少府,出爲<u>荆州刺史,遷冀州牧。</u>太傅司馬宣王謂禮曰:「今淸河、平原爭界八年, 若欲使必也無訟,當以烈祖初封平原時圖決之。何必推古問故,以益辭訟?昔成王 當別下圖。」禮到,案圖宜屬平原。 在家期年,衆人多以爲言,除城門校尉 而曹爽信淸河言,下書云:「圖不可用,當參異 輒束帶著履,駕車待放。 案解與圖奏而鄃 爽見禮奏, 大

時匈奴王劉靖部衆彊盛,而鮮卑數寇邊,乃以禮爲并州刺史,加振武將軍,使持節,護

兇,此禮之所以不悅也。」因涕泣橫流。宣王曰:「且止,忍不可忍。」 爽誅後,入爲司隸校 邪?本謂明公齊蹤伊、呂,匡輔魏室,上報明帝之託,下建萬世之勳。今社稷將危,天下兇 尉,凡臨七郡五州,皆有威信。遷司空,封大利亭侯,邑一百戶。禮與盧毓同郡時輩,而情 好不睦。爲人雖互有長短,然名位略齊云。嘉平二年薨,諡曰景侯。孫元嗣。 分乎?今當遠別,何不懽也!」禮曰:「何明公言之乖細也!禮雖不德,豈以官位往事爲意 匈奴中郎將。往見太傅司馬宣王,有忿色而無言。宣王曰:「卿得幷州,少邪?恚理分界失

所以爲民也。今郡在外劇,則於役條當有降差。豈可爲太守之私而負一郡之民乎?」遂 虜,數有寇害,云何不爲劇邪?」主者曰:「若郡爲外劇,恐於明府有任子。」觀曰:「夫君者, 期會,但敕事訖各還。於是吏民相率不督自勸,旬日之中,一時俱成。守禦有備,寇鈔以 寇盜,觀令邊民十家已上,屯居,築京候。 時或有不願者,觀乃假遣朝吏,使歸助子弟,不與 言爲外劇郡,後送任子詣鄴。 時觀但有一子而又幼弱。 其公心如此。 觀治身淸素,帥下以 任令,所在稱治。文帝踐阼,入爲尙書郎、廷尉監,出爲南陽、涿郡太守。涿北接鮮卑,數有 明帝卽位,下詔書使郡縣條爲劇、中、平者。 主者欲言郡爲中平,觀敎曰:「此郡濱近外 王觀字偉臺,東郡廩丘人也。少孤貧勵志,太祖召爲丞相文學掾,出爲高唐、陽泉、酇、

儉,僚屬承風,莫不自勵。

樹。 射。 第拜授。 就官數日,上送印綬,輒自輿歸里舍。 薨于家,遺令藏足容棺,不設明器,不封不 內侯,復爲尙書,加駙馬都尉。高貴鄕公卽位,封中鄕亭侯。頃之,加光祿大夫,轉爲右僕 放,多有干求,憚觀守法,乃徙爲太僕。 家屋材,及諸私用之物,觀聞知,皆錄奪以沒官。少府統三尙方御府內藏玩弄之寶,爽等奢 尉司馬宣王請觀爲從事中郎,遷爲尙書,出爲河南尹,徙少府。大將軍曹爽使材官張達斫 常道鄉公卽位,進封陽鄉侯,增邑千戶,幷前二千五百戶。遷司空,固辭,不許,遣使卽 諡日肅侯。 明帝幸許昌,召觀爲治書侍御史,典行臺獄。時多有倉卒喜怒,而觀不阿意順指。 子悝嗣。 咸熙中,開建五等,以觀著勳前朝,改封悝膠東子。 司馬宣王誅爽,使觀行中領軍,據爽弟義營,賜爵關 太

伉厲;王觀淸勁貞白:咸克致公輔。 評曰:韓暨處以靜居行化,出以任職流稱;崔林簡樸知能;高柔明於法理;孫禮剛斷 及暨年過八十,起家就列;柔保官二十年,元老終位

比之徐邈、常林,於茲爲疾矣。

辛毗楊阜高堂隆傳第二十五

也。 外,謀臣誅於內,兄弟讒鬩,國分爲二;連年戰伐,而介胄生蟣蝨,加以旱蝗,饑饉並臻,國 無囷倉,行無裹糧,天災應於上,人事困於下,民無愚智, 於己也。今一旦求救於明公,此可知也。顯甫見顯思困而不能取,此力竭也。兵革敗於 空,辟毗,毗不得應命。及袁尚攻兄譚於平原,譚使毗詣太祖求和。「己太祖將征荆州,次于 毗望太祖色,知有變,以語郭嘉。嘉白太祖,太祖謂毗曰:「譚可信?尚必可克不?」毗對曰: 西平。毗見太祖致譚意,太祖大悅。後數日,更欲先平荆州,使譚、尚自相弊。 明公無問信與詐也,直當論其勢耳。」袁氏本兄弟相伐,非謂他人能閒其閒,乃謂天下可定 還救,即譚踵其後。 兵法稱有石城湯池帶甲百萬而無粟者,不能守也。 辛毗字佐治,潁川陽翟人也。其先建武中,自隴西東遷。毗隨兄評從袁紹。太祖爲司 以明公之威,應困窮之敵,擊疲弊之寇,無異迅風之振秋葉矣。天 皆知土崩瓦解,此乃天亡尚之時 今往攻鄴,尚不還救,即不能自 他日置酒,

魏書

繼,而不綏之,欲待他年;他年或登,又自知亡而改脩厥德,失所以用兵之要矣。 今因其請 以袁尙與明公,明公不取而伐荆州。 二袁不務遠略而內相圖,可謂亂矣;居者無食,行者無糧, 可謂亡矣。朝不謀夕,民命靡

救而撫之,利莫大焉。且四方之寇,莫大於河北;河北平,則六軍盛而天下震。」太祖曰. 「善。」乃許譚平,次于黎陽。明年攻鄴,克之,表毗爲議郎。

(1)英雄記曰:譚、倚戰於外門,譚軍敗奔北。郭圖說譚曰:「今將軍國小兵少,糧匱勢弱,顯甫之來,久則不敵。 對矣。不然,不諧。」譚始不納,後遂從之。問圖:「誰可使?」圖答:「辛佐治可。」譚遂遣毗詣太祖 奔亡,又可斂取以拒曹公。曹公遠僑而來,糧餉不繼,必自逃去。比此之際,趙國以北皆我之有,亦足與曹公爲 爲可呼曹公來擊顯甫。曹公至,必先攻鄴,顯甫還救。將軍引兵而西,自鄴以北皆可虜得。若顯甫軍破,其兵 愚以

久之,太祖遣都護曹洪平下辯,使毗與曹休參之,令曰:「昔高祖貪財好色,而良、平匡

其過失。今佐治、文烈憂不輕矣。」軍還,爲丞相長史。

於湯、武,以戰伐定天下,乃改正朔。孔子曰「行夏之時」,左氏傳曰「夏數爲得天正」,何必 期於相反。帝善而從之。 文帝踐阼,遷侍中,賜爵關內侯。時議改正朔。毗以魏氏遵舜、禹之統,應天順民;至

帝欲徙冀州士家十萬戶實河南。時連蝗民饑,羣司以爲不可,而帝意甚盛。 毗與朝臣

太急邪?」毗曰:「今徙,旣失民心,又無以食也。」帝遂徙其半。嘗從帝射雉,帝曰:「射雉 俱求見,帝知其欲諫,作色以見之,皆莫敢言。 毗曰:「陛下欲徙士家,其計安出?」 帝曰: 怒臣!」帝不答,起入內;毗隨而引其裾,帝遂奮衣不還,良久乃出,曰:「佐治,卿持我何 臣不肖,置之左右,廁之謀議之官,安得不與臣議邪!臣所言非私也,乃社稷之慮也,安得 樂哉!」毗曰:「於陛下甚樂,而於羣下甚苦。」帝默然,後遂爲之稀出。 卿謂我徙之非邪?」毗曰:「誠以爲非也。」帝曰:「吾不與卿共議也。」毗曰:「陛下不以

夫不賓者,其能久乎?昔尉佗稱帝,子陽僭號,歷年未幾,或臣或誅。何則,違逆之道不久 遠;十年之中,彊壯未老,童齔勝戰,兆民知義,將士思奮,然後用之,則役不再舉矣。」帝 之,此未易也。 算有闕而欲用之,臣誠未見其利也。先帝屢起銳師,臨江而旋。今六軍不增於故,而復循 全,而大德無所不服也。方今天下新定,土廣民稀。夫廟算而後出軍,猶臨事而懼,況今廟 曰:「吳、楚之民,險而難禦,道隆後服,道洿先叛,自古患之,非徒今也。今陛下祚有海內, 可,容得已乎!」 曰:「如卿意, 上軍大將軍曹眞征朱然于江陵,毗行軍師。還,封廣平亭侯。帝欲大興軍征吳,毗諫 更當以虜遺子孫邪?」毗對曰:「昔周文王以紂遺武王,唯知時也。苟時未 今日之計,莫若脩范蠡之養民,法管仲之寄政,則充國之屯田,明仲尼之懷 帝竟伐吳,至江而還。

資,放、資對曰:「陛下用思者,誠欲取其効力,不貴虛名也。 毗實亮直,然性剛而專,聖慮 劉、孫不平,不過令吾不作三公而已,何危害之有。焉有大丈夫欲爲公而毀其高節者邪?」 所當深察也。」遂不用。出爲衞尉。 冗從僕射畢軌表言:「尙書僕射王思精勤舊吏,忠亮計略不如辛毗,毗宜代思。」帝以訪放、 塵;不然必有謗言。」毗正色曰:「主上雖未稱聰明,不爲闇劣。 吾之立身,自有本末。 莫不交好,而毗不與往來。 明帝即位,進封潁鄉侯,邑三百戶。時中書監劉放、令孫資見信於主,制斷時政,大臣 毗子敞諫曰:「今劉、孫用事,衆皆影附,大人宜小降意,和光同

爲害,而丘陵皆夷,將何以禦之?」 帝乃止。(1) 地之性,高高下下,今而反之,旣非其理;加以損費人功,民不堪役。且若九河盈溢,洪水 今卿爲魏重臣,亦宜解其大歸。」 諫者立名之時也。夫王者之都,當及民勞棄辦,使後世無所復增,是蕭何爲漢規摹之略也。 止,迄可小康,惠此中國,以綏四方。』 指,似欲相左右。 備豫不虞,古之善政,而今者宮室大興,加連年穀麥不收。 詩云:『民亦勞 帝方脩殿舍,百姓勞役,毗上疏曰:「竊聞諸葛亮講武治兵,而孫權市馬遼東,量其意 帝又欲平北芒,令於其上作臺觀,則見孟津。毗諫曰:「天 唯陛下爲社稷計。」帝報曰:「二虜未滅而治宮室,直

(1)魏略曰:諸葛亮圍祁山,不克,引退。張郃追之,為流矢所中死。帝惜郃,臨朝而歎曰:「蜀未平而郃死,將若之

公可謂善變矣。 不可無文皇帝也,及委棄天下,而陛下龍興。今國內所少,豈張郃乎?」 持墨曰:「陳公,是何言歟!當建安之末,天下不可一日無武皇帝也,及委國祚,而文皇帝受命。 何!」司空陳羣曰:「邱誠良將,國所依也。」 毗心以爲四雖可惜,然已死,不當內弱主意,而示外以不大也。 乃 陳羣曰:「亦誠如辛毗言。」 黄初之世,亦謂 帝笑曰:「陳

臣 有於一將之死而可以祖宗爲譬哉?非所宜言,莫過於茲。 已難信,習氏又從而載之,竊謂斯人受誣不少。 松之以為擬人必於其倫,取譬宜引其類,故君子於其言,無所苟而已矣。 進違其類,退似諂佞,佐治剛正之體,不宜有此。 毗欲弘廣主意,當舉若張遼之疇,安

歲恐不能禁,乃以毗爲大將軍 還爲衞尉。 青龍二年,諸葛亮率衆出渭南。 薨,諡曰肅侯。 子敞嗣,咸熙中爲河內太守。〔三〕 ·軍師,使持節;六軍皆肅,準毗節度,莫敢犯違。(1) 先是,大將軍司馬宣王數請與亮戰, 明帝終不聽。 亮卒,復

- 1)魏略曰:宣王數數欲進攻,毗禁不聽。宣王雖能行意,而每屈於毗。
- (三)世語曰:做字泰雅,官至衞尉。毗女憲英,適太常泰山羊耽,外孫夏侯湛爲其傳曰:「憲英聰明有才鑒。 |英曰:『天子在外,太傅閉城門,人云將不利國家,於事可得爾乎?』|憲英曰:『天下有不可知,然以吾度之,太傅殆 陳思王爭爲太子,旣而文帝得立, 司馬宣王將誅爽,因爽出,閉城門。 社 稷者也。 代君不可以不成,主國 「不可以不懼,宜戚而喜,何以能久?魏其不昌乎!」 抱毗頸而喜曰:『辛君知我喜不?』毗以告憲英,憲英歎曰:『太子代君主宗廟 大將軍司馬魯芝將逐府兵,犯門斬關,出城門赴處,來呼敞俱去。 弟敞爲大將軍曹爽多軍。 |敞懼 初文帝與 一問憲

魏

書

辛毗楊阜高堂隆傳第二十五

十有九,泰始五年卒。」 在義思其所立,不遺父母憂患而已。軍族之間,可以濟者,其惟仁恕乎!汝其愼之!』」誘竟以全身。憲英年至七 會請予琇爲參軍,憲英憂曰:『他日見鍾會之出,吾爲國憂之矣。今日難至吾家,此國之大事,必不得止也。』「琇 之才非太傅之偶也。』敞曰:『然則敞可以無出乎?』憲英曰:『安可以不出。職守,人之大義也。凡人在難,猶或 勢,行以驕奢,於王室不忠,於人道不直,此舉不過以誅曹爽耳。』敞曰:『然則事就乎?』憲英曰:『得無殆就!爽 事定之後,做歎曰:『吾不謀於姊,幾不獲於義。』 恤之;爲人執鞭而棄其事,不祥,不可也。且爲人死,爲人任,親昵之職也,從衆而已。』敞遂出。宣王果誅傸。 固請司馬文王,文王不聽。憲英語琇曰:『行矣,戒之!古之君子,入則致孝於親,出則致節於國,在職思其所司, !明皇帝臨崩,把太傅臂,以後事付之,此言猶在朝士之耳。 逮鍾會爲鎭西將軍,憲英謂從子羊祜曰:『鍾士季何故西出? 且曹爽與太傅俱受寄託之任, 而獨專權

雖彊,終不能成大業。曹公有雄才遠略,決機無疑,法一而兵精,能用度外之人,所任各盡 將問袁、曹勝敗孰在,阜日:「袁公寬而不斷,好謀而少決;不斷則無威,少決則失後事,今 其力,必能濟大事者也。」長史非其好,遂去官。而端徵爲太僕,其子康代爲刺史,辟阜爲別 楊阜字義山,天水冀人也。〔〕以州從事爲牧章端使詣許,拜安定長史。阜還,關右諸

駕。察孝廉,辟丞相府,州表留參軍事。

(1)魏略曰:阜少與同郡尹奉次會、趙昂偉章俱發名,偉章、次會與阜俱爲凉州從事。

守,不固於此也。棄垂成之功,陷不義之名,阜以死守之。」遂號哭。刺史、太守卒遣人請 太守失色,始有降超之計。阜流涕諫曰:「阜等率父兄子弟以義相勵,有死無二;田單之 萬餘人,攻城。阜率國士大夫及宗族子弟勝兵者千餘人,使從弟岳於城上作偃月營,與超 接戰,自正月至八月拒守而救兵不至。州遣別駕閻溫循水潛出求救,爲超所殺,於是刺史、 使,言於太祖曰:「超有信、布之勇,甚得羌、胡心,西州畏之。 若大軍還,不嚴爲之備,隴上 和,開城門迎超。超入,拘岳於冀,使楊昂殺刺史、太守。 上郡縣皆應之,惟冀城奉州郡以固守。超盡兼隴右之衆,而張魯又遣大將楊昂以助之,凡 諸郡非國家之有也。」太祖善之,而軍還倉卒,爲備不周。 超率諸戎渠帥以擊隴上郡縣,隴 馬超之戰敗渭南也,走保諸戎。太祖追至安定,而蘇伯反河間,將引軍東還。阜時奉

敍母慨然,敕敍從阜計。 夫皆蒙其恥。 君亡不能死,亦何面目以視息於天下!馬超背父叛君,虐殺州將,豈獨阜之憂責,一州士大 |骸家,見||骸母及||敍,說前在||冀中時事,歔欷悲甚。||敍曰:「何爲乃爾?」||阜曰:「守城不能完, 阜內有報超之志,而未得其便。頃之,阜以喪妻求葬假。阜外兄姜敍屯歷城。阜少長 君擁兵專制而無討賊心,此趙盾所以書弑君也。超彊而無義,多釁易圖耳。」 計定,外與鄉人姜隱、趙昂、尹奉、姚瓊、孔信、武都人李俊、王靈結

謀,定討超約,使從弟謨至冀語岳,幷結安定梁寬、南安趙衢、龐恭等。約誓旣明,十七年九 之母,勸敍早發,明智乃爾,雖楊敞之妻蓋不過此。賢哉,賢哉!良史記錄,必不墜於地 **羣賢共建大功,西土之人以爲美談。子貢辭賞,仲尼謂之止善。君其剖心以順國命。姜敍** 以面目視人乎!」 襲歷城,得敍母。 月,與敍起兵於鹵城。超聞阜等兵起,自將出。 功,君亡無死節之效,於義當絀,於法當誅;超叉不死,無宜苟荷爵祿。」太祖報曰:「君輿 [隴右平定,太祖封討超之功,侯者十一人, 賜阜爵關內侯。 阜讓曰:「阜君存無扞難之 敏母罵之曰:「汝背父之逆子,殺君之桀賊,天地豈久容汝,而不早死,敢 超怒,殺之。阜與超戰,身被五創,宗族昆弟死者七人。超遂南奔張魯。 而衢、寬等解岳,閉冀城門,討超妻子。

矣。」[] 皇甫謐列女傳曰:姜敍母者,天水姜伯奕之母也。 舉兵叛超,超怒,必自來擊敍,寬等因從後閉門。約誓以定,敍遂進兵入鹵,昂、奉守祁山。超聞,果自出擊敍,寬 使君遇難,豈一 死,辭超寧歸西,因過至歷,候餘母,說康被害及冀中之難,相對泣良久。 發,我自爲汝當之,不以餘年累汝也。」因敕敍與阜參議,許諾,分人使語鄉里尹奉、趙昂及安定樂寬等, 爲撫夷將軍,擁兵屯歷。 州之恥,亦汝之負,豈獨義山哉?汝無顧我,事淹變生。 \

敏姑子楊阜,故為康從事,同等十餘人,皆略屬超,陰相結為康報仇, 建安中,馬超攻冀,害涼州刺史章康,州人悽然,莫不感憤。啟 姜敍舉室感悲,敍母曰:「咄! 人誰不死?死國,忠義之大者。 未有閒。 伯奕,章 但當速 會阜妻

備。 等從後閉冀門,超失據。過鹵,敍守鹵。超因進至歷,歷中見超往,以爲敍軍還。又傳聞超以走奔漢中, 及超入歷 ,執敍母,母怒罵超。 超被購大怒,即殺餓母及其子,燒城而去。阜等以狀聞,太祖甚嘉之,手令褒 故歷無

揚

,語如本傳。

與異重相接結。 公成霸。 方今社稷初定,治亂在於得人,涼州士馬,迺可與中夏爭鋒,不可不詳也。」 **昂守備,又悉脫所佩環、黼黻以賞戰士。及超攻急,城中飢困,刺史章康素仁,愍吏民傷殘,欲與超和。** 全,當奈月何?」 死,不可從也。」 藥而絕。 是発難。 歲,獨與異在城中。 刺史天水趙偉璋妻,王氏女也。昂爲羌道令,留異在西。會同郡梁雙反,攻破西城,害異兩男。異女英,年六 臣松之案: 聽,歸以語異,異曰:「君有爭臣,大夫有專利之義;專不爲非也。 蒙不絜之服,則人掩鼻,沉我貌非西施乎?」乃以溷糞冱麻而被之,尠食瘠形,自春至冬。 超妻楊聞異節行 時適有解毒藥良湯,擨口灌之,良久迺蘇。建安中,昂轉參軍事,徙居冀。會馬超攻冀,異躬著布韝,佐 昂遣吏迎之,未至三十里,止謂英曰:「婦人無符信保傅,則不出房**罩**。 今吾遭亂不能死,將何以復見諸姑?所以偷生不死,惟憐汝耳。今官舍已近,吾去汝死矣。」 證稱阜爲敍姑子,而本傳云敍爲阜外兄,與今名內外爲不同。 謐又載趙昂妻曰:趙昂妻異者,故益州 比昂還,康與超和。 昂所以得信於超,全功免禍者,異之力也。及昂與楊阜等結謀討超,告異曰:「吾謀如是,事必萬 異厲聲應曰:「忠義立於身,雪君父之大恥,喪元不足爲重,況一子哉?夫項託、顏淵、豈復百 異見兩男已死,又恐爲雙所侵,引刀欲自刎,顧英而歎曰:「身死爾棄,當誰恃哉!吾聞四施 ,請與讌終日。 異欲信昂於超以濟其謀,謂楊曰:「昔管仲入齊,立九合之功; 超遂背約害康, 叉劫昂,質其嫡子月於南鄭。 焉知救兵不到關<u>職</u>哉?當共勉卒高勳 昭姜沈流,伯姬待燒,每讀其傳, 楊深感之,以爲忠於己,遂 欲要昂以爲己用,然心未甚 雙與州郡和 由余適秦,穆 |昂諫 ,全節致 遂飲毒 異竟以

魏

書

年,貴義存耳。」 昂曰:「善。」 遂共閉門逐超,超奔漢中,從張魯得兵還。 異復與昂保祁山,爲超所圍,三十日救 <u>兵到,乃解。超卒殺異子月。凡自冀城之難,至于祁山,昂出九奇,異輒參焉。</u>

甚於此。」遂奮衣辭出。洪立罷女樂,請阜還坐,肅然憚焉。 笑。阜厲聲責洪曰:「男女之別,國之大節,何有於廣坐之中裸女人形體!雖傑、紂之亂,不 應之。太祖遣都護曹洪禦超等,超等退還。洪置酒大會,令女倡著羅縠之衣,蹋鼓,一坐皆 依襲遂故事,安之而已。會劉備遣張飛、馬超等從沮道趣下辯,而氐雷定等七部萬餘落反 太祖征漢中,以阜爲益州刺史。還,拜金城太守,未發,轉武都太守。郡濱蜀漢,阜請

用,會帝崩。在郡十餘年,徵拜城門校尉。 己,下不忍欺也。文帝問侍中劉曄等:「武都太守何如人也?」皆稱阜有公輔之節。未及 民、氐,使居京兆、扶風、天水界者萬餘戶,徙郡小槐里,百姓襁負而隨之。爲政舉大綱而 及劉備取漢中以逼下辯,太祖以武都孤遠,欲移之,恐吏民戀土。阜威信素著,前後徙

阜常見明帝蓍繡褶,被縹綾半褎,阜問帝曰:「此於禮何法服也?」帝默然不答,自是不

法服不以見阜。

阜上疏曰:「臣聞明主在上,羣下盡辭。 堯、舜聖德,求非索諫;大禹勤功,務卑宮室;成湯 遷將作大匠。時初治宮室,發美女以充後庭,數出入弋獵。秋,大雨震電,多殺鳥雀。 後遷少府。是時大司馬曹眞伐蜀,遇雨不進。阜上疏曰:「昔文王有赤鳥之符, 而猶日

所略,退叉不得,非主兵之道也。武王還師,殷卒以亡,知天期也。 用不足,益宜節度。」帝卽召諸軍還。 損膳減服,技巧珍玩之物,皆可罷之。 昔邵信臣爲少府於無事之世,而奏罷浮食;今者軍 繼,必違本圖。 [傳曰:『見可而進,知難而退,軍之善政也。』 徒使六軍困於山谷之間,進無 者諸軍始進,便有天雨之患,稽閡山險,以積日矣。轉運之勞,擔負之苦,所費以多,若有不 今吳、蜀未平,而天屢降變,陛下宜深有以專精應答,側席而坐,思示遠以德,綏邇以儉。 閒 **昃不暇食;武王白魚入舟,君臣變色。而動得吉瑞,猶尙憂懼,況有災異而不戰竦者哉?** 今年凶民饑,宜發明詔

器,而競作奇巧,以合上欲,此傷本之甚者也。 良方正敦樸之士而選用之,此亦求賢之一端也。」 吏,爲政不通治體,苟好煩苛,此亂民之甚者也。 所私,此忘治之甚者也。 後詔大議政治之不便於民者,阜議以爲:「致治在於任賢,興國在於務農。 廣開宮館,高爲臺榭,以妨民務,此害農之甚者也。 當今之急,宜去四甚,並詔公卿郡國,舉賢 孔子曰:『苛政甚於猛虎。』 今守功文俗之 若舍賢而任 百工不敦其

得宣露。」阜怒,杖吏一百,數之曰:「國家不與九卿爲密,反與小吏爲密乎?」帝聞而愈敬 阜叉上疏欲省宮人諸不見幸者,乃召御府吏問後宮人數。 吏守舊令,對曰:「禁密,不 魏 書 辛毗楊阜高堂隆傳第二十五

疏曰:「文皇帝、武宣皇后崩,陛下皆不送葬,所以重社稷、備不虞也。何至孩抱之赤子而可 帝愛女淑,未期而夭,帝痛之甚,追封平原公主,立廟洛陽,葬於南陵。 將自臨送,阜上

送葬也哉?」帝不從。

至,不足以感寤陛下。陛下不察臣言,恐皇祖烈考之祚,將墜于地。使臣身死有補萬一,則 之。孝經曰:『天子有爭臣七人,雖無道不失其天下。』臣雖駑怯,敢忘爭臣之義?言不切 其無人。』王者以天下爲家,言豐屋之禍,至於家無人也。方今二虜合從,謀危宗廟,十萬之 高高在上,實監后德。愼守天位,以承祖考,巍巍大業,猶恐失之。不夙夜敬止,尤恭卹民, 欲,未有不亡者也。陛下當以堯、舜、禹、湯、文、武爲法則,夏桀、殷紂、楚靈、秦皇爲深誠。 受其禍;秦始皇作阿房而殃及其子,天下叛之,二世而滅。夫不度萬民之力,以從耳目之 軍,東西奔赴,邊境無一日之娛;農夫廢業,民有饑色。陛下不以是爲憂,而營作宮室,無 彫弊百姓之財力者也。、桀作璇室、象廊,) 紂爲傾宮、鹿臺,以喪其社稷,楚靈以樂章華而身 有已時。 使國亡而臣可以獨存,臣叉不言也;〔〕 君作元首,臣爲股肱,存亡一體,得失同 而乃自暇自逸,惟宮臺是侈是飾,必有顯覆危亡之禍。 易曰:『豐其屋,蔀其家,闚其戶,閴 天下樂其業;及至殷、周,或堂崇三尺,度以九筵耳。古之聖帝明王,未有極宮室之高麗以 帝旣新作|許宮,又營洛陽宮殿觀閣。|阜上疏日:「堯尙茅茨而萬國安其居,禹卑宮室而

會議,阜常侃然以天下爲己任。 死之日,猶生之年也。 謹叩棺沐浴,伏俟重誅。」奏御,天子感其忠言,手筆詔答。 數諫爭,不聽,乃屢乞遜位,未許。會卒,家無餘財。 毎朝廷

〕 臣松之以爲忠至之道,以亡己爲理。 此則發憤爲己,豈爲國哉?斯言也,豈不傷讜烈之義,爲一表之病乎! 是以匡救其惡,不爲身計。 而阜表云「使國亡而臣可以獨存,臣又不言也」, 嗣。

中與悌! 高堂隆字升平,泰山平陽人,魯高堂生後也。 臨臣名君,義之所討也。」 爭論,名悌而呵之。 隆按劍叱督軍曰:「昔魯定見侮,仲尼歷階;趙彈秦箏, 督軍失色,悌驚起止之。後去吏,避地濟南。 少爲諸生, 泰山太守薛悌命爲督郵。 相如 郡

|虞有遏密之哀,高宗有不言之思,是以至德雍熙,光于四海。」 以爲不宜爲會, 爲散騎常侍,賜爵關內侯。〔〕〕 遷陳留太守。 位,是爲明帝。 反游獵馳騁; 建安十八年,太祖召爲丞相軍議掾, 隆以義正諫,甚得輔導之節。 **犢民酉牧,年七十餘,有至行,舉爲計曹掾;帝嘉之,特除郎中以顯焉。** 以隆爲給事中、博士、駙馬都尉。 後爲歷城侯徽文學,轉爲相。 黄初中,爲堂陽長, 帝初踐阼,羣臣或以爲宜響會,隆曰:「唐、 以選爲平原王傅。 徽遭太祖喪,不哀, 帝敬納之。 王即尊

〔1〕魏略曰:太史上漢曆不及天時,因更推步弦望朔晦,爲太和曆。帝以隆學問優深,於天文又精,乃詔使隆與尙書 郎楊偉、太史待詔駱禄參共推校。偉、禄是太史,隆故據舊曆更相劾奏,紛紜數歲,偉稱禄得日蝕而月晦不盡,隆

不得日蝕而月晦盡,詔從太史。隆所爭雖不得,而遠近猶知其精微也。

必書,古之道也,作而不法,何以示後?聖王樂聞其闕, 新聲發響,商辛以隕,大鐘旣鑄,周景以弊,存亡之機,恆由斯作,安在廢興之不階也?君舉 表授蘭,使難隆曰:「興衰在政,樂何爲也。化之不明,豈鐘之罪。」 隆曰:「夫禮樂者,爲治 損,以傷德政,非所以興禮樂之和,保神明之休也。」是日,帝幸上方,隆與下蘭從。帝以隆 史記焉,以爲永鑒。然今之小人,好說秦、漢之奢靡以盪聖心,求取亡國不度之器,勞役費 之聖制,旣鑄大錢,又作大鐘,單穆公諫而弗聽,冷州鳩對而弗從,遂迷不反,周德以衰,良 有匪躬之義也。」帝稱善。 之大本也。 青龍中,大治殿舍,西取長安大鐘。隆上疏曰:「昔周景王不儀刑文、武之明德,忽公旦 故簫韶九成,鳳皇來儀,雷鼓六變,天神以降,政是以平,刑是以錯,和之至也。 故有箴規之道;忠臣願竭其節,故

火燒其室。』又曰:『君高其臺,天火爲災。』此人君苟飾宮室,不知百姓空竭,故天應之以 曰:「夫災變之發,皆所以明教誠也,惟率禮脩德,可以勝之。 易傳曰:『上不儉,下不節,孽 遷侍中,猶領太史令。崇華殿災,詔問隆:「此何咎?於禮,寧有祈禳之義乎?」隆對

宗。此則前代之明鑒也。今案舊占,災火之發,皆以臺榭宮室爲誠。然今宮室之所以充廣 者,實由宮人猥多之故。宜簡擇留其淑懿,如周之制,罷省其餘。此則祖己之所以訓高宗, 旱,火從高殿起也。上天降鑒,故譴吿陛下;陛下宜增崇人道,以答天意。昔太戊有桑穀 竭民之財!實非所以致符瑞而懷遠人也。」帝遂復崇華殿,時郡國有九龍見,故改曰九龍 所災之處,不敢於此有所立作,萐莆、嘉禾必生此地,以報陛下虔恭之德。豈可疲民之力, 德,以消復之。今宜罷散民役。宮室之制,務從約節,內足以待風雨,外足以講禮儀。清埽 聖賢之明訓也。五行志曰:『柏梁災,其後有江充巫蠱(也)衞太子事。』如志之言,越巫建章 何?」隆對曰:「臣聞西京柏梁旣災,越巫陳方,建章是經,以厭火祥;乃夷越之巫所爲,非 高宗之所以享遠號也。」詔問隆:「吾聞漢武帝時,柏梁災,而大起宮殿以厭之,其義云 生於朝,武丁有雊雉登於鼎,皆聞災恐懼,側身脩德,三年之後,遠夷朝貢,故號日中宗、高 無所厭也。孔子曰:『災者脩類應行,精祲相感,以戒人君。』是以聖主覩災責躬,退而脩

之,斯乃上天之戒也。夫天道無親,惟與善人,不可不深防,不可不深慮。夏、商之季,皆繼 起陵霄闕,而鵲巢之,此宮室未成身不得居之象也。 天意若日,宮室未成,將有他姓制御 陵霄闕始構,有鵲巢其上,帝以問隆,對曰:「詩云『維鵲有巢,維鳩居之』。 今興宮室,

體 躬,安存社稷,臣雖灰身破族,猶生之年也。 豈憚忤逆之災,而令陛下不聞至言乎?」 於是 興兆民之所利,三王可四,五帝可六,豈惟殷宗轉禍爲福而已哉!臣備腹心,苟可以繁祉聖 祗承天戒,故其興也勃焉。 今若休罷百役,儉以足用,增崇德政,動遵帝則,除普天之所患, 一也,不欽承上天之明命,惟讒諂是從,廢德適欲,故其亡也忽焉。 太戊、武丁,覩災竦懼

帝改容動色。

之象,始卒皆於尊位,殷勤鄭重,欲必覺寤陛下;斯乃慈父懇切之訓,宜崇孝子祗聳之禮 龍,華飾過前。天彗章灼,始起於房心,犯帝坐而干紫微,此乃皇天子愛陛下,是以發敎戒 以垂皇風也;玉臺瓊室,夏癸、商辛之所以犯昊天也。今之宫室,實違禮度,乃更建立九 民爲先,然後稽古之化,格于上下,自古及今,未嘗不然也。 夫采椽卑宮,唐、虞、大禹之所 頌,則嚮以五福,民怒吁嗟,則威以六極,言天之賞罰,隨民言,順民心也。 所盡略齊。 未定,宗廟之制又未如禮,而崇飾居室,士民失業。外人咸云宮人之用,與興戎軍國之費, 以率先天下,以昭示後昆,不宜有忽,以重天怒。」 將營宮室,則宗廟爲先,廢庫爲次,居室爲後。今圜丘、方澤、南北郊、明堂、祉稷,神位 是歲,有星孛于大辰。隆上疏曰:「凡帝王徙都立邑,皆先定天地社稷之位,敬恭以奉 民不堪命,皆有怨怒。。書曰『天聰明自我民聰明,天明畏自我民明威』, 是以臨政務在安 輿人作

魏

朔,易服色,殊徽號,異器械,自古帝王所以神明其政,變民耳目,故三春稱王,明三統也。 救其末,譬猶棼絲,非政理也。 可命羣公卿士通儒,造具其事,以爲典式。」 隆又以爲改正 副。 宜崇禮樂,班敍明堂,修三雍、大射、養老,營建郊廟,尊儒士,舉逸民,表章制度,改正朔,易 服慕義,固非俗吏之所能也。今有司務糾刑書,不本大道,是以刑用而不措,俗弊而不敦。 能庶績其凝而品物康义也。 犧牲用白,從地正也。 於是敷演舊章,奏而改焉。 服色,布愷悌,尚儉素,然後備禮封禪,歸功天地,使雅頌之聲盈于六合,緝熙之化混于後 斯蓋至治之美事,不朽之貴業也。然九域之內,可揖讓而治,尙何憂哉!不正其本而 時軍國多事,用法深重。隆上疏曰:「夫拓跡垂統,必俟聖明,輔世匡治,亦須良佐,用 帝從其議,改青龍五年春三月爲景初元年孟夏四月,服色尚黃, 夫移風易俗,宣明道化,使四表同風,回首面內,德敎光熙,九

作者萬數,公卿以下至于學生,莫不展力,帝乃躬自掘土以率之。而遼東不朝。 天作淫雨,冀州水出,漂沒民物。隆上疏切諫日 之園,建昭陽殿於太極之北,鑄作黃龍鳳皇奇偉之獸,飾金墉、陵雲臺、陵霄闕。 遷光祿勳。 帝愈增崇宮殿,彫飾觀閣,鑿太行之石英,采穀城之文石,起景陽山於芳林 百役繁興,

蓋「天地之大德日生,聖人之大寶日位;何以守位?日仁;何以聚人?日財」。然

歲;宜加愍卹,以救其困 美,而美好之集, 非人力不成, 非穀帛不立。 情苟無極, 則人不堪其勞, 物不充其求。 育,故稱「愷悌君子,民之父母」。今上下勞役,疾病凶荒,耕稼者寡,饑饉荐臻,無以卒 也,交爭于心。 志,恬忽變戒,未有不尋踐禍難,至於顚覆者也。 不延期流祚者也。爰及末葉,闇君荒主,不崇先王之令軌,不納正士之直言,以遂其情 陽之逆順,矜矜業業,惟恐有違。 四夷,非嘉聲也,垂之竹帛,非令名也。是以有國有家者,近取諸身,遠取諸物,嫗煦養 有等差,君子小人,物有服章。今無若時之急,而使公卿大夫並與廝徒共供事役,聞之 之甚,莫過於彼,力役之興,莫久於此,堯、舜君臣,南面而已。禹敷九州,庶士庸勳,各 之會,洪水滔天,使縣治之,續用不成,乃舉文命,隨山刊木,前後歷年二十二載。災眚 臣觀在昔書籍所載,天人之際,未有不應也。是以古先哲王,畏上天之明命,循陰 然後治道用興,德與神符,災異既發,懼而脩政,未有

是以帝耕以勸農,后桑以成服,所以昭事上帝,告虔報施也。 昔在伊唐,世值陽九厄運

則士民者,乃國家之鎭也;穀帛者,乃士民之命也。穀帛非造化不育,非人力不成。

天道旣著,請以人道論之。夫六情五性,同在於人,嗜欲廉貞,各居其一。及其動 欲彊質弱,則縱濫不禁;精誠不制,則放溢無極。 夫情之所在,非好則

之,禮義之制,非苟拘分,將以遠害而興治也。 勞求並至,將起禍亂。 故不割情,無以相供。 仲尼云:「人無遠慮, 必有近憂。」由此觀

乎?苟如此,則可易心而度,事義之數亦不遠矣。 聞之,豈不勃然忿其困我無辜之民,而欲速加之誅,其次,豈不幸彼疲弊而取之不難 告者曰,彼二賊並爲無道,崇侈無度,役其士民,重其徵賦,下不堪命,吁嗟日甚。 陛下 容耆賢,事遵禮度[°]陛下聞之,豈不惕然惡其如此,以爲難卒討滅,而爲國憂乎。若使 中國爭衡。今若有人來告,權、(備)〔禪〕並脩德政,復履淸儉,輕省租賦,不治玩好,動 今吳、蜀二賊,非徒白地小虜、聚邑之寇,乃據險乘流,跨有士衆,僭號稱帝,欲與

動,若有寇警,則臣懼版築之士不能投命虜庭矣。 況今天下彫弊,民無儋石之儲,國無終年之畜,外有彊敵,六軍暴邊,內興土功,州郡騷 養民,而賈誼方之,以爲天下倒縣,可爲痛哭者一,可爲流涕者二,可爲長歎息者三。 後至於亡;賢聖之君自謂將亡,然後至於不亡。昔漢文帝稱爲賢主,躬行約儉,惠下 故臣以爲使先代之君知其所行必將至於敗,則弗爲之矣。是以亡國之主自謂不亡,然 臣爲此計也,亦欲立萬世之業,使子孫長有天下,豈意一朝匹夫大呼,而天下傾覆哉? 且秦始皇不築道德之基,而築阿房之宮,不憂蕭牆之變,而脩長城之役。當其君

書奏,帝覽焉,謂中書監、令曰:「觀隆此奏,使朕懼哉!」 前後相繼。反而推之,凡此諸費,必有所在。且夫祿賜穀帛,人主所以惠養吏民而爲 睢,命之曰天下桎梏。」二世用之,秦國以覆,斯亦滅族。是以史遷議其不正諫,而爲世 以告,從命奔走,惟恐不勝,是則具臣,非鯁輔也。 昔李斯教秦二世曰:「爲人主而不恣 坐廊廟治天下者,非三司九列,則臺閣近臣,皆腹心造膝,宜在無諱。若見豐省而不敢 各足之後,乃以式貢之餘,供王玩好。又上用財,必考于司會。會音膾。今陛下所與共 府掌九(伐)[賦]之(則)[財],以給九式之用,入有其分,出有其所,不相干乘而用各足。 之司命者也,若今有廢,是奪其命矣。旣得之而又失之,此生怨之府也。周禮,(天)〔大〕 隆疾篤,口占上疏曰: 曾子有疾,孟敬子問之。曾子曰:「鳥之將死,其鳴也哀;人之將死,其言也善。」

皆出半:此爲官入兼多於舊,其所出與參少於昔。而度支經用,更每不足,牛肉小賦,

叉,將吏奉祿,稍見折減,方之於昔,五分居一;諸受休者叉絕廩賜,不應輸者今

臣寢疾病,有增無損,常懼奄忽,忠款不昭。臣之丹誠,豈惟曾子,願陛下少垂省覽! **渙然改往事之過謬,勃然興來事之淵塞,使神人嚮應,殊方慕義,四靈效珍,玉衡曜精,**

則三王可邁,五帝可越,非徒繼體守文而已也。

也。 崩圮哉?近漢孝武乘文、景之福,外攘夷狄,內興宮殿,十餘年閒,天下囂然。 乃信越 祟,淫樂是好,倡優是說,作靡靡之樂,安濮上之音。 上天不蠲,眷然回顧,宗國爲墟, 殃咎之毒,禍流數世。 巫,懟天遷怒,起建章之宮,千門萬戶,卒致江充妖蠱之變,至於宮室乖離,父子相殘, 中國,威服百蠻,天下震竦,道路以目;自謂本枝百葉,永垂洪暉,豈寤二世而滅,社稷 (示)[下]夷于隸,紂縣白旗,桀放鳴條;天子之尊,湯、武有之,豈伊異人,皆明王之胄 面,夫何爲哉!然癸、辛之徒,恃其旅力,知足以拒諫,才足以飾非,諂諛是尙,臺觀是 非其有,一民莫非其臣,萬國咸寧,九有有截;處臺之金,巨橋之粟,無所用之,仍舊南 魚,煎水作冰,其不可得,明矣。 尋觀三代之有天下也,聖賢相承,歷載數百,尺土莫 惑亂亡國之主,而不登踐虞、夏、殷、周之軌。悲夫!以若所爲,求若所致,猶緣木求 且當六國之時,天下殷熾,秦旣兼之,不脩聖道,乃構阿房之宮,築長城之守,矜夸 臣常疾世主莫不思紹堯、舜、湯、武之治,而蹈踵桀、紂、幽、厲之跡,莫不蚩笑季世

鷹揚之臣於蕭牆之內。可選諸王,使君國典兵,往往棊跱,鎭撫皇畿,翼亮帝室。 臣觀黃初之際,天兆其戒,異類之鳥,育長燕巢,口爪胸赤,此魏室之大異也,宜防 昔周

下也。 民詠德政,則延期過歷,下有怨歎,掇錄授能。 之東遷,晉、鄭是依,漢呂之亂,實賴朱虛,斯蓋前代之明鑒。夫皇天無親,惟德是輔。 臣百疾所鍾,氣力稍微,輒自輿出,歸還里舍,若遂沈淪,魂而有知,結草以報。 由此觀之,天下之天下,非獨陛下之天

陰德,疾除而延壽; 貢禹以守節, 詔曰:「生廉追伯夷,直過史魚,執心堅白,謇謇匪躬,如何微疾未除,退身里舍? 昔邴吉以 疾篤而濟愈。 生其彊飯專精以自持。」隆卒,遺令薄葬,

斂以時服。(二)

謂也。 習鑿齒曰:高堂隆可謂忠臣矣。 物 ,德音沒而彌彰,可不謂忠且智乎!詩云:「聽用我謀,庶無大悔。」又曰:「會是莫聽,大命以傾。」 君侈每思諫其惡,將死不忘憂社稷, 正辭動於昏主,明戒驗於身後,簪諤足以 其高堂隆之

子琛嗣爵 歷歲,後途議脩之,使隆撰其禮儀。 初,太和中,中護軍蔣濟上疏曰「宜遵古封禪」。詔曰:「聞濟斯言,使吾汗出流足。」事寢 帝聞隆沒,歎息曰:「天不欲成吾事,高堂生舍我亡也。」

原伯之不學,荀卿醜秦世之坑儒,儒學旣廢,則風化曷由興哉?方今宿生巨儒 餘敎,著於六藝。 始,景初中,帝以蘇林、秦靜等並老,恐無能傳業者。 六藝之文,禮叉爲急,弗可斯須離者也。 乃詔曰:「昔先聖旣沒, 末俗背本,所由 來久。 並各年高 故閔子畿 而其遺言

試之法。 極經道,則爵祿榮寵,不期而至。 教訓之道 才解經義者三十人,從光祿勳隆、散騎常侍林、博士靜,分受四經三禮, 夏侯勝有言:『士病不明經術,經術苟明,其取青紫如俯拾地芥耳。』今學者有能究 ,孰爲其繼?昔伏生將老,漢文帝嗣以鼂錯;穀梁寡疇, 可不勉哉!」數年,隆等皆卒,學者遂廢 主者具爲設課 其科郎

縣旌萬里,六軍 之。」太子不悅,然自後游出差簡。 庶,故方制四海**匪**爲天子, 潛諫曰:「王公設險以固其國,都城禁衞,用戒不虞。 义。太祖濬哲神武,芟除暴亂,克復王綱,以開帝業。 天下,醇德以洽,黎元賴之。三王旣微,降逮于漢,治日益少,喪亂弘多,自時厥後,亦罔克 『猶之未遠,是用大諫。』 [窮谷,怪石珷玞,浮于河、淮,都圻之內,盡爲甸服,當供橐秸銍粟之調, 明帝時,衆役並興,戚屬疏斥,潛上疏曰:「天生蒸民而樹之君,所以覆燾羣生,熙育兆 初,任城棧潛,太祖世歷縣令,〔〕嘗督守鄴城。 陛下聖德,纂承洪緒,宜崇晏晏,與民休息。 ·騷動,水陸轉運,百姓舍業,日費千金。 若逸于遊田,晨出昏歸,以一日從禽之娛,而忘無垠之釁,愚竊惑 裂土分疆匪爲諸侯也。始自三皇,爰暨唐、虞,咸以博濟加 黄初中, 文帝將立郭貴嬪爲皇后,潛上疏諫,語在后妃 大雅云:『宗子維城,無俾城壞、』又曰: 時文帝爲太子,耽樂田獵,晨出夜還。 文帝受天明命,廓恢皇基,踐阼七載 大興殿舍, 而方隅匪寧,征夫遠戍,有事海外, 功作萬計,徂來之松,刊 而爲苑囿擇禽之

不植。 葉,而二世顚覆,願爲黔首,由枝幹旣(杌)[杌],本實先拔也。 恐民力彫盡,下不堪命也。 侈:影鏤極妙,忘有虞之總期,思殷辛之瓊室,禁地千里,舉足投網,麗擬阿房,役百乾谿,臣 府,盛林莽之穢,豐鹿兔之藪;傷害農功,地繁茨棘,災疫流行,民物大潰,上減和氣,嘉禾 後爲燕中尉,辭疾不就,卒。 庸勳親親;俊乂在官,則功業可隆,親親顯用,則安危同憂;深根固本,並爲幹翼,雖歷盛 衰,內外有輔。 分陝所任,又非旦、奭。 臣聞文王作豐,經始勿亟,百姓子來,不日而成。靈沼、靈囿,與民共之。今宮觀崇 昔成王幼沖,未能莅政,周、**呂、召、**畢,並在左右;今旣無衞侯、康叔之監, 東宮未建,天下無副。 **昔秦據殽函以制六合,自以德高三皇,功兼五帝,欲號諡至萬** 願陛下留心關塞,永保無極, 蓋聖王之御世也,克明俊德, 則海內幸甚。

(一) 潛字彥皇,見應璩書林。

君,因變陳戒,發於懇誠,忠矣哉!及至必改正朔,俾魏祖虞,所謂意過其通者數! 評曰:辛毗、楊阜,剛亮公直,正諫匪躬,亞乎汲黯之高風焉。 高堂隆學業脩明,志在匡

滿田牽郭傳第二十六

太守使竈糾焉。 寵因其來在傳舍,率吏卒出收之,詰責所犯,即日考竟,遂棄官歸。 滿籠字伯寧,山陽昌邑人也。年十八,爲郡督郵。時郡內李朔等各擁部曲,害于平民, 朔等請罪,不復鈔略。守高平令。 縣人張苞爲郡督郵,貪穢受取,干亂吏

|太祖即日赦出||彪。| 初,彧、融聞考掠彪,皆怒,及因此得了,更善龗。 [1] 訊無他辭語。當殺者宜先彰其罪;此人有名海內,若罪不明,必大失民望,竊爲明公惜之。」 屬竈:「但當受辭,勿加考掠。」。竈一無所報,考訊如法。數日,求見太祖,言之曰:「楊彪考 速殺之。太祖喜曰:「當事不當爾邪?」故太尉楊彪收付縣獄,尙書令荀彧、少府孔融等並 在界,數犯法,寵收治之。洪書報籠,寵不聽。洪白太祖,太祖召許主者。寵知將欲原,乃 |太祖臨||兗州,辟爲從事。 及爲大將軍,辟署西曹屬,爲||許令。 時||曹洪宗室親貴,有賓客

臣松之以爲楊公積德之門,身爲名臣,縱有愆負,猶宜保祐,況淫刑所濫,而可加其楚掠乎?若理應考訊,荷、孔 滿田牽郭傳第二十六

|賢豈其妄有相請屬哉?耀以此爲能,酷吏之用心耳。雖有後善,何解前虐?

汝南太守。寵募其服從者五百人,率攻下二十餘壁,誘其未降渠帥,於坐上殺十餘人,一時 時袁紹盛於河朔,而汝南紹之本郡,門生賓客布在諸縣,擁兵拒守。 太祖憂之,以寵爲

皆平。得戶二萬,兵二千人,令就田業。

禁等軍以霖雨水長爲羽所沒。 寵還爲汝南太守,賜爵關內侯。 關羽圍襄陽,寵助征南將軍曹仁屯樊城拒之,而左將軍于 位,進封昌邑侯。太和二年,領豫州刺史。三年春,降人稱吳大嚴,揚聲欲詣江北獵,孫權 部伏夜來燒,寵掩擊破之,進封南鄉侯。 軍人盟誓。會徐晃等救至,寵力戰有功,羽遂退。進封安昌亭侯。文帝卽王位,遷揚武將 其後耳。今若遁去,洪河以南,非復國家有也;君宜待之。」仁曰:「善。」龐乃沈白馬,與 疾,冀其不久。聞羽遣別將已在郟下,自許以南,百姓擾擾,羽所以不敢遂進者,恐吾軍掎 水相對。 「今日之危,非力所支。可及羽圍未合,乘輕船夜走,雖失城,尙可全身。」[寵曰:「山水速 破吳於江陵有功,更拜伏波將軍,屯新野。大軍南征,到精湖,龐帥諸軍在前,與賊隔 建安十三年,從太祖征荆州。大軍還,留寵行奮威將軍,屯當陽。孫權數擾東睡,復召 **寵敕諸將曰:「今夕風甚猛,賊必來燒軍,宜爲其備。」諸軍皆警。** 羽急攻樊城,樊城得水,往往崩壞,衆皆失色。或謂仁曰: 黃初三年,假寵節鉞。五年,拜前將軍。 夜半,賊果遣十 明帝即

凌騰布 去 成本志, 首者。 凌 後 此 至合肥,寵表召克、豫諸軍,皆集。 代都督揚州諸軍事。 不 利,退走。 以共事 暴歸 必欲 、無彊口 索兵不得 克而還。 、詔報日:「昔廉頗彊食, 不 平 道 書,請兵馬迎之。 **《偽退以罷吾兵,而倒還乘虛,掩不備也,表不罷兵。後十餘日,權果更來,到合肥城** 詔 臨時節度其宜。」籭會被書當入朝,敕留府 一,甚相嘉尙。 疏日 使寵將親兵千人自隨,其餘一無所問。 寵度其必襲西陽而爲之備,權聞之,退還。 秋,使曹休從廬江南入合肥,令寵向夏 宜深爲之備。」 會朱靈等從後來斷道,與賊相遇。賊驚走,休軍乃得還。是歲休薨,寵以前將軍 · ,凌支黨毀寵疲老悖謬,故明帝 ,乃單遣一督將步騎七百人往迎之。 其明年,吳將孫布遣人詣揚州求降,辭云:「道遠不能自致,乞兵見迎。」 曹休雖明果而希用兵,今所從道,背湖旁江,易進難退,此兵之窪地 汝南兵民戀慕,大小相率,奔隨道路,不可禁止。 今欲遣兵相迎,然計兵少則不 龍以爲必詐,不與兵, 龍表未報,休遂深入。 賊果從無彊口斷夾石,要休還路。 休戰不 馬援據鞍,今君未老而自謂已老,何與廉、馬之相背邪 賊尋退還,被詔罷兵。 召之。 而爲浚作報書曰:「知識邪正,欲避禍就順 布夜掩擊,督將迸走,死傷過半。 四年,拜寵征東將軍。 旣至,體氣康彊,見而造還。[1]寵屢表求 [長史:「若凌欲往迎, 足相衞, 龐以爲今賊大舉而還,非本意也, 多則事 必遠聞。 護軍表上,欲殺其爲 其冬,孫權揚聲欲 勿與兵也。」 且先密計以 初,寵 刺史王 其思安 凌於 與

邊境,惠此中國。」

日: 及鎮淮南,吳人憚之。若不如所表,將爲所闚。可令還朝,問以方事以察之。」帝從之。龐旣至,進見,飮 王凌表麗年過耽酒,不可居方任。 帝將召籠,給事中郭謀曰:「鼈爲汝南太守、豫州刺史二十餘年,有勳

酒至一石不亂。帝慰勞之,遣還。

十日不敢下船。 冠謂諸將曰:「權得吾移城,必於其衆中有自大之言,今大舉來欲要一切之 福生於內矣。」尚書趙咨以寵策爲長,詔遂報聽。 者形之』。今賊未至而移城卻內,此所謂形而誘之也。引賊遠水,擇利而動,舉得於外,則 道也。故能而示之以弱不能,驕之以利,示之以懾。此爲形實不必相應也。又曰『善動敵 未攻而自拔。 掎其歸路,於計爲便。」護軍將軍蔣濟議,以爲:「旣示天下以弱,且望賊煙火而壞城,此爲 遠壽春,賊攻圍之,得據水爲勢;官兵救之,當先破賊大輩,然後圍乃得解。 賊往甚易,而 叉賊舍船二百里來,後尾空縣,尙欲誘致,今宜聽其遂進,但恐走不可及耳。」整軍趨楊宜 兵往救之甚難,宜移城內之兵,其西三十里,有奇險可依,更立城以固守,此爲引賊平地而 賊聞大兵東下,卽夜遁。時權歲有來計。青龍元年,寵上疏曰:「合肥城南臨江湖,北 明年,吳將陸遜向廬江,論者以爲宜速赴之。寵曰:「廬江雖小,將勁兵精,守則經時。 一至於此,劫略無限,必以淮北爲守。」帝未許。籠重表曰:「孫子言,兵者,詭 其年,權自出,欲圍新城,以其遠水,積二

之,因以所獲盡爲將士賞。 兵去城遠者數百里,可掩擊也。 遣長吏督三軍循江東下,摧破諸屯,焚燒穀物而還。 詔美 於是引退。三年春,權遣兵數千家佃於江北。至八月,寵以爲田向收熟,男女布野,其屯衞 馳往赴,募壯士數十人,折松爲炬,灌以麻油,從上風放火,燒賊攻具,射殺權弟子孫泰。 耀兵,寵伏軍卒起擊之,斬首數百,或有赴水死者。明年,權自將號十萬,至合肥新城。 功,雖不敢至,必當上岸耀兵以示有餘。」乃潛遣步騎六千,伏肥城隱處以待之。權果上岸

後增邑,凡九千六百戶,封子孫二人亭侯。正始三年薨,諡曰景侯。子偉嗣。偉以格度知 心憂公,有行父、祭遵之風。賜田十頃,穀五百斛,錢二十萬,以明清忠儉約之節焉。」寵前 名,官至衞尉。 [1] 景初二年,以寵年老徵還,遷爲太尉。寵不治產業,家無餘財。詔曰:「君典兵在外,專

(二)世語曰:偉字公衡。偉子長武,有寵風,年二十四,爲大將軍掾。高貴鄉公之難,以掾守闆闍掖門,司馬文王弟安 |偉弟子**鸞,晉元康中至尚書令、司隸校尉。 鼈、偉、長武、鄨,皆長八尺**。 從文王至許,以疾不進。子從,求還省疾,事定乃從歸,由此內見恨。收長武考死杖下,偉免爲庶人。時人寃之。 陽亭侯幹欲入。幹妃,偉妹也。長武謂幹曰:「此門近,公且來,無有入者,可從東掖門。」 幹遂從之。 文王問幹 入何遲,幹言其故。 參軍王羨亦不得入,恨之。既而歲因王左右啓王,滿掾斷門不內人, 宜推劾。 壽春之役,偉

晉諸公贊曰:奮體量通雅,有寵風也。

爲豫州刺史,豫以母老求歸,備涕泣與別,曰:「恨不與君共成大事也。」 田豫字國讓,漁陽雍奴人也。 劉備之奔公孫瓚也,豫時年少,自託於備,備甚奇之。 備

謀掾,除潁陰、朗陵令,遷弋陽太守,所在有治。 假器,吾旣受之矣;何不急攻乎?」門慚而退。 能定天下者,必曹氏也。宜速歸命,無後禍期。」輔從其計,用受封寵。太祖召豫爲丞相軍 于輔爲國人所推,行太守事,素善豫,以爲長史。時雄傑並起,輔莫知所從。 曰:「卿爲公孫所厚而去,意有所不得已也;今還作賊,乃知卿亂人耳。 夫揧甁之智,守不 公孫瓚使豫守東州令,瓚將王門叛瓚,爲袁紹將萬餘人來攻。衆懼欲降。 **鹭雖知豫有權謀而不能任也。**鹭敗而鮮 豫謂輔曰:「終 豫登城謂門

形,回車結圜陳,弓弩持滿於內,疑兵塞其隙。胡不能進,散去。追擊,大破之,遂前平代, 鄢陵侯彰征代郡,以豫爲相。軍次易北,虜伏騎擊之,軍人擾亂,莫知所爲。 豫因地

皆豫策也。

遷南陽太守。先時,郡人侯音反,衆數千人在山中爲羣盜,大爲郡患。前太守收其黨

與五百餘人,表奏皆當死。豫悉見諸繫囚,慰諭,開其自新之路,一時破械遣之。諸囚皆叩 頭,願自效,卽相告語,羣賊一朝解散,郡內淸靜。 具以狀上,太祖善之。

亭侯。 狄。單將銳卒,深入虜庭,胡人衆多,鈔軍前後,斷截歸路。 豫乃進軍,去虜十餘里結屯營, 盟,出馬干匹與官,爲比能所攻,求救於豫。豫恐遂相兼并,爲害滋深,宜救善討惡,示信衆 城,圍之十重,豫密嚴,使司馬建旌旗,鳴鼓吹,將步騎從南門出,胡人皆屬目往赴之。豫將 馬與中國市。豫以戎狄爲一,非中國之利,乃先搆離之,使自爲讐敵,互相攻伐。 以東,濊貊以西,鮮卑數十部,此能、彌加、素利割地統御,各有分界;乃共要誓,皆不得以 豫皆構刺攪離,使凶邪之謀不遂,聚居之類不安。事業未究,而幽州刺史王雄支黨欲令雄 使左右斬進,顯其罪惡以令衆。衆皆怖慴不敢動,便以進弟代進。自是胡人破膽,威震沙 僵尸蔽地。 又鳥丸王骨進桀黠不恭,豫因出塞案行,單將麾下百餘騎入進部。 進逆拜,遂 精銳自北門出,鼓譟而起,兩頭俱發,出虜不意,虜衆散亂,皆棄弓馬步走,追討二十餘里, 多聚牛馬糞然之,從他道引去。胡見烟火不絕,以爲尙在,去,行數十里乃知之。追豫到馬 山賊高艾,衆數千人,寇鈔,爲幽、冀害,豫誘使鮮卑素利部斬艾,傳首京都。封豫長樂 文帝初,北狄彊盛,侵擾邊塞,乃使豫持節護烏丸校尉,牽招、解儁并護鮮卑。 爲校尉九年,其御夷狄,恆擢抑棄幷,乖散彊猾。凡逋亡姦宄,爲胡作計不利官者, 素利違 自高柳

魏書

領烏丸校尉,毀豫亂邊,爲國生事。

多,放散皆不納官。」由是功不見列。 事之際,多相違錯。 入海鉤取浪船。豫懼窮虜死戰,皆不聽。 山沈沒,波蕩著岸,無所蒙竄,盡虜其衆。一初,諸將皆笑於空地待賊,及賊破,競欲與謀,求 豫度賊船垂還,歲晚風急,必畏漂浪,東隨無岸,當赴成山。成山無藏船之處,輒便循海,案 行地勢,及諸山島,徼截險要,列兵屯守。自入成山,登漢武之觀。賊還,果遇惡風,船皆觸 官督青州諸軍,假節,往討之。會吳賊遣使與淵相結,帝以賊衆多,又以渡海,詔豫使罷軍。 太和末,公孫淵以遼東叛,帝欲征之而難其人,中領軍楊暨舉豫應選。〔〕乃使豫以本 喜知帝寶愛明珠,乃密上:「豫雖有戰功而禁令寬弛,所得器仗珠金甚 初,豫以太守督青州,青州刺史程喜內懷不服,軍

[1] 臣松之案:暨字休先,滎陽人,專見劉曄傳。暨子肇,晉荆州刺史。山濤啓專稱肇有才能。肇子潭字道元,次歌 字公嗣,潭子彧字長文,次經字仲武,皆見潘岳集。

大軍相向,當使難知,不當使自畫也。」豫輒上狀,天子從之。會賊遁走。後吳復來寇,豫 怠;罷怠然後擊之,可大克也。若賊見計,必不攻城,勢將自走。若便進兵,適入其計。 小利,欲質新城以致大軍耳。宜聽使攻城,挫其銳氣,不當與爭鋒也。城不可拔,衆必罷 後孫權號十萬衆攻新城,征東將軍滿籠欲率諸軍救之。豫曰:「賊悉衆大舉,非徒投射

往拒之,賊卽退。 諸軍夜驚,云:「賊復來!」豫臥不起,令衆「敢動者斬」。 有頃,竟無賊。

州刺史。 休,是罪人也。」遂固稱疾篤。 馬宣王以爲豫克壯, 景初末,增邑三百,并前五百戶。 外胡聞其威名,相率來獻。 書喩未聽。 拜太中大夫,食卿祿。年八十二薨。 豫書答曰:「年過七十而以居位, 州界寧肅,百姓懷之。徵爲衞尉。 正始初,遷使持節護匈奴中郎將,加振威將軍,領并 譬猶鐘鳴漏盡而夜行不 子彭祖嗣。(二) 屢乞遜位,太傅司

魏略曰: |豫 爲立碑銘。 乎?」豫言:「豹所履行與我敵等耳,使死而有靈,必與我善。」 妻子從之。 汝南聞其死也,悲之,旣爲畫像,又就 老,苦汝來過。 一不受。 豫罷官歸、居魏縣。 會病亡,戒其妻子曰:「葬我必於四門豹〔祠〕邊。」妻子難之,言:「西門豹古之神人,那可葬於其邊 無能有益,若何?」健步愍其貧羸,流涕而去,還爲故吏民說之。汝南爲具資數千匹,遣人餉豫 會汝南遺健步詣征北,感豫宿恩,過拜之。豫爲殺雞炊黍,送詣至陌頭,謂之曰:「罷

類,咸高豫節。白嘉平六年,下詔褒揚,賜其家錢穀。 豫清儉約素, 賞賜皆散之將士。 每胡、狄私遗, 悉簿藏官,不入家;家常貧匱。 語在徐邈傳。

魏略曰: 戎(賂),今卿舉袖以受狄金,朕甚嘉焉。」 乃卽賜絹五百匹。]豫得賜,分以其半藏小府,後胡復來,以半與之。 公,可以爲家資。」 斤,謂豫曰:「願避左右,我欲有所道。」。豫從之,胡因跪曰:「我見公貧,故前後遺公牛馬,公輒送官,今密以此上 鮮卑素利等數來客見,多以牛馬遺豫;豫轉送官。 豫張袖受之,答其厚意。胡去之後,皆悉付外,具以狀聞。於是詔褒之曰:「昔魏絳開懷以納 胡以爲前所與豫物顯露,不如持金。 乃密懷金三十

魏

滿田牵郭傳第二十六

史,招隨卒業。値京都亂,苗、隱見害,招俱與隱門生史路等觸蹈鋒刃,共殯斂隱屍,送喪還 道遇寇鈔,路等皆悉散走。賊欲斫棺取釘,招垂淚請赦。賊義之,乃釋而去。由此顯 牽招字子經,安平觀津人也。年十餘歲,詣同縣樂隱受學。後隱爲車騎將軍何苗長

破 萬,北阻彊胡,勸幹迎尚,并力觀變。」幹旣不能,而陰欲害招。招聞之,閒行而去,道隔不得 見罪 追尙,遂東詣太祖。 (走,到中山。時)尚外兄高幹爲幷州刺史,招以幷州 左有恆山之險,右有大河之固,帶甲五 也。 冀州牧袁紹辟爲督軍從事,兼領烏丸突騎。 紹卒,又事紹子尚。建安九年,太祖圍鄴。尚遣招至上黨,督致軍糧。未還,尚 太祖領冀州,辟爲從事。 紹舍人犯令,招先斬乃白,紹奇其意而不

嚴,以五千騎當遣詣譚。又遼東太守公孫康自稱平州牧,遣使韓忠齎單于印綬往假峭王。峭 所拜假;中間違錯,天子命曹公代之,言當白天子,更假眞單于,是也。 白天子,假我眞單于;遼東復持印綬來。如此,誰當爲正?」招答曰:「昔袁公承制,得有 王大會羣長,忠亦在坐。峭王問招:「昔袁公言受天子之命,假我爲單于;今曹公復言當更 太祖將討袁譚,而柳城烏丸欲出騎助譚。 太祖以招嘗領烏丸,遣詣柳城。 遼東下郡,何得擅 到,值峭王

爲右 汝君臣頑嚚,今恃險遠,背違王命,欲擅拜假,侮弄神器,方當屠戮,何敢慢易咎毀大人?」 稱拜假也?」忠曰:「我遼東在滄海之東,擁兵百萬,又有扶餘、濊貊之用;當今之勢,彊者 王等說成敗之效,禍福所歸, 便捉忠頭頓築,拔刀欲斬之。 ,曹操獨何得爲是也?」 招呵忠曰:「曹公允恭明哲,翼戴天子,伐叛柔服,寧靜 峭王驚怖,徒跣抱招,以救請忠,左右失色。 皆下席跪伏,敬受敕教,便辭遼東之使,罷所嚴騎 招乃還坐,爲峭 四海,

首,縣在馬市,招覩之悲感,設祭頭下。 太祖滅譚於南皮,署招軍謀掾,從討烏丸。至柳城,拜護烏丸校尉。 事罷,還鄴,拜平虜校尉,將兵督青、徐州郡諸軍事,擊東萊賊,斬其渠率,東土寧 。太祖義之,舉爲茂才。 從平漢中,太祖還,留招爲中 還鄴,遼東送袁尚

者,處有干數。 文帝踐阼,拜招使持節護鮮卑校尉,屯昌平。是時,邊民流散山澤,又亡叛在鮮卑中 又懷來鮮卑素利、彌加等十餘萬落,皆令款塞。 招廣布恩信,招誘降附。 建義中郎將公孫集等,率將部曲,咸各歸命;使還

塞,勒兵逆擊,來輒摧破,於是吏民膽氣日銳,荒野無虞。又搆閒離散,使虜更相猜疑。 備,而寇鈔不斷。 大軍欲征吳,召招還,至,值軍罷,拜右中郎將,出爲雁門太守。 招既教民戰陳,又表復烏丸五百餘家租調,使備鞍馬,遠遣偵候。 郡在邊陲,雖有候望之 **廣毎犯**

卑大人步度根 **鞪遠汲流水,往返七里。** 簡選有才識者,詣太學受業,還相授教,數年中庠序大興。 夷虜大小,莫不歸心,諸叛亡雖親戚不敢藏匿,咸悉收送。 雲中故郡,大破之。 能弟苴羅侯,及叛烏丸歸義侯王同、王寄等,大結怨讎。 、泄歸泥等與軻比能爲隙,將部落三萬餘家詣郡附塞。 招通河西鮮卑附頭等十餘萬家,繕治壓北故上館城,置屯戍以鎭內外, 招準望地勢,因山陵之宜,鑿原開渠,注水城內,民賴其益 是以招自出,率將歸泥等討比能於 郡所治廣武,井水鹹苦,民皆擔 於是野居晏閉,寇賊靜息。 敕令還擊比能,殺比

使守新興、雁門二牙門,出屯壓北,外以鎭撫,內令兵田,儲畜資糧,秋冬馬肥,州郡兵合,乘 遷徙無常。 通,表爲防備,議者以爲縣遠,未之信也。會亮時在祁山,果遣使連結比能。比能至故北地 騎來,到故平州塞北。招潛行撲討,大斬首級。招以蜀虜諸葛亮數出,而比能狡猾,能相交 軍踴躍。 自表輒行。 移招求救。 石城,與相首尾。 明帝即位,賜爵關內侯。太和二年,護烏丸校尉田豫出塞,爲軻比能所圍於故馬邑城 又遺一通於虜蹊要,虜卽恐怖,種類離散。 若勞師遠追,則遲速不相及。若欲潛襲,則山溪艱險,資糧轉運,難以密辦。 招卽整勒兵馬,欲赴救豫。并州以常憲禁招,招以爲節將見圍,不可拘於吏議 又並馳布羽檄,稱陳形勢,云當西北掩取虜家,然後東行,會誅虜身。檄到,豫 帝乃詔招,使從便宜討之。時比能己還漠南,招與刺史畢軌議曰:「胡虜 軍到故平城,便皆潰走。比能復大合 미

豫,百姓追思之。而漁陽傅容在雁門有名績,繼招後,在遼東叉有事功云。 釁征討,計必全克。未及施行,會病卒。招在郡十二年,威風遠振。其治邊之稱,次于田

招子嘉嗣。 次子弘,亦猛殺有招風,以隴西太守隨鄧艾伐蜀有功,咸熙中爲振威護軍。

嘉與晉司徒李胤同母,早卒。[1]

[1]按資書: 弘後爲揚州、凉州刺史,以果烈死事於邊。嘉子秀,字成叔。

即表訴被誣陷之由,論愷穢行,文辭尤厲。于時朝臣雖多證明,秀名譽由是而損。 **空從事中郞。與帝舅黃門侍郞王愷素相輕侮。** · 南綽冀州記曰:秀有雋才,性豪恢有氣,弱冠得美名。於太康中爲衞瓘、崔洪、石崇等所提攜,以新安令博士爲司 河間王以秀爲平北將軍,假節,在馮翊遇害。世人玩其辭賦,惜其材幹。 愷諷司隸荷愷,令都官誣奏秀夜在道中載高平國守士田興妻。秀 後張華請爲長史,稍遷至尚

淵司馬。 爲門下賊曹,轉爲丞相兵曹議令史,從征漢中。 主,諸營乃定。其明日,備欲渡漢水來攻。 淮曰:「此示弱而不足挫敵,非算也。不如遠水爲陳,引而致之,半濟而後擊,備可破 郭淮字伯濟,太原陽曲人也。〔〕建安中舉孝廉,除平原府丞。文帝爲五官將,召淮署 淵與備戰,淮時有疾不出。淵遇害,軍中擾擾,淮收散卒,推盪寇將軍張郃爲軍 。」諸將議衆寡不敵,僱便乘勝,欲依水爲陳以 太祖還,留征西將軍夏侯淵拒劉備 ,以淮爲 拒

魏

書

滿田牽郭傳第二十六

文帝卽王位,賜爵關內侯,轉爲鎭西長史。又行征羌護軍,護左將軍張郃、冠軍將軍楊秋討 一賊鄭甘、盧水叛胡,皆破平之。 既陳 ,備疑不渡,淮逡堅守,示無還心。以狀聞,太祖善之,假郃節,復以淮爲司馬。 關中始定,民得安業。

(二)按郭氏譜:淮祖全,大司農;父縕,雁門太守。

羌、胡來降,淮輒先使人推問其親理,男女多少,年歲長幼;及見,一二知其款曲,訊問周 也。 日:「普禹 至,咸稱神 「臣聞五帝先教導民以德,夏后政衰,始用刑辟。 黃初元年,奉使賀文帝踐阼,而道路得疾,故計遠近爲稽留。及羣臣歡會,帝正色責之 帝悅之,擢領雍州刺史,封射陽亭侯,五年爲眞。 會諸侯於塗山,防風後至,便行大戮。 明。 ' 今溥天同慶而卿最留遲,何也?」 。今臣遭唐虞之世,是以自知免於防風之誅 安定羌大帥辟蹏反,討破降之。 淮對日 毎

多謂不然。淮曰:「若亮跨渭登原,連兵北山,隔絕隴道,搖蕩民、夷,此非國之利也。」宣王 年,諸葛亮出斜谷,並田于蘭坑。 議欲關中大運,淮以威恩撫循羌、胡,家使出穀,平其輸調,軍食用足,轉揚武將軍。 太和二年,蜀相諸葛亮出祁山,遣將軍馬謖至街亭,高詳屯列柳城。 又破隴西名羌唐蹏於枹罕,加建威將軍。 是時司馬宣王屯渭南;淮策亮必爭北原,宜先據之,議者 五年, 蜀出鹵城。 張郃擊謖,淮攻詳 是時, 隴 右無穀 青龍一

善之,淮遂屯北原。塹壘未成,蜀兵大至,淮逆擊之。後數日,亮盛兵西行,諸將皆謂欲攻 西圍,淮獨以爲此見形於西,欲使官兵重應之,必攻陽遂耳。其夜果攻陽遂,有備不得上。

請使居安定之高平,爲民保障,其後因置(西三)〔西州〕都尉。 轉拜前將軍,領州如故 千餘落,拔徙以實關中。 正始元年,蜀將姜維出隴西。 遷左將軍。凉州休屠胡梁元碧等,率種落二千餘家附雍州。 准遂進軍,追至彊中,維退,遂討羌迷當等,按撫柔氏三

治無戴 l胡,化以據險,分軍兩持,兵勢轉弱,進不制維,退不拔化,非計也,不如合而俱西,及問、**閩** 留在西海。 白土故城,據河拒軍。淮見形上流,密於下渡兵據白土城,擊,大破之。治無戴圍武威,家屬 宜先討定枹罕,內平惡羌,外折賊謀。淮策維必來攻霸,遂入渢中,轉南迎霸。 兵,凉州名胡治無戴復叛應之。討蜀護軍夏侯霸督諸軍屯爲翅。淮軍始到狄道,議者僉謂 虜在石 |翅,會淮軍適至,維遁退。 八年,隴西、南安、金城、西平諸羌餓何、燒戈、伐同、蛾遮塞等相結叛亂,攻圍城邑,南招蜀 五年,夏侯玄伐蜀,淮督諸軍爲前鋒。 淮度勢不利,輒拔軍出,故不大敗。 還假淮節 頭山之西,當大道止,斷絕王使。 留陰平太守廖化於成重山 淮進軍趨 西海,欲掩取其累重,會無戴折還,與戰於龍夷之北,破走之。 進討叛羌,斬餓何、燒戈,降服者萬餘落。 · 築城,斂破羌保質。 淮還過討,大破之。 淮欲分兵取之。 姜維出石營,從彊川,乃西迎 九年,遮塞等屯河關、 諸將以維衆西接彊 維果攻爲 令居惡

追維於沓中,淮自率諸軍就攻化等。維果馳還救化,皆如淮計。進封都鄉侯。 定化,且使維疲於奔命。兵不遠西,而胡交自離,此一舉而兩全之策也。」乃別遣夏侯霸等 宏接,絕其內外,此伐交之兵也。淮曰:「今往取化,出賊不意,維必狼顧。比維自致,足以

子正嗣。咸熙中,開建五等,以淮蓍勳前朝,改封汾陽子。三 戶,封一子亭侯。〔1〕正元二年薨,追贈大將軍,諡曰貞侯。子統嗣。統官至荆州刺史,薨。 准為車騎將軍、儀同三司,持節、都督如故。」進封陽曲侯,邑凡二千七百八十戶,分三百 十餘年,外征寇虜,內綏民夷。比歲以來,摧破廖化,禽虜句安,功績顯著,朕甚嘉之。今以 向安等於翅上。二年,詔曰:「昔漢川之役,幾至傾覆。淮臨危濟難,功書王府。在關右三 嘉平元年,遷征西將軍,都督雍、凉諸軍事。是歲,與雍州刺史陳泰協策,降蜀牙門將

- 〔1〕,世語曰:淮妻,王凌之妹。凌誅,妹當從坐,御史往收。督將及羌、胡渠帥數千人叩頭請淮表留妻,淮不從。 還。淮以書白司馬宜王曰:「五子哀母,不惜其身;若無其母,是無五子;無五子,亦無淮也。今輒追還,若於法 道,莫不流涕,人人扼腕,欲劫留之。 准五子叩頭流血請准,准不忍視,乃命左右追妻。 於是追者數千騎,數日而 未通,當受罪於主者,觀展在近。」書至,宣王亦宥之。 妻上
- (三) 晉諸公贊曰:惟弟配,字仲南,有重名,位至城陽太守。裴秀、賈充皆配女壻。子展,字泰舒。有器度幹用,歷職 著績,終於太僕。 次弟豫,字泰寧,相國參軍,知名,早卒。 女適王衍。 配弟鎭,字季南,謁者僕射。 鎭子奕,字泰

郭淮方策精詳,垂問秦、雍。而豫位止小州,招終於郡守,未盡其用也。 評曰:滿竈立志剛毅,勇而有謀。田豫居身淸白,規略明練。 牽招秉義壯烈,威績顯著。

徐胡二王傳第二十七

聖人。」達白之太祖,太祖甚怒。度邃將軍鮮于輔進日:「平日醉客謂酒淸者爲聖人,濁者 之。 爲賢人,邈性脩愼,偶醉言耳。」竟坐得免刑。後領隴西太守,轉爲南安。文帝踐阼,歷譙 中聖人不?」邈對曰:「昔子反斃於穀陽,御叔罰於飮酒,臣嗜同二子,不能自懲,時復中 相,平陽、安平太守,潁川典農中郎將,所在著稱,賜虧關內侯。 車駕幸許昌,問邈曰:「頗復 然宿瘤以醜見傳,而臣以醉見識。」帝大笑,顧左右曰:「名不虛立。」遷撫軍大將軍軍 魏國初建,爲尙書郎。時科禁酒,而邈私飮至於沈醉。校事趙達問以曹事,邈曰:「中 徐邈字景山,燕國薊人也。 太祖平河朔,召爲丞相軍謀掾,試守奉高令,入爲東曹議令

山,隴右三郡反,邈輒遣參軍及金城太守等擊南安賊,破之。河右少雨,常苦乏穀,邈上脩 明帝以凉州絕遠,南接蜀寇,以邈爲凉州刺史,使持節領護羌校尉。 至,值諸葛亮出祁

魏

徐胡二王傳第二十七

犯大罪,先告部帥,使知,應死者乃斬以徇,是以信服畏威。賞賜皆散與將士,無入家者,妻 也。 學明訓:禁厚葬,斷淫祀,進善黜惡,風化大行,百姓歸心焉。」西域流通,荒戎入貢,皆邈勳 用之餘,以市金帛犬馬,通供中國之費。以漸收斂民閒私仗,藏之府庫。然後率以仁義,立 武威、酒泉鹽池以收虜穀,叉廣開水田,募貧民佃之,家家豐足,倉庫盈溢。乃支度州界軍 子衣食不充;天子聞而嘉之,隨時供給其家。彈邪繩枉,州界肅清。 討叛羌柯吾有功,封都亭侯,邑三百戶,加建威將軍。 邈與羌、胡從事,不問小過; 若

寬。聖人以清爲難,而除公之所易也。」或問欽:「徐公當武帝之時,人以爲通,自在涼州及 書,稱邈曰:「徐公志高行絜,才博氣猛。其施之也,高而不狷,絜而不介,博而守約,猛而能 沒之後,家無餘財,朕甚嘉之。 其賜邈等家穀二千斛,錢三十萬,布告天下。」 邈同郡韓觀 **衞尉田豫皆服職前朝,歷事四世,出統戎馬,入贊庶政,忠清在公,憂國忘私,不營產業,身** 曼游,有鑒識器幹,與邈齊名,而在孫禮、盧毓先,爲豫州刺史,甚有治功,卒官。行這歐欽著 之士,詔曰:「夫顯賢表德,聖王所重;舉善而敎,仲尼所美。故司空徐邈、征東將軍胡質、 **嘉平元年,年七十八,以大夫薨于家,用公禮葬,諡曰穆侯。子武嗣。 六年,朝廷追思清節** 歲卽拜司空,邈歎曰:「三公論道之官,無其人則缺,豈可以老病忝之哉?」遂固辭不受。 正始元年,還爲大司農。遷爲司隸校尉,百寮敬憚之。公事去官。後爲光祿大夫,數

若,不與俗同,故前日之通,乃今日之介也。是世人之無常,而徐公之有常也。」 還京師,人以爲介,何也?」欽答曰:「往者毛孝先、崔季珪等用事,貴淸素之士,于時皆變易 車服以求名高,而徐公不改其常,故人以爲通。比來天下奢靡,轉相做效,而徐公雅尚自

魏名旺奏載黃門侍郎杜恕表,稱"「韓觀、王昶,信有策才,高官重任,不但三州。」

郡吏馮諒緊獄爲證。 及於父,至於精良綜事過之。」「二太祖卽召質爲頓丘令。縣民郭政通於從妹,殺其夫程他, 駕,使見太祖。太祖問曰:「胡通達,長者也,寧有子孫不?」濟曰:「有子曰質,規模大略不 更詳其事,檢驗具服 胡質字文德,楚國壽春人也。少與蔣濟、朱績俱知名於江、淮間,仕州郡。 政與妹皆耐掠隱抵,諒不勝痛,自誣,當反其罪。價至官,察其情色, 蔣濟爲別

(1)案胡氏譜:通達名敏,以方正徵。

於口,今以睚眦之恨, 知其不貪,奔北知其不怯,聞流言而不信,故可終也。 請質,質辭以疾。 入爲丞相東曹議令史, 遼出謂質曰:「僕委意於君,何以相 乃成嫌隙。 州請爲治中。 睡,五賣反。 眦,士賣反。況質才薄,豈能終好?是以不願也。」 將軍張遼與其護軍武周有隙。 武伯南身爲雅士,往者將軍稱之不容 遼見刺史溫恢求

七四一

魏書

遼感言,復與周平。(一)

國 志 卷二十七

(一) 虞預晉書曰:周字伯南,沛國竹邑人。位至光祿大夫。子陔,字元夏。 是見怒。元康元年,楊駿被誅。愷時爲尚書僕射,以茂駿之姨弟,陷爲駿黨,遂枉見殺,衆咸寃痛之。 有誠,終於散騎常侍。 吏部尚書,遷左僕射、右光祿大夫、開府儀同三司,卒於官。 | 陔以在|魏已爲大臣,本非佐命之數,懷遜讓,不得已 量最優,有輔佐之風,展力仕宦,可爲亞公。叔夏、季夏,不減常伯、納言也。」」該少出仕宦,歷職內外,泰始初爲 高下,以效郭、許之聽可乎?」公榮乃自詣陔兄弟,與共言語,觀其舉動。 出語周曰:「君三子皆國士也。 雖鄉人諸父,未能覺其多少。 而居位,故在官職,無所荷任,夙夜思恭而已。終始全潔,當世以爲美談。|韶歷二官吏部郎。山濤啓事稱|韶清白 茂至侍中、尚書。潁川荷愷,宣帝外孫,世祖姑子,自負貴戚,要與茂交。茂拒而不答,由 陔及二弟韶、茂,皆總角見稱,並有器望, 元夏器

曰:「此士無讎而有少妻,所以死乎!」悉見其比居年少,書吏李若見問而色動,遂窮詰情 太祖辟爲丞相屬。黃初中,徙吏部郎,爲常山太守,遷任東莞。士盧顯爲人所殺,質

中乃安。 爲賊盛不可迫,質曰:「樊城卑下,兵少,故當進軍爲之外援;不然,危矣。」 遷荆州刺史,加振威將軍,賜爵關內侯。吳大將朱然圍樊城,質輕軍赴之。 遷征東將軍,假節都督青、徐諸軍事。 廣農積穀,有兼年之儲,置東征臺,且佃且 **遂勒兵臨圍**,城 議者皆以

寸。又通渠諸郡,利舟楫,嚴設備以待敵。海邊無事。

軍師以聞,追進封陽陵亭侯,邑百戶,諡曰貞侯。子威嗣。 性沉實內察,不以其節檢物,所在見思。嘉平二年薨,家無餘財,惟有賜衣書篋而已。 語在徐邈傳。處,咸熙中官至徐州刺史,日之有殊績,歷三郡守,所在有名。卒於安 六年,詔書褒述質清行,賜其家

晉陽秋曰:城字伯虎。少有志尚、厲操淸白。質之爲<u>荆州也,城自京都省之。家餐,無車馬童僕,</u>城自驅驢單行, 遠也。」 吏名。 東將軍;並以潔行垂名。 質帳下都督,素不相識,先其將歸,請假還家,陰資裝百餘里要之,因與爲伴,每事佐助經營之,又少進飲食,行數質帳下都督,素不相識,先其將歸,請假還家,陰資裝百餘里要之,因與爲伴,每事佐助經營之,又少進飲食,行數 清孰與父淸?」|威對曰:「臣不如也。」帝曰:「以何爲不如?」對曰:「臣父淸恐人知,臣淸恐人不知,是臣不如者 百里。城疑之,密誘問,乃知其都督也,因取向所賜絹答謝而遣之。後因他信,具以白質。質杖其都督一百,除 拜見父。停廐中十餘日,告歸。 是吾俸祿之餘,故以爲汝糧耳。」」威受之,辭歸。每至客舍,自放驢,取樵炊爨,食畢,復隨旅進道,往還如是。 其父子淸愼如此。於是名譽著聞,歷位宰牧。晉武帝賜見,論邊事,語及平生。帝歎其父淸,謂威曰:「卿 官至前將軍、靑州刺史。太康元年卒,追贈鎭東將軍。威弟羆、字季象,征南將軍;威子奕,字次孫,平 臨辭,質賜絹一疋,爲道路糧。 威跪曰:「大人淸白,不審於何得此絹?」質曰:

王昶字文舒,太原晉陽人也。[]少與同郡王凌俱知名。凌年長,昶兄事之。

復興,不可得也。乃著治論,略依古制而合於時務者二十餘篇,又著兵書十餘篇,言奇正之 在外任,心存朝廷,以爲魏承秦、漢之弊,法制苛碎,不大釐改國典以準先王之風,而望治化 宮,昶爲太子文學,遷中庶子。文帝踐阼,徙散騎侍郎,爲洛陽典農。時都畿樹木成林,昶

(一) 案王氏譜:昶伯父柔,字叔優;父澤,字季道。

用,三青龍中奏之。

皆二千石才也,雖然,叔優當以仕宦顯,季道宜以經術進,若違才易務,亦不至也。」叔優等從其言。 郭林宗傳曰:叔優、季道幼少之時,聞林宗有知人之鑒,共往候之,請問才行所宜,以自處業。 林宗笑曰:「卿二人 叔優至北中

〔三〕孫子兵法曰:兵以正合,以奇勝;奇正還相生,若循環之無端。

則將,季道代郡太守。

其爲兄子及子作名字,皆依謙實,以見其意,故兄子默字處靜,沈字處道,其子渾字玄

沖,深字道沖。 遂書戒之日:

也。孝敬則宗族安之,仁義則鄕黨重之,此行成於內,名著于外者矣。人若不篤於至 于滅亡之禍者,何也?由所祖習非其道也。夫孝敬仁義,百行之首,行之而立,身之本 夫人爲子之道,莫大於寶身全行,以顯父母。此三者人知其善,而或危身破家,陷

暇。」 弱以爲彊,鮮不遂矣。 自伐好爭之咎乎。故君子不自稱,非以讓人,惡其蓋人也。 松柏之茂,隆寒不衰。 行;況在己名,可不戒之哉!夫物速成則疾亡,晚就則善終。 此二者之戒,昭然著明,而循覆車磁衆,逐末彌甚,皆由惑當時之譽,昧目前之利故也。 其委笄,惡其掩人也。〔三〕 名,欲使汝曹顧名思義,不敢違越也。古者盤杅有銘,几杖有誠,俯仰察焉,用 家,永全福祿者也。 之足常足矣。 退,知欲而不知足,故有困辱之累,悔吝之咎。 語曰:「如不知足,則失所欲。」 故 **夫富貴聲名,人情所樂,而君子或得而不處,何也?惡不由其道耳。** 行,而背本逐末,以陷浮華焉,以成朋黨焉;浮華則有虛僞之累,朋黨則有彼此之患。 掩人者人亦掩之, 陵人者人亦陵之。故三部爲戮于晉, 以聖人之德,猶尙如此,況庸庸之徒而輕毀譽哉? 誰毀誰譽; 覽往事之成敗,察將來之吉凶,未有干名要利,欲而不厭,而能保 欲使汝曹立身行己,遵儒者之教,履道家之言,故以玄默沖 如有所譽, 夫毀譽,愛惡之原而禍福之機也,是以聖人愼之。 是以大雅君子惡速成,戒闕黨也。 夫人有善鮮不自伐, 必有所試。」 叉曰:「子貢方人。賜也賢乎哉,我則不 有能者寡不自矜;伐則掩人, 若范匄對秦客而武子擊之折 夫能屈以爲伸,讓以爲得, 王叔負罪於周,不惟矜善 朝華之草,夕而 患人知進而不知 孔子曰:「吾 矜則 零落; 世持 知足 無過 虚爲 陵

當矣;若已無可毀之行,則彼言妄矣。當則無怨于彼,妄則無害於身,又何反報焉? 校乎?其害深矣。夫虛僞之人,言不根道,行不顧言,其爲浮淺較可識別;而世人惑 莫如重裘,止謗莫如自脩。」斯言信矣。若與是非之士,凶險之人,近猶不可,況與對 驅動後生。 焉,猶不檢之以言行也。 且聞人毀己而忿者,惡醜聲之加人也,人報者滋甚,不如默而自脩己也。諺曰:「救寒 可得而言也。」 斯戒至矣。 〔三人或毀已,當退而求之於身。 若已有可毀之行,則彼言 昔伏波將軍馬援戒其兄子,言:「聞人之惡,當如聞父母之名;耳可得而聞,口不 雖刑於鈇鉞,大爲烱戒,然所汙染,固以衆矣。 可不愼與! [三] 近濟陰魏諷、山陽曹偉皆以傾邪敗沒,熒惑當世,挾持姦慝,

知。 之昵之,不願兒子爲之。(四)北海徐偉長,不治名高,不求苟得,澹然自守,惟道是務 學於師友。吾與時人從事,雖出處不同,然各有所取。 公幹,博學有高才,誠節有大意,然性行不均,少所拘忌,得失足以相補。吾愛之重之, 其有所是非,則託古人以見其意,當時無所褒貶。吾敬之重之,願兒子師之。 人不可爲,吾亦不願也。 其爲人弘曠不足,輕貴有餘;得其人重之如山,不得其人忽之如草。 若夫山林之士,夷、叔之倫,甘長飢於首陽,安赴火於縣山,雖可以激貪勵俗,然聖 今汝先人世有冠冕,惟仁義爲名,守愼爲稱,孝悌於閨門,務 潁川郭伯益,好尚通達,敏而有 吾以所知親 東平劉

耳。 其取人務實道,其處世戒驕淫,其貧賤愼無戚,其進退念合宜,其行事加九思,如此而 在朝忘身。吾友之善之,願兒子邍之。〔宀〕若引而伸之,觸類而長之,汝其庶幾舉一隅 不願兒子慕之。〔刑樂安任昭先,淳粹履道,內敏外恕,推遜恭讓,處不避洿,怯而義勇, 及其用財先九族,其施舍務周急,其出入存故老,其論議貴無貶,其進仕尙忠節, 吾復何憂哉?

- 國語曰:范文子暮退於朝,武子曰:「何暮也?」對曰:「有秦客廋辭于朝,大夫莫之能對也,吾知三焉。」 案:對秦客者,范燮也。 曰:「大夫非不能也,讓父兄也。 爾童子而三掩人於朝,吾不在,晉國亡無日也。」 擊之以杖, 折其委笄。 此云范匄、蓋誤也。 臣松之 武子怒
- (三) 臣松之以爲援之此誡,可謂切至之言,不刊之訓也。 使事徹時主,季良以敗。言之傷人,孰大於此?與其所誠,自相違伐。 若乃行事,得失已暴于世,因其善惡,即以爲誠,方之于彼,則有愈焉。 凡道人過失,蓋謂居室之愆,人未之知,則由己而發者也。 然援誠稱龍伯高之美,言杜季良之惡,致
- 世語曰:黃初中,孫權通章表。偉以白衣登江上,與權交書求賂,欲以交結京師,故誅之。
- (四)伯益名奕,郭嘉之子。
- (五)臣松之以爲文舒復擬則文淵,顯言人之失。魏諷、曹偉,事陷惡逆,著以爲誠,差無可尤。至若郭伯益、劉公幹, 孫則揚: 雖其人皆往,善惡有定;然旣友之於昔,不宜復毀之於今,而乃形于翰墨,永傳後葉,於舊交則違久要之義,於子 人前世之惡。於夫鄙懷,深所不取。善乎東方之誠子也,以首陽爲拙,柳下爲工,寄旨古人,無傷當時。

魏

方之馬、王,不亦遠哉!

会 昭先名嘏。 擅耕版地數十畝種之,人以語版,版曰:「我自以借之耳。」耕者聞之,慚謝還地。及邑中爭訟,皆詣版質之,然後 故東東郡程威、趙國劉固、河東上官崇等,錄其事行及所著書奏之。詔下祕書,以貰羣言。 海內至德,嘏應其舉,爲臨菑侯庶子、相國東曹屬、尚書郎。 不綜覽,於時學者號之神童。 不絕聲,自然之哀,同於成人,故幼以至性見稱。 今雖作賊,那可入其鄕邪?」遂相帥而去。 以至行稱。 足,恭敬如有畏。 禁省,歸書不封。 意厭。其子弟有不順者,父兄竊數之曰:「汝所行,豈可令任君知邪!」其禮敎所化,率皆如此。 匹。後生 口家來贖,時價直六十匹。 漢末,黃巾賊起,天下饑荒,人民相食。 寇到博昌,聞旐姓字,乃相謂曰:「宿聞任子旟,天下賢人也。 別傳曰:嘏,樂安博昌人。 其脩身履義,皆沈默潛行,不顯其美,故時人少得稱之。著書三十八篇,凡四萬餘言。 帝嘉其淑慎,累遷東郡、趙郡、河東太守,所在化行,有遺風餘敎。 遂遇荒亂,家貧賣魚,會官稅魚,魚貴數倍,假取直如常。 共買者欲隨時價取贖,嘏自取本價八匹。 世爲著姓,夙智性成,故鄉人爲之語曰:「蔣氏翁,任氏童。」父族,字子旗: 由是聲聞遠近,州郡並招舉孝廉,歷酸棗、祝阿令。 嘏八歲喪母,號泣 年十四始學,疑不再問,三年中誦五經,皆究其義,兼包羣 文帝時,爲黃門侍郞。 共買者慚,亦還取本價。 每納忠言,輒手書懷本,自在 嘏爲人淳粹凱悌,虚己若不 又與人共買生口,各雇 會太祖創業,召 比居者 jζ

端一小心,清脩密靜,乾乾不解,志尙在公者, 太尉司馬宣王以昶應選。 四年,詔「欲得有才智文章,謀慮淵深,料遠若近,視昧而察,籌不虛運,策弗徒發, 正始中,轉在徐州,封武觀亭侯,遷征南將軍,假節都督荆、豫諸 無限年齒, 勿拘貴賤, 卿校已上各舉一人」。

課之法不垂。周制冢宰之職,大計羣吏之治而誅賞,又無校比之制。 敍,儲穀畜帛,反民於樸。詔書褒讚。 學,抑絕浮華,使國子入太學而脩庠序;其二,欲用考試,考試猶準繩也,未有舍準繩而意 欲約官實祿,勵以廉恥,不使與百姓爭利;其五,欲絕侈靡,務崇節儉,令衣服有章,上下有 正曲直,廢黜陟而空論能否也;其三,欲令居官者久於其職,有治績則就增位賜爵;其四, 任賢,略舉黜陟之體,以委達官之長,而總其統紀,故能否可得而知也。 嘉平初,太傅司馬宣王旣誅曹爽,乃奏博問大臣得失。 因使撰百官考課事,昶以爲唐虞雖有黜陟之文,而考 **昶陳治略五事:其一,欲崇道篤** 由此言之,聖主明於 其大指如此

州刺史王基詣夷陵,昶詣江陵,兩岸引竹絙爲橋,渡水擊之。賊奔南岸,鑿七道並來攻。 續果追軍,與戰,克之。續遁走,斬其將鍾離茂、許旻,收其甲首旗鼓珍寶器仗,振旅而還。 先遣五軍案大道發還,使賊望見以喜之,以所獲鎧馬甲首,馳環城以怒之,設伏兵以待之。 是昶使積弩同時俱發,賊大將施績夜遁入江陵城,追斬數百級。 歸、房陵皆在江北,民夷與新城郡接,可襲取也。」乃遣新城太守州泰襲巫、秭歸、房陵,荆 二年,昶奏:「孫權流放良臣,適庶分爭,可乘釁而制吳、蜀;白帝、夷陵之間,黔、巫、秭

魏書

徐胡二王傳第二十七

嗣,咸熙中爲越騎校尉。〔〕〕 績、全熙使不得東。誕既誅,詔曰:「昔孫臏佐趙,直湊大梁。 也。」增邑千戶,幷前四千七百戶,遷司空,持節、都督如故。 兵拒儉、飲有功,封二子亭侯、關內侯,進位驃騎將軍。 王基、州泰皆有功。於是遷昶征南大將軍、儀同三司,進封京陵侯。毌丘儉、文欽作亂,引 諸葛誕反,昶據夾石以逼江陵,持施 甘露四年薨,諡曰穆侯。 西兵驟進,亦所以成東征之勢 子渾

案晉書:渾自越騎入晉,累居方任,平吳有功,封一子江陵侯,位至司徒。渾子濟,字武子,有雋才令望,爲河南 自爲名士,述及坦之並顯重於世,爲時盛門云。自湛已下事,見晉陽秋也。 子述,字懷祖,尚書令、衞將軍。述子坦之,字文度,北中郎將,徐、克二州刺史。趙諸子中,湛最有德譽,而承亦 尹、太僕。早卒,追贈驃騎將軍。渾弟深,冀州刺史。深弟湛,字處沖,汝南太守。湛子承,字安期,東海內史。承

宿衞之臣,留祕閣之吏,所希聞也。」凌猶不遣。凌流稱青土,蓋亦由基協和之輔也。 郡召爲吏,非其好也,遂去,入琅邪界游學。」黃初中,察孝廉,除郎中。是時青土初定,刺史 曰:「凡家臣之良,則升于公輔,公臣之良,則入于王職,是故古者侯伯有貢士之禮。 王凌特表請基爲別駕,後召爲祕書郎,凌復請還。頃之,司徒王朗辟基,凌不遣。 王基字伯輿,東萊曲城人也。少孤,與叔父翁居。緣撫養甚篤,基亦以孝稱。年十七, 朗書劾州 **今州取**

軍司馬宣王辟基,未至,擢爲中書侍郎。

競, 社稷之憂也。 至於生患。 賊未殄,猛將擁兵,檢之則無以應敵,久之則難以遺後,當盛明之世,不務以除患,若子孫不 下,至孝文時唯有同姓諸侯,而賈誼憂之曰:『置火積薪之下而寢其上,因謂之安也。』今寇 明帝盛脩宮室,百姓勞瘁。基上疏曰:「臣聞古人以水喩民,曰『水所以載舟,亦所以覆 故在民上者,不可以不戒懼。 昔顏淵云東野子之御,馬力盡矣而求進不已,是以知其將敗。今事役勞苦,男 使賈誼復起,必深切于曩時矣。」 夫民逸則慮易,苦則思難,是以先王居之以約**儉**,俾不

還。 柄,風化陵遲,基著時要論以切世事。 將則舊將已盡, 新將未信。 誕使基策之。 威惠,明設防備,敵不敢犯。 安平太守,公事去官。大將軍曹爽請爲從事中郎,出爲安豐太守。郡接吳寇,爲政清嚴有 今陸遜等已死,而權年老,內無賢嗣,中無謀主。 權自出則懼內釁卒起,癰疽發潰; 遣 散騎常侍王肅著諸經傳解及論定朝儀,改易鄭玄舊說,而基據持玄義,常與抗衡。 基曰:「昔孫權再至合肥,一至江夏,其後全琮出廬江,朱然寇襄陽,皆無功而 此不過欲補定支黨,還自保護耳。」後權竟不能出。時曹爽專 加討寇將軍。吳嘗大發衆集建業,揚聲欲入攻揚州,刺史諸葛 以疾徵還,起家爲河南尹,未拜,爽伏誅,基嘗爲爽

魏

官屬,隨例罷

沮、漳,資水浮穀而下。賊知官兵有經久之勢,則拒天誅者意沮,而向王化者益固。然後率 聚糧水戰之備,則雖積兵江內,無必渡之勢矣。今江陵有沮、潭二水,溉灌膏腴之田以于 宜。 門自守。 交絕,交絕而吳禽矣。 不然,兵出之利,未可必矣。」 於是遂止。 合蠻夷以攻其內,精卒勁兵以討其外,則夏口以上必拔,而江外之郡不守。如此,吳、蜀之 賊不敢輕越江。明制度,整軍農,**兼脩學校,南方稱之。時朝廷議欲伐吳,詔基量進趣之** 口。於是移其降民,置夷陵縣。賜爵關內侯。基又表城上昶,徙江夏治之,以偪夏口,由是 安陸左右,陂池沃衍。若水陸並農,以實軍資,然後引兵詣江陵、夷陵,分據夏口,順 基對曰:「夫兵動而無功,則威名折於外,財用窮於內,故必全而後用也。 若不資通川 其年爲尙書,出爲荆州刺史,加揚烈將軍,隨征南王昶擊吳。 。基示以攻形,而實分兵取雄父邸閣,收米三十餘萬斛,虜安北將軍譚正,納降數千 基別襲步協於夷陵,協閉

故知 也。 和遠在身,定衆在心。 夫志正則衆邪不生, 司 ?馬景王新統政,基書戒之曰::「天下至廣,萬機至猥,誠不可不矜矜業業,坐而待旦 心靜則衆事不躁,思慮審定則教令不煩,親用忠良則遠近協服。 許允、傅嘏、袁侃、崔贊皆一時正士,有直質而無流心,可與同政

事者也。」景王納其言。

適與景王 高 [貴鄉公即尊位,進封常樂亭侯。毋丘儉、文欽作亂,以基爲行監軍、假節,統計昌軍 會於許昌。 景王曰:「君籌儉等何如?」基曰:「淮南之逆,非吏民思亂也,儉等誑

乃聽進 州刺史鄧艾屯樂嘉,儉使文欽將兵襲艾。 大邸閣 城,南頓是也。」遂輒進據南頓 時決,則事之深淺未可測也。 之,則淮 懐離心; 民望,而停軍高壘,有似畏懦,非用兵之勢也。 欲須諸軍集到, 以爲:「儉等舉軍足以深入,而久不進者,是其詐僞已露,衆心疑沮也。今不張示威形以副 脅迫懼 不行之謂也,進而 軍門矣。」景王曰:「善。」乃令基居軍前。 據隱水。 ,計足軍 ,畏目下之戮,是以尙羣聚耳。 南非國家之有,譙、沛、汝、豫危而不安,此計之大失也。 儉等所迫脅者,自顧罪重,不敢復還,此爲錯兵無用之地,而成姦宄之源。 猶尙未許。 人四十日糧。 旣至,復言曰:「兵聞拙速,未覩工遲之久。 方今外有彊寇,內有叛臣,若不 不可犯耳。 基日:「將在軍,君令有所不受。 保堅城,因積穀,先人有奪人之心,此平賊之要也。」 今據堅城,保壁壘,以積實資虜,縣運軍糧,甚非計 議者多欲將軍持重。 ,儉等從項亦爭欲往,發十餘里,聞基先到,復還保項。 若大兵臨偪,必土崩瓦解,儉、欽之首,不終朝而縣於 基知其勢分,進兵偪項,儉衆遂敗。欽等已平,遷 議者咸以儉、欽慓悍,難與爭鋒。 若或虜略民人,又州郡兵家爲賊所得者, 將軍持重是也,停軍不進非也。 彼得則利, 我得亦利, 軍宜速進據南頓, 詔基停駐 也。」景王 基屢請, 是謂 持 吳寇因 南頓有 重非 基 更

關內侯,以報叔父拊育之德。有詔特聽。

智者不 部界, 軍司 弟, 諸將曰:「今圍壘轉固,兵馬向集,但當精脩守備以待越逸,而更移兵守險,使得放縱,雖有 年,人有歸志,今俘馘十萬,罪人斯得,自歷代征伐,未有全兵獨克如今之盛者也。 拔,而衆死者太半。 軍堅壘。 拒 於勢大損 「初議者云云,求移者甚衆,時未臨履,亦謂宜然。 ,衆議,終至制敵禽賊,雖古人所述,不是過也。」文王欲遣諸將輕兵深入,招迎唐咨等子 因釁有 馬 諸 一不得有所遣。 能善後矣。」遂守便宜上疏曰:「今與賊家對敵,當不動如山。若遷移依險,人心搖蕩, 文王進屯丘頭 葛誕反 輕敵則 基累啓求進討。 ·蕩覆吳之勢。 諸軍並據深溝高壘,衆心皆定,不可傾動,此御兵之要也。」 書奏,報聽。 慮難 了基以本官行鎭東將軍,都督揚、豫諸軍事。 不 姜維 深。 ,分部圍守, 城中食盡,晝夜攻壘,基輒拒擊,破之。 因洮上之利,輕兵深入,糧餉不 基諫日:「昔諸葛恪乘東關之勝,竭江表之兵,以圍新城,城旣不 會吳遣朱異來救誕,軍於安城。 今賊新敗於外, 各有所統。 叉內患未弭, 基督城東城南二十六軍,文王敕軍吏入鎭南 將軍深算利害,獨秉固志,上違詔命,下 是其脩備設慮之時也。 繼,軍覆上邽。 基又被詔引諸軍轉據北山,基謂 時大軍在頃,以賊兵精,詔基斂 壽春既拔,文王與基書曰: 夫大捷之後,上下 且兵 定皇帝 大將

克袁紹於官渡,自以所獲已多,不復追奔,懼挫威也。」文王乃止。以淮南初定,轉基爲征 東將軍,都督揚州諸軍事,進封東武侯。基上疏固讓,歸功參佐,由是長史司馬等七人皆

征南將軍,都督荆州諸軍事。常道鄉公卽尊位,增邑千戶,幷前五千七百戶。前後封子一 是歲,基母卒,詔祕其凶問,迎基父豹喪合葬洛陽,追贈豹北海太守。甘露四年,轉爲

人亭侯、關內侯。

外利。」 輒敬依來指。」後由等竟不降。(二) 驛陳狀。 景元二年,襄陽太守表吳賊鄧由等欲來歸化,基被詔,當因此震蕩江表。 文王報書曰:「凡處事者,多曲相從順,鮮能確然共盡理實。 誠感忠愛,每見規示, 且曰:「嘉平以來,累有內難,當今之務,在于鎭安社稷,綏寧百姓,未宜動衆以求

司馬彪戰略載基此事,詳於本傳。曰:「景元二年春三月,襄陽太守胡烈表上『吳賊鄧由、李光等,同謀十八屯,欲 至赤岸乃得渡沮,西道當出箭谿口,乃趣平土,皆山險狹,竹木叢蔚,卒有要害,弩馬不陳。今者筋角弩弱,水潦 誘致官兵,馳驛止文王,說由等可疑之狀。『且當淸澄,未宜便舉重兵深入應之』。又曰:『夷陵東道,當由 軍,使烈督萬人徑造沮水,荆州、義陽南屯宜城,承書夙發。若由等如期到者,便當因此震蕩江表。甚疑賊詐降, 來歸化,遣將張吳、鄧生,幷送質任。克期欲令郡軍臨江迎拔』。大將軍司馬文王啓聞。 詔征南將軍王基部分諸 車御,

魏

徐胡二王傳第二十七

王曰:『昔漢祖納酈生之說, 未足爲多,失之傷損威重。』文王累得甚書,意疑。尋敕諸軍已上道者,且權停住所在,須後節度。甚又言于文 也。嘉平以來,累有內難。當今之宜,當鎭安社稷,撫寧上下,力農務本,懷柔百姓,未宜動衆以求外利也。 縣乏。」姜維深入,不待輜重,士衆飢餓,覆軍上邽。,文欽、唐咨,舉吳重兵,昧利壽春,身沒不反。此皆近事之鑒戒 方降,廢盛農之務,徼難必之利,此事之危者也。 昔子午之役,兵行數百里而值霖雨,橋閣破壞,後糧腐敗,前軍 欲封六國,寤張良之謀,而趣銷印。基謀慮淺短,誠不及留侯,亦懼襄陽有食其之 得之

封基孫廙,而以東武餘邑賜一子爵關內侯。晉室踐阼,下詔曰:「故司空王基旣著德立勳, 叉治身淸素,不營產業,久在重任,家無私積,可謂身沒行顯,足用勵俗者也。 其以奴婢! 是歲基薨,追贈司空,諡曰景侯。子徽嗣,早卒。咸熙中,開建五等,以基著勳前朝,改

謬。』 文王於是遂罷軍嚴,後由等果不降。」

人賜其家。

評曰:徐邈清尙弘通,胡質素業貞粹,王昶開濟識度,王基學行堅白,皆掌統方任,垂稱 可謂國之良臣,時之彥士矣。

王毌丘諸葛鄧鍾傳第二十八

長,江稍遷至中山太守,所在有治,太祖辟爲丞相掾屬。 入長安,殺允,盡害其家。凌及兄晨,時年皆少,踰城得脫,亡命歸鄕里。 王凌字彥雲,太原祁人也。叔父允,爲漢司徒,誅董卓。卓將李傕、郭汜等爲卓報仇, 凌舉孝廉、爲發干

魏略曰:凌爲長,遇事,髠刑五歲,當道掃除。時太祖車過,問此何徒,左右以狀對。太祖曰:「此子師兄子也,所 坐亦公耳。」于是主者選爲驍騎主簿。

勝、豫州刺史,咸得軍民之歡心。 之,不容於口。後從曹休征吳,與賊遇於夾石,休軍失利,凌力戰決圍,休得冤難。 轉在青州。 呂範等船漂至北岸。凌與諸將逆擊,捕斬首虜,獲舟船,有功,封宜城亭侯,加建武將軍, 文帝踐阼,拜散騎常侍,出爲兗州刺史,與張遼等至廣陵討孫權。臨江,夜大風,吳將 是時海濱乘喪亂之後,法度未整。凌布政施教,賞善罰惡,甚有 始至豫州,旌先賢之後,求未顯之士,各有條教,意義甚 :綱紀,百姓稱 仍徙爲

魏書

王毌丘諸葛鄧鍾傳第二十八

七五

州 進封南鄕侯,邑千三百五十戶,遷車騎將軍、儀同三司。 軍事。 初,凌與司馬朗、賈逵友善,及臨兗、豫,繼其名跡。 二年,吳大將全琮數萬衆寇芍陂,凌率諸軍逆討,與賊爭塘,力戰連日,賊退走。 正始初,爲征東將軍,假節都督揚

謝罪 印綬 乃窮治其事。 水。 還,會愚病死。〔三〕二年,熒惑守南斗,凌謂:「斗中有星,當有暴貴者。」〔三〕三年春,吳賊塞涂 追戮,陳屍斲棺,載在方策。凌、愚罪宜如舊典。乃發凌、愚冢,剖棺,暴屍於所近市三日 將尙書廣東,使爲書喻浚,大軍掩至百尺逼浚。 兗州刺史黃華,華、弘連名以白太傅司馬宣王。 舍人勞精詣洛陽,語子廣。 彪長而才,欲迎立彪都許昌。 爲司空。 、節鉞,遣步騎六百人送還京都。 ,送印綬、節鉞。 凌欲因此發,大嚴諸軍,表求 是時,凌外甥合狐愚以才能爲兗州刺史,屯平阿。 司馬宣王旣誅曹爽,進凌爲太尉,假節鉞。 彪賜死,諸相連者悉夷三族。(馬)朝議咸以爲春秋之義,齊崔杼、鄭歸生皆加 軍到丘頭 廣言:「廢立大事,勿爲禍先。」〔1〕其十一月,愚復遣式詣彪,未 嘉平元年九月,愚遣將張式至白馬, ,凌面縛水次。 討賊;詔報 凌至項,飲藥死。[四]宣王遂至壽春。 不聽。 宣王承韶遣主簿解縛反服,見凌,慰勞之,還 宣王將中軍乘水道討凌,先下赦赦凌罪,又 凌自知勢窮,乃乘船單出迎宣王,遣掾王彧 凌陰謀滋甚,遣將軍楊弘以廢立事告 凌、愚密協計,謂齊王不任天位,楚王 舅甥並典兵, 專淮南之重。 與彪相問往來。 張式等皆自首, 凌就遷 凌又遣

燒其印綬、朝服,親土埋之。〔心進弘、華爵爲鄕侯。 廣有志尚學行,死時年四十餘。(+)

漢晉春秋曰:凌、愚謀,以帝幼制於彊臣,不堪爲主,楚王彪長而才,欲迎立之,以興曹氏。凌使人告廣,廣曰:「凡 爽之所以爲惡者,彼莫不必改,夙夜匪解,以恤民爲先。 安之,莫或之哀,失民故也。今懿情雖難量,事未有逆, 舉大事,應本人情。今曹爽以驕奢失民,何平叔虛而不治,丁、畢、桓、鄧雖並有宿望,皆專競于世。 政令數改,所存雖高而事不下接,民習于舊,衆莫之從。 父子兄弟,並握兵要,未易亡也。」 故雖勢傾四海,聲震天下,同日斬戮,名士減半,而百姓 而擢用賢能,廣樹勝已,修先朝之政令,副衆心之所求。 凌不從。 加變易朝典,

臣 松之以爲如此言之類,皆前史所不載,而猶出習氏。且制言法體不似於昔,疑悉鑿齒所自造者也。

(三)魏書曰: 愚字公治,本名浚,黄初中,爲和戎護軍。 烏丸校尉田豫討胡有功,小違節度,愚以法繩之。 帝怒,械繁 愚,冤官治罪,韶曰「浚何愚」!遂以名之。正始中,爲曹爽長史,後出爲兗州刺史。

愚聞楚王彪有智勇。

魏略曰: 王。乃先使人通意於王,言「使君謝王,天下事不可知,願王自愛」!彪亦陰知其意,答言「謝使君,知厚意也。」 斛,行數里,還入河中。」 又有謠言:「白馬素羈西南馳,其誰乘者朱虎騎。」楚王小字朱虎,故愚與王凌陰謀立楚

初東郡有譌言云:「白馬河出妖馬,夜過官牧邊嗚呼,衆馬皆應,明日見其迹,大如

- 3 ·魏略曰: 同占,當有王者興。 凌聞東平民浩詳知星,呼問詳。詳疑凌有所挾,欲悅其意,不言吳當有死喪,而言淮南楚分也,今吳、楚 故凌計遂定。
- (回) 魏略載凌與太傅書曰:「卒聞神軍密發,已在百尺,雖知命窮盡,遲於相見,身首分離,不以爲恨,前後遣使,有書 況,累紙誨示,聞命驚愕,五內失守,不知何她可以自處?僕久忝朝恩,歷試無效,統御戎馬,董齊東夏,事有闕 未得還報,企踵西望,無物以譬。昨遣書之後,便乘船來相迎宿丘頭,且發於浦口,奉被露布赦書,又得二十三日

魏

王毌丘諸葛鄧鍾傳第二十八

重,試索棺釘,以觀太傅意,太傅給之。 住船淮中,相去十餘丈。凌知見外,乃遙謂太傅曰:「卿直以折簡召我,我當敢不至邪?而乃引軍來乎!」太傅 有分。」及到,如書。太傅使人解其縛。凌旣蒙赦,加怙舊好,不復白疑,徑乘小船自趣太傅。 廢,中心犯義,罪在三百,妻子同縣,無所禱矣。 曰:「以卿非肯逐折簡者故也。」凌曰:「卿負我!」太傅曰:「我寧負卿, 母,活我者子也。」又重曰:「身陷刑罪,漻蒙赦宥。 之言,僕卽時呵抑,使不得竟其語。 旣人已知,神明所靈,夫非事無陰,卒至發露,知此梟夷之罪也。 凌行到項,夜呼掾屬與決曰:「行年八十,身名並滅邪!」遂自殺。 不圖聖恩天覆地載,橫蒙視息,復覩日月。亡甥令狐愚攜惑羣小 今遣掾送印綬,頃至,當如詔書自縛歸命。 不負國家。」遂使人送來西。凌自知罪 太傅使人逆止之, 雖足下私之,官法 生我者父

太傅有疾,夢凌、逵爲癘,甚惡之,遂薨。 干寶香紀曰:凌到項,見賈逵祠在水側,凌呼曰:「賈梁道,王凌固忠于魏之社稷者,唯爾有神,知之。」 其年八月,

至 魏略載:山陽單固,字恭夏,爲人有器質。正始中,兗州刺史令狐愚與固父伯龍善,辟固,欲以爲別駕。 之曰:「恭夏,汝本自不欲應州郡也,我强故耳。汝爲人吏,自當爾耳。此自門戶衰,我無恨也。 屬,皆緊廷尉,考實數十,固故云無有。 邪?」固對不知。 州東,辭以疾。愚禮意愈厚,固不欲應。固母夏侯氏謂固曰:「使君與汝父久善,故命汝不止,汝亦故當仕進,自 族,顧汝當活邪!」辭定,事上,須報廷尉,以舊皆聽得與其母妻子相見。固見其母,不仰視,其母知其慚也,字謂 徒召詣洛陽, 固不獲已,遂往,與兼治中從事楊康並爲愚腹心。 固亦以疾解祿。 太傅曰:「且置近事。 康在京師露其事, 太傅錄楊康,與固對相詰。 問卿,令狐反乎?」固又曰無。 太傅乃東取王凌。 後愚與王凌通謀,康、固皆知其計。 固辭窮,乃罵康曰:「老庸旣負使君,又滅我 到壽春,固見太傅,太傅問曰:「卿知其事爲 而楊康白,事事與固連。 汝本意與我語。」 會愚病,康應司 **遂**收捕固及家 固不樂爲

固終不仰,又不語,以至於死。初,楊康自以白其事,冀得封拜,後以辭頗參錯,亦幷斬。臨刑,俱出獄,固又罵康

曰:「老奴,汝死自分耳。若令死者有知,汝何面目以行地下也。」

(云)于寶晉紀曰:克州武吏東平馬隆,託爲愚家客,以私財更殯葬,行服三年,種植松柏。一州之士愧之。

[+)魏氏春秋曰:廣字<u>公淵。弟飛梟、金虎,並才武過人。太傅嘗從容問蔣濟,濟曰:「凌文武俱贍,當今無雙</u>。 |廣等

志力,有美於父耳。」退而悔之,告所親曰:「吾此言,滅人門宗矣。」

隨枝低印,舉弓射之卽倒,追人乃止不復進。明山投親家食,親家告吏,乃就執之。 魏末傳曰:凌少子字明山,最知名。善書,多技藝,人得其書,皆以爲法。走向太原,追軍及之,時有飛鳥集桑樹

滅,士民飢凍,雖崇美宮室,猶無益也。」遷剌州刺史。 取農民以治宮室,儉上疏曰:「臣愚以爲天下所急除者二賊,所急務者衣食。誠使二賊不 原侯文學。明帝卽位,爲尙書郞,遷羽林監。以東宮之舊,甚見親待。出爲洛陽典農。時 金城太守蘇則。 毌丘儉字仲恭,河東聞喜人也。父興,黃初中爲武威太守,伐叛柔服,開通河右,名次 討賊張進及討叛胡有功,封高陽鄉侯。〔〕入爲將作大匠。儉襲父爵,爲平

(一)魏名臣奏載雍州刺史張旣表曰:「河右遐遠,喪亂彌久,武威當諸郡路道喉轄之要,加民夷雜處,數有兵難。 不顧,爲將校民夷陳說禍福,言則涕泣。于時男女萬口,咸懷感激,形毀髮亂,誓心致命。尋率精兵踧脅張掖,濟 守田丘興到官,內撫吏民,外懷羌、胡,卒使柔附,爲官效用。黃華、張進初圖逆亂,扇動左右,興志氣忠烈,臨難

魏

王毌丘諸葛鄧鍾傳第二十八

拔領太守杜通、西海太守張睦。張掖番和、驪靬二縣吏民及郡雜胡棄惡詣興,興皆安卹,使盡力田。 盡竭心力,誠國之良吏。 殿下卽位,留心萬機,苟有毫毛之善,必有賞錄,臣伏緣聖旨,指陳其事。」 興每所歷

率幽州諸軍至襄平, 屯遼隧。 侯、王,賜輿馬繒綵各有差。公孫淵逆與儉戰,不利,引還。 袁尙奔遼東者,率衆五千餘人降。 軍及儉等衆數萬討淵,定遼東。 <u></u>青龍中,帝圖討遼東,以儉有幹策,徙爲幽州刺史,加度遼將軍,使持節,護烏丸校尉。 正始中,儉以高句驪數侵叛,督諸軍步騎萬人出玄菟,從諸道討之。 右北平烏丸單于寇婁敦、遼西烏丸都督率衆王護留等,昔隨 儉以功進封安邑侯,食邑三千九百戶。 寇婁敦遣弟阿羅槃等詣闕朝貢,封其渠率二十餘人爲 明年,帝遣太尉司馬宣王統中 句驪王宮將步騎

論功受賞,侯者百餘人。穿山溉灌,民賴其利。 沃沮千有餘里,至肅愼氏南界,刻石紀功,刊丸都之山,銘不耐之城。諸所誅納八千餘口, 宮單將妻子逃竄。 生蓬蒿。」遂不食而死,舉國賢之。儉令諸軍不壞其墓,不伐其樹,得其妻子,皆放遣之。 都,斬獲首虜以干數。 一萬人,進軍沸流水上,大戰梁口,梁音渴。宮連破走。 儉引軍還。 六年,復征之,宮遂奔買溝。 句驪沛者名得來,數諫宮,(三宮不從其言。得來歎曰:「立見此地將 儉遂束馬縣車, 以登丸都, 儉造玄蔻太守王頎追之,<

三過 屠句驪所

儉與文欽禦之,太尉司馬字督中軍東解圍,恪退還。 乃令誕、儉對換。 遷左將軍,假節監豫州諸軍事,領豫州刺史,轉爲鎭南將軍。諸葛誕戰于東關,不利, 誕爲鎭南,都督豫州。儉爲鎭東,都督揚州。 吳太傅諸葛恪圍合肥新城,

項。 檢堅守,欽在外爲游兵。 [1] 小,皆入壽春城,爲壇於城西,歃血稱兵爲盟,分老弱守城,儉、欽自將五六萬衆渡淮,西至 **遂矯太后詔,罪狀大將軍司馬景王,移諸郡國,舉兵反。 迫脅淮南將守諸別屯者,及吏民大** 心無貳。正元二年正月,有彗星數十丈,西北竟天,起于吳、楚之分。儉、欽喜,以爲己祥。 戰功,好增虜獲,以徼籠賞,多不見許,怨恨日甚。儉以計厚待飲,情好歡洽。飲亦感戴,投 初,儉與夏侯玄、李豐等厚善。揚州刺史前將軍文欽,曹爽之邑人也,驍果麤猛,數有

[一] 儉、飲等表曰:「故相國懿,匡輔魏室,歷事忠貞,故烈祖明皇帝授以寄託之任。 之,義士譏之,天下所聞,其罪一也。 懿造計取賊,多春軍糧,克期有日。 師爲大臣,當除國難,又爲人子,當卒父 王以懿有輔己大功,故遂使師承統懿業,委以大事。而師以盛年在職,無疾託病,坐擁疆兵,無有臣禮,朝臣 |王聰明,無有穢德,乃心勤盡忠以輔上,天下賴之。||懿欲討滅二虜以安宇內,始分軍糧,克時同舉,未成而薨。 哀聲未絕 而便罷息,爲臣不忠,爲子不孝,其罪二也。賊退過康關,坐自起衆,三征同進,喪衆敗績,歷年軍 懿戮力盡節,以寧華夏。 叉以 |齊

魏書

王毌丘諸葛鄧鍾傳第二十八

恨也。 廢主。 受漢禪,開國承家,猶堯舜相傳也。 表,欲擅疆勢,以逞姦心,募取屯田,加其復賞,阻兵安忍,壞亂舊法。 補,多載器杖,充聚本營,天下所聞,人懷憤怨,譌言盈路,以疑海內,其罪十也。多休守兵,以占高第,以空虛四 流徙,道路餓殺,天下聞之,莫不哀傷,其罪九也。三方之守,一朝闕廢,多選精兵,以自營衞,五營領兵,闕 幸師舍以省其疾,復拒不通,不奉法度,其罪八也。 之,莫不歡慶; 無君之心,其罪五也。 師無人臣節,欲議退之。師知而請豐,其夕拉殺,載尸埋棺。 軍已來,爲難苦甚,莫過於此。 | 子與臣等建計,乃杜塞要險,不與爭鋒,還固新城。 淮南將士,衝鋒履刃,畫夜相守,勤瘁百日,死者塗地,自魏有 王休等議,各以累世受恩,千載風塵,思盡驅命,以完全社稷安主爲效。斯義苟立,雖焚妻子,吞炭漆身,死而不 督遣,臨時哀愕,莫不傷痛;而師稱慶,反以歡喜,其罪七也。 羣臣皆怒而師懷忍,不顧大義,其罪六也。又故光祿大夫張緝,無罪而誅,夷其奏子,丼及母后,逼恐至尊,彊催 旦 按師之罪,宜加大辟,以彰姦慝。養秋之義,一世爲善,十世宥之。感有大功,海內所書,依古典議,廢師 天不長惡,使目腫不成,其罪十一也。 盡,致使賊來,天下騷動,死傷流離,其罪三也。 師自知姦慝,人神所不祐,矯廢君主,加之以罪。字,師之叔父,性甚仁孝,追送齊王,悲不自勝。 而師不自改悔,脩復臣禮,而方徵兵募士,毀壞宮內,列侯自衞。陛下卽阼,初不朝覲。陛下欲臨 |懿每歎說齊王自堪人主,君臣之義定。 而師遂意自由,不論封賞,權勢自在,無所領錄,其罪四也。 臣與安豐護軍鄭麗、廬江護軍呂宣、太守張休、淮南太守丁尊、督守合肥護軍 臣等先人皆隨從太祖武皇帝征討凶暴,獲成大功,與高祖文皇帝即 近者領軍許尤當爲鎭北,以廚錢給賜, 賊舉國悉衆,號五十萬,來向壽春,圖詣洛陽,會太尉 陛下踐阼,聰明神武,事經聖心,欲崇省約,天下聞 奉事以來十有五載,始欲歸政,按行武庫,詔問禁 豐等爲大臣,帝王腹心,擅加酷暴,死無罪名,師有 合聚諸藩王公以著鄴,欲悉誅之,一旦舉事 故中書令李豐等,以 而師奉奏加辟,雖云 而不

得復承用。 賞罰自由,聞臣等舉衆,必下詔禁絕關津,使驛書不通,擅復徵調,有所收捕。 若師負勢恃衆不自退者,臣等率將所領,晝夜兼行,惟命是授。 古今所稱。乞陛下下臣等所奏,朝堂博議。臣言當道,使問遜位避賢者,罷兵去備,如三皇舊法,則天下協同。 爲中領軍。 以侯就第。 及州郡國典農,各安慰所部吏民,不得妄動,謹具以狀聞。惟陛下愛養精神,明慮危害,以寧海內。師專權用勢, 意,遠絕亡之禍,百姓安全,六合一體,使忠臣義士,不愧於三皇五帝耳。臣恐兵起,天下擾亂,臣輒上事,移三征 太尉学,忠孝小心,所宜親寵,授以保傅。 臣等道遠,懼文書不得皆通,輒臨時賞罰,以便宜從事,須定表上也。」 春秋之義,大義減親,故周公誅弟,石碏戮子,季友鴆兄,上爲國計,下全宗族。 弟昭,忠肅寬明,樂善好士,有高世君子之度,忠誠爲國,不與師同。臣等碎首所保,可以代師輔導聖 護軍散騎常侍望,忠公親事,當官稱能,遠迎乘興,有宿衞之功,可 臣等今日所奏,惟欲使大魏永存,使陛下得行君 此乃師詔,非陛下詔書,在所皆不 極縣用禹,聖人明典,

走,衆潰。比至愼縣,左右人兵稍棄儉去,儉獨與小弟秀及孫重藏水邊草中。 山諸軍萬餘人至樂嘉,示弱以誘之,大將軍尋自洙至。欽不知,果夜來欲襲艾等,會明,見 除諸軍出于譙、宋之間,絕其歸路。大將軍屯汝陽,使監軍王基督前鋒諸軍據南頓以待之。 大軍兵馬盛,乃引還。〔〕大將軍縱驍騎追擊,大破之,欽遁走。 是日,儉聞欽戰敗,恐懼夜 士,家皆在北,衆心沮散,降者相屬,惟淮南新附農民爲之用。 大將軍遣兗州刺史鄧艾督泰 令諸軍皆堅壁勿與戰。

儉、

飲進不得鬭,

退恐壽春見襲,不得歸,計窮不知所爲。 大將軍統中外軍討之,別使諸葛誕督豫州諸軍從安風津擬壽春,征東將軍胡遵督青、 安風津都尉 淮南將

部民張屬就射殺儉,傳首京都。 屬封侯。秀、重走入吳。將士諸爲儉、欽所迫脅者,悉歸

降。

〔一〕魏氏春秋曰:|欽中子||似,小名||鷹。 年尙幼,勇力絕人,謂||欽曰:「及其未定,擊之可破也。」 於是分爲二隊,夜夾攻

魏末傳曰:殿中人姓尹,字大目,小爲曹氏家奴,常侍在帝側,大將軍將俱行。大目知大將軍一目已突出,啓云: 不祐汝!」乃張弓傅矢欲射大目,大目涕泣曰:「世事敗矣,善自努力也。」 也!」欲使欽解其旨。欽殊不悟,乃更厲聲罵大目:「汝先帝家人,不念報恩,而反與司馬師作逆;不顧上天,天 聽遣大目單身往,乘大馬,被鎧甲,追文欽,遙相與語。大目心實欲曹氏安,謬言:「君侯何苦若不可復忍數日中 軍。|椒率壯士先至,大呼大將軍,軍中震擾。|飲後期不應。會明,|椒退,|飲亦引還。 「文欽本是明公腹心,但爲人所誤耳,又天子鄕里。」大目昔爲文欽所信,乞得追解語之,令還與公復好。」大將軍

(二) 欽與郭淮書曰:「大將軍昭伯與太傅(伯) 俱受顧命,登牀把臂,託付天下,此遠近所知。 業,肆其虐暴,日月滋甚,放主弑后,殘戮忠良,包藏禍心,遂至篡弑。此可忍也,孰不可忍?」欽以名義大故,事君 耳。然同舟共濟,安危勢同,禍痛已連,非言節所解,自公侯所明也。共事曹氏,積信魏朝,行道之人,皆所知見。 須東問,影響相應,聞問之日,能不慷慨!是以不顧妻孥之痛,卽與毌丘鎭東舉義兵三萬餘人,西趨京師,欲扶持 有節,忠憤內發,忘寢與食,無所吝顧也。 可堪也。 其親黨,皆一時之俊,可爲痛心,柰何柰何!公侯恃與大司馬公恩親分著,義貫金石,當此之時,想益毒痛,有不 王室,掃除姦逆。 王太尉嫌其專朝,潛欲舉兵,事竟不捷,復受誅夷,害及楚王,想甚追恨。太傅旣亡,然其子師繼承 企踵西望,不得聲問,魯望高子,不足喻急。夫當仁不讓,沉救君之難,度道遠艱,故不果期要 會毌丘子邦自與父書,騰說公侯,盡事主之義,欲奮白髮,同符太公,惟 後以勢利,乃絕其祀,及 父

期要,使六合校考,與周、召同封,以託付兒孫。此亦非小事也,大丈夫寧處其落落,是以遠呈忠心,時望嘉應。」 也。 孤舉。今者之計,宜屈已伸人,託命歸漢,東西俱舉爾,乃可克定師黨耳。 深思鄙言,若愚計可從,宜使漢軍克制 惟當歸命大吳,借兵乞食,繼踵伍員耳。不若僕隸,如何快心,復君之響,永使曹氏少享血食,此亦大國之所祐念 兵討之、即時克破,所向全勝,要那後無繼何?孤軍梁昌,進退失所,還據壽春,壽春復走,狼狽躓閡,無復他計 之,更謂小人爲誤,諸軍便爾瓦解。 進兵,就于樂嘉城討師,師之徒衆,轉時崩潰,其所斬截,不復訾原,但當長驅徑至京師,而流言先至,世上不復詳 然在朝之士,冒利偷生,烈士所恥,公侯所賤,賈豎所不忍爲也,沉當塗之士邪?軍屯住頂,小人以閏月十六日別 分連接,遠同一勢,日欲俱舉,瓜分中國,不願偏取以爲己有。公侯必欲共忍帥胸懷,宜廣大勢,恐秦川之卒不可 想公侯不使程嬰、杵臼擅名於前代,而使大魏獨無鷹揚之士與?今大吳敦崇大義,深見愍悼。 毌丘還走,追轉釋解,無所及。小人還頂,復遇王基等十二軍,追尋毌丘,進 然僕於國大

世語曰:毌丘儉之誅,黨與七百時郭淮已卒,飲未知,故有此書。

州刺史、河南尹。子默,字世玄,歷吏部郎、衞尉。 世語曰: 田丘儉之誅,黨與七百餘人,傳侍御史杜友治獄,惟舉首事十人,餘皆奏散。 友字季子,東郡人,仕晉冀

儉子甸爲治書侍御史,先時知儉謀將發,私出將家屬逃走新安靈山上。別攻下之,夷

儉三族。[]

魏

王毌丘諸葛鄧鍾傳第二十八

(二)世語曰:闽字子邦,有名京邑。 **儉然之。大將軍惡其爲人也。** 齊王之廢也,甸謂儉曰:「大人居方嶽重任,國傾覆而晏然自守,將受四海之責。」 及儉起兵,問屈顧所在,云不來無能爲也。 檢初起兵,遭子宗四人入吳。太康中,

吳平,宗兄弟皆還中國。宗字子仁,有儉風,至零陵太守。宗子奧,巴東監軍、益州刺史。

與敗者時也,我苟無時,成何可必乎?忘我而不自必,乃所以爲忠也。古人有言:「死者復生,生者不愧。」若田 習鑿窗曰:田丘儉感明帝之顧命,故爲此役。君子謂田丘儉事雖不成,可謂忠臣矣。 夫竭節而赴義者我也,成之

欽亡入吳,吳以欽爲都護、假節、鎭北大將軍、幽州牧、譙侯。〔〕〕

丘儉可謂不愧也

(1) 欽降吳表曰:「稟命不幸,常隸魏國,兩絕於天。雖側伏隅都,自知無路。司馬師滔天作逆,廢害二主,辛、癸、高、 魏書曰:欽字仲若,譙郡人。父稷,建安中爲騎將,有勇力。」欽少以名將子,材武見稱。 生,非辭所陳。謹上還所受魏使持節、前將軍、山桑侯印綬。臨表惶惑,伏須罪誅。」 仰,靡所自厝。 討師,掃除凶孽,誠臣慺慺愚管所執。智慮淺薄,微節不騁,進無所依,悲痛切心。 <u>游,惡不足喻。</u>飲累世受<u>魏恩,鳥鳥之情,竊懷憤踊,在三之義,期於弊仆。</u> 上,不奉官法,輒見奏遣,明帝抑之。後復以爲淮南牙門將,轉爲廬江太守、鷹揚將軍。主凌奏飲貪殘,不宜撫 連,及下獄,掠笞數百,當死,太祖以稷故赦之。太和中,爲五營校督,出爲牙門將。 冒緣古義,固有所歸,庶假天威,得展萬一,儷仆之日,亦所不恨。 輒相率將,歸命聖化,慚偷苟 前與毌丘儉、郭淮等俱舉義兵,當共 **欽性剛暴無禮**, 退惟不能扶翼本朝,抱愧俛 魏諷反,欽坐與諷辭語 所在倨傲陵 相

不及,遂得入吳,孫峻厚待之。」欽雖在他國,不能屈節下人,自呂據、朱異等諸大將皆憎疾之,惟峻常左右之。

故益驕,好自矜伐,以壯勇高人,頗得虛名於三軍。曹爽誅後,進飲爲前將軍以安其心,後代諸葛誕爲揚州刺史。

會誕去兵,毌丘儉往,乃陰共結謀。戰敗走,晝夜間行,追者

曹爽以欽鄉里,厚養待之,不治欽事。復遣還廬江,加冠軍將軍,貴龍踰前。」欽以

自曹爽之誅,欽常內懼,與諸葛誕相惡,無所與謀。

邊,求冤官治罪,由是徵欽還。

魏 書 王毌丘諸葛鄧鍾傳第二十八 有所屬託,輒顯其言而承用之,後有當否,則公議其得失以爲褒貶,自是羣僚莫不愼其所 諸葛誕字公休,琅邪陽都人,諸葛豐後也。 初以尙書郞爲滎陽令,二入爲吏部郎。

脩浮華,合虛譽,漸不可長。 累遷御史中丞尚書,與夏侯玄、鄧颺等相善,收名朝廷,京都翕然。言事者以誕、颺等 明帝惡之,免誕官。〔三〕會帝崩,正始初,玄等並在職。復以誕

爲御史中丞尚書,出爲揚州刺史,加昭武將軍。

(二)魏氏春秋曰: 誕爲郎,與僕射杜畿試船陶河,遭風覆沒, 誕亦俱溺。 虎賁浮河救誕,誕曰:「先救杜侯。」 |誕飄于

岸,絕而復蘇。

[二]世語曰:是時、當世俊士散騎常侍夏侯玄、尚書諸葛誕、鄧颺之徒,共相題表,以玄、疇四人爲四聰,誕、備八人爲 以構長浮華,皆免官廢錮。 八達,中書監劉放子熈、孫資子密、東部尚書衞臻子烈三人,咸不及比,以父居勢位,容之爲三豫,凡十五人。帝

陽亭侯。 王凌之陰謀也,太傅司馬宣王潛軍東伐,以誕爲鎭東將軍、假節都督揚州諸軍事,封山 諸葛恪興東關,遣誕督諸軍討之,與戰,不利。 還,徙爲鎭南將軍。

大將軍司馬景王東征,使誕督豫州諸軍,渡安風津向壽春。 後毌丘儉、文欽反,遣使詣誕,招呼豫州士民。 儉、欽之破也,誕先至壽春。

誕斬其使,露布天下,令知儉、飲凶逆。

春中十餘萬 首,收其印節。 乃帥衆將欽徑至壽春;時誕諸軍已至,城不可攻,乃走。 復以爲鎭 東 口,聞儉、欽敗,恐誅,悉破城門出,流迸山澤,或散走入吳。以誕久在淮南,乃 大將軍、儀同三司、都督揚州。與大將孫峻、呂據、留贊等聞淮南亂,會文欽往, 進封高平侯,邑三千五百戶,轉爲征東大將軍。 誕遣將軍蔣班追擊之,斬贊,傳

穀足一年食,閉城自守。 得將其衆突入城。 牧、壽春侯。 咨、王祚等, 率三萬衆, 密與文欽俱來應誕。 刺史樂綝,殺之。〔三〕斂淮南及淮北郡縣屯田口十餘萬官兵, 誕舊臣,欲入度之。 之,而復請十萬衆守壽春,又求臨淮築城以備寇,內欲保有淮南。 親附及揚州輕俠者數千人爲死士。〔〕甘露元年冬, 誕旣與玄、颺等至親,又王凌、毌丘儉累見夷滅,懼不自安,傾帑藏振施以結衆心,厚養 是時鎭南將軍王基始至,督諸軍圍壽春,未合。 ' 二年五月,徵爲 遣長史吳綱將小子靚至吳請救。〔三〕吳人大喜,遣將全懌、全端、唐 司空。 誕被詔書, 以誕爲左都護、假節、大司徒、驃騎將軍、青州 吳賊欲向徐場, 愈恐,遂反。 場州新附勝兵者四五萬人, 答、欽等從城東北,因山 朝廷微知誕有自疑心,以 召會諸將,自出攻揚州 計誕所督兵馬足以待

- 〕魏書曰:[誕賞賜過度。有犯死者,虧制以活之。
- [三]世語曰:司馬文王旣秉朝政,長史賈充以爲宜遣參佐慰勞四征,于是遣充至壽春。 充還啓文王"「誕再在揚州,有

後,今便爲司空!不遣使者、健步驚害,使以兵付樂綝,此必綝所爲。」乃將左右數百人至揚州,揚州人欲閉門 威名,民望所歸。今徵:必不來,禍小事淺;不徵,事遲禍大。」 乃以爲司空。 書至,誕曰:「我作公當在王文舒

|誕叱曰:「卿非我故吏邪!」徑入,綝逃上樓,就斬之。

魏末傳曰: 非賈豫州子?世受魏恩,如何負國,欲以魏室輸人乎?非吾所忍聞。 乞朝廷察臣至誠。」 日久。臣奉國命,以死自立,終無異端。念綝不忠, 輒將步騎七百人, 以今月六日討綝, 即日斬首, 函頭驛馬傳 府庫,遂殺綝。 用、欲蹔出,將見人游戲,須臾還耳;諸君且止。」 「當還洛邑,蹔出游戲,揚州何爲閉門見備?」前至東門,東門復閉,乃使兵緣城攻門,州人悉走,因風放火,焚其 ,請諸牙門置酒飮宴,呼牙門從兵,皆賜酒令醉,謂衆人曰:「前作千人鎧仗始成,欲以擊賊,今當還洛,不復得 若聖朝明臣,臣即魏臣;不明臣,臣即吳臣。不勝發憤有日,謹拜表陳愚,悲感泣血,哽咽斷絕,不知所如, …賈充與誕相見,談說時事,因謂誕曰:「洛中諸賢,皆願禪代,君所知也。 君以爲云何?」誕厲色曰:「卿 |誕表曰:「臣受國重任,統兵在東。|揚州刺史樂||編專詐,說臣與||吳交通,又言被詔當代臣位,無狀 乃嚴鼓將士七百人出。 若洛中有難,吾當死之。」 充默然。 樂琳聞之,閉州門。 誕歷南門宣言曰: |誕既被

臣松之以爲魏末傳所言,率皆鄙陋。疑臧表言曲,不至於此也。

(11)世語曰: 黃初末,吳人發長沙王吳芮冢,以其塼於臨湘爲孫堅立廟。 曰:「君何類長沙王吳芮,但微短耳。」綱瞿然曰:「是先祖也,君何由見之?」見者言所由,綱曰:「更葬否?」答 曰:「卽更葬矣。」自芮之卒年至冢發,四百餘年,綱,芮之十六世孫矣。 |芮容貌如生, 衣服不朽。 後豫發者見吳綱

六月,車駕東征,至項。 大將軍司馬文王督中外諸軍二十六萬衆,臨淮討之。大將軍

魏

書

至,衆無所恃。將軍蔣班、焦彝,皆誕爪牙計事者也,棄誕,踰城自歸大將軍。〔1〕大將軍乃 等,渡黎漿水,泰等逆與戰,每摧其鋒。孫綝以異戰不進,怒而殺之。城中食轉少,外救不 史州泰等,簡銳卒爲游軍,備外寇。」欽等數出犯圍,逆擊走之。。吳將朱異再以大衆來迎誕 使反間,以奇變說全懌等,懌等率衆數千人開門來出。城中震懼,不知所爲。 **屯丘頭。使基及安東將軍陳騫等四面合圍,表裏再重,塹壘甚峻。又使監軍石苞、兗州刺**

[1] 漢晉春秋曰:蔣班、焦彝言于諸葛誕曰:「朱異等以大衆來而不能進,孫綝殺異而歸江東,外以發兵爲名,而內實 江表,就孫綝不欲,主上及其親戚豈肯聽乎?且中國無歲無事,軍民並疲,今守我一年,勢力已困,異圖生心,變 故將起,以往準今,可計日而望也。」班、蘇固勸之,欽怒,而誕欲殺班。二人懼,且知誕之必敗也,十一月,乃相 坐須成敗,其歸可見矣。 今宜及衆心尙固,士卒思用,丼力決死,攻其一面,雖不能盡克,猶可有全者。」 文欽曰: 「江東乘戰勝之威久矣,未有難北方者也。沉公今舉十餘萬之衆內附,而」欽與全端等皆同居死地,父子兄弟盡在

攜而降。

隙,徒以計合,事急愈相疑。 欽見誕計事, 誕遂殺欽。 欽子鸞及虎將兵在小城中,聞欽死, 竭,降出者數萬口。 飲欲盡出北方人,省食,與吳人堅守,誕不聽,由是爭恨。 飲素與誕有 以發石車火箭逆燒破其攻具,弩矢及石雨下,死傷者蔽地,血流盈塹。復還入城,城內食轉 三年正月,誕、欽、咨等大爲攻具,晝夜五六日攻南圍,欲決圍而出。〔〕圍上諸軍,臨高

逆擊,斬誕,傳首,夷三族。誕麾下數百人,坐不降見斬,皆曰:「爲諸葛公死,不恨。」其得 鼓譟登城,城內無敢動者。
。
誕窘急,單乘馬,將其麾下突小城門出。
大將軍司馬胡奮部兵 賜爵關內侯。城內喜且擾,叉日飢困,誕、咨等智力窮。大將軍乃自臨圍,四面進兵,同時 使將兵數百騎馳巡城,呼語城內云:「文欽之子猶不見殺,其餘何懼?」表濤、虎爲將軍,各 人心如此。自己唐咨、王祚及諸裨將皆面縛降,吳兵萬衆,器仗軍實山積。 之罪不容誅,其子固應當戮,然於、虎以窮歸命,且城未拔,殺之是堅其心也。」乃赦為、虎, 勒兵馳赴之,衆不爲用。陰、虎單走,踰城出,自歸大將軍。軍吏請誅之,大將軍令曰:「」欽

- (三)干寶晉紀曰:數百人拱手爲列,每斬一人,輒降之,竟不變,至盡,時人比之田橫。吳將于詮曰:「大丈夫受命其 [1]漢晉春秋曰:文欽曰:「蔣班、焦彝謂我不能出而走,全端、全懌又率衆逆降,此敵無備之時也,可以戰矣。」 誕及 唐咨等皆以爲然,遂共悉衆出攻。
- 主,以兵救人,既不能克,又東手於敵,吾弗取也。」乃免胄冒陳而死。

克。行及破壽春,議者又以爲淮南仍爲叛逆,吳兵室家在江南,不可縱,宜悉坑之。大將軍 受敵,此危道也。今三叛相聚於孤城之中,天其或者將使同就戮,吾當以全策黶之,可坐而 制也。」誕以二年五月反,三年二月破滅。六軍按甲,深溝高壘,而誕自困,竟不煩攻而 |初圍||壽春,議者多欲急攻之,大將軍以爲:「城固而衆多,攻之必力屈,若有外寇,表裏

魏

王毌丘諸葛鄧鍾傳第二十八

以爲古之用兵,全國爲上,戮其元惡而已。吳兵就得亡還,適可以示中國之弘耳。一無所

殺,分布三河近郡以安處之。

(一) 干寶晉紀曰:初,壽春每歲雨潦,淮水溢,常淹城邑。故文王之築圍也,誕笑之曰:「是固不攻而自敗也。」 及大軍 左光祿大夫開府。 之政,亢旱踰年。城旣陷,是日大雨,圍壘皆毀。一誕子觀,字仲思,吳平還晉。一觀子恢,字道明,位至尙書令,追贈

諸爲誕所脅略者,惟誅其首逆,餘皆赦之。聽騰、虎收斂欽喪,給其車牛,致葬舊墓。〔〕〕 拜咨安遠將軍,其餘裨將咸假號位,吳衆悅服。江東感之,皆不誅其家。其淮南將吏士民 入海,遂亡至吳,官至左將軍,封侯、持節。。誕、飲屠戮,咨亦生禽,三叛皆獲,天下快焉。〔〕〕 唐咨本利城人。黃初中,利城郡反,殺太守徐箕,推咨爲主。文帝遣諸軍討破之,咨走

- [一] 傳子曰:宋建椎牛禱賽,終自焚滅。 文欽日祠祭事天,斬于人手。 諸葛誕夫婦聚會神巫,徭祀求福,伏尸淮南,舉 族誅夷。此天下所共見,足爲明鑒也。
- (三)智鑿齒曰:自是天下畏威懷德矣。 人樂其成,業廣而敵懷其德,武昭旣敷,文算叉給,推此道也,天下其孰能當之哉?喪王基,語在基傳 壯矣。而未及安坐,喪王基之功,種惠吳人,結異類之情,竈鷹葬飲,忘疇昔之隙,不咎誕衆,使揚士懷愧,功高而 不能兼并也。故窮武之雄斃于不仁,存義之國喪于懦退,今一征而禽三叛,大廣吳衆,席卷淮浦,俘馘十萬,可謂 君子謂司馬大將軍於是役也,可謂能以德攻矣。夫建業者異矣,各有所尙,而

騰一名椒。

晉諸公贊日,椒後爲將軍,破凉州虜,名聞天下。

太康中爲東夷校尉、假節。當之職,入辭武帝,帝見

綱紀,上計吏,因使見太尉司馬宣王。 **貧,資給甚厚,艾初不稱謝。** 與同者,故改焉。 至潁川,讀故太丘長陳寔碑文,言「文爲世範,行爲士則」,艾遂自名範,字士則。後宗族有 鄧艾字士載,義陽棘陽人也。少孤,太祖破荆州,徙汝南,爲農民養犢。年十二,隨母 爲都尉學士,以口吃,不得作幹佐。爲稻田守叢草吏。 每見高山大澤,輒規度指畫軍營處所,時人多笑焉。 宣王奇之,辟之爲掾,行遷尚書郎。 同郡吏父憐其家 後爲 典農

相。 吉本起兵許都,玄信坐被刑在家,從典農司馬求人御,以艾、苞與御,行十餘里,與語,悅之,謂二人皆當遠至爲佐 艾後爲典農功曹,奉使詣宣王,由此見知,遂被拔擢。 曰:鄧艾少爲襄城典農部民,與石苞皆年十二三。謁者陽翟郭玄信,武帝監軍郭誕元奕之子。 建安中,少府

屯二萬人,淮南三萬人,十二分休,常有四萬人,且田且守。 牛,功費互億,以爲大役。 利,宜開河渠,可以引水澆溉,大積軍糧,又通運漕之道」。 一昔破黃巾,因爲屯田,積穀于許都以制四方。今三隅已定,事在淮南,每大軍征舉,運兵過 時欲廣田 「畜穀,爲滅賊資,使艾行陳、項已東至壽春。 陳、蔡之間,土下田良,可省許昌左右諸稻田,幷水東下。 水豐常收三倍於西,計除衆費 乃著濟河論以喻其指。 艾以爲「田良水少,不足以盡地 令淮北 叉以爲

魏

歲完五百萬斛以爲軍資。六七年間,可積三千萬斛於淮上,此則十萬之衆五年食也。以此 乘吳,無往而不克矣。」宣王善之,事皆施行。正始二年,乃開廣漕渠,每東南有事,大軍興

維使化持吾,令不得還。維必自東襲取洮城。」洮城在水北,去炗屯六十里。 艾卽夜潛軍 維遣廖化自白水南向艾結營。艾謂諸將曰:「維今卒還,吾軍人少,法當來渡而不作橋。 衆,汎舟而下,達于江、淮,資食有儲而無水害,艾所建也。 出參征西軍事,遷南安太守。嘉平元年,與征西將軍郭淮拒蜀偏將軍姜維。維退,淮

邊長計也。」又陳:「羌胡與民同處者,宜以漸出之,使居民表崇廉恥之敎,塞姦宄之路。」 大將軍司馬景王新輔政,多納用焉。遷汝南太守,至則尋求昔所厚己吏父,久已死,遣吏祭 之尊日疏,外土之威寖重,則胡虜不可不深備也。聞劉豹部有叛胡,可因叛割爲二國,以分 制長卑。誘而致之,使來入侍。由是羌夷失統,合散無主。以單于在內,萬里順軌。今單于 附,故周宣有玁狁之寇,漢祖有平城之圍。每匈奴一盛,爲前代重患。自單于在外,莫能牽 徑到,維果來渡,而艾先至據城,得以不敗。賜爵關內侯,加討寇將軍,後遷城陽太守。 是時幷州右賢王劉豹幷爲一部,艾上言曰:「戎狄獸心,不以義親,彊則侵暴,弱則內 去卑功顯前朝,而子不繼業,宜加其子顯號,使居鴈門。離國弱寇,追錄舊勳,此御

之,重遺其母,舉其子與計吏。这所在,荒野開闢,軍民並豐。

誅。 然農者,勝之本也。孔子曰『足食足兵』,食在兵前也。上無設爵之勸,則下無財畜之功。今 商鞅、樂毅皆見任時君,主沒而敗。況恪才非四賢,而不慮大患,其亡可待也。」恪歸,果見 事,虐用其民,悉國之衆,頓於堅城,死者萬數,載禍而歸,此恪獲罪之日也。 昔子胥、吳起、 有部曲,阻兵仗勢,足以建命。恪新秉國政,而內無其主,不念撫恤上下以立根基,競於外 使考績之賞,在於積粟富民,則交游之路絕,浮華之原塞矣。」 遷兗州刺史,加振威將軍。上言曰:「國之所急,惟農與戰,國富則兵彊,兵彊則戰勝。 諸葛恪圍合肥新城,不克,退歸。艾言景王曰:「孫權已沒,大臣未附,吳名宗大族,皆

長水校尉。以破欽等功,進封方城鄉侯,行安西將軍。解雍州刺史王經圍於狄道,姜維退 曰:「洮西之敗,非小失也;破軍殺將,倉廩空虚,百姓流離,幾於危亡。今以策言之,彼有 駐鍾提,乃以艾爲安西將軍,假節、領護東羌校尉。 賊勢相遠,非要害之地,輒移屯附亭,遣泰山太守諸葛緒等于黎漿拒戰,遂走之。 其年徵拜 丘頭。欽奔吳。吳大將軍孫峻等號十萬衆,將渡江,鎭東將軍諸葛誕遣艾據肥陽,艾以與 道進軍,先趣樂嘉城,作浮橋。司馬景王至,遂據之。文欽以後大軍破敗於城下,艾追之至 高貴鄉公卽尊位,進封方城亭侯。毌丘儉作亂,遣健步齎書,欲疑惑大衆,艾斬之,兼 議者多以爲維力已竭,未能更出。

德陽亭趣涪,出劍閣西百里,去成都三百餘里,奇兵衝其腹心。劍閣之守必還赴涪,則會方 川口,大戰,維敗走。聞雍州已塞道屯橋頭,從孔函谷入北道,欲出雍州後。諸葛緒聞之, 牽弘等邀其前,金城太守楊欣等詣甘松。維聞鍾會諸軍已入漢中,引退還。欣等追躡於彊 與維相綴連;雍州刺史諸葛緒要維,令不得歸。|艾遣|天水太守王頎等直攻維營,隴西太守 年,又破維于侯和,維卻保沓中。 **忠爲亭侯。」二年,担姜維于長城,維退還。** 於巴、蜀,武聲揚於江、岷。今以艾爲鎭西將軍、都督隴右諸軍事,進封鄧侯。分五百戶封子 **遂東引,還守劍閣。** 卻還三十里。 維入北道三十餘里,聞緒軍卻,尋還,從橋頭過,緒趣截維,較一日不及。 維 維連年狡黠,民夷騷動,西土不寧。「艾籌畫有方,忠勇奮發,斬將十數,馘首千計;國威震 爭險,不克,其夜,渡<u>渭東行,緣山趣上邽,艾與戰於段谷,大破之。</u>甘露元年詔曰:「逆賊姜 必矣。」頃之,維果向祁山,聞艾已有備,乃回從董亭趣南安,艾據武城山以相持。 以船行,吾以陸軍,勞逸不同,三也。狄道、隴西、南安、祁山,各當有守,彼專爲一, 乘勝之勢,我有虛弱之實,一也。彼上下相習,五兵犀利,我將易兵新,器杖未復,二也。 四,四也。 從南安、隴西,因食羌穀,若趣祁山,熟麥千頃,爲之縣餌,五也。 鍾會攻維未能克。艾上言:「今賊摧折,宜遂乘之,從陰平由邪徑經漢 四年秋,詔諸軍征蜀,大將軍司馬文王皆指授節度,使艾 遷征西將軍,前後增邑凡六千六百戶。景元三 賊有點數,其來 維與艾 我分為

軌而進;劍閣之軍不還,則應涪之兵寡矣。軍志有之曰:『攻其無備,出其不意。』今掩其

空虚,破之必矣。」

險,又糧運將匱,頻於危殆。。艾以氊自裹,推轉而下。將士皆攀木緣崖,魚貫而進。 首,進軍到雒。 江由,蜀守將馬邈降。蜀衞將軍諸葛瞻自涪還縣竹,列陳待艾。艾遣子惠唐亭侯忠等出其 一舉,何不可之有?」乃叱忠、纂等,將斬之。忠、纂馳還更戰,大破之,斬瞻及尙書張遵等 冬十月,艾自陰平道行無人之地七百餘里,鑿山通道,造作橋閣。山高谷深,至爲艱 劉禪遣使奉皇帝璽綬,爲箋詣炗請降。 先登至

與蜀兵同共埋藏。艾深自矜伐,謂蜀士大夫曰:「諸君賴遭某,故得有今日耳。 徒,已殄滅矣。」又曰:「姜維自一時雄兒也,與某相值,故窮耳。」有識者笑之。 刺史,隴西太守牽弘等領蜀中諸郡。使於縣竹築臺以爲京觀,用彰戰功。 將軍,太子奉車、諸王駙馬都尉。蜀羣司各隨高下拜爲王官,或領炗官屬。以師纂領益州 之。檢御將士,無所虜略,綏納降附,使復舊業,蜀人稱焉。輒依鄧禹故事,承制拜禪行驃騎 | 支至成都,禪率太子諸王及羣臣六十餘人面縛輿櫬詣軍門, | 支執節解縛焚櫬,受而宥 士卒死事者,皆 若遇吳漢之

十二月,詔曰:「艾曜威奮武,深入虜庭,斬將搴旗,梟其鯨鯢,使僭號之主,稽首係頸,

宜。 **躅兵二萬人,煑鹽興冶,爲軍農要用,並作舟船,豫順流之事,然後發使告以利害,吳必歸** 吳人震恐,席卷之時也。 事機。兵法,進不求名,退不避罪,艾雖無古人之節,終不自嫌以損于國也。」鍾會、胡烈 秋之義,大夫出疆,有可以安社稷,利國家,專之可也。今吳未賓,勢與蜀連,不可拘常以失 廣陵、城陽以待吳人,則畏威懷德,望風而從矣。」文王使監軍衞瓘喻艾:「事當須報,不宜 其資財,供其左右。 徙,則於向化之心不勸。宜權停留,須來年秋冬,比爾吳亦足平。以爲可封禪爲扶風王,錫 化,可不征而定也。今宜厚劉禪以致孫休,安士民以來遠人,若便送禪於京都,吳以爲流 師纂等皆白艾所作悖逆,變釁以結。 輒行。」||艾重言曰:「銜命征行,奉指授之策,元惡旣服;至于承制拜假,以安初附,謂合權 二人亭侯,各食邑千戶。」〔1〕艾言司馬文王曰:「兵有先聲而後實者,今因平蜀之勢以乘吳, 今蜀舉衆歸命,地盡南海,東接吳會,宜早鎭定。 郡有董卓塢,爲之宮舍。爵其子爲公侯,食郡內縣,以顯歸命之籠。 然大舉之後,將士疲勞,不可便用,且徐緩之;留隴右兵二萬人, 詔書艦車徵艾。三 若待國命,往復道途,延引日月。 開

數日不降,則二將之軍難以反矣。故功業如此之難也。 速者也。方鄧艾以萬人入江由之危險,鍾會以二十萬衆留劍閣而不得進,三軍之士已飢,艾雖戰勝克將,使劉禪 國家前有壽春之役,後有滅蜀之勞,百姓貧而倉稟虚,故

小國之慮,在於時立功以自存,大國之慮,在於旣勝而力竭,成功之後,戒懼之時也。

〔三〕魏氏春秋曰:艾仰天歎曰:「艾忠臣也,一至此乎!白起之酷,復見於今日矣。」

艾父子旣囚,鍾會至成都,先送艾,然後作亂。 會已死,艾本營將士追出艾艦車,迎還。

| 確遣田續等討 | 艾,遇於縣竹西,斬之。子忠與艾俱死,餘子在洛陽者悉誅,徙 | 艾妻子及孫於

西域。[]]

|漢晉春秋曰:初艾之下江由也,以續不進,欲斬,旣而捨之。 曰:「伯玉其不免乎!身爲名士,位望已高,旣無德音,又不御下以正,是小人而乘君子之器,將何以堪其責乎?」 及確遣續,謂曰:「可以報江由之辱矣。」 杜預 八言於衆

| 遊聞之,不俟駕而謝。

世語曰:師纂亦與艾俱死。纂性急少恩,死之日體無完皮。

|蹇繇曰:『蹇利西南,不利東北。』孔子曰:『蹇利西南,往有功也;不利東北,其道窮 初,|艾當伐||蜀,夢坐山上而有流水,以問殄虜護軍||爰邵。||邵曰:「按燙卦,山上有水曰

也。』往必克蜀,殆不還乎!」艾憮然不樂。〔〕

[一] 荀綽冀州記曰:邵起自幹吏,位至衞尉。長子翰,河東太守。中子敞,大司農。少子倩,字君幼,寬厚有器局,勤 於當世,歷位冀州刺史、太子右衞率。 翰子偷,字世都,清貞貴素,辯於論議,採公孫龍之辭以談微理。少有能

魏書

王田丘諸葛鄧鍾傳第二十八

名,辟太尉府,稍歷顯位,至侍中中書令,遷爲監。

臣松之按:蹇彖辭云「蹇利西南,往得中也」,不云〔有功」;下云「利見大人,往有功也」。

門、段谷之戰,以少擊多,摧破彊賊。先帝知其可任,委炗廟勝,授以長策。这受命忘身,束門、段谷之戰,以少擊多,摧破彊賊。先帝知其可任,委炗廟勝,授以長策。这受命忘身,束 盡力。艾持節守邊,所統萬數,而不難僕虜之勞,士民之役,非執節忠勤,孰能若此?故落 稷;雖違常科,有合古義,原心定罪,本在可論。 鍾會忌艾威名, 構成其事。 馬縣車,自投死地,勇氣陵雲,士衆乘勢,使劉禪君臣面縛,叉手屈膝。 艾功名以成,當書之 治備守,積穀彊兵。 値歲凶旱,艾爲區種,身被烏衣,手執耒耜,以率將士。 上下相感,莫不 懷至忠而荷反逆之名,平定巴蜀而受夷滅之誅,臣竊悼之。惜哉,言艾之反也!艾性剛急, 同。今大赦得還,若無子孫者聽使立後,令祭祀不絕。」三年,議郞段灼上疏理戊日:「艾心 艾,矜功失節,實應大辟。然被書之日,罷遣人衆,束手受罪,比于求生遂爲惡者,誠復不 受誅之家,不拘敍用。昔秦民憐白起之無罪,吳人傷子胥之冤酷,皆爲立祠。今天下民人 竹帛,傳祚萬世。 輕犯雅俗,不能協同朋類,故莫肯理之。臣敢言及不反之狀。昔姜維有斷隴右之志,艾脩 而見疑,頭縣馬市,諸子幷斬,見之者垂泣,聞之者歎息。陛下龍興,闡弘大度,釋諸嫌忌, 泰始元年,晉室踐阼,詔曰:「昔太尉王凌謀廢齊王,而王竟不足以守位。 征西將軍鄧 。七十老公,反欲何求!艾誠恃養育之恩,心不自疑,矯命承制, 忠而受誅,信 權安社

其行,埋一魂而天下歸其義,所爲者寡而悅者衆矣。」九年,詔曰:「艾有功勳,受罪不逃刑, 之功,紹封其孫,使闔棺定諡,死無餘恨。赦寃魂于黃泉,收信義于後世,葬一人而天下慕 爲艾悼心痛恨,亦猶是也。臣以爲艾身首分離,捐棄草土,宜收尸喪,還其田宅。以平蜀

艾在西時,修治障塞,築起城塢。 泰始中,羌虜大叛,頻殺刺史,凉州道斷。 而子孫爲民隸,朕常愍之。其以嫡孫朗爲郞中。」

者,皆保艾所築塢焉。[1]

世語曰:咸寧中,積射將軍樊震爲西戎牙門,得見辭,武帝問震所由進,震自陳曾爲鄧艾伐閩時帳下將,帝遂尋問 死。 掾。 艾,震具申艾之忠,言之流涕。先是以艾孫朗爲丹水令,由此遷爲定陵令。次孫千秋有時望,光祿大夫王戎辟爲 永嘉中,朗為新都太守,未之官,在襄陽失火,朗及母妻子舉室燒死,惟子韜子行得免。千秋先卒,二子亦燒

艾州里時輩南陽州泰,亦好立功業,善用兵,官至征虜將軍、假節都督江南諸軍事。

元二年薨,追贈衞將軍,諡曰壯侯。〔1〕

(二) 世語曰: 文采,故守吏職;獼猴騎土牛,又何遲也!」衆賓咸悅。後歷克、豫州刺史,所在有籌算績效。 泰:「君釋褐登宰府,三十六日擁麾蓋,守兵馬郡;乞兒乘小車,一何駛乎?」泰曰:「誠有此。君,名公之子,少有 逐辟泰。 初 泰頻喪考、妣、祖,九年居喪,宣王留缺待之,至三十六日,擢爲新城太守。宣王爲泰會,使尚書鍾繇調 ,荆州刺史裴潛以泰爲從事,司馬宜王鎭宛,潛數遣詣宜王,由此爲宣王所知。及征孟達,泰又導軍

魏

王毌丘諸葛鄧鍾傳第二十八

博學精練名理,以夜續畫,由是獲聲譽。 正始中,以爲祕書郎,遷尙書中書侍郎。 (三) 高貴鄉 眸子,足以知人。」會年五歲,繇遣見濟,濟甚異之,曰:「非常人也。」及壯,有才數技藝,而 鍾會字士季,潁川長社人,太傅繇小子也。少敏惠夙成。〔〕中護軍蔣濟著論,謂「觀其

公即尊位,賜爵關內侯。

[一] 會爲其母傳曰:「夫人張氏,字昌蕭,太原茲氏人,太傅定陵成侯之命婦也。世長吏二千石。夫人少喪父母,充成 臣松之按::踵繇于時老矣,而方納正室。蓋禮所云宗子雖七十無無主婦之義也。 不言,夫人言其故,成侯大驚,益以此賢之。」黃初六年,生會,恩寵愈隆。 |侯家,修身正行,非禮不動,爲上下所稱述。 貴妾孫氏,攝嫡專家,心害其賢,數讒毀無所不至。 毒之!』成侯曰:『得男藥佳事,闇於食中與人,非人情也。』遂訊侍者具服,孫氏由是得罪出。成侯問夫人何能 必言,固將先我;事由彼發,顧不快耶!』遂稱疾不見。孫氏果謂成侯曰:『妾欲其得男,故飮以得男之藥,反謂 『何不向公言之?』答曰:『嫡庶相害,破家危國,古今以爲鑒誡。假如公信我,衆誰能明其事?彼以心度我,謂我 巧,言足以飾非成過,然竟不能傷也。 及姙娠,愈更嫉妬,乃置藥食中,夫人中食,覺而吐之,瞑眩者數日。 成侯既出孫氏,更納正嫡賈氏。」 孫氏辨博有智 或曰:

(三)世語曰:司馬景王命中書令虞松作表,再呈輒不可意,命松更定。以經時,松思竭不能改,心苦之,形於顏色。會

魏氏春秋曰:曾母見籠於緣,緣爲之出其夫人。下太后以爲言,文帝詔緣復之。緣恚憤,將引鴆,弗獲,餐椒致

噤,帝乃止。

貫。」 會乃絕賓客,精思十日,平旦入見,至鼓二乃出。 向 察其有憂,問松,松以實答。 !亦欲啓之,會公見問,不敢饕其能。」王曰:「如此,可大用,可令來。」 | 會問||松王所能,||松曰:「博學明識,無所不 會取視,爲定五字。 松悅服,以呈景王,王曰:「不當爾邪,誰所定也?」松曰:「鍾會 出後,王獨拊手歎息曰:「此眞王佐材也!

松字叔茂,陳留人,九江太守邊讓外孫。松弱冠有才,從司馬宣王征遼東,宣王命作檄,及破賊,作露布。 松從

還,宣王辟爲掾,時年二十四,遷中書郎,遂至太守。|松子濬,字顯弘,晉廷尉。

乎? 設使先不相識,但見五字而便知可大用,雖聖人其猶病諸,而況景王哉? 臣松之以爲鍾會名公之子,聲譽夙著,弱冠登朝,已歷顯位,景王爲相,何容不悉,而方於定虞松表然後乃蒙接引

許昌爲內外之援,令嘏率諸軍還。 王薨於許昌,文王總統六軍,會謀謨帷幄。 於是朝廷拜文王爲大將軍、輔政,會遷黃門侍郎,封東武亭侯,邑三百戶。 毌丘儉作亂,大將軍司馬景王東征,會從,典知密事,衞將軍司馬文王爲大軍後繼。 會與嘏謀,使嘏表上,輒與衞將軍俱發, 時中詔敕尚書傅嘏,以東南新定,權留衞將 還到雒水南屯 屯

行,不復追改。〔〕及誕反,車駕住頃,文王至壽春,會復從行。 甘露二年, 徵諸葛誕爲司空, 時會喪寧在家, 策誕必不從命, 馳白文王。 文王以事已施

會時遭所生母喪。 方奇文異訓。 誦詩,十歲誦尚書,十一誦易,十二誦春秋左氏傳。國語,十三誦周禮、禮記,十四誦成侯易記,十五使入太學 謂會曰: 『學猥則倦,倦則意怠;吾懼汝之意怠,故以漸訓汝,今可以獨學矣。』 其母傳曰:「夫人性矜嚴,明於敎訓,會雖童稚, 勤見規誨。 年四歲授孝經,七歲誦論語,八歲 雅好書籍, 涉歷衆 問 匹

王毌丘諸葛鄧鍾傳第二十八

書,特好易、老子,每讀易孔子說鳴鶴在陰、勞謙君子、籍用白茅、不出戶庭之義,每使會反覆讀之,曰:『易三百餘

儉。 有妻,有妾,所謂外命婦也。依春秋成風、定姒之義,宜崇典禮,不得總稱妾名,於是稱成侯命婦。 次。 『大將軍奢僭無度,吾常疑其不安。太傅義不危國,必爲大將軍舉耳。吾兒在帝側何憂?聞且出兵無他重器,其 專朝政,日縱酒沉醉,會兄侍中臟宴還,言其事。夫人曰:『樂則樂矣,然難久也。居上不驕,制節謹度,然後乃無 爻,仲尼特說此者,以謙恭愼密,樞機之發,行已至要,榮身所由故也,順斯術已往,足爲君子矣。』正始八年,會 暴疾薨。比葬,天子有手詔,命大將軍高都侯厚加賵贈,喪事無巨細,一皆供給。議者以爲公侯有夫人,有世 以小善爲無益而弗爲,此乃小人之事耳。希通慕大者,吾所不好。』會自幼少,衣不過青紺,親營家事, 人。汝居心正,吾知冤矣。但當脩所志以輔益時化,不忝先人耳。常言人誰能皆體自然,但力行不倦,抑亦其 計,事從民悅,可謂功矣。 勢必不久戰。』 衆人恐懼,而夫人自若。中書令劉放、侍郞衞瓘、夏侯和等家皆怪問:『夫人一子在危難之中,何能無憂?』答曰, 危溢之患。今奢僭若此,非長守富貴之道。』嘉平元年,車駕朝高平陵,會爲中書郎,從行。相國宣文侯始舉兵 爲尙書郎,夫人執會手而誨之曰:『汝弱冠見敍,人情不能不自足,則損在其中矣,勉思其戒!』是時大將軍曹爽 雖接鄙賤,必以言信。 然見得思義,臨財必讓。 果如其言,一時稱明。 然其母以爲乘僞作詐,末業鄙事,必不能久。其識本深遠,非近人所言,吾常樂其爲 取與之間,分畫分明。』或問:『此無乃小乎?』答曰:『君子之行,皆積小以致高大,若 會前後賜錢帛數百萬計,悉送供公家之用,一無所取。年五十有九,甘露二年二月 會歷機密十餘年,頗豫政謀。 夫人謂曰:『昔范氏少子爲趙簡子設伐邾之 殯葬之事,有 自知恭

初,吳大將全踪,孫權之婚親重臣也,踪子懌、孫靜、從子端、翩、緝等,皆將兵來救誕。

取于古制

禮

也。」

聽會所執,以成其美。」 勝,有謀謨之勳,而推寵固讓,辭指款實,前後累重,志不可奪。 多,親待日隆,時人謂之子房。 輝、儀作書,使輝、儀所親信齎入城告懌等,說吳中怒懌等不能拔壽春,欲盡誅諸將家,故逃 懌兄子輝、儀留建業,與其家內爭訟,攜其母,將部曲數十家渡江,自歸文王。 爲腹心之任。 見誅,皆會謀也 懌等恐懼,遂將所領開東城門出降,皆蒙封龍,城中由是乖離。 以討諸葛誕功,進爵陳侯,屢讓不受。 遷司隸校尉。 軍還,遷爲太僕,固辭不就。 雖在外司,時政損益,當世與奪, 詔曰:「會典綜軍事,參同 以中郎在大將軍 夫成功不處,古人 無不綜典。 壽春之破,會謀居 會建策 計策,料敵制 ·府管記室事 所重,其 嵇康等

足陷 皆不得戰,退還漢、樂二城守。 乃下詔使鄧艾、諸葛緒各統諸軍三萬餘人,艾趣甘松、沓中連綴維,緒趣武街、橋頭絕維 <u></u>王勅青、徐、兗、豫、荆、揚諸州,並使作船,又令唐咨作浮海大船,外爲將伐吳者。 可 取 會統· ,於是斬儀。 ,豫共籌度地形,考論事勢。 文王以蜀大將姜維屢擾邊陲,料蜀國小民疲,資力單竭,欲大舉圖蜀。 十餘萬衆,分從斜谷、駱谷入。先命牙門將許儀在前治道, 儀者,許褚之子,有功王室,猶不原貸。 魏興太守劉欽趣子午谷,諸軍數道平行,至漢中。 景元三年冬,以會爲鎭西將軍、假節都督關中諸 諸軍聞之,莫不震竦。 會在後行,而橋穿,馬 惟會亦以爲蜀 軍事。 蜀監軍王 蜀令諸圍 四年秋, 歸

魏

七八八

藏積穀。姜維自沓中還,至陰平,合集士衆,欲赴關城。未到,聞其已破,退趣白水,與蜀將 輔圍樂城。 含守樂城,護軍蔣斌守漢城,兵各五千。會使護軍荀愷、前將軍李輔各統萬人,愷圍漢城 會徑過,西出陽安口,遣人祭諸葛亮之墓。使護軍胡烈等行前,攻破ᅛ城,得庫

張翼、廖化等合守劍閣拒會。 會移檄蜀將吏士民曰:

戰;故虞舜舞干威而服有苗,周武有散財、發廩、表閭之義。 今鎭西奉辭銜命,攝統戎 重,庶弘文告之訓,以濟元元之命,非欲窮武極戰,以快一朝之政,故略陳安危之要,其 西、雍州、鎭西諸軍,五道並進。古之行軍,以仁爲本,以義治之;王者之師,有征無 肅愼致貢。悼彼巴蜀,獨爲匪民,愍此百姓,勞役未已。是以命授六師,龔行天罰,征 上聖德欽明,紹隆前緒,宰輔忠肅明允,劬勞王室,布政垂惠而萬邦協和,施德百蠻而 拓洪業。然江山之外,異政殊俗,率土齊民未蒙王化,此三祖所以顧懷遺恨也。今主 正,拯其將墜,造我區夏。高祖文皇帝應天順民,受命踐阼。烈祖明皇帝奕世重光,恢 往者漢祚衰微,率土分崩,生民之命,幾于泯滅。太祖武皇帝神武聖哲,撥亂反

之,與隆大好。中更背違,棄同卽異,諸葛孔明仍規秦川,姜伯約屢出隴右,勞動我邊 益州先主以命世英才,興兵朔野,困躓冀、徐之郊,制命紹、布之手,太祖拯而濟

籠,況巴蜀賢知見機而作者哉!誠能深鑒成敗,邈然高蹈,投跡微子之蹤,錯身陳平之 戎首。 永安之福,豈不美與!若偸安旦夕,迷而不反,大兵一發,玉石皆碎,雖欲悔之,亦無及 軌,則福同古人,慶流來裔,百姓士民,安堵舊業,農不易畝,市不回肆,去累卵之危,就 時,并兵一向,而巴蜀一州之衆,分張守備,難以禦天下之師。段谷、侯和沮傷之氣,難 境,侵擾我氐、羌,方國家多故,未遑修九伐之征也。今邊境乂淸,方內無事,畜力待 往者吳將孫壹舉衆內附,位爲上司,籠秩殊異。 者見危于無形,智者規禍于未萌,是以微子去商,長爲周賓,陳平背項,立功于漢。豈晏 也。 安酖毒,懷祿而不變哉? 以敵堂堂之陳。 其詳擇利害,自求多福,各具宣布,咸使聞 蜀相壯見禽於秦,公孫述授首于漢,九州之險,是非一姓。此皆諸賢所備聞也。 咨困逼禽獲,欽二子還降,皆將軍、封侯; 咨與聞國事。 比年以來,曾無寧歲,征夫勤瘁,難以當子來之民。此皆諸賢所親見 今國朝隆天覆之恩,宰輔弘寬恕之德,先惠後誅,好生惡殺。 知 文欽、唐咨爲國大害,叛主讐賊,還爲 壹等窮踧歸命,猶 加盛

劍閣西,徑出江由。 鄧艾追姜維到陰平,簡選精銳,欲從漢德陽入江由 緒以本受節度邀姜維,西行非本詔, 未至百里,章先破燭伏兵三校,艾使章先登。遂長驅而前。 **遂進軍前向白水**,與會合。 、左儋道詣縣竹,趣成都,與諸葛緒 會遣將軍田章 會與緒軍向 等從

衆,方軌而西。 逸之徑,四面雲集,首尾並進,蹊路斷絕,走伏無地。 臣又手書申喩,開示生路,羣寇困逼, 縣爲東西勢援。維等所統步騎四五萬人,擐甲厲兵,塞川塡谷,數百里中首尾相繼,憑恃其 截其前,參軍爰彰、將軍句安等躡其後,參軍皇甫闓、將軍王買等從陪南出衝其腹,臣據涪 化、董厥等逃死遁走,欲趣成都。臣輒遣司馬夏侯咸、護軍胡烈等,經從劍閣,出新都、大渡 涪,遣胡烈、田續、龐會等追維。 保險拒守。艾遂至縣竹,大戰,斬諸葛瞻。維等聞瞻已破,率其衆東入于巴。會乃進軍至 后來其蘇,義無以過。」會于是禁檢士衆不得鈔略,虛己誘納,以接蜀之羣司,與維情好歡 閭伍,舍其賦調,弛其征役,訓之德禮以移其風,示之軌儀以易其俗,百姓欣欣,人懷逸豫 服,師不踰時,兵不血刃,萬里同風,九州共貫。臣輒奉宣詔命,導揚恩化,復其社稷,安其 師,商旅倒戈:有征無戰,帝王之盛業。 全國爲上,破國次之; 全軍爲上,破軍次之:用兵之 廣漢郪縣,令兵悉放器仗,送節傳於胡烈,便從東道詣會降。 知命窮數盡,解甲投戈,面縛委質,印綬萬數,資器山積。 昔舜舞干戚,有苗自服; 牧野之 ,會欲專軍勢,密白緒畏懦不進,檻車徵還。軍悉屬會,自己進攻劍閣,不克,引退,蜀軍 陛下聖德,侔蹤前代,翼輔忠明,齊軌公旦,仁育羣生,義征不譓,殊俗向化,無思不 臣敕咸、闓等令分兵據勢,廣張羅罔,南杜走吳之道,西塞成都之路,北絕越 艾進軍向成都,劉禪詣及降,遣使敕維等令降于會。 會上言曰:「賊姜維、張翼、廖 維至

其以會爲司徒,進封縣侯,增邑萬戶。封子二人亭侯,邑各千戶。 謀無遺策,舉無廢功。凡所降誅,動以萬計, 甚。(三十二月詔曰:「會所向摧弊,前無彊敵,緘制衆城, 全勝獨克, 有征無戰。 罔羅迸逸。 拓平西夏,方隅清晏。 蜀之豪帥,面縛歸命,

(1)按百官名:緒入晉爲太常崇禮衞尉。子冲,廷尉。

荷綽兗州記曰:沖子詮,字德林,政字仁林,並知名顯達。詮,兗州刺史。政,侍中御史中丞。

(三)世語曰:夏侯霸奔蜀, 蜀朝問「司馬公如何德」?爾曰:「自當作家門。」「京師俊士」?曰:「有鍾士季, 其人管朝

政,吳、蜀之憂也。」

外事。 漢晉春秋曰:初,夏侯霸降蜀,姜維問之曰:「司馬懿旣得彼政,當復有征伐之志不?」霸曰:「彼方營立家門,未遑 按習鑿齒此言,非出他書,故採用世語而附益也。 有鐘士季者,其人雖少,終爲吳、閩之憂,然非非常之人亦不能用也。」後十五年而會果滅蜀

爲人下,加猛將銳卒皆在己手,遂謀反。欲使姜維等皆將燭兵出斜谷,會自將大衆隨其後。 收艾入檻車。會所憚惟艾,艾旣禽而會尋至,獨統大衆,威震西土。自謂功名蓋世,不可復 或不從命,敕會並進軍成都,監軍衞瓘在會前行,以文王手筆令宣喻及軍,及軍皆釋仗,遂 旣至長安,令騎士從陸道,步兵從水道順流浮渭入河,以爲五日可到孟津,與騎會洛陽, 會內有異志,因鄧艾承制專事,密白艾有反狀,自於是詔書艦車徵艾。 司馬文王懼艾

雷鼓 相告 倚梯登城,或燒城屋,蟻附亂進,矢下如雨,牙門、郡守各緣屋出,與其卒兵相得。 擊之耳。」 匈 呼外兵入,人賜白帖,苦治反。 請羣官,悉閉著益州諸曹屋 后遺 五日 能獨辦之;今來大重,必覺我異矣,便當速發。 屯樂城,吾自將十萬屯長安,相見在近。」會得書,驚呼所親語之曰:「但取鄧艾,相國 '匈聲,似失火,有頃,白兵走向 公出門,諸軍兵不期皆鼓譟出,曾無督促之者,而爭先赴城。 也 皆偏。 會請以自隨,任愛之。 烈紿語親兵及疏與其子曰:「丘建密說消息,會已作大坑, ,使會起兵廢文王,皆班示坐上人,使下議訖, 可定也。 其明日, 我自淮南以來,畫無遺策,四海所共知也。 會遣 或謂會:「可盡殺牙門騎督以上。」 兵悉殺所閉諸牙門郡守,內人共舉机以柱門, 會得文王書云:「恐鄧艾或不就徵,今遣中護軍賈充將步騎萬人徑入斜谷, 悉請護軍、郡守、牙門騎督以上及蜀之故官,爲太后發喪于閩朝堂。 中,城門宮門皆閉,嚴兵圍守。 建愍烈獨坐,啓會,使聽內一親兵出取飲食, 拜為散將,以次棓殺坑中。」 城。 會驚,謂維 會猶豫未決。 事成,可得天下;不成,退保蜀漢,不 曰:「兵來似欲作惡,當云何? 書版署置, 我欲持此安歸乎!」會以五年正 諸牙門親 會帳下督丘建本屬胡烈,烈薦之 兵斫門, 十八日日 時方給與姜維鎧杖,白外有 更使所親信代領諸軍。 白棓 兵亦咸說此 不 棓與棒同。 ф, 能破。 諸牙門隨例 烈軍 |維日:「 數干, 斯須 兵 姜維率會 〈與烈兒 門外 夜傳 月十

左右戰,手殺五六人,衆旣格斬濰,爭赴殺會。會時年四十,將士死者數百人。〔三〕

[1]世語曰:會善效人書,於劍閣要艾章表白事,皆易其言,令辭指悖傲,多自矜伐。又毀文王報書,手作以疑之也。

[三] 晉諸公贊曰: 胡烈兒名淵,字世元,遵之孫也。 遵,安定人,以才兼文武,累居藩鎭,至車騎將軍。 子奮,字玄威 字玄武,秦州刺史。次岐,字玄嶷,并州刺史。廣子喜,凉州刺史。淵小字鷂鴟,時年十八,既殺會救父,名震遠 亦歷方任。女爲晉武帝貴人,有籠。太康中,以奮爲尚書僕射,加鎭軍大將軍、開府。弟廣,字宣祖,少府。次烈

近。後趙王倫篡位,三王興義,倫使淵與張泓將兵禦齊王,屢破齊軍。會成都戰克,淵乃歸降伏法。

法。」或曰,毓曾密啓司馬文王,言會挾術難保,不可專任,故宥峻等云。 〔1〕 以會、邕之罪,而絕緣、毓之類,吾有愍然!峻、辿兄弟特原,有官爵者如故。惟黻及邕息伏 薨,會竟未知問。 會兄子邕,隨會與俱死。 會所養兄子毅及峻、辿 較連反。等下獄,當伏誅。 |司馬文王表天子下詔曰:「峻等祖父縣,三祖之世,極位台司,佐命立勳,饗食廟庭。 父毓 歷職內外,幹事有績。昔楚思子文之治,不滅鬭氏之祀。晉錄成宣之忠,用存趙氏之後 初,艾爲太尉,會爲司徒,皆持節、都督諸軍如故,咸未受命而斃。 會兄毓,以四年冬

〔1〕漢晉春秋曰:文王嘉其忠亮,笑答毓曰:「若如卿言,必不以及宗矣。」

重任,不若使餘人行。」文王笑曰:「我寧當復不知此耶?蜀爲天下作患,使民不得安息,我 初,文王欲遣會伐蜀,西曹屬邵悌求見曰:「今遣鍾會率十餘萬衆伐蜀,愚謂會單身無 矣。」軍至長安,會果已死,咸如所策。〔1〕 取艾,不足自行。」文王曰:「卿忘前時所言邪,而更云可不須行乎。雖爾,此言不可宣也。 **愼莫使人聞也。」及會白鄧艾不軌,文王將西,悌復曰:「鍾會所統,五六倍于鄧艾,但可敕會** 震恐,不足與圖事; 中國將士各自思歸,不肯與同也。 若作惡,祗自滅族耳。 卿不須憂此 辦耶?凡敗軍之將不可以語勇,亡國之大夫不可與圖存,心膽以破故也。若蜀以破,遺民 爲敵禽耳。 今伐之如指掌耳,而衆人皆言蜀不可伐。 夫人心豫怯則智勇並竭,智勇並竭而彊使之,適 我要自當以信義待人,但人不當負我,我豈可先人生心哉!近日賈護軍問我,言:『頗疑]鍾 』我答言:『如今遣卿行, 惟鍾會與人意同,今遣會伐蜀,必可滅蜀。滅蜀之後,就如卿所慮,當何所能一 寧可復疑卿邪? 』賈亦無以易我語也。 我到長安,則自了

」按咸熙元年百官名: 邵悌字元伯,陽平人。

哉?今王誅旣加,於法已備,雌感義收葬,敎亦無闕。法立於上,敎弘於下,以此訓物,雄曰可矣! 叛逆而又輒收葬,若復相容,其如王法何!」雌曰:「昔先王掩骼埋胔,仁流朽骨,當時豈先卜其功罪而後 漢晉春秋曰:文王聞鍾會功曹向雄之收葬會也,召而責之曰:「往者王經之死,卿哭于東市而我不問,今鍾會躬爲 建生,以立於時。 殿下讎對枯骨,捐之中野,百歲之後,爲臧獲所笑,豈仁賢所掩哉?」王悅,與宴談而遣之。 何必使雄背死 收葬

習鑿齒曰:

向伯茂可謂勇於蹈義也,哭王經而哀感市人,葬鍾會而義動明主,彼皆忠烈奮勁,知死而往,非存生

也。 沉使經、會處世,或身在急難,而有不赴者乎?故尋其奉死之心,可以見事生之情,覽其忠貞之節,足以愧背

義之士矣。王加禮而遣,可謂明達。

書郎,年二十餘卒。[1]

也,其文似會。 會嘗論易無互體、才性同異。 初, 會弱冠與山陽王弼並知名。 及會死後,于會家得書二十篇,名曰道論,而實刑名家 | 丽好論儒道,辭才逸辯,注易及老子,爲尚

弼字輔嗣 物而 幾時病亡,爽用王沈代黎,弼遂不得在門下,晏爲之歎恨。 茂於人者神明 會論議以校練爲家,然每服弼之高致。 善投壺。其論道傅會文辭,不如何晏,自然有所拔得,多晏也。頗以所長笑人,故時爲士君子所疾。弱與鍾會善, 劉陶善論縱橫,爲當時所推。 充、裴秀、朱整,又議用弼。 時丁謐與晏爭衡,致高邑王黎於曹爽,爽用黎。 <u> 尚書,甚奇弼,歎之曰:「仲尼稱後生可畏,若斯人者,可與言天人之際乎!」正始中, 黃門侍郎累缺。</u> 冠,往造焉。 「聖人體无,无又不可以訓,故不說也。老子是有者也,故恆言無所不足。」尋亦爲傅嘏所知。于時何晏爲吏部 無累於物者也。 何劭爲其傳曰:哪幼而察慧,年十餘,好老氏,通辯能言。父業,爲尚書郎。時裴徽爲吏部郎,卿未弱 徽一見而異之,問弼曰:「夫無者誠萬物之所資也,然聖人莫肯致言,而老子申之無已者何?」弼曰: 也,同於人者五情也,神明茂故能體沖和以通無,五情同故不能無哀樂以 今以其無累,便謂不復應物,失之多矣。 每與弼語,常屈弼。弼天才卓出,當其所得,莫能奪也。 何晏以爲聖人無喜怒哀樂,其論甚精,鍾會等述之。 | 厨在臺既淺,事功亦雅非所長,益不留意焉。 爾注易,潁川人荀融難弼大衍義。 於是以弼補臺郎。 性和理,樂遊宴, 、應物,然則聖人之情,應 弼與不同,以爲聖人 初除,覲爽 弼答其意,白音 晏旣用賈 淮南人 尋黎無 ()請閒

王毌丘諸葛鄧鍾傳第二十八

絕嗣。 哀。 融善,黎奪其黃門郎,於是恨黎,與融亦不終。正始十年,曹爽廢,以公事免。其秋遇癘疾亡,時年二十四,無子 往往有高麗言。太原王濟好談,病老、莊,常云:「見弼易注,所悟者多。」然弼爲人淺而不識物情,初與王黎、荀 朔,何其相思之多乎?故知尼父之於顏子,可以無大過矣。」聞注老子,爲之指略,致有理統。 以戲之曰:「夫明足以轉極幽微,而不能去自然之性。 顏子之量,孔叉之所預在,然遇之不能無樂,喪之不能無 叉常狹斯人,以爲未能以情從理者也,而今乃知自然之不可革。足下之量,雖已定乎胸懷之內,然而隔踰 弼之卒也,晉景王聞之,嗟歎者累日,其爲高識所惜如此。 著道略論,注易,

落,多所不關。雖有可觀者焉,恐將泥夫大道。 孫盛曰: 玄旨者乎?故其敍浮義則麗辭溢目,造陰陽則妙賾無閒,至于六爻變化,羣象所效,日時歲月,五氣相推,剛皆擯 易之爲書,窮神知化,非天下之至精,其孰能與於此?世之注解,殆皆妄也。 沉弼以傅會之辨而欲籠

操物記曰:初,王粲與族兄凱俱避地荆州,劉表欲以女妻粲, 書悉入業。 業,業即劉表外孫也。 業字長緒,位至謁者僕射。子宏字正宗,司隸校尉。宏,弼之兄也。 蔡邕有書近萬卷,末年載數車與疑,疑亡後,相國掾魏諷謀反,疑子與焉,旣被誅,邕所與 而嫌其形陋而用率,以凱有風貌,乃以妻凱。 |凱生

魏氏春秋曰:文帝既誅燦二子,以業嗣粲。

茲榮任,而皆心大志迂,不慮禍難,變如發機,宗族塗地,豈不謬惑邪!鄧艾矯然彊壯,立 評曰:王浚風節格尙,毌丘儉才識拔幹,諸葛誕嚴毅威重,鍾會精練策數,咸以顯名,致 魏

功立事,然闇于防患,咎敗旋至, 豈遠知乎 諸葛恪而不能近自見,此蓋古人所謂目論者

也。

(1) 史記曰:越王無疆與中國爭疆,當楚威王時,越北伐齊,齊威王使人說越云,越王不納。齊使者曰:「幸也,越之不 亡也。吾不貴其用智之如目,目見毫毛而不自見其睫也。今王知晉之失計,不自知越之過,是目論也。」

方技傳第二十九

到」,應便拔針,病亦行差。 若病結積在內,針藥所不能及,當須刳割者,便飮其麻沸散,須 過七八壯,病亦應除。 若當針,亦不過一兩處,下針言「當引某許,若至,語人」。 病者言「已 數種,心解分劑,不復稱量,煑熟便飲,語其節度,舍去輒愈。 若當灸,不過一兩處,每處不 |斑辟,皆不就。 曉養性之術,時人以爲年且百歲而貌有壯容。 叉精方藥,其療疾,合湯不過 自寤,一月之間,卽平復矣。 **臾便如醉死無所知,因破取。** 華佗字元化,沛國譙人也,一名專。〔〕游學徐土,兼通數經。 沛相陳珪舉孝廉,太尉黃 病若在腸中,便斷腸湔洗,縫腹膏摩,四五日差,不痛,人亦不

(1)臣松之案:古「敷」字與「專」相似,寫書者多不能別。尋陀字元化,其名宜爲專也。

則男,在右則女。 故甘陵相夫人有娠六月,腹痛不安,佗视脈,曰:「胎已死矣。」使人手摸知所在,在左 人云「在左」,於是爲湯下之,果下男形,卽愈。

縣吏尹世苦四支煩,口中乾,不欲聞人聲,小便不利。陀曰:「試作熱食,得汗則愈;不

汗,後三日死。」即作熱食而不汗出,佗曰:「藏氣已絕於內,當啼泣而絕。」果如佗言。

府吏兒尋、李延共止,俱頭痛身熱,所苦正同。佗曰:「尋當下之,延當發汗。」或難其

異,佗曰:「尋外實,延內實,故治之宜殊。」即各典藥,明旦並起。

有急病見於面,莫多飮酒。」坐畢歸,行數里,町卒頭眩墮車,人扶將還,載歸家,中宿死。

吐舌數寸。」其妻聞其病除,從百餘里來省之,止宿交接,中間三日發病,一如佗言。 故督郵頓子獻得病已差,詣佗視脈,曰:「尙虛,未得復,勿爲勞事,御內卽死。 臨死,當

督郵徐毅得病,佗往省之。 毅謂佗曰:「昨使醫曹吏劉租針胃管訖,便苦欬嗽,欲臥不

安。」佗曰:「刺不得胃管,誤中肝也,食當日減,五日不救。」遂如佗言。 東陽陳叔山小男二歲得疾,下利常先啼,日以羸困。問佗,佗曰:「其母懷驅,陽氣內

養,乳中虛冷,兒得母寒,故令不時愈。」陀與四物女宛丸,十日卽除。

彭城夫人夜之廁,蠆螫其手,呻呼無賴。陀令溫湯近熱,漬手其中,卒可得寐,但旁人

數爲易湯,湯令煖之,其旦卽愈。

軍吏梅平得病,除名還家,家居廣陵,未至二百里,止親人舍。有頃,佗偶至主人許,主

人令|佗視||平,||佗謂||平日:「君早見我,可不至此。今疾已結,促去可得與家相見,五日卒。」

應時歸,如佗所刻。

疾者前入坐,見忆北壁縣此虵輩約以十數。 枚,縣車邊,欲造佗。 語之曰:「向來道邊有賣餅家蒜韲大酢,從取三升飮之,病自當去。」即如陀言, | 佗行道,見一人病咽塞,嗜食而不得下,家人車載欲往就醫。 佗尙未還, 小兒戲門前, 逆見, 自相謂曰:「似逢我公, 車邊病是也。」 佗聞其呻吟,駐車往視, 立吐虵一

守果大怒,令人追捉殺佗。郡守子知之,屬使勿逐。 叉有一郡守病,佗以爲其人盛怒則差,乃多受其貨而不加治,無何棄去,留書駡之。 然君壽亦不過十年,病不能殺君,忍病 守瞋恚既甚,吐黑血數升而 愈。 郡

十歲,壽俱當盡,不足故自刳裂。」士大夫不耐痛癢,必欲除之。。陀遂下手,所患尋差,十年 叉有一士大夫不快,佗云:「君病深,當破腹取。

身是生魚膾也,所苦便愈。 食腥物所爲也。」即作湯二升,先服一升,斯須盡服之。食頃,吐出三升許蟲,赤頭皆動,半 廣陵太守陳登得病,胸中煩懣,面赤不食。 佗曰:「此病後三期當發,遇良醫乃可濟救。」依期果發動,時佗 | 佗脈之曰:「府君胃中有蟲數升,欲成內疽,

不在,如言而死

太祖聞而召佗,佗常在左右。太祖苦頭風,每發,心亂目眩,佗針鬲,隨手而差。

[1] 佗別傳曰:有人病兩脚躄不能行,舉詣佗,佗望見云:「已飽針灸服藥矣,不復須看脈。」 便使解衣,點背數十處, 相去或一寸,或五寸,縱邪不相當。言灸此各十壯,灸創愈卽行。後灸處夾脊一寸,上下行端直均調,如引繩也。

果得一死男,手足完具,色黑,長可尺所。 死胎必出。」 湯針旣加,婦痛急如欲生者。 ||佗曰:「此死胎久枯,不能自出,宜使人探之。」 曰:「案脈,胎未去也。」將軍以爲不然。|佗舍去,婦稍小差。 百餘日復動,更呼陀,陀曰: 不復迎,遂不得生。胎死,血脈不復歸,必燥著母脊,故使多脊痛。今當與湯,幷針一處,此 「此脈故事有胎。前當生兩兒,一兒先出,血出甚多,後兒不及生。母不自覺,旁人亦不寤, 李將軍妻病甚,呼陀視脈,曰:「傷娠而胎不去。」 將軍言:「聞實傷娠,胎已去矣。」 佗

於是傳付許獄,考驗首服。荀彧請曰:「佗術實工,人命所縣,宜含宥之。」太祖曰:「不憂, 還耳。」到家,辭以妻病,數乞期不反。太祖累書呼,又敕郡縣發遣。佗恃能厭食事,猶不 天下當無此鼠輩耶?」 遂考竟陀。陀臨死,出一卷書與獄吏,曰:「此可以活人。」 吏畏法不 上道。太祖大怒,使人往檢。若妻信病,賜小豆四十斛,寬假限日;若其虛詐,便收送之。 專視。||佗日:「此近難濟,恆事攻治,可延歲月。」||佗久遠家思歸,因曰:「當得家書,方欲暫 陀之絕技,凡此類也。然本作士人,以醫見業,意常自悔,後太祖親理,得病篤重,使佗

受,佗亦不彊,索火燒之。 佗死後,太祖頭風未除。 太祖曰:「佗能愈此。 小人養吾病,欲以 自重,然吾不殺此子,亦終當不爲我斷此根原耳。」及後愛子倉舒病困, 太祖歎曰:「吾悔殺

華佗,令此兒彊死也。」

成病竟發,無藥可服,以至於死。 [三] 歲,親中人有病如成者,謂成曰:「卿今彊健,我欲死,何忍無急去藥,「」以待不祥。先持貸 我,我差,爲卿從華佗更索。」成與之。 八歲當一小發,服此散,亦行復差。若不得此藥,故當死。」復與兩錢散。成得藥,去五六 肺來也。 初,軍吏李成苦欬嗽,晝夜不寤,時吐膿血,以問佗。陀言:「君病腸臃,欬之所吐,非從 與君散兩錢,當吐二升餘膿血訖,快自養,一月可小起,好自將愛,一年便健。十 已故到譙,適值陀見收,忽忽不忍從求。後十八歲,

「一」臣松之案:古語以藏爲去。

三〕佗别傳曰:人有在青龍中見山陽太守廣陵劉景宗,景宗説中平日數見華佗,其治病手脈之候,其驗若神。琅琊 「是易治之。當得稻糠黄色犬一頭,好馬二疋。」以繩繫犬頭,使走馬牽犬,馬極輒易,計馬走三十餘里,犬不能 長三尺所,純是她,但有眼處而無童子,又逆鱗耳。以膏散著瘡中,七日愈。又有人苦頭眩,頭不得舉,目不得視, 口,令去二三寸。停之須臾,有若她者從瘡中而出,便以鐵椎横貫虵頭。虵在皮中動摇良久,須臾不動,乃牽出, 行,復令步人拖曳,計向五十里。乃以藥飲女,女即安卧不知人。因取大刀斷犬腹近後腳之前,以所斷之處向瘡 |劉勳爲|河内太守,有女年幾二十,左腳膝裏上有瘡,癢而不痛。 瘡愈數十日復發,如此七八年,迎忙使視,忙日:

數。將至八十灌,熱氣乃蒸出,囂囂高二三尺。滿百灌,佗乃使然火溫牀,厚覆,良久汗洽出,著粉,汗燥便愈。 **膐壞。以刀斷之,刮去惡肉,以膏傅瘡,飮之以藥,百日平復。** 又有人病腹中半切痛,十餘日中,鬢眉墮落。 佗曰:「是脾半腐,可刳腹養治也。」 使飮藥令臥,破腹就視,脾果半 病者。冬十一月中,陀令坐石槽中,平旦用寒水汲灌,云當滿百。始七八灌,會戰欲死,灌者懼,欲止。陀令滿 脈,五色血盡,視赤血,乃下,以膏犘被覆,汗自出周市,飲以亭歷犬血散,立愈。又有婦人長病經年,世謂寒熱注 佗使悉解衣倒懸,令頭去地一二寸,濡布拭身體,令周市,候視諸脈,盡出五色。|佗令弟子數人以鈹刀決

堅。阿善針術。凡醫咸言背及胸藏之間不可妄針,針之不過四分,而阿針背入一二寸,巨 壽百餘歲。漆葉處所而有,靑黏生於豐、沛、彭城及朝歌云。〔〕〕 闕胸藏針下五六寸,而病輒皆瘳。阿從佗求可服食益於人者,佗授以漆葉青黏散。漆葉屑 虎,二曰鹿,三曰熊,四曰猨,五曰鳥,亦以除疾,並利蹄足,以當導引。 者爲導引之事,熊頸鴟顧,引輓腰體,動諸關節,以求難老。吾有一術,名五禽之戲,一日 之戲,沾濡汗出,因上著粉,身體輕便,腹中欲食。」普施行之,年九十餘,耳目聰明,齒牙完 但不當使極爾。 升,青黏屑十四兩,以是爲率,言久服去三蟲,利五藏,輕體,使人頭不白。 阿從其言, 廣陵吳普、彭城樊阿皆從佗學。普依準佗治,多所全濟。佗語普曰:「人體欲得勞動 動搖則穀氣得消,血脈流通,病不得生,譬猶戶樞不朽是也。是以古之仙 體中不快,起作一禽

[1] 佗别傳曰:青黏者,一名地節,一名黃芝,主理五藏,盆精氣。本出於迷入山者,見仙人服之,以告佗。佗以爲佳,輒

語阿,阿又祕之。近者人見阿之壽而氣力彊盛,怪之,遂賣阿所服,因醉亂誤道之。 法一施,人多服者,皆有大驗。

始來,衆人無不鴟視狼顧,呼吸吐納。 術。 榮言其尸解。 導之術,至寺人嚴峻,往從問受。 以當仙。 並爲軍 文帝典論 齊南孫邕少事之,從至京師。會和平病死,邕因葬之東陶,有書百餘卷,藥數囊,悉以送之。 吏。 邕至今恨不取其寶書仙藥。 論卻儉等事曰:「潁川卻儉能辟穀,餌伏苓。 初,儉之至,市伏苓價暴數倍。 閹豎眞無事於斯術也,人之逐聲,乃至於是。 軍謀祭酒弘農董芬爲之過差,氣閉不通,良久乃蘇。 劉向惑於鴻寶之說,君游眩於子政之言,古今愚謬,豈唯一 議則安平李覃學其辟穀,餐伏苓,飲寒水,中泄利,殆至隕命。 甘陵甘始亦善行氣, 光和中,北海王和平亦好道術,自 老有少容。 左慈到 廬江 左慈 叉競受其補 入哉!」 後弟子夏 知補導之 後

欲觀神仙於瀛洲,求安期於海島,釋金輅而履雲輿,棄六驥而美飛龍哉?自家王與太子及余兄弟咸以爲調笑,不 香罽、腰帶、割玉刀,時悔不取也。』 又言:『車師之西國。 兒生,擘背出脾,欲其食少而弩行也。』 又言:『取鯉魚 必益壽,可以療疾而不憚饑饉焉。 曉房中之術,儉善辟穀,悉號三百歲。 之,始語 信之矣。然始等知上遇之有恆,奉不過於員吏,賞不加於無功,海島難得而游,六黻難得而佩, 五寸一雙,合其一 少容,自諸術士咸共歸之。 言,出非常之語。 東阿王作辯道論曰:「世有方士,吾王悉所招致,甘陵有甘始,廬江有左慈,陽城有郤儉。 ·余·『吾本師姓韓字世雄,嘗與師於南海作金,前後數四,投數萬斤金於海。』 煮藥,俱投沸膏中,有藥者奮尾鼓鰓,游行沉浮,有若處淵,其一者已熟而可噉。 余嘗試卻儉絕穀百日,躬與之寢處,行步起居自若也。 然始辭繁寡實,頗有怪言。 左慈善修房內之術,差可終命,然自非有志至精,莫能行也。 卒所以集之於魏國者,誠恐斯人之徒,接姦宄以欺衆,行妖慝以惑民,豈復 余常辟左右,獨與之談,問其所行,溫顏以誘之,美辭以導 夫人不食七日則死 又言:『諸梁時,西域胡來獻 ,而儉乃如是。 始能行氣導引 甘始者, 終不敢進 余時問:『言 虚誕之 老而有 然不 慈

魏

始若遭秦始皇、漢武帝,則復爲徐市、樂大之徒也。」 率可試不?』言: 『是藥去此逾萬里,當出塞;始不自行不能得也。』 言不盡於此,頗難悉載,故粗舉其互怪者。

酒,參太樂事,因令創制雅樂。 天子合樂,而庭作之,無乃不可乎!」表納其言而止。後表子踪降太祖,太祖以變爲軍謀祭 奔荆州。荆州牧劉表令與孟曜爲漢主合雅樂,樂備,表欲庭觀之,夔諫曰:「今將軍號(示)爲 杜夔字公良,河南人也。以知音爲雅樂郎,中平五年,疾去官。州郡司徒禮辟,以世亂

樂,歌師尹胡能歌宗廟郊祀之曲,舞師馮肅、服養曉知先代諸舞,夔總統研精,遠考諸經,近 宋故事,教習講肄,備作樂器,紹復先代古樂,皆自變始也。 |夔善鐘律,聰思過人,絲竹八音,靡所不能,惟歌舞非所長。 時散即鄧靜、尹齊善詠雅

琴,變有難色,由是帝意不悅。後因他事繫變,使〈願〉〔驥〕等就學,變自謂所習者雅,仕宦有 是罪玉及諸子,皆爲養馬士。文帝愛待玉,又嘗令夔與(左願)〔左瞋〕等於賓客之中吹笙鼓 貴人見知。 夔令玉鑄銅鐘,其聲均淸濁多不如法,數毀改作。 |玉甚厭之,謂變淸濁任意,頗 拒捍夔。夔、玉更相白於太祖,太祖取所鑄鐘,雜錯更試,然〔後〕知夔爲精而玉之妄也,於 黃初中,爲太樂令、協律都尉。漢鑄鐘工柴玉巧有意思,形器之中,多所造作,亦爲時

本,意猶不滿,遂黜免以卒。

弟子河南邵登、張泰、桑馥,各至太樂丞,下邳陳旗司律中郎將。自左延年等雖妙於

音,咸善鄭聲,其好古存正莫及變。(1)

一〕 時有扶風馬鈞,巧思絕世。 者,上國之士也,精通見理,聞而哂之。乃難先生,先生口屈不對。襲子自以爲難得其要,言之不已。傅子謂裴 善也。」 之模,而衡者所以定物之輕重;輕重無準而莫不模哉!』先生曰:『虛爭空言,不如試之易效也。』 於是二子遂以 不可以言言者,又焉可以言校也。先生爲給事中,與常侍。直隆、驍騎將軍秦朗爭論於朝,言及指南車,二子謂 大石數十,以機鼓輪爲常,則以斷縣石飛擊敵城,使首尾電至。嘗試以車輪縣瓴甓數十,飛之數百步矣。 者,能設而不能動也。帝以問先生:『可動否?』對曰:『可動。』帝曰:『其巧可益否?』對曰:『可益。』 受詔作之。 園,患無水以灌之,乃作翻車,令童兒轉之,而灌水自覆,更入更出,其巧百倍於常。 此二異也。 其後人有上百戲 及巧,焉可以言知乎?爲博士居貧,乃思綾機之變,不言而世人知其巧矣。舊綾機五十綜者五十躡,六十綜者六 劍,緣絙倒立,出入自在;百官行署,春磨鬬雞,變巧百端。此三異也。先生見諸葛亮連弩,曰:『巧則巧矣,未盡 以大木彫構,使其形若輪,平地施之,潛以水發焉。 殼爲女樂舞象,至令木人擊鼓吹簫;作山嶽,使木人跳丸擲 白明帝,韶先生作之,而指南車成。此一異也,又不可以言者也,從是天下服其巧矣。居京都,城內有地,可以爲 古無指南車,記言之虛也。 先生曰:『古有之,未之思耳,夫何遠之有!』二子哂之曰:『先生名鈞字德衡,鈞者器 十躡,先生患其喪功費日,乃皆易以十二躡。 其奇文異變,因感而作者,猶自然之成形,陰陽之無窮,此輪扁之對 言作之可令加五倍。 傅玄序之曰:「馬先生,天下之名巧也,少而游豫,不自知其爲巧也。 又患發石車,敵人之於樓邊縣濕牛皮,中之則墮,石不能連屬而至。 當此之時,言不 欲作 :一輪,縣 有裴子

旣易試之事,又馬氏巧名已定,猶忽而不察,況幽深之才,無名之璞乎?後之君子其鑒之哉!馬先生之巧,雖古 巧無由出也。夫同情者相好,同事者相害,中人所不能免也。故君子不以人害人,必以考試爲衡石;廢衡石而不 以御難盡之物,此所以多廢也。馬氏所作,因變而得是,則初所言者不皆是矣。其不皆是,因不用之,是不世之 十尋之木,勞二人之力,不經時而是非定。難試易驗之事而輕以言抑人異能,此猶以己智任天下之事,不易其道 短,難彼所長,則必有所不解者矣。夫巧,天下之微事也,有所不解而難之不已,其相擊刺,必已遠矣。心乖於內, 子曰:『子所長者言也、所短者巧也。 馬氏所長者巧也,所短者言也。 以子所長,擊彼所短,則不得不屈。 以子所 雖給事省中,俱不典工官,巧無盆於世。用人不當其才,聞賢不試以事,良可恨也。」裴子者,裴秀。安鄉侯者, 公輸般、墨翟、王爾,近漢世張平子,不能過也。公輸般、墨翟皆見用於時,乃有益於世。平子雖爲侍中,馬先生 用,此美玉所以見誣爲石,荆和所以抱璞而哭之也。』於是安鄉侯悟,遂言之武安侯,武安侯忽之,不果試也。此 縣言物理,不可以言盡也,施之於事,言之難盡而試之易知也。今若馬氏所欲作者,國之精器,軍之要用也。費 聖人之明盡物,如有所用,必有所試,然則試再、季以政,試游、夏以學矣。游、夏獨然,況自此而降者乎!何者? 倫是也。 取人不以一揆也:有以神取之者,有以言取之者,有以事取之者。有以神取之者,不言而誠心先達,德行顏淵之 口屈於外,此馬氏所以不對也。』傅子見安鄉侯,言及裴子之論,安鄉侯又與裴子同。傅子曰:『聖人具體備物, 以言取之者,以變辯是非,言語字我、子買是也。以事取之者,若政事冉有、季路,文學子游、子夏。雖

朱建平,沛國人也。善相術,於閭巷之間,效驗非一。太祖爲魏公,聞之,召爲郎。文

曹羲。武安侯者,曹爽也。

白狗,而旁人不見也。」謂曹彪曰:「君據藩國,至五十七當厄於兵,宜善防之。」 可年至七十,致位公輔。」謂應璩曰:「君六十二位爲常伯,而當有厄,先此一年,當獨見一 至四十時當有小厄,願謹護之。」謂夏侯威曰:「君四十九位爲州牧,而當有厄,厄若得過, 帝爲五官將,坐上會客三十餘人,文帝問己年壽,又令徧相衆賓。建平曰:「將軍當壽八十,

雖唐舉、許負何以復加也!」 嫁卿阿鷺耳。』何意此子竟早隕沒,戲言遂驗乎!今欲嫁阿鷺,使得善處。 追思建平之妙, 「吾與公達會共使朱建平相,建平曰:『荀君雖少,然當以後事付鍾君。』吾時啁之曰:『惟當 初,潁川荀攸、鍾繇相與親善。 攸先亡,子幼。 繇經紀其門戶,欲嫁其妾。 與人書曰:

宴自娱,過期一年,六十三卒。曹彪封楚王,年五十七,坐與王凌通謀,賜死。凡說此輩,無 璩六十一爲侍中,直省內,欽見白狗,問之衆人,悉無見者。於是數聚會,幷急游觀田里,飮 之,果崩。夏侯威爲兗州刺史,年四十九,十二月上旬得疾,念建平之言,自分必死,豫作遗 不如言,不能具詳,故粗記數事。惟相司空王昶、征北將軍程喜、中領軍王肅有蹉跌云。肅 所苦漸平,明日雞鳴,年便五十,建平之戒,眞必過矣。」」威罷客之後,合瞑疾動,夜半遂卒。 令及送喪之備,咸使素辨。至下旬轉差,垂以平復。 三十日日昃,請紀綱大吏設酒,曰:「吾 文帝黃初七年,年四十,病困,謂左右曰:「建平所言八十,謂晝夜也,吾其決矣。」頃

年六十二,疾篤,衆醫並以爲不愈。 肅夫人問以遺言,肅云:「建平相我踰七十,位至三公,

今皆未也,將何慮乎!」而肅竟卒。

乘馬,馬惡衣香,驚囓文帝膝,帝大怒,即便殺之。建平黃初中卒。 建平叉善相馬。 文帝將出,取馬外入,建平道遇之,語曰:「此馬之相,今日死矣。」帝將

以藥酒。」使宣占之。是時黃巾賊起,宣對曰:「夫杖起弱者,藥治人病,八月一日,賊必除 周宣字孔和,樂安人也。爲郡吏。太守楊沛夢人曰:「八月一日曹公當至,必與君杖,飮

滅。」至期,賊果破。

女子而作賊者。」頃之,女賊鄭、姜遂俱夷討,以虵女子之祥,足非虵之所宜故也。 後東平劉楨夢虵生四足,穴居門中,使宣占之,宣曰:「此爲國夢,非君家之事也。 當殺

文,欲令滅而更愈明,此何謂邪?」宣悵然不對。帝重問之,宣對曰:「此自陛下家事,雖意 者。」帝曰:「吾詐卿耳!」宣對曰:「夫夢者意耳,苟以形言,便占吉凶。」言未畢,而黃門 死。」是時,帝已遣使賜甄后璽書,聞宣言而悔之,遣人追使者不及。帝復問曰:「吾夢摩錢 令奏宮人相殺。無幾,帝復問曰:「我昨夜夢青氣自地屬天。」

宣對曰:「天下當有貴女子寃 文帝問宣曰:「吾夢殿屋兩瓦墮地,化爲雙鴛鴦,此何謂也。」宣對曰:「後宮當有暴死

欲爾而太后不聽,是以文欲滅而明耳。」時帝欲治弟植之罪,偪於太后,但加貶爵。

中郎,屬太史。

之,果如宣言。後又問宣:「昨夜復夢見芻狗,何也?」宣曰:「君家失火,當善護之。」 俄鉁 之相矣。其餘效故不次列。明帝末卒。 車轢之後,必載以爲樵,故後夢憂失火也。」宣之敍夢,凡此類也。十中八九,世以比建平 果遇豐膳。後又問宣曰:「昨夜復夢見芻狗,何也?」宣曰:「君欲墮車折腳,宜戒愼之。」 頃 言,故與眞夢無異也。」 又問宣曰:「三夢芻狗而其占不同,何也?」宣曰:「芻狗者,祭神之 故君始夢,當得餘食也。祭祀旣訖,則芻狗爲車所轢,故中夢當墮車折腳也。 嘗有問宣曰:「吾昨夜夢見芻狗,其占何也?」宣答曰:「君欲得美食耳!」有頃,出行, 語宣曰:「前後三時,皆不夢也。聊試君耳,何以皆驗邪?」宣對曰:「此神靈動君使 芻狗旣

管輅字公明,平原人也。 容貌粗醜,無威儀而嗜酒,飲食言戲,不擇非類,故人多愛之

而不敬也。[1]

(1)軽別傳曰:整年八九歲,便喜仰視星辰,得人輒問其名,夜不肯寐。父母常禁之,猶不可止。 眼中喜視天文。」常云:「家雞野鵠,猶尙知時,況於人乎?」 與鄰比兒共戲土壤中, 輒畫地作天文及日月星辰。 自言「我年雖 小,然

魏

陳秦、漢之事,但欲論金木水火土鬼神之情耳。」子春言:「此最難者,而卿以爲易邪?」於是唱大論之端,遂經於 若府君四坐之士邪?」子春曰:「吾欲自與卿旗鼓相當。」輅言:「始讀詩、論、湯本,學問微淺,未能上引聖人之道, 道,不欲與漁父同舟,此吾志也。」 其事父母孝,篤兄弟,順愛士友,皆仁和發中,終無所闕。 臧否之士,晚亦服 無不精微。體性寬大,多所含受;憎已不響,愛已不褒,每欲以德報怨。常謂:「忠孝信義,人之根本,不可不厚; 至日向暮,酒食不行。 陰陽,文采葩流,枝葉橫生,少引聖籍,多發天然。子春及衆士互共攻劫,論難鋒起,而輅人人答對,言皆有餘。 神,請先飮三升淸酒,然後言之。」子春大喜,便酌三升淸酒,獨使飮之。酒盡之後,問子春:「今欲與略爲對者 會賓客百餘人,坐上有能言之士,解問子春:「府君名士,加有雄貴之姿,略旣年少,膽未堅剛,若欲相觀,懼失精 方及國內諸生四百餘人,皆服其才也。瑯邪太守單子春雅有材度,聞輅一黌之儁,欲得見,輅父卽遣輅造之。大 焉。父爲琅邪卽丘長,時年十五,來至官舍讀書。始讀詩、論語及易本,便開淵布筆,辭義斐然。 廉介細直,士之浮飾,不足爲務也。」自言:「知我者稀,則我貴矣,安能斷江、漢之流,爲激石之淸,樂與季主論 神以茂,必能明天文地理變化之數,不徒有言也。」於是發聲徐州,號之神童 言說事,語皆不常,宿學耆人不能折之,皆知其當有大異之才。及成人,果明周易,仰觀、風角、占、相之道 子春語衆人曰:「此年少 盛有才器,聽其言論,正似司馬犬子游獵之賦,何其磊落雄壯,英 于時黌上有遠

中有女鬼,非君伯母,當叔母也。 父爲利漕,利漕民郭恩兄弟三人,皆得躄疾,使輅筮其所由。 昔饑荒之世,當有利其數升米者,排著井中,嘖嘖有聲,推 輅曰:「卦中有君本墓,墓

(一) 輅別傳曰: 利漕民郭恩,字義博,有才學,善周易、春秋,又能仰觀。略就義博讀易,數十日中,意便開發,言難踰 大石,下破其頭,孤魂寃痛,自訴於天。」於是恩涕泣服罪。[1]

博反從輅問易及天文事要。義博每聽輅語,未嘗不推几慷慨。自言「登聞君至論之時,忘我篤疾,明闇之不相逮, 有咎殃者,天道赦人,當爲吾祈福於神明,勿有所愛。兄弟俱行,此爲更生。」,略便作卦,思之未詳。 仰觀,三十日中通夜不臥,語義博:「君但相語墟落處所耳,至於推運會,論災異,自當出吾天分。」學未一年,養 我不得言,禮也。 何其遠也」!義博設主人,獨請解,具告辛苦,自說:「兄弟三人俱得躄疾,不知何故?試相爲作卦,知其所由。 留宿,至中夜,語義博曰:「吾以此得之。」旣言其事,義博悲涕沾衣,曰:「皇漢之末,實有斯事。 於此分蓍下卦,用思精妙,占黌上諸生疾病死亡貧富喪衰,初無差錯,莫不驚怪,謂之神人也。 兄弟躄來三十餘載,腳如棘子,不可復治,但願不及子孫耳。」將言火形不絕,水形無餘,不及 君不名主,諱也 又從義博學 會日夕,因

廣平劉奉林婦病困,已買棺器。時正月也,使輅占,曰:「命在八月辛卯日日中之時。」

|林謂必不然,而婦漸差,至秋發動,一如||解言。 [1] 二 輅別傳曰: 義。」、格論爻象之旨,說變化之義,若規圓矩方,無不合也。 鮑子春爲列人令, 有明思才理,與略相見,曰:「聞君爲劉奉林卜婦死亡日,何其詳妙!試爲論其意 子春自言:「吾少好譚易,又喜分著,可謂盲者欲視白

黑,墮者欲聽清濁,苦而無功也。聽君語後,自視體中,眞爲憒憒者也。」

叉牀 有此三怪。」 上當有 |輅往見安平太守||王基,基令作卦,||輅曰:「當有賤婦人,生一男兒,墮地便走入竈中死。 一大虵銜筆,小大共視,須臾去之也。又烏來入室中,與燕共鬭,燕死,烏去。 基大驚,問其吉凶。略曰:「直客舍久遠,魑魅魍魎爲怪耳。 見生便走,非能自

魏

走,直宋無忌之妖將其入竈也。大虵銜筆,直老書佐耳。鳥與燕鬭,直老鈴下耳。今卦中

見象而不見其凶,知非妖咎之徵,自無所憂也。」 後卒無患。〔1〕

[一] 輅別傳曰:基與略共論易,數日中,大以爲喜樂,語略言:「俱相聞善卜,定共淸論。 |輅爲|基出卦,知其無咎,因謂|基曰:「昔|高宗之鼎,非雉所鴝,殷之階庭,非木所生,而野鳥一鴝,武丁爲|高宗,桑穀 暫生,太戊以興焉。知三事不爲吉祥,願府君安身養德,從容光大,勿以知神奸汙累天眞。」 君一時異才,當上竹帛也。」

矛,一男持弓箭,頭在壁內,腳在壁外。 持矛者主刺頭,故頭重痛不得舉也。 持弓箭者主射 胸腹,故心中縣痛不得飮食也。晝則浮游,夜來病人,故使驚恐也。」於是掘徙骸骨,家中 時信都令家婦女驚恐,更互疾病,使輅筮之。 輅曰:「君北堂西頭,有兩死男子,一男持

自愈。〔一〕

(一) 軽別傳曰: 王基即遣信都令遷掘其室中,入地八尺,果得二棺,一棺中有矛,一棺中有角弓及箭,箭久遠,木皆消 固無優劣。夫萬物之化,一例之道也。是以夏縣,天子之父,趙王如意,漢祖之子,而縣爲黃熊,如意爲蒼狗,斯 言,如何可得,終以皆亂,此自天授,非人力也。」於是藏周易,絕思慮,不復學卜筮之事。略鄕里乃太原問略 妙如此。」便從略學易,推論天文。,略每開變化之象,演吉凶之兆,未嘗不纖微委曲,盡其精神。基曰:「始聞君 爛,但有鐵及角完耳。 及徙骸骨,去城一十里埋之,無復疾病。 基曰:「吾少好讀易,玩之以久,不謂神明之數,其 「苟非性與天道,何由背爻象而任胸心者乎?夫萬物之化,無有常形,人之變異,無有常體,或大爲小,或小爲大, 「君往者爲王府君論怪,云老書佐爲虵,老鈴下爲烏,此本皆人,何化之微賤乎?爲見於爻象,出君意乎?」輅言:

亦至尊之位而爲黔喙之類也。況虵者協辰巳之位,烏者棲太陽之精,此乃騰黑之明象,白日之流景,如書佐、鈴

下,各以微軀化爲虵、烏,不亦過乎!」

至。」頃之,經爲江夏太守。[1] 衣彷徉,招呼婦人,覓索餘光。」|經大笑曰:「實如君言。」|輅曰:「吉,遷官之徵也,其應行 「爻吉,不爲怪也。君夜在堂戶前,有一流光如燕爵者,入君懷中,殷殷有聲,內神不安,解 清河王經去官還家,輅與相見。 經曰:「近有一怪,大不喜之,欲煩作卦。」 卦成,輅曰.

〔1〕輅別傳曰:經欲使輅卜,而有疑難之言。 彦緯斂手謝輅:「前言戲之耳。」於是略爲作卦,其言皆驗。經每論略,以爲得龍雲之精,能養和通幽者,非徒合 事或以成,嫁女娶妻或以生長,豈直數千錢哉?以此推之,急務也。苟道之明,聖賢不讓,沉吾小人,敢以爲難! 法天地,象四時,順仁義。伏羲作八卦,周文王三百八十四爻,而天下治。病者或以愈,且死或以生,息或以免, 會之才也 輅笑而答之曰:「君侯州里達人,何言之鄙!昔司馬季主有言,夫卜者必

主人雖喜,當有小故。」明日果有客,如所占。恩使客節酒、戒肉、愼火,而射雞作食,箭 輅又至郭恩家,有飛鳩來在梁頭,鳴甚悲。 輅曰:「當有老公從東方來,攜豚一頭,酒一

從樹間激中數歲女子手,流血驚怖。〔1〕

數,以律呂爲衆鳥之商,六甲爲時日之端,反覆譴曲,出入無窮。。義博靜然沉思,馳精數日,卒無所得。 **略爲說八風之變,五音之**

魏

才不出位,難以追徵於此。」 遂止。

牽引西家人夫離婁,候不過日在虞淵之際,告者至矣。」到時,果有東北同伍民來告,鄰婦 <u>輅至安德令劉長仁家,有鳴鵲來在閣屋上,其聲甚急。</u>輅曰:「鵲言東北有婦昨殺夫,

手殺其夫, 詐言西家人與夫有嫌, 來殺我壻。〔1〕

(一) 輅別傳曰: 勃海劉長仁有辯才,初雖聞略能曉鳥鳴,後每見難解曰:「夫生民之晉曰言,鳥獸之聲曰鳴,故言者則 廬聽音,著在春秋,斯皆典謨之實,非聖賢之虛名也。 商之將興,由一燕卵也。 文王受命,丹鳥銜書,此乃聖人之 之候,通靈者必有宮商之應,是以宋襄失德,六鶂並退,伯姬將焚,鳥唱其災,四國未火,融風已發,赤鳥夾日,殃 |輅答曰:「夫天雖有大象而不能言,故運星精於上,流神明於下,驗風雲以表異,役鳥獸以通靈。 表異者必有浮沉 靈祥,周室之休祚,何賤之有乎?夫鳥鳴之聽,精在鶉火,妙在八神,自非斯倫,猶子路之於死生也。」長仁言:「君 在荆楚。此乃上天之所使,自然之明符。考之律呂則音聲有本,求之人事則吉凶不失。昔在秦祖,以功受封,葛 有知之貴靈,鳴者則無知之賤名,何由以鳥鳴爲語,亂神明之所異也?孔子曰『吾不與鳥獸同羣』,明其賤也。」

|直問其故,輅曰:「其日乙卯,則長子之候也。 木落於申,斗建申, 申破寅,死喪之候也。 日 久乃止。 直以問輅,輅曰:「東方當有馬吏至,恐父哭子,如何!」明日膠東吏到,直子果亡。 加午而風發,則馬之候也。離爲文章,則吏之候也。申未爲虎,虎爲大人,則父之候也。」 |輅至||列人典農||王弘||直許,有飄風高三尺餘,從申上來,在庭中幢幢回轉,息以復起,良

辭雖茂,華而不實,未敢之信。」須臾有鳴鵲之驗,長仁乃服。

有雄雉飛來,登直內鈴柱頭,直大以不安,令輅作卦,輅曰:「到五月必遷。」時三月也,至

期,直果爲勃海太守。〔〕

學問,有道術,皆不能精。問格:「風之推變,乃可爾乎?」將言:「此但風之毛髮,何足爲異?若夫列宿不守,衆神 亂行,八風橫起,怒氣電飛,山崩石飛,樹木摧傾,揚塵萬里,仰不見天,鳥獸藏竄,兆民駭驚,於是使<u>梓愼之徒,登</u>

高臺,望風氣,分災異,刻期日,然後知神思遐幽,靈風可懼。」

中,使射覆。卦成,輅曰:「第一物,含氣須變,依乎宇堂,雄雌以形,翅翼舒張,此燕卵也。 第二物,家室倒縣,門戶衆多,藏精育毒,得秋乃化,此鑑窠也。 羅,尋網求食,利在昬夜,此體鼄也。」舉坐驚喜。〔1〕 館陶令諸葛原遷新興太守,輅往祖餞之,賓客並會。原自起取燕卵、鑑窠、體鼄著器 第三物,觳觫長足,吐絲成

[一] 軽別傳曰:諸葛原字景春,亦學士。好卜筮,數與略共射覆,不能窮之。 也。 |輅解景春微旨,遂開張戰地,示以不固,藏匿孤虛,以待來攻。|景春奔北,軍師摧衂,自言吾覩卿旌旗,城池已壞 白起之坑趙卒,項羽之塞雕水,無以尚之。于時客皆欲面縛衡璧,求東手於軍鼓之下。 論三王,如翮如翰;其英者若春華之俱發,其攻者若秋風之落葉。聽者眩惑,不達其義,言者收聲,莫不心服,雖 譚之客。 其欲戰之士,於此鳴鼓角,舉雲梯,弓弩大起,牙旗雨集。然後登城曜威,開門受敵,上論五帝,如江如漢,下 諸人多聞其善卜、仰觀,不知其有大異之才,於是先與略共論聖人著作之原,又敍五帝、三王受命之符。 景春與輅有榮辱之分,因略餞之,大有高 **略獨總干山立,未便許**

魏

方技傳第二十九

閒,不憂不富貴也。」|略言:「酒不可極,才不可盡,吾欲持酒以禮,持才以愚,何患之有也?」 辭合,妙不可述。景春及衆客莫不言聽後論之美,勝於射覆之樂。 期?且復共一射覆。」、輅占旣皆中。景春大笑,「卿爲我論此卦意, 紓我心懷」。 輅爲開爻散理,分賦形象,言徵 之。 溫克,然不可保,寧當節之。 「本聞卿作狗,何意爲龍?」「輅言:「潛陽未變,非卿所知,焉有狗耳,得聞龍聲乎!」景春言:「今當遠別,後會何 至明日 ·離別之際,然後有腹心始終。 一時海內俊士,八九人矣。 卿有水鏡之才,所見者妙,仰觀雖神,禍如膏火,不可不愼。持卿叡才,遊於雲漢之 景春與略別,戒以二事,言:「卿性樂酒,量雖 蔡元才在朋友中最有清才,在衆人中言:

十日,二人飲酒醉,夜共載車,牛驚下道入潭河中,皆卽溺死也。 耳之間同有凶氣,異變俱起,雙魂無宅,口流魂于海,骨歸于家,少許時當並死也。」復數 |輅族兄孝國,居在斥丘,輅往從之,與二客會。 客去後,輅謂孝國曰:「此二人天庭及口

一〕 輅別傳曰:輅叉曰:「厚味腊毒,天精幽夕,坎爲棺槨,兌爲喪車。」

於是辟爲文學從事,引與相見,大善友之。徙部鉅鹿,遷治中別駕。 **[周易則齊思]字主。今明使君方垂神幽藪,留精九皋,輅宜蒙陰和之應,得及羽儀之時。」 徽** 孔曜薦輅於冀州刺史裴徽曰:「輅雅性寬大,與世無忌,仰觀天文 則同妙甘公、石申,俯覽 當此之時,輅之鄰里,外戶不閉,無相偸竊者。清河太守華表,召輅爲文學掾。 安平趙

初應州召,與弟季儒共載,至武城西,自卦吉凶,語儒云:「當在故城中見三貍,爾者乃

顯。」前到河西故城角,正見三貍共踞城側,兄弟並喜。正始九年舉秀才。〔〕

悴耳。 」 幣別傳曰: 輅爲華凊河所召,爲北黌文學,一時士友無不歎慕。安平趙孔曜,明敏有思識,與輅有管、鮑之分,故 聞卿消息,使吾食不甘味也。冀州裴使君才理淸明,能釋玄虛,每論易及老、莊之道,未嘗不注精於嚴、瞿之徒 若巧妙,以攻難之才,游形之表,未入於神。夫入神者,當步天元,推陰陽,探玄虛,極幽明,然後覽道無窮,未暇 熱,移牀在庭前樹下,乃至雞向晨,然後出。再相見,便轉爲鉅鹿從事。三見,轉治中。 相爲取之,莫使騏驥更爲凡馬,荆山反成凡石。」即檄召輅爲文學從事。 風遐被,莫不草靡,宜使略特蒙陰和之應, 得及羽儀之時,必能翼宣隆化,揚聲九圍也。」 裴使君聞言, 言皆巧妙,巧妙之志,殆破秋毫,君當愼之!自言不解易九事,必當以相問。 比至洛,宜善精其理也。」 月,舉爲秀才。、輅辭裴使君,使君言:「(丁)〔何〕、鄧二尚書,有經國才略,於物理〔無〕不精也。 曰:「何乃爾邪!雖在大州,未見異才可用釋人鬱悶者,思還京師,得共論道耳,況草間自有淸妙之才乎? 天文則能同妙甘公、石申,俯覽周易則能思齊季主,游步道術,開神無窮,可謂士英。 若能動東風,與朝雲,吾志所不讓也。」於是遂至冀州見裴使君。 使君言:「君顏色何以消減於故邪?」孔曜言: 從發干來,就郡黌上與輅相見,言:「卿腹中汪汪,故時死人半,今生人無雙,當去俗騰飛,翱翔昊蒼,云何在此? 而爲淸河郡所錄北黌文學,可爲痛心疾首也。使君方欲流精九皋,垂神幽藪,欲令明主不獨治,逸才不久滯,高 體中無藥石之疾,然見淸河郡內有一騏驥,拘縶後廄歷年,去王良、伯樂百八十里,不得騁天骨,起風塵,以此憔 又眷吾意重,能相明信者。今當故往,爲卿陳感虎開石之誠。」、略言:「吾非四淵之龍,安能使白日畫陰?卿 使君言:「騏驎今何在也?」孔曜言:「平原管輅字公明,年三十六,雅性寬大,與世無忌,可謂士雄。 一相見,淸論終日,不覺罷倦。 抱荆山之璞,懷夜光之寶, 四見,轉爲別駕。 何尚書神明精微, |輅言:「何 天時大 則慷慨 如 仰觀 此 便

魏

細言。 若欲差次老、莊而參交、象,愛微辯而興浮藻,可謂射侯之巧,非能破秋毫之妙也。若九事皆至義者,不足 若陰陽者,精之以久。上輅去之後,歲朝當有時刑大風,風必摧破樹木。若發於乾者,必有天威,不足共

答曰:「夫老生者見不生,常譚者見不譚。」晏曰:「過歲更當相見。」(三輅還邑舍,具以此言 壯;謙則裒多益寡,壯則非禮不履。未有損己而不光大,行非而不傷敗。願君侯上追文王 焉。位峻者顚,輕豪者亡,不可不思害盈之數,盛衰之期。是故山在地中曰謙,雷在天上曰 **룇多福之仁。又鼻者艮,此天中之山,〔〕高而不危,所以長守貴也。今青蠅臭惡,而集之** 休應,非卜筮之所明也。今君侯位重山嶽,勢若雷電,而懷德者鮮, 畏威者衆, 殆非小心翼 故?」輅曰:「夫飛鴞,天下賤鳥,及其在林食椹,則懷我好音,況輅心非草木,敢不盡忠?昔 作一卦,知位當至三公不?」又問:「連夢見青蠅數十頭,來在鼻上,驅之不肯去,有何意 北大風,塵埃蔽天,十餘日,聞晏、颺皆誅,然後舅氏乃服。〔三〕 語舅氏,舅氏責輅言太切至。|輅曰:「與死人語,何所畏邪?」舅大怒,謂輅狂悖。歲朝,西 元、凱之弼重華,宣惠慈和,周公之翼成王,坐而待旦,故能流光六合,萬國咸寧。此乃履道 六爻之旨,下思尼父彖象之義,然後三公可決,青蠅可驅也。」

颺曰:「此老生之常譚。」

輅 十二月二十八日,吏部尙書何晏請之,鄧颺在晏許。晏謂輅曰:「聞君著爻神妙,試爲

- [一] 臣松之案:相書謂鼻之所在爲天中。 鼻有山象,故曰「天中之山」也。
- [三] 輅別傳曰: | 略爲回晏所請,果共論易九事,九事皆明。 見謂善易,而語初不及易中辭義,何故也?」將尋聲答之曰:「夫善易者不論易也。」晏含笑而讚之「可謂要言不 煩也」。因請略爲卦。 輅既稱引鑒戒,晏謝之曰:「知幾其神乎,古人以爲難;交疏而吐其誠,今人以爲難。 詩不云乎,『中心藏之,何日忘之』!」 晏曰:「君論陰陽,此世無雙。」 時鄧颺與晏共坐,颺言:「君 今君

面而盡二難之道,可謂明德惟馨。

 \subseteq 軽別傳曰: 濁。 也。」裴使君曰:「誠如來論。 魂不守宅,血不華色,精爽烟浮,容若槁木,謂之鬼幽。 相近,又知聖賢求精之妙。夫鄧之行步,則筋不東骨,脈不制肉,起立傾倚,若無手足,謂之鬼躁。 焉,益令不了。 華,說易生義則美而多僞;華則道浮,僞則神虛;得上才則淺而流絕, 酸也。」 神在廣博,志不務學,弗能成才。欲以盆盎之水,求一山之形,形不可得,則智由此惑。故說老、莊則巧而多 輅後因得休,裴使君問:「何平叔一代才名,其實何如?」 輅曰:「其才若盆盎之水,所見者淸,所不見者 舅夏大夫問輅:「前見何、鄧之日,爲已有凶氣未也?」輅言:「與禍人共會,然後知神明交錯;與吉人 相見得淸言,然後灼灼耳。」 吾數與平叔共說老、莊及易,常覺其辭妙於理,不能折之。 故鬼躁者爲風所收,鬼幽者爲火所燒,自然之符,不可以 得中才則游精而獨出,輅以爲少功之才 叉時人吸習,皆歸服之 何之視候,則

當太平否? 言,無幾,曹爽等誅,乃覺寤云。〔1〕 言無蹉跌。 始輅過魏郡太守鍾毓,共論易義,輅因言「卜可知君生死之日」。 毓使筮其生日月,如 」輅曰:「方今四九天飛,利見大人,神武升建,王道文明,何憂不平。」驗未解輅 毓大愕然,曰:「君可畏也。死以付天,不以付君。」 遂不復筮。 毓問輅:「天下

魏

書

方技傳第二十九

九

輅別傳云: 能入,死者能顯亦能幽,此物之精氣,化之游魂,人鬼相感,數使之然也。」,苞曰:「目見陰陽之理,不過於君 得數者妙,得神者靈,非徒生者有驗,死亦有徵。是以杜伯乘火氣以流精,彭生託水變以立形。是故生者能出亦 之謂也、請舉其大體以驗之。夫白日登天,運景萬里,無物不照,及其入地,一炭之光,不可得見。三五盈月,清 同也。僕自欲正身以明道,直己以親義,見數不以爲異,知術不以爲奇,夙夜研幾,孳孳溫故,而素隱行怪,未暇 耀燭夜,可以遠望,及其在晝,明不如鏡。今逃日月者必陰陽之數,陰陽之數通於萬類,鳥獸猶化,況於人乎!夫 班不能說其手,離朱不能說其目,非言之難, 孔子曰『書不盡言』,言之細也,『言不盡意』,意之微也, 形 以不隱?」輅曰:「夫陵虛之鳥,愛其淸高,不願江、漢之魚;淵沼之魚,樂其濡溼,不易騰風之鳥:由性異而分不 言:「夫物不精不爲神,數不妙不爲術,故精者神之所合,妙者智之所遇,合之幾微,可以性通,難以言論。 是故傳 鄉里翟文耀能隱形,其事可信乎?」輅言:「此但陰陽蔽匿之數,苟得其數,則四嶽可藏,河海可逃。 化,死生一道,悠悠太極,終而復始。 文王損命,不以為憂,仲尼曳杖,不以爲懼,緒煩蓍筮,宜盡其意。」 義皆殊妙。 「生者好事,死者惡事,哀樂之分,吾所不能齊,且以付天,不以付君也。」石苞爲鄴典農,與輅相見, ,游變化之內,散雲霧以幽身,布金水以滅迹,術足數成,不足爲難。」「包曰:「欲聞其妙,君且善論其數也。」「輅 |蘇即謝輅。 魏郡太守鍾毓,清逸有才,難略易二十餘事,自以爲難之至精也。略尋聲投響,言無留滯,分張爻象 |輅卜知||號生日月,||號愕然白:「聖人運神通化,連屬事物, 何聰明乃爾!」輅言:「幽明同 問曰:「聞君 況以七尺之 斯皆神妙 |毓 |日: 了君何

出則有章,此印囊也。高嶽巖巖,有鳥朱身,羽翼玄黃,鳴不失晨,此山雞毛也。」 邠曰:「此 平原太守劉邠取印囊及山雞毛著器中,使筮。 輅曰:「內方外圓,五色成文,含寶守信,

染丘山,故因昬夕,多有怪形也。 郡官舍,連有變怪,使人恐怖,其理何由?」 明府道德高妙,自天祐之,願安百祿,以光休寵。」〔〕〕 輅曰:「或因漢末之亂,兵馬擾攘,軍屍流血,汙

輅別傳曰: 怪多形,使人怖恐,君似當達此數者,其理何由也?」略言:「此郡所以名平原者,本有原,山無木石,與地自然; 易及老、莊之道,至於精神遐流,與化周旋,清若金水,鬱若山林,非君侶也。」 別又曰:「此郡官舍,連有變怪,變 皆以爲妙,所不解者,皆以爲神。自說:「欲注易八年,用思勤苦,歷載廳寧,定相得至論,此才不及易,不愛久勞, 場繫詞,諸爲之理以爲注,不得其要。 于萬代,不可不先定其神而後垂明思也。自旦至今,聽采聖論,未有易之一分,易安可注也!略不解古之聖人, 擾攘,軍 術者易之近數,欲求其端耳。若如來論,何事於斯?」留略五日,不遑恤官,但共淸譚。 儀之明數,陰陽之幽契,施之於道則定天下吉凶,用之於術則收天下豪纖。 喜承雅言,如此相爲高枕偃息矣。」欲從略學射覆,略言:「今明府以虛神於注湯,亦宜絕思於靈蓍。 清濁者有疑,疑則無神,恐非注易之符也。」略於此爲論八卦之道及爻象之精,大論開廓,衆化相連。例所解者 二位與六卦同列?乾之象彖曰:『大哉乾元,萬物資始,乃統天。』夫統者,屬也,尊莫大焉,何由有別位也?」|邠依 何以處乾位於西北,坤位於西南。夫乾坤者天地之象,然天地至大,爲神明君父,覆載萬物,生長無首,何以安處 含陰不能吐雲,含陽不能激風,陰陽雖弱,猶有微神;微神不眞,多聚凶奸,以類相求,魍魎成羣。 明府欲勞不世之神,經緯大道,誠富美之秋。然略以爲注易之急,急於水火;水火之難,登時之驗,易之淸濁,延 一屍流血 故郡將劉邠字令元,清和有思理,好易而不能精。與略相見,意甚喜歡,自說注易向訖也。 ,汙染丘嶽,彊魂相感,變化無常,故因昏夕之時,多有怪形也。 曰:「夫乾坤者,易之祖宗,變化之根源,今明府論 纖微,未可以爲易也。」 昔夏禹文明,不怪於黃龍,周武信 邠自言:「數與何平叔論 或因漢末兵馬 |邠曰:「以爲 鰋著者,二 |輅言:「今

「易言剛健篤實,輝光日新,斯爲同不也?」略曰:「不同之名,朝且爲輝,日中爲光。」 其理,每有變怪,輒聞鼓角聲音,或見弓劍形象。 夫以土山之精,伯有之魂,實能合會,干犯明靈也。」 |邠問|輅; 時,不惑於暴風,今明府道德高妙,神不懼妖,自天祐之,吉無不利,願安百祿以光休寵也。」 |邠曰:「聽雅論爲近

中興名士也。 ||一概,光祿大夫。||漢淸沖有貴識,名亞樂廣。||宏子咸,徐州刺史。||次,晉陵內史。||耽子恢,字眞長,尹||丹楊,爲 **晉諸公贊曰:'邠本名炎,犯晉太子諱,改爲別。位至太子僕。子粹,字純嘏,侍中。 玄宏,字鮗嘏** ,太常。次漢,字

著大篋中,使輅射。 云:「器中藉藉有十三種物。」 先說雞子,後道蠶蛹, 途一一名之,惟以 不彊,雖有文章,蔚而不明,非虎非雉,其名曰狸。」獵人暮歸,果如輅言。季龍取十三種物,不彊,雖有文章,蔚而不明,非虎非雉,其名曰狸。」獵人暮歸,果如輅言。季龍取十三種物, 梳爲批耳。(二) 清河令徐季龍使人行獵,令輅筮其所得。 輅曰:「當獲小獸,復非食禽,雖有爪牙,徼而

〔1〕熱別傳曰:清河令徐季龍,字開明,有才機。與輅相見,共論龍動則景雲起,虎嘯則谷風至,以爲火星者龍,參星 運風。 為疑?」季龍言:「夫龍之在淵,不過一井之底,虎之悲嘯,不過百步之中,形氣淺弱,所通者近,何能瀏景雲而馳 爲陰,幽靈上通,和氣感神,二物相扶,故能興雲。 夫虎者,陰精而居於陽,依木長嘯,動於巽林,二氣相感,故能爲陰,幽靈上通,和氣感神,二物相扶,故能興雲。 夫虎者,陰精而居於陽,依木長嘯,動於巽林,二氣相感,故能 失則機器,機器則榮辱之主。若以參星爲虎,則谷風更爲寒霜之風,寒霜之風非東風之名。是以龍者陽精,以潛失則機器,機謬則榮辱之主。若以參星爲虎,則谷風更爲寒霜之風,寒霜之風非東風之名。是以龍者陽精,以潛 者虎,火出則雲應,參出則風到,此乃陰陽之感化,非龍虎之所致也。 | 輅言:「夫論難當先審其本,然後求其理,理 若磁石之取鐵,不見其神而金自來,有徵應以相感也。況龍有潛飛之化,虎有文明之變,招雲召風,何足

* 書 方技傳第二十九

者神化之源,未然者則幽冥之先,此皆周易之紀綱,何僕之不謙?」季龍於是取十三種物,欲以窮之,略射之皆 之物而言,於理爲合不?」輅言:「晉平奢泰,崇飾宮室,斬伐林木,殘破金石,民力旣盡,怨及山澤,神痛人感,二 靈,抱日月而游杳冥,極變化而覽未然,沉茲近物,能蔽聰明?」季龍大笑,「君旣不識,又念窮在近矣」。 嘉,留輅經數日。 精並作,金石同氣,則兌爲口舌,口舌之妖,動于靈石。傳曰輕百姓,飾城郭,則金不從革,此之謂也。」季龍欽 鳴則有兵,不專近在於雞雉也。」季龍言:「魯昭公八年,有石言於晉,師曠以爲作事不時,怨靄動於民,則有非言 流行則雉驚,各感數而動。又兵之神道,布在六甲,六甲推移,其占無常。是以晉柩牛呴,果有西軍,鴻嘉石鼓, 其應在物,在物則山林鳥獸也。夫雞者兌之畜,金者兵之精,雉者離之鳥,獸者武之神,故太白揚輝則雞鳴 雞雉先鳴,其道何由?復有他占,惟在雞雉而已?」「輅言:「貴人有事,其應在天,在天則日月星辰也。 兵動民愛, 東風?」輅言:「君不見陰陽燧在掌握之中,形不出手,乃上引太陽之火,下引太陰之水,嘘吸之間,煙景以集。 精氣相感,縣象應乎二燧;苟不相感,則二女同居,志不相得。 自然之道,無有遠近。」 |季龍言:「世有軍事 吾尙未識謙言,焉能論道?夫天地者則乾坤之卦,蓍龜者則卜筮之數,日月者離坎之象,變化者陰陽之爻,杳冥 季龍乃嘆曰:「作者之謂聖,述者之謂明,豈此之謂乎!」 輅占獵旣驗,季龍曰:「君雖神妙,但不多藏物耳,何能皆得之?」、輅言:「吾與天地參神,蓍龜 |輅||言: ,則感

日:「今夕當雨。」是日暘燥,晝無形似,府丞及令在坐,咸謂不然。 族。不過二載,其應至矣。」卒如其言。後得休,過淸河倪太守。 可久;碑誄雖美,無後可守。玄武藏頭,蒼龍無足,白虎銜尸,朱雀悲哭,四危以備,法當滅 輅隨軍西行,過毌丘儉墓下,倚樹哀吟,精神不樂。 人問其故, 輅曰:「林木雖茂,無形 時天旱,倪問輅雨期,輅 到鼓一中,星月皆沒,風

雲並起,竟成快雨。於是倪盛脩主人禮,共爲歡樂。〔1〕

[1] 輅別傳曰: | 輅與倪淸河相見, 旣刻雨期, 倪猶未信。 之。」於是便留輅,往請府丞及淸河令。若夜雨者當爲啖二百斤犢肉,若不雨當住十日。 輅曰:「言念費損!」至 箕,使召雷公、電母、風伯、雨師,羣嶽吐陰,衆川激精,雲漢垂澤,蛟龍含靈,爗爗朱電,吐咀杳冥,殷殷雷聲,噓吸 子,直滿,畢星中已有水氣,水氣之發,動於卯辰,此必至之應也。又天昨檄召五星,宣布星符,刺下東井,告命南 至矣。」須臾,果有艮風鳴鳥。日未入,東南有山雲樓起。黃昏之後,雷聲動天。到鼓一中,星月皆沒,風雲並興 雨靈,習習谷風,六合皆同,欬唾之間,品物流形。天有常期,道有自然,不足爲難也。」倪曰:「譚高信寡,相爲憂 玄氣四合,大雨河傾。倪調略言:「誤中耳,不爲神也。」 | 略曰:「誤中與天期,不亦工乎!」 日向暮,了無雲氣,衆人並嗤輅。 輅言:「樹上已有少女微風,樹間又有陰鳥和鳴。 又少男風起,衆鳥和翔,其應 略曰:「夫造化之所以爲神,不疾而速,不行而至。十六日壬

額上無生骨,眼中無守精,鼻無梁柱,腳無天根,背無三甲,腹無三壬,此皆不壽之驗。 叉吾 錯也。」是歲八月,爲少府丞。 明年二月卒,年四十八。(1) 本命在寅,加月食夜生。天有常數,不可得諱,但人不知耳。吾前後相當死者過百人,略無 令,可使路不拾遺,枹鼓不鳴。 但恐至太山治鬼,不得治生人,如何!」 辰問其故,輅曰:「吾 耳,然天與我才明,不與我年壽,恐四十七八間,不見女嫁兒娶婦也。若得免此,欲作洛陽 正元二年,弟辰謂輅曰:「大將軍待君意厚,冀當富貴乎?」輅長歎曰:「吾自知有分直

[1] 輅別傳曰:旣有明才,遭朱陽之運,于時名勢赫奕,若火猛風疾。當塗之士,莫不枝附葉連。賓客如雲,無多少皆

利

至於仰察星辰,俯定吉凶,遠期不失年歲,近期不失日月,辰以甘、石之妙不先也。 朴,卷舒有時,妙不見求,愚不見遺,可謂知幾相邈也。 當亡,可謂明哲相殊。又京房目見遘讒之黨,耳聽靑蠅之聲,面諫不從,而猶道路紛紜。輅處魏、晉之際,藏智以 端,欲受學求道,尋以迷昏,無不扼腕椎指,追響長歎也。昔京房雖善卜及風律之占,卒不免禍,而輅自知四十八 川兄弟,以輅稟受天才,明陰陽之道,吉凶之情,一得其源,遂涉其流,亦不爲難,常歸服之。輅自言與此五君共 **論,足爲三公,無用知之也。」於是遂止。子弟無能傳其術者。|艮敍曰:「夫晉、魏之士,見略道術神妙,占候無** 也。 不過也。 流五曜,經緯三度,口滿聲溢,微言風集,若仰眺飛鴻,漂漂兮景沒,若俯臨深溪,杳杳兮精絕;偪以攻難,而失其 之親,數與輅有所諮論。 子章、楚甘公、魏石申共登靈臺,披神圖,步三光,明災異,運蓍龜,決狐疑,無所復恨也。 語使人精神清發,昏不暇寐。自此以下,殆白日欲寢矣。又自言當世無所願,欲得與魯梓愼、鄭碑竈、晉卜偃、宋 十家,其晝有數千卷,書不少也。然而世鮮名人,皆由無才,不由無書也。 少府官舍,無家人子弟隨之,其亡沒之際,好奇不哀喪者,盜略書,惟餘易林、風角及爲鳴書還耳。 錯,以爲有隱書及象甲之數。 爲設食。 國利身,困不能用,卒陷大刑,可謂枯龜之餘智,膏燭之末景,豈不哀哉!世人多以輅疇之京房,辰不敢許也。 弟辰嘗欲從略學卜及仰觀事,略言:「卿不可敎耳。夫卜非至精不能見其數,非至妙不能覩其道,孝經、詩 賓無貴賤,候之以禮。 京城紛紛,非徒歸其名勢而已,然亦懷其德焉。 觀骨形而審貴賤,覽形色而知生死,許負、唐舉不超也。 至於辨人物,析臧否,說近義,彈曲直,拙而不工也。 辰每觀略書傳,惟有易林、風角及爲鳴、仰觀星書三十餘卷,世所共有。 京房上不量萬乘之主,下不避佞諂之徒,欲以天文、洪範 若夫疏風氣而探微候,聽鳥鳴而識神機,亦一 裴冀州、何、鄧二尚書及鄉里劉太常、潁 若敷皇、羲之典,揚文、孔之辭,周 向不夭命,輅之榮華,非世所測 射覆名物,見術流速,東方朔 辰不以闇淺, 夫術數有百數 得因孔懷 然輅 獨在

邪 已,分別龍蛇,各使有理。言絕之後,孟荆州長歎息曰:『吾聞君論,精神騰躍, 可採,不及春英,臨文慷慨,伏用哀慚。將來君子,幸以高明求其義焉。往孟荆州爲列人典農,嘗問亡兄,昔東 親賢遐潛,不宣於良史,而爲鄙弟所見追述,既自闇濁,又從來久遠,所載卜占事,雖不識本卦,捃拾殘餘,十得二 必信而貴之,無道者必疑而怪之;信者以妙過眞,夫妙與神合者,得神則無所惑也。 方朔射覆得何卦,正知守宮、蜥蜴二物者。亡兄於此爲安卦生象,辭喻交錯, 至於仰觀鹽曜,說魏、晉興衰,及五運浮沉,兵革災異,十不收一。 向使輅官達,爲宰相大臣,膏腴流於明世,華曜列乎竹帛,使幽驗皆舉,祕言不遺,千載之後,有道者 無源何以成河?無根何以垂榮?雖秋菊 微義豪起, **殆欲飛散,何其汪汪乃至於斯** 恨輅才長命短,道貴時賤 變化相推, 會於辰

出。 能言之。 臣松之案:辰所稱鄉里劉太常者,謂劉寔也。辰撰略傳,寔時爲太常,潁川則寔弟智也。寔、智並以儒學爲名,無 舍,嘗候遠鄰,主人患數失火。上略卜,教使明日於南陌上伺,當有一角巾諸生,駕黑牛故車,必引留,爲設賓主,此 教使明旦於東陽城門中伺擔豚人牽與共鬭。 中,果得牛。 嘗受辰傳所謂劉太常者曰:「輅始見聞,由於爲鄰婦卜亡牛,云當在西面窮牆中,縣頭上向。 教婦人令視諸丘冢 年,應三十九,而傳云三十六,以正元三年卒,應四十七,傳云四十八,皆爲不相應也。近有閻續伯者,名纘,該微 通物,有良史風。爲天下補綴遺脫,敢以所聞列于篇左。皆從受之於大人先哲,足以取信者,冀兎虛誣之譏云爾。 劉侯云甚多此類,辰所載纔十一二耳。 世語稱寔博辯,猶不足以並襲、何之流也。 婦人因以爲藏已牛,告官案驗,乃知以術知,故裴冀州遂聞焉。」又云:「路中小人失妻者,略爲卜, 劉侯云:「辰,孝廉才也。」中書令史紀玄龍,輅鄉里人,云:「輅在田 具如其言,豚逸走,即共追之。 豚入人舍,突破主人甕,婦從甕中 又案輅自說,云「本命在寅」,則建安十五年生也。 至正始九

魏 書 方技傳第二十九

名,以補太醫。」 叉云:「隨輅父在利漕時,有治下屯民捕鹿者,其晨行還,見毛血,人取鹿處來詣廢告輅,輅爲卦 |輅使明晨於寺門外看,當逢一人,使指天畫地,舉手四向,自當得之。 暮果獲於故處矣。」 藏還著故處,病當自愈。 辰仕宦至州主簿、部從事,太康之初物故。」 駿叉云:「輅卜亦不悉中,十得七八,駿問其故,輅云:『理無差錯,來 里,遂加恩意,常與同載周旋,具知其事。云諸要驗,三倍於傳。辰旣短才,又年縣小,又多在田舍,故益不詳。 不復有災。」前長廣太守陳承祐口受城門校尉華長駿語云:「昔其父爲淸河太守時,召略作吏,駿與少小,後以鄉 閒,側立假寐。 能消之。即從輅戒。 不過明日食時,自送還汝。』其夜,盗者父病頭痛,壯熱煩疼,然亦來詣略卜。 語云:『此有盜者,是汝東巷中第三家也。 卒,來詣盧公,占能治女郎。 公卽表請留之,專使其子將詣華氏療疾,初用散藥,後復用丸治,尋有效,卽奏除驟 南纏里中,三廢在其東南。 卜者或言不足以宣事實,故使爾。』華城門夫人者,

魏故司空涿郡盧公女也,得疾,連年不差。華家時居西城下 数有一小物直來過前,如獸,手中持火,以口吹之。生驚,舉刀斫,正斷要,視之則狐。 諸生有急求去,不聽,遂留當宿,意大不安,以爲圖己。主人罷入,生乃把刀出門,倚兩薪積 乃密教鹿主往取。又語使復往如前,舉椽棄瓦。 略卜當有師從東方來,自言能治,便聽使之,必得其力。後無何,有南征廢騶,當充甲 汝徑往門前,伺無人時,取一瓦子,密發其碓屋東頭第七椽,以瓦著下, 盗父病差。 又都尉治內史有失物者, 幣爲發崇,盗者具服。 輅令擔皮肉 自此主人

評曰:華佗之醫診,杜夔之聲樂,朱建平之相術,周宣之相夢,管輅之術筮,誠皆玄妙之

殊巧,非常之絕技矣。昔史遷著扁鵲、倉公、日者之傳,所以廣異聞而表奇事也。故存錄云 三國志卷二十九

八三〇

烏丸鮮卑東夷傳第三十

伐,窮追單于,奪其饒衍之地。後遂保塞稱藩,世以衰弱。建安中,呼廚泉南單于入朝,遂 兼河北,乃撫有三郡烏丸,籠其名王而收其精騎。其後尚、熙叉逃于蹋頓。蹋頓叉驍武,邊 中國多事,不遑外討,故得擅(漢)〔漢〕南之地,寇暴城邑,殺略人民,北邊仍受其困。 會袁紹 留內侍,使右賢王撫其國,而匈奴折節,過於漢舊。然烏丸、鮮卑稍更彊盛,亦因漢末之亂 御羣狄,盡收匈奴故地,自雲中、五原以東抵遼水,皆爲鮮卑庭。 數犯塞寇邊,幽、幷苦之。 夷狄懾服,威振朔土。遂引烏丸之衆服從征討,而邊民得用安息。後鮮卑大人軻比能復制 長老皆比之冒頓,恃其阻遠,敢受亡命,以雄百蠻。太祖潛師北伐,出其不意,一戰而定之, 能爲中國輕重。而匈奴最逼於諸夏,胡騎南侵則三邊受敵,是以屢遣衞、霍之將,深入北 雖外事四夷,東平兩越、朝鮮,西討貳師、大宛,開邛苲、夜郎之道,然皆在荒服之外,不 **澐載「蠻夷猾夏」,詩稱「玁狁孔熾」,久矣其爲中國患也。 秦、漢以來,匈奴久爲邊害。**

魏

烏丸鮮卑東夷傳第三十

矣。烏丸、鮮卑卽古所謂東胡也。其習俗、前事,撰漢記者已錄而載之矣。故但舉漢末魏 相侵伐,彊者遠遁,弱者請服。 田豫有馬城之圍,畢軌有陘北之敗。青龍中,帝乃聽王雄,遣劍客刺之。然後種落離散,互 \equiv 國 志 卷三十 · 由是邊陲差安,(漢)〔漠〕南少事,雖時頗鈔盜,不能復相扇動

初以來,以備四夷之變云。 [1]

魏書曰: 烏丸者,東胡也。 實如葵子,至十月熟。能作白酒,而不知作麴蘗。米常仰中國。大人能作弓矢鞍勒,鍛金鐵爲兵器,能刺韋作文 之次妻伯叔焉,死則歸其故夫。俗識鳥獸孕乳,時以四節,耕種常用布穀鳴爲候。地宜青穄、東牆,東牆似蓬草, 牛羊以爲聘娶之禮。壻隨妻歸,見妻家無尊卑,旦起皆拜,而不自拜其父母。爲妻家僕役二年,妻家乃厚遣送 繼也。數百千落自爲一部,大人有所召呼,刻木爲信,邑落傳行,無文字,而部衆莫敢違犯。氏姓無常,以大人健 至嫁時乃養髮,分爲髻,著句決,飾以金碧,猶中國有冠步搖也。父兄死,妻後母執嫂;若無執嫂者,則已子以親 女,居處財物,一出妻家。故其俗從婦人計,至戰鬭時,乃自決之。父子男女,相對蹲踞,悉髠頭以爲輕便。婦人 者名字爲姓。大人已下,各自畜牧治産,不相徭役。其嫁娶皆先私通,略將女去,或半歲百日,然後遣媒 母,以母有族類,父兄以己爲種,無復報者故也。常推募勇健能理決鬭訟相侵犯者爲大人,邑落各有小帥,不世 處,以穹廬爲宅,皆東向。 貴兵死,斂屍有棺,始死則哭,葬則歌舞相送。 肥養犬,以采繩嬰牽,并取亡者所乘馬、衣物、生時服飾,皆燒 有病,知以艾灸,或燒石自熨,燒地臥上,或隨痛病處,以刀決脈出血,及祝天地山川之神,無鍼 日弋獵禽獸,食肉飮酪,以毛毳爲衣。貴少賤老,其性悍驚,怒則殺父兄,而終不害其 漢初,匈奴冒頓滅其國,餘類保鳥丸山,因以爲號焉。俗善騎射,隨水草放牧,居無常 人送馬

魏

後丘力居死,子樓班年小,從子蹋頓有武略,代立,總攝三王部,衆皆從其敎令。 師,寇略青、徐、幽、冀四州,殺略吏民。靈帝末,以劉虞爲幽州牧,募胡斬純首,北州乃定。 汗魯王,皆有計策勇健。 綬,皆以爲單于。 [1] 孫瓚連戰不決,蹋頓遣使詣紹求和親,助紹擊費,破之。紹矯制賜蹋頓、(難)峭王、汗魯王印 遼東屬國烏丸大人蘇僕延,衆千餘落,自稱峭王,右北平烏丸大人烏延,衆八百餘落,自稱 漢末,遼西烏丸大人丘力居,衆五千餘落,上谷烏丸大人難樓,衆九千餘落,各稱王,而 中山太守張純叛入丘力居衆中,自號彌天安定王,爲三郡烏丸元 袁紹與公

(一)英雄記曰:紹遣使卽拜鳥丸三王爲單于,皆安車、華蓋、羽旄、黄屋、左纛。 版文曰:「使持節大將軍督幽、靑、抖領 長為百蠻長。厥有咎有不臧者,泯於爾祿,而喪於乃庸,可不勉乎!烏桓單于都護部衆,左右單于受其節度,他 冀州牧阮鄉侯紹,承制詔遼東屬國率衆王頒下、烏丸遼西率衆王蹋頓、右北平率衆王汗盧維: 控弦與漢兵爲表裏,誠甚忠孝,朝所嘉焉。 外夷,最又聰惠者也。 多故,公孫瓚作難,殘夷厥土之君,以侮天慢主,是以四海之內,並執干戈以衞社稷。 塞內附,北捍玁狁,東拒濊貊,世守北陲,爲百姓保障,雖時侵犯王略,命將徂征厥罪,率不旋時,悔愆變改,方之 今遣行謁者楊林,齎單于璽綬車服,以對爾勞。 始有千夫長、百夫長以相統領,用能悉乃心,克有勳力於國家,稍受王侯之命。自我王室 然而虎兕長蛇, 其各綏靜部落,敎以謹慎,無使作凶作慝。 相隨塞路, 王官爵命, 否而無聞。 三王奮氣裔土,忿姦憂國 夫有勳不賞, 乃祖 世復爾 慕義遷善,款 祀 俾勤

邊。 侯王大人種衆與征伐。由是三郡烏丸爲天下名騎(二) 斬,傳送其首。其餘遺迸皆降。 觀其小動,乃擊破其衆,臨陳斬蹋頓首,死者被野。速附丸、樓班、烏延等走遼東,遼東悉 餘里,虜乃覺。 爲校尉,猶持漢使節,治廣甯如舊。 **沒鳥丸、鮮卑中,爲其種所歸信。** 後袁尚敗奔蹋頓,憑其勢,復圖冀州。 後樓班大,峭王率其部衆奉樓班爲單于,蹋頓爲王。 尚與蹋頓將衆逆戰於凡城,兵馬甚盛。太祖登高望虜陳,(柳)[押]軍未進, 及幽州、幷州柔所統烏丸萬餘落,悉徙其族居中國,帥從其 柔乃因鮮卑衆,殺鳥丸校尉邢舉代之,紹因寵慰以安北 建安十一年,太祖自征蹋頓於柳城,潛軍詭道,未至百 會太祖平河北,柔帥鮮卑、烏丸歸附,遂因以柔 然蹋頓多畫計策。 廣陽閻柔,少

(一)魏略曰:景初元年秋,遣幽州刺史毌丘儉率衆軍討遼東。右北平烏丸單于寇婁敦、遼西烏丸都督率衆王護留

爲王,賜輿馬繒采各有差。

州 ,步度根與軻比能等因烏丸校尉閻柔上貢獻。後代郡烏丸能臣氐等叛,求屬扶羅韓,扶 鮮卑行步度根旣立,衆稍衰弱,中兄扶羅韓亦別擁衆數萬爲大人。建安中,太祖定幽

比能。 衆悉保比能,寇鈔幷州,殺略吏民。 息征伐,羈縻兩部而已。至青龍元年,比能誘步度根深結和親,於是步度根將泄歸泥及部 獻,厚加賞賜,是後一心守邊,不爲寇害,而軻比能衆遂彊盛。 **豈與仇等**?」由是歸泥將其部落逃歸步度根,此能追之弗及。 所殺,不念報仇,反屬怨家。今雖厚待汝,是欲殺汝計也。 根部衆稍寡弱,將其衆萬餘落保太原、鴈門郡。 尉。持節幷護鮮卑, 能。 歸義王,賜幢麾、曲蓋、鼓吹,居幷州如故。 韓將萬餘騎迎之。 此能 比能 刨 自以殺歸泥父, 將萬餘騎到,當共盟誓。 屯昌平。 到桑乾,氏等議,以爲扶羅韓部威禁寬緩,恐不見濟,更遣人呼軻比 特又善遇之。 步度根遣使獻馬,帝拜爲王。 帝遣驍騎將軍秦朗征之,歸泥叛比能,將其部衆降, 比能便於會上殺扶羅韓,扶羅韓子泄歸泥及部衆悉屬 步度根由是怨比能。 步度根爲比能所殺。 步度根乃使人招呼泄歸泥曰:「汝父爲比能 不如還我,我與汝是骨肉至親 後數與軻比能更相攻擊, 明帝即位,務欲綏和戎狄,以 至黃初五年,步度根詣闕貢 文帝踐作, 田 豫爲烏丸校

·魏 ·鲁 有貂、豽、齳子,皮毛柔蠕,故天下以爲名裘。 m 大會,作樂水上,嫁女娶婦,髠頭飮宴。其獸異於中國者,野馬、羱羊、端牛。 曰:鮮卑亦東胡之餘也,別保鮮卑山,因號焉。 自與烏丸相接。 至光武時,南北單于更相攻伐,匈奴損耗,而鮮卑遂盛。 鮮卑自爲冒頓所破,遠竄遼東塞外,不與餘國爭衡,未有名通於漢, 其言語習俗與烏丸同。 其地東接遼水,西當西城。 端牛角爲弓,世謂之角端者也。 建武三十年,鮮卑大人於仇賁率 常以季春 叉

種人詣闕朝寅,封於仇賁爲王。永平中,祭肜爲遼東太守,誘賂鮮卑,使斬叛烏丸欽志賁等首,於是鮮卑自燉煌、

惒

死,弟步度根代立。自檀石槐死後,諸大人遂世相襲也。 于出鴈門塞,三道並進,徑二千餘里征之。檀石槐帥部衆逆擊,旻等敗走,兵馬還者什一而已。 |北平以西至上谷爲中部,十餘邑,其大人曰|柯最、|闕居、|慕容等,爲大帥。從上谷以西至燉煌,西接鳥孫爲西部, 射者射中和連,和連即死。 五死,子和連代立。和連材力不及父,而貪淫,斷法不平,衆叛者半。靈帝末年數爲寇鈔,攻北地,北地庶人善弩 石槐東擊汗國,得千餘家,徙置烏侯秦水上,使捕魚以助糧。至于今,烏侯秦水上有汗人數百戶。檀石槐年四十 畜射獵,不足給食。 緣邊諸郡, 二十餘邑,其大人曰置鞬落羅、日律推演、宴荔游等,皆爲大帥,而制屬檀石槐。 至靈帝時, 大鈔略幽、抖二州。 從右北平以東至遼、(遼) 〔東〕接夫餘、〔歲〕貊爲東部、二十餘邑、其大人曰彌加、闕機、素利、槐頭。 無歲不被其毒。(嘉)[熹]平六年,遣護鳥丸校尉夏育,破鮮卑中郎將田晏,匈奴中郎將臧旻與南單 後檀石槐乃案行鳥侯秦水,廣袤數百里,渟不流,中有魚而不能得。聞汗人善捕魚,於是檀 其子騫曼小,兄子魁頭代立。 魁頭既立後,騫曼長大,與魁頭爭國,衆遂離散。 鮮卑衆日多,田

獵,建立旌麾,以鼓節爲進退。建安中,因閻柔上貢獻。 據河北,中國人多亡叛歸之,敎作兵器鎧楯,頗學文字。 將三千餘騎隨柔擊破銀。後代郡烏丸反,比能復助爲寇害,太祖以鄢陵侯彰爲驍騎將軍, 北征,大破之。比能走出塞,後復通貢獻。延康初,比能遣使獻馬,文帝亦立比能爲附義 黃初二年,比能出諸魏人在鮮卑者五百餘家,還居代郡。明年,比能帥部落大人小子 軻比能本小種鮮卑,以勇健,斷法平端,不貪財物,衆推以爲大人。 太祖西征關中,田銀反河間,比能 故其勒御部衆,擬則中國,出入弋 部落近塞,自袁紹

及檀 我以 校尉 將軍當保明我於天子。」 每鈔略得財物,均平分付,一決目前,終無所私,故得衆死力,餘部大人皆敬憚之,然猶未能 帥 大人素利 輕騎 鈔盜 輔書曰:「夷狄不識文字,故校尉閻柔保我於天子。 鳥丸修武盧等三千餘騎,驅牛馬七萬餘口交市,遣魏人千餘家居上谷。 助素利。 槐 徑進掎其後。 也 及步度根 我夷狄雖不知禮義,兄弟子孫受天子印綬,牛馬尙知美水草,況我有人心邪 我臨陳使瑣奴往,聞使君來,即便引軍退。 三部爭鬭,更相攻擊。 比能使別小帥瑣奴拒豫,豫進討,破走之,由是懷貳。 輔得書以聞,帝復使豫招納安慰。 田豫 和合,使不得相侵。 我與素利爲讐,往年攻擊之, 步度根數數鈔盜,又殺我弟,而 比能衆遂彊盛,控弦十餘萬騎 五年,比能復擊素利, 乃與輔國將 後與東部鮮 而 卑 軍 田

之弟 泄歸 其累重於陘北。 能 煩,臨陳害尚、弼。 數款 泥 也 太和二年,豫遣譯夏舍詣比能女壻鬱築鞬部,舍爲鞬所殺。 一、素爲 塞,詣州 出塞討 鮮卑所信。 鬱築難, 奉貢獻。 幷州 至三年中,雄遣勇士韓龍刺殺比能,更立其弟。 刺 大破之。 史畢軌遣將軍 至青龍 志往解喻, 元年, 還至馬城, 即解圍 一蘇尙 此能 誘納步度根,使叛幷州 去。 比能自將三萬騎圍豫七日 董弼等擊之, 後幽州 刺史王雄幷領校尉, 比能遣子將騎與尚等會戰於樓 其秋,豫將西部鮮卑蒲 與結 和 上谷太守閣志,柔 親, 撫以恩信。 自勒萬; 騎 頭 迎

於比能。 漢王。延康初,又各遣使獻馬。文帝立素利、彌加爲歸義王。 一年,素利死。子小,以弟成律歸爲王,代攝其衆。 素利、彌加、厥機皆爲大人,在遼西、右北平、漁陽塞外,道遠初不爲邊患,然其種衆多 建安中,因閻柔上貢獻,通市,太祖皆表寵以爲王。厥機死,又立其子沙末汗爲親 素利與比能更相攻擊。太和

孫、疎勒、月氏、鄯善、車師之屬,無歲不奉朝貢,略如漢氏故事。一而公孫淵仍父祖三世有遼 後西域之事具存,故史官得詳載焉。魏興,西域雖不能盡至,其大國龜茲、于寘、康居、鳥 所出,遂周觀諸國,宋其法俗,小大區別,各有名號,可得詳紀。雖夷狄之邦,而俎豆之象 討,窮追極遠,踰烏丸、骨都,過沃沮,踐肅愼之庭,東臨大海。長老說有異面之人,近日之 東,天子爲其絕域,委以海外之事,遂隔斷東夷,不得通於諸夏。景初中,大興師旅,誅淵 世而至,其遐遠也如此。及漢氏遣張騫使西域,窮河源,經歷諸國,遂置都護以總領之,然 跡車軌所及,未有知其國俗殊方者也。自處暨周,西戎有白環之獻,東夷有肅愼之貢,皆曠 又潛軍浮海,收樂浪、帶方之郡,而後海表謐然,東夷屈服。其後高句麗背叛,又遣偏師致 書稱「東漸于海,西被于流沙」。其九服之制,可得而言也。然荒域之外,重譯而至,非足

中國失禮,求之四夷,猶信。故撰次其國,列其同異,以接前史之所未備焉。

同俗。 殺之。 俱擔糧飲食之。 有鎧仗。 加、豬加、狗加、大使、大使者、使者。 邑落有豪民,名下戶皆爲奴僕。 諸加別主四出,道大 五穀,不生五果。其人麤大,性彊勇謹厚,不寇鈔。國有君王,皆以六畜名官,有馬加、牛 千里。戶八萬,其民土著,有宮室、倉庫、牢獄。多山陵、廣澤,於東夷之域最平敞。 手據地竊語。 履革鞜。 中大會,連日飮食歌舞,名曰迎鼓,於是時斷刑獄,解囚徒。 者主數千家,小者數百家。食飮皆用俎豆,會同、拜爵、洗爵,揖讓升降。以殷正月祭天,國 大餘在長城之北,去玄蔻千里,南與高句麗,東與挹婁,西與鮮卑接,北有弱水,方可二 尤慴妒,已殺,尸之國南山上,至廣爛。女家欲得,輸牛馬乃與之。兄死妻嫂,與匈奴 其國善養牲,出名馬、赤玉、貂狖、美珠。珠大者如酸棗。以弓矢刀矛爲兵,家家自 有軍事亦祭天,殺牛觀蹄以占吉凶,蹄解者爲凶,合者爲吉。 出國則尙繒繡錦罽,大人加狐狸、於白、黑貂之裘,以金銀飾帽。 國之耆老自說古之亡人。作城栅皆員,有似牢獄。行道晝夜無老幼皆歌,通 用刑嚴急,殺人者死,沒其家人爲奴婢。竊盜一責十二。男女淫,婦人妒,皆 其死,夏月皆用冰。殺人徇葬,多者百數。 厚葬,有槨無棺。(二 在國衣尚白,白布大秧,袍、袴, 有敵, 諸加自戰, 下戶 譯人傳辭,皆跪, 土地宜 日聲

魏

書

(1)魏略曰:其俗停喪五月,以久爲榮。其祭亡者,有生有熟。喪主不欲速而他人雘之,常諍引以此爲節。 男女皆純白,婦人着布面衣,去環珮,大體與中國相彷彿也。 其居喪,

夫餘庫有玉璧、珪、瓊數代之物,傳世以爲寶,耆老言先代之所賜也。

「ご其印文言「歲王之 季父牛加有二心,位居殺季父父子,籍沒財物,遣使簿斂送官。舊夫餘俗,水旱不調,五穀 印」,國有故城名濊城,蓋本濊貊之地,而夫餘王其中,自謂「亡人」,抑有(似)〔以〕也。 (三) 王葬用玉匣,常豫以付玄菀郡,王死則迎取以葬。公孫淵伏誅,玄荛庫猶有玉匣一具。今 居死,諸加共立麻余。牛加兄子名位居,爲大使,輕財善施,國人附之,歲歲遣使詣京都貢 鮮卑彊,度以夫餘在二虜之間,妻以宗女。尉仇台死,簡位居立。無適子,有孽子麻余。 不熟,輒歸咎於王,或言當易,或言當殺。麻余死,其子依慮年六歲,立以爲王。漢時,夫餘 正始中,幽州刺史毌丘儉討句麗,遣玄蔻太守王頎詣夫餘,位居遣大加郊迎,供軍糧。 **夫餘本屬玄菟。漢末,公孫度雄張海東,威服外夷,夫餘王尉仇台更屬遼東。 時句麗** 位

〔1〕魏略曰:其國殷富,自先世以來,未嘗破壞。

〔二〕魏略曰: 舊志又言,昔北方有高離之國者,其王者侍婢有身,王欲殺之,婢云:「有氣如雞子來下,我故有身。」 後 常令牧馬。東明善射,王恐奪其國也,欲殺之。東明走,南至施掩水,以弓擊水,魚鼈浮爲橋,東明得度,魚鼈乃 生子,王捐之於溷中,豬以喙噓之,徙至馬閑,馬以氣嘘之,不死。王疑以爲天子也,乃令其母收畜之,名曰東明

鹽供給之。其民喜歌舞,國中邑落,暮夜男女羣聚,相就歌戲。無大倉庫,家家自有小倉, 起,不得與王家使者、阜衣先人同列。其國中大家不佃作,坐食者萬餘口,下戶遠擔米糧魚 也。其置官,有對盧則不置沛者,有沛者則不置對盧。王之宗族,其大加皆稱古雛加。 于東界築小城,置朝服衣幘其中,歲時來取之,今胡猶名此城爲幘溝漊。溝漊者,句麗名城 之。漢時賜鼓吹技人,常從玄荔郡受朝服衣幘,高句麗令主其名籍。後稍驕恣,不復詣郡, 性凶急,喜寇鈔。 足以實口腹。其俗節食,好治宮室,於所居之左右立大屋,祭鬼神,叉祀靈星、社稷。其人 奴部本國主,今雖不爲王,適統大人,得稱古雛加,亦得立宗廟,祠靈星、社稷。 可二千里,戶三萬。多大山深谷,無原澤。隨山谷以爲居,食澗水。 王婚,加古雛之號。 諸大加亦自置使者、阜衣先人,名皆達於王,如卿大夫之家臣,會同坐 有五族,有涓奴部、絕奴部、順奴部、灌奴部、桂婁部。本涓奴部爲王,稍微弱,今桂婁部代 人,尊卑各有等級。東夷舊語以爲大餘別種,言語諸事,多與大餘同,其性氣衣服有異。 高句麗在遼東之東千里,南與朝鮮、濊貊,東與沃沮,北與夫餘接。都於丸都之下,方 其國有王,其官有相加、對盧、沛者、古雛加、主簿、優台丞、使者、阜衣先 無良田,雖力佃作,不 絕奴部世典

魏

中大會,名曰東盟。 水,南流入海,句麗別種依小水作國,因名之爲小水貊,出好弓,所謂貊弓是也。 送終之衣。厚葬,金銀財幣,盡於送死,積石爲封,列種松柏。其馬皆小,便登山。**國人有** 隧于神坐。 名之爲桴京。其人絜清自喜,善藏釀。跪拜申一腳,與大餘異,行步皆走。以十月祭天,國 氣力,習戰鬭,沃沮、東濊皆屬焉。又有小水貊。句麗作國,依大水而居,西安平縣北有小 乃聽使就小屋中宿,傍頓錢帛,至生子已長大,乃將婦歸家。 其俗淫。 男女已嫁娶,便稍作 家作小屋於大屋後,名壻屋,壻暮至女家戶外,自名跪拜,乞得就女宿,如是者再三,女父母 加著折風,形如弁。 無牢獄,有罪諸加評議,便殺之,沒入妻子爲奴婢。 其俗作婚姻,言語已定,女 其公會,衣服皆錦繡金銀以自飾。大加主簿頭著幘,如幘而無餘,其小 其國東有大穴,名隧穴,十月國中大會,迎隧神還于國東上祭之,置木

被之大罪,恐其遂反。」捧不聽,詔尤擊之。尤誘期句麗侯騎至而斬之,傳送其首詣長安。 之,爲所殺。州郡縣歸咎于句麗侯駒,嚴尤奏言:「貊人犯法,罪不起于駒,且宜安慰,今猥 王莽初發高句麗兵以伐胡,不欲行,彊迫遣之,皆亡出塞爲寇盜。遼西大尹田譚追擊

至殤、安之間,句麗王宮敷寇遼東,更屬玄荔。遼東太守蔡風、玄荛太守姚光以宮爲二

時,數寇遼東,又受亡胡五百餘家。建安中,公孫康出軍擊之,破其國,焚燒邑落。 富山賊,破之。 後宮復犯遼東,蔡風輕將吏士追討之,軍敗沒。 年,太尉司馬宣王率衆討公孫淵,宮遣主簿大加將數千人助軍。正始三年,宮寇西安平,其 復擊玄菀,玄蔻與遼東合擊,大破之。 模更作新國,今日所在是也。拔奇遂往遼東,有子留句麗國,今古雛加駮位居是也。 爲兄而不得立,與涓奴加各將下戶三萬餘口詣康降,還住沸流水。 略得樂浪太守妻子。 郡害,興師伐之。宮詐降請和,二郡不進。宮密遣軍攻玄菟,焚燒候城,入邃隧,殺吏民。 目視人,句麗呼相似爲位,似其祖,故名之爲位宮。位宮有力勇,便鞍馬,善獵射。 名宮,生能開目視,其國人惡之,及長大,果凶虐,數寇鈔,國見殘破。今王生墮地, (嘉) [熹] 平中, 伯固死,有二子,長子拔奇,小子伊夷模。拔奇不肖,國人便共立伊夷模爲王。 宮死,子伯固立。 伊夷模無子,淫灌奴部,生子名位宮。伊夷模死,立以爲王,今句麗王宮是也。 伯固乞屬玄菀。 靈帝建寧二年,玄菟太守耿臨討之,斬首虜數百級:伯固降,屬邃東。 順、桓之間,復犯遼東,寇新安、居鄉,又攻西安平,于道上殺帶方令, 公孫度之雄海東也,伯固遣大加優居、主簿然人等助度擊 降胡亦叛伊夷模, 亦能開 拔奇怨 景初二 其曾祖 自伯固

五年,爲幽州刺史毌丘儉所破。語在儉傳。

縣,時沃沮亦皆爲縣。漢(光)〔建〕武六年,省邊郡,都尉由此罷。 小異。 婁、夫餘,南與濊貊接。戶五千,無大君王,世世邑落,各有長帥。 曹,皆濊民作之。沃沮諸邑落渠帥,皆自稱三老,則故縣國之制也。 縣侯,不耐、華麗、沃沮諸縣皆爲侯國。夷狄更相攻伐,唯不耐濊侯至今猶置功曹、主簿諸 中食物,千里擔負致之,又送其美女以爲婢妾,遇之如奴僕。 沃沮還屬樂浪。漢以土地廣遠,在單單大領之東,分置東部都尉,治不耐城,別主領東七 **遂臣屬句麗**。 分其地爲四郡,以沃沮城爲玄菀郡。後爲夷貊所侵,徙郡句麗西北,今所謂玄菀故府是也。 東沃沮在高句麗蓋馬大山之東,濱大海而居。 漢初,燕亡人衞滿王朝鮮,時沃沮皆屬焉。漢武帝元封二年,伐朝鮮,殺滿孫右渠, 句麗復置其中大人爲使者,使相主領,又使大加統責其租稅,貊布、魚、鹽、海 其地形東北狹,西南長,可千里,北與挹 其言語與句麗大同,時時 其後皆以其縣中渠帥爲 國小,迫于大國之間

居處,衣服禮節,有似句麗。〔〕其葬作大木槨,長十餘丈,開一頭作戶。

其土地肥美,背山向海,宜五穀,善田種。人性質直彊勇,少牛馬,便持矛步戰。

才使覆形,皮肉盡,乃取骨置槨中。

舉家皆共一槨,刻木如生形,隨死者爲數。

新死者皆假埋之,

食飲

叉有瓦鑑,

置米其中,編縣之於槨戶邊。

魏略 Ë 其嫁娶之法,女年十歲,已相設許。 壻家迎之,長養以爲婦。 至成人,更還女家。 女家責錢,錢畢,乃復

還壻。

船,隨波出在海岸邊,有一人項中復有面,生得之,與語不相通,不食而死。 中,純女無男。 叉說得一布衣,從海中浮出,其身如中(國)人衣,其兩袖長三丈。 吹數十日,東得一島,上有人,言語不相曉,其俗常以七月取童女沈海。 叉言有一國亦在海 乘船寇鈔,北沃沮畏之,夏月恆在山巖深穴中爲守備,冬月冰凍,船道不通,乃下居村落。 宮奔北沃沮。 王頎別遣追討宮,盡其東界。 毌丘儉討句麗,句麗王宮奔沃沮,遂進師擊之。沃沮邑落皆破之,斬獲首虜三千餘級, 北沃沮一名置溝婁,去南沃沮八百餘里,其俗南北皆同,與挹婁接。 問其耆老「海東復有人不」。。耆老言國人嘗乘船捕魚,遭風見 其域皆在沃沮 叉得 挹婁喜 二破

有大人。處山林之間,常穴居,大家深九梯,以多爲好。 人形似失餘,言語不與夫餘、句麗同。 挹婁在夫餘東北千餘里,濱大海,南與北沃沮接,未知其北所極。 有五穀、牛、馬、麻布。 土氣寒, 劇於夫餘。 其俗好養豬, 人多勇力,無大君長,邑落各 其土地多山險。 其

魏

類皆用俎豆,唯挹婁不,法俗最無綱紀也。

其渠帥爲侯,今不耐濊皆其種也。漢末更屬句麗。其俗重山川,山川各有部分,不得妄相 之。漢武帝伐滅朝鮮,分其地爲四郡。自是之後,胡、漢稍別。無大君長,自漢已來,其官 請《句麗》〔匄〕。言語法俗大抵與句麗同,衣服有異。男女衣皆著曲領,男子繫銀花廣數寸 有侯邑君、三老,統主下戶。其耆老舊自謂與句麗同種。其人性愿慤,少嗜欲,有廉恥,不 號稱王。陳勝等起,天下叛秦,燕、齊、趙民避地朝鮮數萬口。燕人衞滿,魋結夷服,復來王 旣適朝鮮,作八條之敎以敎之,無門戶之閉而民不爲盜。其後四十餘世,朝鮮侯(淮)〔準〕僭 自單單大山領以西屬樂浪,自領以東七縣,都尉主之,皆以濊爲民。後省都尉,封

宿,豫知年歲豐約。不以珠玉爲寶。常用十月節祭天,晝夜飲酒歌舞,名之爲舞天,又祭虎 涉入。同姓不婚。多忌諱,疾病死亡輒捐棄舊宅,更作新居。有麻布,蠶桑作縣。 三丈,或數人共持之,能步戰。樂浪檀弓出其地。 其海出班魚皮,土地饒文豹,又出果下 以爲神。其邑落相侵犯,輒相罰責生日牛馬,名之爲責禍。殺人者償死。少寇盜。作矛長 曉候星

(一)臣松之按"果下馬高三尺,乘之可于果樹下行,故謂之果下。見博物志、魏都賦。

馬,漢桓時獻之。[1]

調,供給役使,遇之如民。 其八年,詣闕朝貢,詔更拜不耐濊王。居處雜在民間,四時詣郡朝謁。 正始六年,樂浪太守劉茂、帶方太守弓邍以領東濊屬句麗,興師伐之,不耐侯等舉邑 。二郡有軍征賦

怒藍國、月支國、咨離牟盧國、素謂乾國、古爰國、莫盧國、卑靡國、占離卑國、臣釁國、支侵 帥,大者自名爲臣智,其次爲邑借,散在山海間,無城郭。有爰襄國、牟水國、桑外國、小石 索國、大石索國、優休牟涿國、臣濱沽國、伯濟國、速盧不斯國、日華國、古誕者國、古離國 三日弁韓。辰韓者,古之辰國也。馬韓在西。其民土著,種植,知蠶桑,作綿布。各有長 韓在帶方之南,東西以海爲限,南與倭接,方可四千里。有三種,一日馬韓,二日辰韓,

狗奚國、不雲國、不斯濆邪國、爰池國、乾馬國、楚離國, 國、臣蘇塗國 奚國、萬盧國 、莫盧國、古臘國、臨素半國、臣雲新國、如來卑離國 一、辟卑離國、日斯烏旦國 ` 離國、不彌國、支半國 凡五十餘國。 、狗素國 、楚山塗卑離國 捷盧國、 牟盧卑離 難國

千家, 總十餘萬戶。 辰王治月支國。 臣智或加優呼臣雲遣支報安邪踧支濱臣離兒不例拘 大國萬餘家, 小國數

其官有魏率善、邑君、歸義侯、中郎將、都尉、伯長。

邪秦支廉之號。

王。(三)其後絕滅,今韓人猶有奉其祭祀者。 侯準旣僭號稱王,爲燕亡人衞滿所攻奪,<

○將其左右宮人走入海, 漢時屬樂浪郡,四時朝謁。 居韓地 自號韓

- 1〕魏略曰:昔箕子之後朝鮮侯,見周衰,燕自尊為王,欲東略地,朝鮮侯亦自稱爲王,欲興兵逆擊縣以尊周室。 其子準立。二十餘年而陳、項起,天下亂,燕、齊、趙民愁苦,稍稍亡往準,準乃置之於西方。及漢以盧綰爲燕王 亡命爲朝鮮藩屏。 爲界,朝鮮遂弱。及秦幷天下,使蒙恬築長城,到遼東。時朝鮮王否立,畏秦襲之, 兵十道至,求入宿衞,遂還攻準。 朝鮮與燕界於冱水。 夫|禮 諫之,乃止。 使禮西說燕,燕止之,不攻。後子孫稍驕虐,燕乃遣將秦開攻其西方,取地二千餘里,至 準信寵之,拜爲博士,賜以圭,封之百里,令守西邊。 及縮反,入匈奴,燕人衞滿亡命,爲胡服,東度浿水,詣準降, 準與滿戰,不敵 也 滿誘亡黨,衆稍多,乃詐遣人告準, 說準求居西界,(故)[收]中國 略服屬秦,不肯朝會。 一滿番汗 否死, 言漢
- (三)魏略曰:其子及親留在國者,因冒姓韓氏。 準王海中,不與朝鮮相往來。

魏略曰:初,右渠未破時,朝鮮相歷谿卿以諫右渠不用,東之辰國,時民隨出居者二千餘戶,亦與朝鮮貢蕃不相往 譯,從一來大船入辰韓,逆取戶來。降伴輩尙得千人,其五百人已死。懶時曉謂辰韓:「汝還五百人。若不者, 人,其語非韓人。問之,男子曰:「我等漢人,名戶來,我等輩千五百人伐材木,為韓所擊得,皆斷髮爲奴,積三年 矣。」 鑽曰:「我當降漢樂浪,汝欲去不?」戶來曰:「可。」 (長) 鑽因將戶來(來) 出詣含資縣,縣言郡,郡卽以鰡爲 收取直還。郡表觸功義,賜冠幘、田宅,子孫數世,至安帝延光四年時,故受復除。 樂浪當遣萬兵乘船來擊汝。」辰韓曰:「五百人已死,我當出贖直耳。」乃出辰韓萬五千人,弁韓布萬五千匹,懶 來。至王莽地皇時,廉斯蠮爲辰韓右渠帥,聞樂浪土地美,人民饒樂,亡欲來降。出其邑落,見田中驅雀男子一

時太守弓遵、樂浪太守劉茂興兵伐之,遵戰死,二郡遂滅韓。 **次**與邑長。其俗好衣幘,下戶詣郡朝謁,皆假衣幘,自服印綬衣幘千有餘人。部從事吳林 以樂浪本統韓國,分割辰韓八國以與樂浪,吏譯轉有異同,臣智激韓忿,攻帶方郡崎離營。 初中,明帝密遣帶方太守劉昕、樂浪太守鮮于嗣越海定二郡,諸韓國臣智加賜邑君印綬,其 地爲帶方郡,遣公孫模、張敞等收集遺民,興兵伐韓濊,舊民稍出,是後倭韓遂屬帶方。 桓、靈之末,韓濊彊盛,郡縣不能制,民多流入韓國。建安中,公孫康分屯有縣以南荒

於送死。以瓔珠爲財寶,或以綴衣爲飾,或以縣頸垂耳,不以金銀錦繡爲珍。其人性彊勇, 室,形如冢,其戶在上,舉家共在中,無長幼男女之別。其葬有槨無棺,不知乘牛馬,牛馬盡 其俗少綱紀,國邑雖有主帥,邑落雜居,不能善相制御。無跪拜之禮。居處作草屋土

常以五月下種訖,祭鬼神,羣聚歌舞,飮酒晝夜無休。其舞,數十人俱起相隨,踏地低昂, 皆鑿脊皮,以大繩貫之,又以丈許木鍤之,通日嚾呼作力,不以爲痛,旣以勸作,且以爲健。 處直如囚徒奴婢相聚。無他珍寶。禽獸草木略與中國同。出大栗,大如梨。叉出細尾雞 之,好作賊。其立蘇塗之義,有似浮屠,而所行善惡有異。其北方近郡諸國差曉禮俗,其遠 之天君。又諸國各有別邑,名之爲蘇塗。立大木,縣鈴鼓,事鬼神。諸亡逃至其中,皆不還 手足相應,節奏有似鐸舞。十月農功畢,亦復如之。信鬼神,國邑各立一人主祭天神,名 魁頭露紒,如炅兵,衣布袍,足履革蹻蹋。其國中有所爲及官家使築城郭,諸年少勇健者, 語不與韓同,皆髠頭如鮮卑,但衣韋,好養牛及豬。其衣有上無下,略如裸勢。乘船往來, 其尾皆長五尺餘。其男子時時有文身。又有州胡在馬韓之西海中大島上,其人差短小,言

今有名之爲秦韓者。 始有六國,稍分爲十二國。 秦人,非但燕、齊之名物也。名樂浪人爲阿殘;東方人名我爲阿,謂樂浪人本其殘餘人。 有城柵。 辰韓在馬韓之東,其耆老傳世,自言古之亡人避秦役來適韓國,馬韓割其東界地與之。 其言語不與馬韓同,名國爲邦,弓爲弧,賊爲寇,行酒爲行觴。相呼皆爲徒,有似

弁辰亦十二國,又有諸小別邑,各有渠帥,大者名臣智,其次有險側,次有樊濊,次有殺

魏 烏丸鮮卑東夷傳第三十 細布。

法俗特嚴峻。

弁辰安邪國(馬延國)、弁辰瀆盧國、斯盧國、優由國。弁、辰韓合二十四國,大國四五千家,小 弁辰古資彌凍國、弁辰古淳是國、冉奚國、弁辰半路國、弁〔辰〕樂奴國、軍關國(弁軍彌國)、弁 其頭,欲其編。今辰韓人皆編頭。 以大鳥羽送死,其意欲使死者飛揚。〔三國出鐵,韓、濊、倭皆從取之。 國六七百家,總四五萬戶。其十二國屬辰王。 相逢,皆住讓路。 國用錢,又以供給二郡。 自立爲王。〔1〕土地肥美,宜種五穀及稻,曉蠶桑,作縑布,乘駕牛馬。 辰彌烏邪馬國、如湛國、弁辰甘路國、戶路國、州鮮國(馬延國)、弁辰狗邪國、弁辰走漕馬國、 奚,次有邑借。 有已柢國、不斯國、弁辰彌離彌凍國、弁辰接塗國、勤耆國、難彌離彌凍國 俗喜歌舞飲酒。有瑟,其形似筑,彈之亦有音曲。 男女近倭,亦文身。便步戰,兵仗與馬韓同。其俗,行者 辰王常用馬韓人作之,世世相繼。 嫁娶禮俗,男女有別。 諸市買皆用鐵,如中 兒生,便以石厭 辰王不得

- 〔1〕魏略曰:明其爲流移之人,故爲馬韓所制。
- (三)魏略曰:其國作屋,橫累木爲之,有似牢獄也

竈皆在戶西。 弁辰與辰韓雜居,亦有城郭。 其瀆盧國與倭接界。十二國亦有王,其人形皆大。 衣服居處與辰韓同。 言語法俗相似, 衣服絜清,長髮。亦作廣 **祠祭鬼神有異,施**

倭人在帶方東南大海之中,依山島爲國邑。舊百餘國,漢時有朝見者,今使譯所通三

十國。 餘旁國遠絕,不可得詳。次有斯馬國,次有已百支國,次有伊邪國,次有都支國,次有彌奴 馬升,次日彌馬獲支,次日奴佳鞮,可七萬餘戶。自女王國以北,其戶數道里可得略載,其 利,可五萬餘戶。南至邪馬壹國,女王之所都,水行十日,陸行一月。官有伊支馬,次曰彌 里,官日多模,副日卑奴母離,有千餘家。南至投馬國,水行二十日,官日彌彌,副日彌彌那 里,到伊都國,官日爾支,副曰泄謨觚、柄渠觚。 有千餘戶, 世有王,皆統屬女王國,郡使往 戶,濱山海居,草木茂盛,行不見前人。好捕魚鰒,水無深淺,皆沈沒取之。 千餘里,名曰瀚海,至一大國,官亦曰卑狗,副曰卑奴母離。方可三百里,多竹木叢林,有 險,多深林,道路如禽鹿徑。有千餘戶,無良田,食海物自活,乘船南北市糴。又南渡一 海,千餘里至對馬國。其大官曰卑狗,副曰卑奴母離。所居絕島,方可四百餘里,土地山 三千許家,差有田地,耕田猶不足食,亦南北市糴。又渡一海,千餘里至末盧國,有四千餘 從郡至倭,循海岸水行,歷韓國,乍南乍東,到其北岸狗邪韓國,七千餘里,始度一 東南至奴國百里,官曰兕馬觚,副曰卑奴母離,有二萬餘戶。東行至不彌國百 東南陸行五百 海

國,次有好古都國,次有不呼國,次有姐奴國,次有對蘇國,次有蘇奴國,次有呼邑國,次有

華奴蘇奴國,次有鬼國,次有爲吾國,次有鬼奴國,次有邪馬國,次有躬臣國,次有巴利國,

狗古智卑狗,不屬女王。自郡至女王國萬二千餘里。

單被,穿其中央,貫頭衣之。種禾稻、紵麻,蠶桑、緝績,出細紵、縑縣。 其地無牛馬虎豹羊 諸國文身各異,或左或右,或大或小,尊卑有差。計其道里,當在會稽、東治之東。其風俗 **曆,斷髮文身以避蛟龍之害。今倭水人好沈沒捕魚蛤,文身亦以厭大魚水禽,後稍以爲飾。** 柟、杼、豫樟、楺櫪、投橿、烏號、楓香, 其竹篠簳、桃支。 他人就歌舞飮酒。已葬,舉家詣水中澡浴,以如練沐。其行來渡海詣中國,恆使一人,不梳 食飲用籩豆,手食。其死,有棺無槨,封土作冢。始死停喪十餘日,當時不食肉,喪主哭泣, 溫暖,冬夏食生菜,皆徒跣。有屋室,父母兄弟臥息異處,以朱丹塗其身體,如中國用粉也。 鵲。兵用矛、楯、木弓。木弓短下長上,竹箭或鐵鏃或骨鏃,所有無與儋耳、朱崖同。倭地 不淫,男子皆露紒,以木緜招頭。 其衣橫幅,但結束相連,略無縫。 婦人被髮屈紒,作衣如 頭,不去蟣蝨,衣服垢汚,不食肉,不近婦人,如喪人,名之爲持衰。 若行者吉善,共顧其生 口財物;若有疾病,遭暴害,便欲殺之,謂其持衰不謹。出眞珠、靑玉。其山有丹,其木有 男子無大小皆黥面文身。自古以來,其使詣中國,皆自稱大夫。夏后少康之子封於會 有薑、橘、椒、蘘荷,不知以爲滋味。

魏書

諸韓國,及郡使倭國,皆臨津搜露,傳送文書賜遺之物詣女王,不得差錯。 下戶與大人相逢 序,足相臣服。 不妒忌。不盜竊,少諍訟。其犯法,輕者沒其妻子,重者滅其門戶。及宗族尊卑,各有差 拜。其人壽考,或百年,或八九十年。 法,視火坼占兆。 其會同坐起,父子男女無別,人性嗜酒。〔〕見大人所敬,但搏手以當跪 道路,逡巡入草。 一大率,檢察諸國,諸國畏憚之。常治伊都國,於國中有如刺史。王遣使詣京都、帶方郡 獺猴、黑雉。其俗舉事行來,有所云爲,輒灼骨而卜,以占吉凶,先告所卜,其辭如令龜 收租賦。有邸閣國,國有市,交易有無,使大倭監之。 傳辭說事,或蹲或跪,兩手據地,爲之恭敬。 其俗,國大人皆四五婦,下戶或二三婦。婦人不淫, 對應聲日噫,比如然諾 自女王國以北,特置

(一)魏略曰:其俗不知正歲四節,但計春耕秋收爲年紀。

彌呼,事鬼道,能惑衆,年已長大,無夫壻,有男弟佐治國。 自爲王以來,少有見者。 以婢千 人自侍,唯有男子一人給飮食,傳辭出入。居處宮室樓觀,城柵嚴設,常有人持兵守衞。 其國本亦以男子爲王,住七八十年,倭國亂,相攻伐歷年,乃共立一女子爲王,名曰卑

餘里。 女王國東渡海千餘里,復有國,皆倭種。 又有裸國、黑齒國復在其東南,船行一年可至。 又有侏儒國在其南,人長三四尺,去女王四千 參問倭地,絕在海中洲島之上,或絕

或連、周旋可五千餘里。

魏 書 烏丸鮮卑東夷傳第三十

繌 栗 罽 米、牛利 罽五 善中郞將,牛利爲率善校尉,假銀印青綬,引見勞賜遣還。 守假授汝。 升米、次使都市牛利奉汝所獻男生口四人,女生口六人、班布二匹二丈,以到。汝所在踰 遠,乃遣使 其年十二月,詔書報倭女王曰:「制詔親魏倭王卑礪呼:帶方太守劉夏遣使送汝大夫難 景初二年六月,倭女王遣大夫難升米等詣郡,求詣天子朝獻,太守劉夏遣吏將送詣京 一張 還到 白絹 貢獻,是汝之忠孝,我甚哀汝。 、
構
経
五 其綏撫種人,勉爲孝順。 一。錄受。 五十匹、金八兩、五尺刀二口、銅鏡百枚、眞珠、鉛丹各五: 悉可以示汝國中人,使知國家哀汝,故鄭重賜汝好物也。 十匹、紺青五十匹,答汝所獻貢直。 汝來使難升米、牛利涉遠,道路勤勞,今以難升米爲率 今以汝爲親魏倭王,假金印紫綬,裝封付帶方太 叉特賜汝紺地句文錦三匹、細 今以絳地交龍錦五匹、臼絳地 十斤, 皆裝封付難升 班華

松之以為 地應爲綈,漢文帝著皂衣謂之弋綈是也。 此字不體,非魏朝之失,則傳寫者誤也

印綬。 帛 狗奴國男王卑彌弓呼素不和,遣倭載斯、烏越等詣郡說相攻擊狀。 、錦罽、刀、鏡、 IE 始 其六年, 元 年, 生口 詔賜倭難升米黃幢, 太守弓遵遣建中校尉梯儁等奉詔書印綬詣倭國, 1、倭錦 采物,倭王因使上表答謝恩詔。 、絳青縑、縣衣、帛布、丹木、猾、短弓矢。 付郡假授。 其八年, 其四 年,倭王復遣使大夫伊聲耆、掖邪狗 太守王頎到官。 掖邪狗等壹拜率善中 拜假倭王,并齎詔賜金、 遣塞曹掾史張政等因齎 倭女王卑彌 郎將 呼與

獻上男女生口三十人,貢白珠五千,孔青大句珠二枚,異文雜錦二十匹。 詔書、黃幢,拜假難升米爲檄告喩之。。卑彌呼以死,大作冢,徑百餘步,殉葬者奴婢百餘人。 更立男王,國中不服,更相誅殺,當時殺千餘人。復立卑彌呼宗女壹與,年十三爲王,國中 政等以檄告喻壹與,壹與遣倭大夫率善中郎將掖邪狗等二十人送政等還,因詣臺,

評曰:史、漢蓍朝鮮、兩越,東京撰錄西羌。 魏世匈奴遂衰,更有烏丸、鮮卑,爰及東夷,

使譯時通,記述隨事,豈常也哉!(二)

魏略西戎傳曰:因人有王,所從來久矣。自漢開益州,置武都郡,排其種人,分竄山谷間,或在福祿,或在將、隴左 馬超 錯居故也。 畜養豕牛馬驢騾。其婦人嫁時著袵露,其緣節之制有似羌,袵露有似中國袍。 所守是也。 扶風、美陽,今之安夷、撫夷二部護軍所典是也。 相號曰盍稚,各有王侯,多受中國封拜。近去建安中,興國氐王阿貴、白項氐王千萬各有部落萬餘,至十六年,從 爲亂。 其種非一,稱槃瓠之後,或號青氏,或號白氏,或號螂氏,此蓋蟲之類而處中國,人即其服色而名之也。 其自還種落間,則自氐語。 其俗,語不與中國同,及完雜胡同,各自有姓,姓如中國之姓矣。 超破之後, 阿貴爲夏侯淵所攻滅,千萬西南入蜀,其部落不能去,皆降。 其嫁娶有似於羌,此蓋乃昔所謂西戎在于街、冀、豲道者也。 其(太)(本)守善,分留天水、南安界,今之(廣平魏郡)(廣魏郡) 其衣服尚青絳。俗能織布,善田種 皆編髪。 國家分徙其前後兩端者,置 多知中國語, 今雖都統於 由與中國 其自

建武時,匈奴衰,分去其奴婢,亡匿在金城、武威、酒泉北黑水、西河東西,畜牧逐水草,鈔盜涼州,部落稍多,有數 郡國,然故自有王侯在其虛落間。又故武都地陰平街左右,亦有萬餘落。 檀柘,死後,其枝大人南近在廣魏、令居界,有禿瑰來數反,爲凉州所殺。 今有劭提,或降來,或遁去,常爲西州道 萬,不與東部鮮卑同也。 其種非一,有大胡,有丁令,或頗有芜雜處,由本亡奴婢故也。 **貲廣,本匈奴也,匈奴名奴婢爲貲。** 當漢、魏之際, 其大人有 始

路患也。

十餘。 燉煌西域之南山中,從婼羌西至葱頜數千里,有月氏餘種葱茈羌、白馬、黃牛羌,各有酋豪,北與諸國接,不知其 到車師界戊已校尉所治高昌,轉西與中道合龜茲,爲新道。 婼羌轉西,越葱質,經縣度,入大月氏,爲南道。 道里廣狹。 且志國、小宛國、精絕國、樓蘭國皆幷屬鄯善也。 西北,過龍堆,到故樓蘭, 從建武以來,更相吞滅,于今有二十道。 傳聞黃牛羌各有種類,孕身六月生,南與白馬羌鄰。 轉西詣龜茲,至葱頜,爲中道。從玉門關西北出,經橫坑,辟三隴沙及龍堆,出五船北, 從玉門關西出,發都護井,回三隴沙北頭,經居盧倉,從沙西井轉 從燉煌玉門關入西域,前有二道,今有三道。從玉門關西出,經 |戎盧國、扞彌國、渠勒國、(穴山國) (皮山國)皆并屬于寘。 凡西域所出,有前史已具詳,今故略說。 西域諸國,漢初開其道,時有三十六,後分爲五 南道 一西行, 罽賓

魏 書 烏丸鮮卑東夷傳第三十

塞、桑門、伯聞、疏問、白疏閒、比丘、晨門,皆弟子號也。

臨兒國,浮屠經云其國王生浮屠。

蛉赤如銅。

始莫邪夢白象而孕,及生,從母左脅出,生而有結,墮地能行七步。

浮屠,太子也。 父曰屑頭邪,母云莫邪。 浮屠身服色黄,髮青如青絲,乳青毛,

此國在天竺城中。天竺又有神

浮屠所載臨

昔漢哀帝元壽元年,博士弟子景盧受大月氏王使伊存口受浮屠經曰復立者其人也。

人,名沙律。

國、大夏國、高附國、天竺國皆并屬大月氏。

浮屠所載與中國送子經相出入,蓋以爲老子西出關,過

西域之天竺,教胡。 浮屠屬弟子別號,合有二十九,不能詳載,故略之如此。

月氏、天竺擊服之。 車離國一名禮惟特,一名沛隸王,在天竺東南三千餘里,其地卑溼暑熱。 其地東西南北數千里,人民男女皆長一丈八尺,乘象、橐駝以戰,今月氏役稅之。 其王治沙奇城,有別城數十,人民怯弱,

盤越國一名漢越王,在天竺東南數千里,與益部相近,其人小與中國人等,蜀人賈似至焉。南道而西極轉東南盡

矣。

條支西行二百餘日,近日所入,今從大秦西近日所入。 以爲疆於安息,今更役屬之,號爲安息西界。前世又謬以爲弱水在條支西,今弱水在大秦西。前世又謬以爲從 |支、烏代。||烏代一名|排悔,此四國次在西,本國也,無增損。 渠沙國、西夜國、依耐國、滿犂國、億若國、楡令國、捐毒國、休脩國、琴國皆幷屬疏勒。 中道西行尉梨國、危須國、山王國皆并屬焉耆,姑墨國、溫宿國、尉頭國皆井屬龜茲也 前世謬以爲條支在大秦西,今其實在東。 。楨中國、莎車國 自是以西, 大宛、安息、條 前世又謬 、 竭石國 ·

災異,輒更立賢人以爲王,而生放其故王,王亦不敢怨。 其俗人長大平正,似中國人而|胡服。 田種五穀,畜乘有馬、騾、驢、駱駝。 餘,東西南北數千里。其王治濱側河海,以石爲城郭。其土地有松、柏、槐、梓、竹、葦、楊柳、梧桐、百草。 西,復直南行經之烏遲散城,渡一河,乘船一日乃過。周迴繞海,凡當渡大海六日乃到其國。 渡一河,乘船一日乃過。 西南又渡一河,一日乃過。 凡有大都三,卻從安谷城陸道直北行之海北,復直西行之海 或三歲。其國在海西,故俗謂之海西。 大秦國一 號犂靬,在安息、條支西大海之西,從安息界安谷城乘船,直截海西,遇風利二月到,風遲或一 桑蠶。 有河出其國,西又有大海。 俗多奇幻,口中出火,自縛自解,跳十二丸巧妙。 海四有遲散城,從國下直北至烏丹城,西南又 其國無常主,國中有 國有小城邑合四百 自云本中國 歲,無風 別

魏

道不羣則不得過。其國置小王數十,其王所治城周回百餘里,有官曹文書。王有五宮,一宮間相去十里,其王平 也,常欲通使於中國,而安息圖其利,不能得過。其俗能胡書。其制度,公私宮室爲重屋,旌旗擊鼓,白蓋小車, 也,亦用木皮或野繭絲作,織成氍毹、毾毲、罽帳之屬皆好,其色又鮮于海東諸國所作也。又常利得中國絲,解以 絺。作金銀錢,金錢一當銀錢十。有織成細布,言用水羊毳,名曰海西布。此國六畜皆出水,或云非獨用羊毛 從人持一章褻自隨,有白言者,受其辭投囊中,還宮乃省為決理。以水晶作宮柱及器物。作弓矢。其別枝封小 旦之一宮聽事,至日暮一宿,明日復至一宮,五日一周。置三十六將,每議事,一將不至則不議也。王出行,常使 郵驛亭置如中國。從安息繞海北到其國,人民相屬,十里一亭,三十里一置,終無盜賊。 但有猛虎、獅子爲害,行 那外夷比,又有水道通益州、永昌,故永昌出異物。前世但論有水道,不知有陸道,今其略如此,其民人戶數不能 合、狄提、迷迷、兜納、白附子、薰陸、鬱金、芸膠、薰草木十二種香。大秦道旣從海北陸通,又循海而南,與交趾七 發陸布、緋持渠布、火浣布、阿羅得布、巴則布、度代布、溫宿布、五色桃布、絳地金織帳、 五色斗帳、一微木、二蘇 色玉、黃白黑綠紫紅絳紺金黃縹留黃十種氍毹、五色毾氍、五色九色首下毾氈、金樓繡、雜色綾、金塗布、緋持布、 月珠、夜光珠、眞白珠、虎珀、珊瑚、赤白黑綠黃青紺縹紅紫十種流離、璆琳、琅玕、水精、玫瑰、雄黃、雌黃、碧、五 鉛、錫、神龜、白馬、朱髦、駭雞犀、瑇瑁、玄熊、赤螭、辟毒鼠、大貝、車渠、瑪瑙、南金、翠臂、羽翮、象牙、符乐玉、明 勒王臣槃獻海西青石、金帶各一。又今西域舊圖云罽賓、條支諸國出琦石,卽次玉石也。大秦多金、銀、銅、鐵、 赤,三日黄,四日白,五日黑,六日綠,七日紫,八日紅,九日紺。今伊吾山中有九色石,即其類。陽嘉三年時,陳 為胡綾,故數與安息諸國交市於海中。海水苦不可食, 故往來者希到其國中。 國,曰澤散王,曰驢分王,曰且蘭王,曰賢督王,曰汜復王,曰于羅王,其餘小王國甚多,不能一一詳之也。國出細 山出九色次玉石,一曰青,二日

備詳也。自葱領西,此國最大,置諸小王甚多,故錄其屬大者矣。

西行。 數。 有黑水,所傳聞西之極矣。 里。 蘭、汜復、斯賓阿蠻北有一山,東西行。大秦、海西東各有一山,皆南北行。賢督王屬大秦,其治東北去汜復六百 復國六百里。 澤散王屬大秦,其治在海中央,北至驢分,水行半歲,風疾時一月到,最與安息安谷城相近,西南詣大秦都不知里 赤水,赤水西有白玉山,白玉山有西王母,西王母西有脩流沙,流沙西有大夏國、堅沙國、屬繇國、月氏國,四 河,斯羅東北叉渡河。 汜復王屬大秦,其治東北去于羅三百四十里渡海也。 驢分王屬大秦,其治去大秦都二千里。從驢分城西之大秦渡海,飛橋長二百三十里,渡海道西南行,繞海直 且蘭王屬大秦。 南道會汜復,乃西南之賢督國。 斯羅國屬安息, 從思陶國直南渡河,乃直西行之且蘭三千里。道出河南,乃西行,從且蘭復直西行之氾 與大秦接也。 且蘭、汜復直南,乃有積石,積石南乃有大海,出珊瑚,眞珠。且 大秦西有海水,海水西有河水,河水西南北行有大山,西有 于羅屬大秦,其治在汜復東北,渡河,從于羅東北 |國西 又渡

澤,故時羈屬康居,今不屬也。 國,又有巖國,又有奄蔡國一名阿蘭,皆與康居同俗。 王 北新道西行,至東且彌國、西且彌國、單桓國、畢陸國、蒲陸國、烏貪國,皆井屬車師後部王。王治于賴城,魏賜其 壹多雜守魏侍中,號大都尉,受魏王印。 轉西北則烏孫、康居, 西與大秦東南與康居接。 本國無增損也。 其國多名貂,畜牧逐水草, 北烏伊別國在康居北,又有柳 臨大

央, 呼得國在葱嶺北,烏孫西北,康居東北,勝兵萬餘人,隨畜牧,出好馬,有貂。 牧,亦多貂,有好馬。 俱去匈奴單于庭安習水七千里,南去車師六國五千里,西南去康居界三千里,西去康居王治八千里。或以 丁令國在康居北,勝兵六萬人,隨畜牧,出名鼠皮,白昆子、青昆子皮。此上三國,堅昆中 堅昆國在康居西北,勝兵三萬人,隨

從膝以上身頭,人也,膝以下生毛,馬脛馬蹄,不騎馬而走疾馬,其爲人勇健敢戰也。 國,有新梨國,明北海之南自復有丁令,非此烏孫之西丁令也。烏孫長老言北丁令有馬脛國,其人音聲似雁鶩, 爲此丁令即匈奴北丁令也,而北丁令在烏孫西,似其種別也。又匈奴北有渾窳國,有屈射國,有丁令國,有隔昆 短人國在康居西北,男女皆

長三尺,人衆甚多,去奄蘇諸國甚遠。康居長老傳聞常有商度此國,去康居可萬餘里。

祖之年,無緣託景風以迅游,載騕褭以遐觀,但勞眺乎三辰,而飛思乎八荒耳。 今氾覽外夷大秦諸國,猶尙曠若發蒙矣,況夫鄒衍之所推出,大易、太玄之所測度乎!徒限處牛蹄之涔,又無彭 魚緣議曰:俗以爲營廷之魚不知江海之大,浮游之物不知四時之氣,是何也?以其所在者小與其生之短也。余

